


নেমেসিস



মোহাম্মদ নাজিম উদ্দিন



মোহাম্মদ নাজিম উদ্দিন-এর জন্ম
ঢাকায়।

ঢাকা বিশ্ববিদ্যালয়ের চারুকলা
ইন্সটিটিউটে এক বছর পড়াশোনা
করলেও পরবর্তীতে ঢাকা
বিশ্ববিদ্যালয়ের গণযোগাযোগ ও
সাংবাদিকতা বিভাগ থেকে
মাস্টার্স সম্পন্ন করেন।

সাঁড়া জাগানো উপন্যাস দ্য দা
ভিক্সি কোড, গডফাদার, বর্ন
আইডেন্টিটি, দ্য ডে অব দি
জ্যাকেল, দ্য সাইলেন্স অব দি
ল্যাঞ্চস, রেড ড্রাগন, ডিসেপশন
পয়েন্ট, আইকন, মোনালিসা,
পেপিকান বৃফ, এ্যাবসলিউট
পাওয়ার, ওডেসা ফাইল, ডগস
অব ওয়ার, অ্যাভেঞ্জার, দান্তে
ক্লাব, দ্য কনফেসর এবং স্লামডগ
মিলিয়নেয়ারসহ বেশ কয়েকটি
উল্লেখযোগ্য গ্রন্থ অনুবাদ
করেছেন।

পরবর্তী ফ্ল্যাপে দেখুন

প্রস্থানের পথ নেই নামের মুক্তিযুদ্ধের উপর একটি নাটকও লিখেছেন, যাতে অভিনয় করেছেন তৌকির আহমেদ, পীয়ুষ বন্দোপধ্যায়সহ আরো অনেকে। এছাড়াও মানিক বন্দোপধ্যায়-এর পুতুল নাচের ইতি কথার নাট্যরূপ দিয়েছেন তিনি।

অনুবাদের পাশাপাশি মৌলিক খুলার নেমেসিস প্রকাশিত হয়েছে।

তার পরবর্তী খুলার উপন্যাস মেডুসা কানেকশান এবং ম্যাজিশিয়ান শীঘ্রই প্রকাশ হতে যাচ্ছে।

E-mail : naazims2006@yahoo.com

প্রচ্ছদ ও অলঙ্করণ : সিরাজুল ইসলাম নিউটন

মোহাম্মদ নাজিম উদ্দিন-এর

নেমোসিস



বাতিঘর প্রকাশনী

নেমেসিস

মোহাম্মদ নাজিম উদ্দিন

NEMESIS

copyright©2010 by Mohammad Nazim Uddin

স্বত্ব © লেখক

তৃতীয় সংস্করণ : ডিসেম্বর ২০১২

দ্বিতীয় সংস্করণ মার্চ ২০১০

প্রথম প্রকাশ ফেব্রুয়ারি বইমেলা ২০১০

প্রচ্ছদ ও অলঙ্করণ নিউটন


বাতিঘর প্রকাশনী, ৩৭/১, বাংলাবাজার (বর্ণমালা মার্কেট তৃতীয় তলা), ঢাকা-
১১০০ থেকে মোহাম্মদ নাজিম উদ্দিন কর্তৃক প্রকাশিত; মুদ্রণ একুশে প্রিন্টার্স,
১৮/২৩, গোপাল সাহা লেন, শিংটোলা, সূত্রাপুর ঢাকা-১১০০; গ্রাফিক্স: ডট
প্রিন্ট, ৩৭/১, বাংলাবাজার, ঢাকা-১১০০; কম্পোজ : লেখক

মূল্য : দুইশত টাকা মাত্র

উ।ৎ।স।র্গ

যাকে আমি পাই নি
যাকে আমি পেয়েছি

আমার বাবা মরহুম মোহাম্মদ বদরুদ্দিন
এবং
আমার বড় চাচা মরহুম মোহাম্মদ আলাউদ্দিন



অধ্যায় ১

অন্ধকার ঘরের চারপাশটা তার কাছে একটু একটু ক'রে উদ্ভাসিত হতে লাগলো। ঠিক কতোক্ষণ আগে ঘুমিয়ে পড়েছিলেন বুঝতে পারছেন না। আজকাল গাঢ় ঘুম হয় না বললেই চলে। শরীর যখন সচল ছিলো কোনোরকম প্রচেষ্টা ছাড়াই ঘুমিয়ে পড়তেন। আজ তিনি গাছের মতোই অচল; ছবির মতো স্থির; কিন্তু ঘুম তার কাছে দুর্লভ হয়ে গেছে। স্লিপিং পিল ছাড়া ঘুম আসে না। কয়েক ঘণ্টা আগে হাউজ-নার্স ঘুমের বড়ি খাইয়ে দিয়ে গেলে একটা ঘোর ঘোর ভাব এসে ভর করেছিলো দু'চোখের পাতায়।

পাশের ঘর থেকে পরিচিত একটা শব্দ শোনা যাচ্ছে। এই শব্দটিই তার স্বপ্নদৈর্ঘ্যের ঘুমে ব্যাঘাত ঘটিয়েছে। খুব ক্ষীণ হলেও কানে বেশ পীড়া দিচ্ছে সেটা। ইদানিং তার ইন্দ্রিয়গুলো আগের চেয়ে অনেক বেশি প্রখর হয়ে উঠেছে। নিঃশব্দের মধ্যেও অনেক শব্দ শুনতে পান। এমন অনেক কিছু বুঝতে পারেন যা ব্যাখ্যা করা সম্ভব নয়। চারপাশের অনেক কিছুই তার কাছে এখন নতুন মাত্রায় উপস্থিত হয়। কোনো ঘটনা ঘটান আগেই তিনি টের পেয়ে যান। ঠিক এরকম একটি অনুভূতি এখন তার হচ্ছে।

অবশ্য কখনও কখনও তার মনে হয় তিনি আসলে সন্দেহবাতিকতায় ভুগছেন। সিজোফ্রেনিয়ায় আক্রান্ত হয়েছেন বৃষ্টি, কিংবা পুরোটাই তার বিভ্রান্তি। হেলুসিনেশন? তিনি কোনো উপসংহারে আসতে পারেন না।

নারী কণ্ঠটা খুবই পরিচিত। পুরুষ কণ্ঠটা চেনার চেষ্টা করলেন। তাদের উচ্ছ্বাসের প্রকাশ তাকে ঈর্ষাকাতর ক'রে তুললো, কিন্তু অনেক দিন পরে, তিনি বেশ অবাধ হয়েই টের পেলেন, উত্থান ঘটেছে। এরকম নিশ্চল-নিখর দেহে এতো তীব্র আর অস্বাভাবিক উত্থান ঘটলো ব'লে তিনি বিস্মিতই হলেন। মানুষ খুবই বিচিত্র। মস্তিষ্কের চেয়ে তার শরীর কোনো অংশে কম বিচিত্র নয়। বিগত এক বছরের এই প্রথম এরকমটি হলো। সেটাও কিনা এরকম অদ্ভুত এক পরিস্থিতিতে!

নারী কণ্ঠটা এখন বেশ তুঙ্গে উঠে গেছে। পুরুষটি অনেক বেশি সচেতন আর সতর্ক; নিজের সমস্ত আবেগ দমিয়ে রেখেছে সে। *চোরেরা একটু বেশিই সতর্ক থাকে*, কথাটা যেনো তার আড়ষ্ট ঠোঁটের ফাঁক দিয়ে প্রায় উচ্চারিত হয়েই যাচ্ছিলো।

একটু পর আর কোনো সাড়া শব্দ নেই। হয়ে গেছে। তিনি ভাবতে লাগলেন তারা এখন কী করছে। এরকম সময় তিনি কি করতেন? একটা সিগারেট ধরাতেন। নয়তো একেবারে চুপ মেরে পড়ে থাকতেন বিছানায়। আর গোলনূর? সঙ্গে সঙ্গে আরো অসংখ্য মুখ তার মনের পর্দায় ভেসে উঠলো। ইচ্ছে করেও তিনি সেইসব মুখ কোনোভাবেই সরাতে পারলেন না। একেকটা মুখ একেকটা দৃশ্যের অবতারণা করছে।

আফিয়া, মিতুল, শর্বরী, রিমি, মেরি, ইরা...! মাথাটা ঝাঁকিয়ে এইসব নাম আর দৃশ্যগুলো বিদায় করতে চাইলেন, কিন্তু সেই সাধ্য তার নেই। এখন আর তিনি ইচ্ছেমতো নিজের অঙ্গপ্রত্যঙ্গ নাড়তে পারেন না। আজকাল তার কাছে সবচাইতে ভয়ংকর মুহূর্ত হলো এটিই। স্মৃতির উপরে মানুষের নিয়ন্ত্রণ যে কতো কম সেটা এখন এই অবস্থায় না এলে হয়তো কখনই বুঝতেই পারতেন না।

আজকাল শৈশবের কথা খুব মনে করতে চান, কিন্তু সেই স্মৃতি এতোটাই ঝাঁপসা হয়ে গেছে যে, সেটা আরো বেশি পীড়াদায়ক ঠেকে তার কাছে। অথচ কোনোরকম প্রচেষ্টা ছাড়াই তিক্ত আর নষ্ট স্মৃতিগুলো অযাচিতভাবে এসে পড়ে।

আরেকটা শব্দে তার চিন্তায় ছেদ ঘটালো—টয়লেট ফ্লাশ করার শব্দ—কে করছে?

পুরুষ আর নারী কণ্ঠের মৃদু ফিস্ফিসানি শোনা যাচ্ছে এখন। তারা কথা বলছে। এসবের পরে কথা বলার কোনো মানে হয় না। তিনি নিজে এরকম মুহূর্তে কোনো কথা বলতেন না। পর পর কয়েকটা সিগারেট শেষ ক'রে ঘুমিয়ে পড়তেন অথবা নতুন কোনো আইডিয়া মাথায় চলে এলে লিখতে ব'সে যেতেন।

নারী-পুরুষের ফিস্ফিসানিটা এখনও চলছে। চাপা কণ্ঠে কী নিয়ে যেনো কথা বলছে তারা। আস্তে আস্তে তার হাতের পশম কাটা দিয়ে উঠলো। শরীরে এক ধরণের অনুভূতি বয়ে যাচ্ছে। আজকাল এই ব্যাপারটা নিয়ে ভেতরে ভেতরে বেশ ভয়ে থাকেন। প্রায়ই মনে হয় তার চারপাশের মানুষজন তাকে মেরে ফেলার ষড়যন্ত্র করছে। তার এই সন্দেহটা কি সম্পূর্ণ অমূলক?

খ্যাচ্ ক'রে একটা শব্দ হলে তার ইন্দ্রিয় আবারো সজাগ হয়ে উঠলো। এই ঘরের জমিনটা যেনো তার নিজের শরীর। কেউ এখানে পদার্পণ করলে তিনি টের পেয়ে যান। এখনও তার সেরকম অনুভূতি হচ্ছে। অন্য যে কেউ হলে এই সামান্য শব্দ নিয়ে মাথা ঘামাতো না—একটা বেড়াল কিংবা বাতাসের ঝাপটা। অথবা সবটাই তার বিভ্রান্তি। হেলুসিনেশন? তার সবচাইতে প্রিয় শব্দ। এই শব্দটাকে তিনিই জনপ্রিয় করেছেন।

মানুষের নিঃশ্বাসের শব্দ শোনা যাচ্ছে এখন। খুবই মৃদু। একেবারে কাছ থেকে! তিনি ঘাড় ঘুরিয়ে দেখার চেষ্টা করলেন না। এটা তার পক্ষে সম্ভবও নয়। পুরো শরীরের মধ্যে ডান হাতটাই সচল আছে, বাম হাতটা খেরাপি করার পর

এখন সামান্য নড়াচড়া করতে পারেন। অনেকের কাছে এটি অলৌকিক একটি ব্যাপার। এর ফলে তার লেখালেখিতে কোনো ছেদ পড়ে নি, বরং আগের যেকোনো সময়ের চেয়ে তার লেখার পরিমাণ বেড়ে গেছে। আগে হাতে লিখলেও এখন ল্যাপটপে লেখেন। হাতে লিখতে গেলে বেশিক্ষণ লিখতে পারেন না। সারা দিনই এখন লেখেন।

ঘরে কোনো বাতি জ্বলছে না। আজ পূর্ণিমা। দক্ষিণের বেলকনির স্লাইডিং ডোরটা খোলা থাকায় বাইরে থেকে জ্যোৎস্না এসে ঘরে ঢুকেছে। এরকম জ্যোৎস্না সব সময়ই তার ভালো লাগে, কিন্তু আজকে তার কাছে এটা অসহ্য লাগছে।

হঠাৎ জ্যোৎস্নার সেই মৃদু আলোতে একটা আবছায়া মূর্তি তার সামনে এসে দাঁড়ালো। কালো পোশাক পরার কারণে স্পষ্ট বোঝা যাচ্ছে না। মুখটা দেখার জন্যে চোখ কুচকালেন তিনি কিন্তু চশমা ছাড়া যে এই স্বল্প আলোতে কিছু দেখবেন না সেটা বুঝে ফেললেন সঙ্গে সঙ্গে।

সব মেনে নিয়েছেন এরকম একটি ভঙ্গী ক'রে নিশ্চেষ্ট হয়ে গেলেন। দীর্ঘ দিন এরকম মুহূর্তের জন্যে অপেক্ষা করেছেন—চূড়ান্ত পরিণতির সময় একেবারে স্বাভাবিক আর স্থির থাকবেন। মৃত্যু নিশ্চিত জেনেও বেঁচে থাকার জন্যে কোনোরকম পাগলামী করবেন না। অন্তিম মুহূর্তটি প্রজ্ঞা আর বিচক্ষণতার সাথে গ্রহণ করবেন।

“কে?” অলৌকিকভাবে কথাটা উচ্চারণ করলেন। দীর্ঘ সময় অব্যবহৃত থাকার ফলে কণ্ঠটা ফ্যাস্ফ্যাসে শোনালো। বিস্ময়করভাবেই তার সামনে দাঁড়িয়ে থাকা লোকটি চমকালো না বলে তিনি অবাকই হলেন।

দ্বিতীয়বার কিছু বলার চেষ্টা করলেন কিন্তু গলা দিয়ে কোনো শব্দ বের হলো না। লোকটা ঠায় দাঁড়িয়ে কী যেনো ভাবছে।

এক সেকেন্ড। দুই সেকেন্ড। তিন সেকেন্ড...

একেবারেই নড়ছে না।

তিনিও অপেক্ষা করতে লাগলেন।

এবার আশ্বে ক'রে কাছে এসে লেখকের মুখ চেপে ধরলো লোকটা। লেখকের ডান হাত লোকটার কজি ধরে ফেললো সঙ্গে সঙ্গে, অনেকটা স্বতঃস্ফূর্তভাবেই, কিন্তু লেখকের শক্তিহীনতার জন্যে তাতে কোনো প্রতিরোধ তৈরি হলো না।

আরেকটা হাত দিয়ে অজ্ঞাত লোকটা সজোরে লেখকের বুকের বাম দিকে, ঠিক যেখানটায় বছরখানেক আগে ওপেনহার্ট সার্জারি হয়েছে, সেখানে ঘুষি চালালো।

লেখক নিজে থেকে, নয়তো ঘুষির কারণে চোখ দুটো বন্ধ ক'রে ফেললেন।

ঘন অন্ধকারে তার সমস্ত জগৎটি ঢেকে গেলো নিমেষে। সেই গাঢ় অন্ধকারে শৈশবের কথা ভাবার চেষ্টা করলেন তিনি। শেষ মুহূর্তে কিছু সুন্দর দৃশ্য দেখতে চাইলেন। তার দম বন্ধ হয়ে আসছে। খুব সঙ্গুত আরেকটা ঘুমি তার বুকের বাম দিকে করা হয়েছে, কিন্তু সে বিষয়ে তিনি নিশ্চিত হতে পারলেন না। কেবল বুঝতে পারলেন পুরো বুকটা চেপে আসছে চারপাশ থেকে। যেনো কেউ দু'হাতে তার বুকটা সজোরে চেপে ধরছে।

কয়েক সেকেন্ড পরে তার শরীরটা উধাও হয়ে গেলো। শুধু মস্তিষ্কটা কাজ করছে এখন। তিনি বুঝতে পারছেন মৃত্যু ধেয়ে আসছে। এই অভিজ্ঞতাটি কেমন সেটা নিয়ে অনেক ভেবেছেন, নিজের সৃষ্ট অনেক চরিত্রের মৃত্যু দৃশ্য নির্মাণ করতে যেয়ে কল্পনার আশ্রয় নিয়েছেন, কিন্তু এখন তার যে অনুভূতি হচ্ছে সেটা বর্ণনাতীত। অনিবার্য! এই অভিজ্ঞতা পৃথিবীর কেউই বর্ণনা ক'রে যেতে পারে না।

কতোক্ষণ লাগবে?

ব্যাপারটা দ্রুত শেষ হয়ে গেলে তার মুক্তি ঘটবে। কিন্তু প্রক্রিয়াটি শেষ হচ্ছে না। শৈশবের একটা ছবি ভাবার চেষ্টা করলেন। আসছে না। নিজের এই অবস্থাকে ভুলে সুন্দর কোনো মুহূর্ত ভাবতে পারছেন না। এখন বুঝতে পারছেন সত্যের কোনো মূল্য নেই। অসুত এই মুহূর্তে তার কাছে সত্যের প্রয়োজন নেই। প্রয়োজন একটা সুন্দর মুহূর্তের,। সেরকম কোনো সুন্দর সুখস্মৃতির জন্যে ব্যাকুল হয়ে উঠলেন।

অবশেষে ছবিটা ভেসে উঠলো। কিন্তু খুব বেশি সময় কি আছে?

একটা সরু খালে দুটো বাচ্চা ছেলে ডিম্বি নৌকায় ক'রে শাপলা ফুল তুলছে আর একে অন্যের দিকে পানি ছুড়ে মারছে...

ঠিক একই সময়ে, ভিটা নুভা অ্যাপার্টমেন্টের সামনের রাস্তার ফুটপাথে অল্পবয়সী এক ছেলে দাঁড়িয়ে আছে। তার দৃষ্টি রাস্তার ওপারে ভিটা নুভা'র ছয় তলার কর্নার ফ্ল্যাটের বেলকনির দিকে। গভীর মনোযোগের সাথে কী যেনো দেখছে। ছেলেটার ভাবভঙ্গী দেখে যে কেউ সন্দেহ করবে। সত্যি বলতে কি, ছেলেটা স্বাভাবিক অবস্থায় নেই।

রাত ১টা ৫৫ মিনিট। পুরো শহর ঘুমিয়ে আছে। শহর কখনও ঘুমায় না-ঢাকার জন্যে এ কথাটি প্রযোজ্য নয়। এক কোটি লোকের এই শহর মাঝরাতের দিকে প্রায় ভুতুরে শহরে পরিণত হয়। যদিও এর আসল এবং অদ্ভুত সৌন্দর্য ফুঁটে ওঠে নিঝুম রাতেই। সেটা নিশাচরেরাই ভালো জানে।

প্রশস্ত রাস্তাগুলো একেবারে ফাঁকা সে কথা বলা যাবে না, দু'য়েকটা ভারি

যানবাহন আর পুলিশের টহল গাড়ি আসছে যাচ্ছে। আধ ঘণ্টা আগে স্থানীয় থানার চারটি টহল গাড়ির একটি-চার্লি ফোর-এই রাস্তায় টহল দিয়ে গেছে। আরেকবার এখান দিয়ে গাড়িটা যাবে। আজকের রাতের ডিউটি শেষ ক'রে একটু পরে থানায় ফিরে যেতে হবে এ পথ দিয়েই।

চার্লি ফোর-এর দায়িত্বে থাকা ইন্সপেক্টর এলাহী নেওয়াজ আরেকটা বেনসন হেজেস ধরালো। এটা তার বিশেষ একটি সিগারেট। কাটাবন থেকে সন্ধ্যার দিকে উপটোকন হিসেবে পেয়েছে। রাতের ডিউটি দিতে তার একটুও ভালো লাগে না। কিন্তু পুলিশের চাকরি করলে ভালো-মন্দ ব'লে কিছু থাকতে নেই। যে খোকাকে এই চাকরিটা পাইয়ে দেবার জন্যে দেশের জমিজমা বেচে নগদ দুই লাখ টাকা দিয়েছিলো তাকে যদি এখন হাতের কাছে পেতো...

আর বেশি ভাবতে পারলো না। “গাড়ি থামাও!” গর্জে উঠলো এলাহী। পিকআপ ভ্যানের ভেতরে ব'সে থাকা তিনজন কনস্টেবল আর ড্রাইভার ওয়াদুদ চমকে গেলো।

“কি হইছে, স্যার?” পাশে বসে থাকা ড্রাইভার ওয়াদুদ বললো।

“আরে, আগে গাড়িটা থামাও।” বলেই সে রাস্তার ডান দিকে ইস্তিত করলো। ড্রাইভার দৃশ্যটি দেখার আগেই গাড়িটা বেশ কিছুটা দূরে চলে এসেছে।

খ্যাচ ক'রে গাড়ি ব্রেক করার যে শব্দ হলো তাতে ক'রে রাস্তার পাশে দাঁড়িয়ে থাকা ছেলেটি একটুও চমকালো না। এটা একেবারেই অস্বাভাবিক আচরণ। এলাহী নিজের পিস্তলটা হোলস্টার থেকে বের ক'রে হাতে নিয়েই ক্ষান্ত হলো না, সেফটি লকটাও খুলে ফেললো। এক অজানা আশংকা তার গাঠইন্দ্রিয়কে সজাগ ক'রে তুলেছে। ইন্সপেক্টর ভ্যানের পেছনে বসা তিনজন কনস্টেবলকে ইশারা করলে তারাও পুলিশ বাহিনীতে সদ্য বিতরণ করা অত্যাধুনিক মার্ক ফোর রাইফেল নিয়ে ভ্যান থেকে নেমে পড়লো। তাদের তিনজনের কেউই এখন পর্যন্ত এই অস্ত্রব্যবহার করে নি। তাদের অভিজ্ঞতা এখনও প্রথম মহাযুদ্ধে ব্যবহার করা থু নট থু রাইফেল। এখন এই নতুন অস্ত্র তাদেরকে দেয়া হলেও ফায়ারিং প্র্যাকটিসে পাঁচটি গুলি করা ছাড়া সত্যিকারের কোনো অ্যাকশনে ব্যবহার করা হয় নি। আজকেও যে করা হবে তার কোনো সম্ভাবনাই তারা দেখতে পাচ্ছে না।

একটা নিরীহ মাল।

তিনজন কনস্টেবল আর একজন পিস্তল হাতে উদ্যত টুগারহ্যাপি ইন্সপেক্টরকে মোকাবেলা করা তার পক্ষে কখনও সম্ভব হবে না।

এলাহী পিস্তলটা নিচু ক'রে রেখে ছেলেটার দিকে এগিয়ে গেলো। তাকে গুল্যসরণ করলো তিনজন কনস্টেবল। তারা যখন মাত্র দশ গজ দূরে তখনই তেঁওগেটা তাদেরকে দেখতে পেলো। ছয় তলার বেলকনির দিকে এমনভাবে

একদৃষ্টে চেয়ে ছিলো যে এতোক্ষণ কিছুই খেয়াল করে নি। পুলিশ দেখেই ভড়কে গেলো সে। সব দৃষ্টিকারীই পুলিশ দেখলে ভড়কে যায়।

“অ্যাঁই ছেলে, এতো রাতে এখানে...” এলাহী বাক্যটি শেষ করার আগেই ছেলেটি তাদেরকে অপ্রস্তুত ক’রে আচমকা দৌড় দিলো।

এলাহী ছেলেটার পেছন পেছন দৌড়ে গেলো না। আটত্রিশ বছর বয়সে তার ভূড়ির অবস্থা যা দাঁড়িয়েছে তাতে এই ছোকরার পেছনে দৌড়ে সে কুলাতে পারবে না।

“শালারে ধরো,” তিনজন হতভম্ব কনস্টেবল, যারা অফিসারের উপস্থিতিতে কোনো রকম নিজস্ব বিচারবুদ্ধি প্রয়োগ করতে অভ্যস্ত নয়, এলাহী তাদেরকে নির্দেশ দিলো।

কনস্টেবল তিনজন নিজেদের ভারি রাইফেলটা কোনো রকম সামলে নিয়ে ছেলেটার পেছনে ছুটলো। ইতিমধ্যে ছেলেটা বেশ দূরে চলে গেছে।

এলাহী ভ্যানে উঠতে উঠতে ড্রাইভারকে বললো, “ওয়াদুদ, জলদি চলো।”
গাড়ির ইঞ্জিন চালুই ছিলো, মুহূর্তে সেটা ছুটে গুরু করলো।

পানির ঝাপটা মুখে এসে লাগতেই অদ্ভুত এক ভালো লাগার অনুভূতিতে আক্রান্ত হলেন তিনি। এই দম বন্ধ অবস্থায়, সুতীব্র যন্ত্রণায় এরকম অনুভূতি তার কাছে স্বর্গের মতো মনে হচ্ছে। মনেপ্রাণে তিনি চাচ্ছেন মৃত্যু যেনো দ্রুত তাকে গ্রাস করে।

শৈশবের ছবিটা মিঁইয়ে গিয়ে একে একে অসংখ্য ছবি ভেসে উঠলো তার মনের পর্দায়। কোনোটা সুখের, কোনোটা সুতীব্র দুঃখের, আবার কোনোটা অনুশোচনার। সবই জীবনের অংশ।

বুকটা আরো চেপে এলো। এখন তার মনে হচ্ছে সমস্ত প্রাণটা মুখ দিয়ে বের হয়ে যাচ্ছে। বমি করার মতো একটা অনুভূতি হলো। *আমি কি বমি করছি?*

এ ক’দিন তিনি নিজেকে সিজোফ্রেনিয়ায় আক্রান্ত ব’লে মনে করেছিলেন, আজকের এই ঘটনায় তার সেই ধারণার অবসান হয়েছে। এই একটা সুখস্মৃতি তাকে শেষবারের মতো কিছুটা হলেও শান্তি দিলো, কিন্তু এই মুহূর্তের সব কিছুই খুব বেশি ক্ষণিকের। একটা মুখ ভেসে উঠতেই তার সব শান্তি তিরোহিত হয়ে গেলো নিমেষে।

কতো মায়াবী মুখটা! একসময় এই মুখটি তাকে কিভাবেই না আন্দোলিত করতো। মুখটার করুণ অভিব্যক্তি তাকে পীড়িত করলো সঙ্গে সঙ্গে। কতো গল্প জড়িয়ে আছে একে নিয়ে! এই মুখটা এক সময় তাকে অনুপ্রেরণা দিতো। জাগিয়ে তুলতো। এক নজর দেখার জন্যে ছুটে আসতে পারতেন হাজার মাইল

দূর থেকে, কিন্তু এখন! মুখটার মলিনতা, বিমর্ষতা তাকে মৃত্যুর চেয়েও সুতীব্র যন্ত্রণা দিচ্ছে। তিনি এ থেকে পরিত্রাণ চান। মৃত্যুর কৃষ্ণ গহ্বরে হারিয়ে গিয়ে এ থেকে নিষ্কৃতি চান।

লেখক মারা গেছে কিনা নিশ্চিত হবার জন্যে ঘাতক লেখকের মুখ থেকে তার বাম হাতটা সরিয়ে একটু ঝুঁকে এলো। লেখকের চোখ দুটো বন্ধ। নিস্তেজ শরীরটায় কোনো প্রাণ আছে কিনা বোঝা যাচ্ছে না। বুকের দিকে তাকিয়ে দেখতে পেলো শ্বাসপ্রশ্বাসে আন্দোলিত হচ্ছে না সেটা।

কিন্তু হঠাৎ করেই যেনো এই জড়বৎ মৃতদেহের মুখটা ক্ষণিকের জন্যে সজীব হয়ে উঠলো। তবে এতো অল্প সময়ের জন্যে যে ঘাতককে তেমন কিছু করতে হলো না।

লেখক শেষবার যে কথাটি বললেন সেটা এই পৃথিবীর কেউই হয়তো বুঝতে পারবে না। এরকম মুহূর্তে এটাকে নিছক অসংলগ্ন কোনো কথা বলেই মনে হবে। তিনি ছাড়া এ ঘরে একমাত্র যে ব্যক্তিটি আছে কথাটা নিশ্চয় তাকে উদ্দেশ্য ক'রে নয়। খুনি নিজেও কথাটা শুনে প্রথমবারের মতো একটু চমকে উঠলো।

“...আমাকে ক্ষমা ক'রে দিও!”



অব্যঙ্গ ২

আধো আলো অন্ধকার একটি ঘর। রকিংচেয়ারে একজন মানুষ ব'সে আছেন। তার চোখে ঘুম নেই। সিভাস রিগাল'র প্রভাবে একটু ঝিমুনি এলে চোখ দুটো কেবল বন্ধ করেছিলেন, তাও দশ মিনিটের বেশি হবে না।

একটা ফোনের জন্যে অপেক্ষা করছেন। একজন বিজনেস টাইকুন হিসেবে রাতবিরাতে অনেক ফোনই তাকে রিসিভ করতে হয়, এটা তার জন্যে নতুন কিছু নয়, তবে অনেক সময় নির্দিষ্ট কলটি আসতে দেরি করে আর তখনই তার মেজাজ বিগড়ে যায়, মনে নানা রকম আশংকা হতে থাকে। আজকের ফোনটাও দেরি করছে। বলা যায় খুব বেশিই দেরি করছে। এখন ভোর চারটা। শীতের দিন ব'লে বাইরে তাকালে মনে হবে রাত একটু কি দুটো বাজে। তিনি জানেন শীতের দিনে রাত একটা আর ভোর তিনটা-চারটার মধ্যে তেমন একটা পার্থক্য থাকে না।

খুব তেষ্ঠা পেলে চোখ খুললেন। সামনে রাখা সিভাস রিগালের প্রায় খালি হওয়া বোতলটা একটু ঝুঁকে হাতে তুলে নিলেন।

আছে, এখনও একটু আছে।

গ্লাসে না ঢেলে সরাসরি বোতল থেকেই বাকিটা শেষ ক'রে ফেললেন।

সিভাস রিগাল পাকস্থলীতে পড়তেই শরীরটা একটু চাপা হয়ে গেলো। মুখটাও বিষাদ লাগছিলো এতোক্ষণ, সেই ভাবটাও কেটে গেলো মুহূর্তে। জিভ দিয়ে ঠোঁটটা চাটতেই তার সেল ফোনটা বেজে উঠলো।

প্রতীক্ষার অবসান ঘটেছে। অপরিচিত একটি টিঅ্যাভটি নাম্বার। একটু অবাক হলেন তিনি। বুঝতে পারলেন না রিসিভ করবেন কিনা। অবশেষে কলটা রিসিভ করলেও নিজে থেকে কিছু বললেন না। এটাই তার স্বভাব। ফোন করেছে তুমি, তুমিই আগে নিজের পরিচয় দেবে।

ওপাশ থেকে যে কণ্ঠটা শুনতে পেলেন সেটা তাকে খুবই বিস্মিত করলো। কিন্তু নিজের এক্সপ্রেশন লুকিয়ে রাখার মধ্যেই অর্ধেক সফলতা নিহিত থাকে—আজীবন এই কথাটা তিনি অক্ষরে অক্ষরে পালন ক'রে এসেছেন তাই ফোনের ওপর পাশের ব্যক্তিটি কোনোভাবেই বুঝতে পারলো না তিনি বেশ অবাকই হয়েছেন।

“সি ই এ সিদ্ধিকী বলছেন?” কণ্ঠটা কর্তৃত্বপূর্ণ। এরকম কর্তৃত্ব ফলায় বড় আমলা, সামরিক বাহিনীর অফিসার আর পুলিশের লোকেরা। প্রথম দু’টি দল এতো রাতে তাকে ফোন করবে সে সম্ভাবনা একেবারেই কম। অতএব এটা যে পুলিশের সেটা বুঝে নিতে মাত্র দু’সেকেন্ড সময় লাগলো তার।

“কেন, কি হয়েছে,” তিনি নিজের পরিচয়টা নিশ্চিত করলেন না, সরাসরি প্রসঙ্গে চলে গেলেন।

ওপাশের লোকটি খুব তাড়ায় আছে, সেও সরাসরি আসল কথায় চলে এলো। “আপনার ছেলে ইরামকে আমরা অ্যারেস্ট করেছি।”

সিদ্ধিকী সাহেব একটু অবাক হলেন। শেষবার যখন ইরামের ঘরে উঁকি মেরেছিলেন তখনও দেখেছেন তার ছেলে ইন্টারনেট ব্রাউজ করছে। সেটা অবশ্য রাত এগারোটার দিকে; এখন থেকে পাঁচ ঘণ্টা আগে।

“কি করেছে সে, কোথেকে অ্যারেস্ট করেছেন?” তিনি বললেন।

শেষরাতে গ্রেফতার হওয়া ছেলের বাবা হিসেবে লোকটার কণ্ঠস্বর বেশ স্বাভাবিক, ফোনের অপরপ্রান্তে থাকা ইন্সপেক্টর এলাহী নেওয়াজ ভাবলো। “ধানমণ্ডি থেকে। আর বাকিটা শুনতে হলে আপনাকে যে একটু থানায় আসতে হবে, স্যার...” এলাহী কেন স্যার সম্বোধন করলো বুঝতে পারলো না। এখনও সে মধ্যবিত্তের ‘জি হুজুর’সুলভ মনোভাব পুরোপুরি ঝেড়ে ফেলতে পারে নি। লোকটার শীতল আর রাশভারি কণ্ঠ তাকে দিয়ে স্যার বলিয়ে নিয়েছে।

“...এক্ষুণি ধান—”

কথাটা শেষ করার আগেই সিদ্ধিকী সাহেব ফোনটা রেখে দিলেন। তাকে এখন আরেকটা জায়গায় ফোন করতে হবে। এতো রাতে এরকম এক হোমরাটোমরাকে ফোন করার জন্যে তিনি মোটেও ইতস্তত বোধ করলেন না। তার মতো ধনীদেব সেবা করতে পেরে এইসব ক্ষমতাবানেরা ধন্য হয়ে যায়।

তার এই ফোনের সিমের খুব বেশি নাম্বার নেই। হাতেগোনা কয়েকটা নাম্বারই এতে সংরক্ষিত আছে।

রিং হচ্ছে। একবার...দু’বার...তিনবার...

রাতের এরকম সময় কেউ ফোনের কাছে বসে থাকবে সে আশা তিনি করেন না। বিশেষ দরকার না হলে সকাল পর্যন্ত অপেক্ষা করতেন, কিন্তু এখন অপেক্ষা করা যাবে না। এক্ষুণি ফোন করতে হবে।

ফোনটা কেটে গেলে এলাহী কী করবে বুঝতে পারলো না। সে কি আবার ফোন করবে?

ক্রান্ত শরীরটা চেয়ারে এলিয়ে দিয়ে ফোনটা বুকের কাছে কিছুক্ষণ ধরে রাখলো। তারপর ফোনটা রেখে হুক্কার দিলো সে, “জলিল, এক কাপ চা দিতে এতোক্ষণ লাগে?”

অনেক ধকল গেছে। এই আধপাগলা ছেলেটা বেশ ভুগিয়েছে। আধমাইল দৌড়ে অবশেষে দম ফুরিয়ে নিজে থেকে ফুটপাতে ব’সে না পড়লে তাকে ধরা যেতো কিনা সন্দেহ। তার তিনজন কনস্টেবল রাইফেল সামলাবে না দৌড়াবে এই সিদ্ধান্ত নিতে নিতে যে দৌড় দিয়েছে সেটা দেখলে কার্টুন ছবির কথাই বেশি মনে পড়ে যায়।

আর এই ছেলেটা! উফ্! আস্ত একটা গজব। কিছুতেই মুখ খুলছে না। কয়েকদিন আগে ধানমণ্ডি এলাকায় এক বাড়িতে ডাকাতি হবার সময় এলাহী ঘটনাচক্রে সেই বাড়ির সামনে দিয়ে টহল দিতে গিয়ে এরকমই এক ছেলেকে রাস্তায় দাঁড়িয়ে থাকতে দেখেছিলো। তারপর বাকি ঘটনা তো পত্রিকায় বড় বড় শিরোনাম হয়ে সারা দেশে আলোড়ন তুলেছে। আজকের ঘটনাটাও এলাহী সেরকম কিছু ব’লে সন্দেহ করছে। তবে ছেলেটা এখন পর্যন্ত মুখ খোলে নি। এলাহী আরেকটা টহল দল খেটা-কে পাঠিয়েছে ভিটা নুভা নামের অ্যাপার্টমেন্টে, যেটার দিকে ছেলেটা তাকিয়ে তাকিয়ে কী যেনো দেখছিলো।

বেশ দামি একটা টি-শার্ট আর জিন্স প্যান্ট পরে আছে, ডাকাত দলের সদস্য ব’লে মনে হচ্ছে না। কিন্তু এলাহী জানে নেশাগ্রস্ত অনেক বড়লোকের ছেলে আজকাল নেশার টাকা যোগার করার জন্যে ডাকাতির সঙ্গে জড়িয়ে পড়েছে। এলাহী এই ছেলেটাকে নিয়ে গভীর সন্দেহ করছে। ছেলেটার সঙ্গে মোবাইল ফোন কিংবা মানিব্যাগ নেই। কোনো এক অজ্ঞাত ড্রাগ নিয়েছে সে-এ ব্যাপারেই কেবল এলাহী নিশ্চিত। বাকি সবকিছুই বেখাপ্লা ঠেকছে তার কাছে। এই মাত্র ফোনে ছেলেটার বাবার সঙ্গে যে কথা হলো সেটা আরো বেশি বেখাপ্লা লাগছে এলাহীর কাছে। এই হারামজাদা কোনো কথাই বলে নি, অল্প একটু টর্চার করার পর অবশেষে তার বাবার ফোন নাম্বার আর নামটা বলেছে কেবল। নাম শুনেই বোঝা যাচ্ছে বড়লোকের নাম। দীর্ঘ নাম থাকে তাদের। ছোটো নামের কোনো বড়লোকের দেখা আজ পর্যন্ত সে পায় নি।

তার ডেস্কের ফোনটা বেজে উঠলে এলাহীর মনে হলো সিদ্ধিকী সাহেব হয়তো ফোন করেছেন। কিছুক্ষণ আগে কথা বলার মাঝখানে যান্ত্রিক কারণে লাইনটা কেটে গিয়েছিলো তাহলে।

ফোনটা তুলে নিতেই যে কণ্ঠটা সে শুনতে পেলো সেটার জন্যে মোটেই প্রস্তুত ছিলো না। কণ্ঠটা শুনেই ব্যাপারটা বুঝতে পারলো। এ রকম শ্রায়ই হয়ে

থাকে। তার রাত জাগার তিজতা আরো বেড়ে গেলো। এখন পুরো ঘটনাটি তাকে বলতে হবে। ক্লাস্তির কারণে কোনো কথা বলতে ইচ্ছে না করলেও তাকে এই অপ্রিয় কাজটি করতেই হবে। যতোটুকু সম্ভব সংক্ষেপে ঘটনাটা বললো।

সব শুনে ওপাশ থেকে ওসি আলী হোসেন সাহেব ঘুম ঘুম কণ্ঠে বললেন, “কী যে করেন না। একটা ছেলে রাস্তায় দাঁড়িয়ে রইলো আর অমনি তাকে ধরতে লেগে গেলেন?”

“না, মানে, সন্দেহজনক ছিলো, স্যার,” এলাহী ব্যাখ্যা করতে চাইলো।

“এতো দিন ধরে ধানমণ্ডি থানায় আছেন, বোঝেন না? বড়লোকের পোলাপান, রাতে হয়তো মাগি-টাগি খুঁজতে বের হয়েছিলো।”

ওসির মুখে ‘মাগি’ শব্দটা শুনে একটু লজ্জা পেলো এলাহী।

“আমাদের হোম মিনিস্টারকে এতো রাতে ঐ লোক ঘুম থেকে ডেকে উঠিয়েছে। বুঝলেন?”

“জি, স্যার,” এলাহী কিছু বলতে গিয়েও বললো না।

“সি ই এ সিদ্ধিকী নিজেই হয়তো আসতে পারেন। একটাই তো সম্ভান। খুব ভালো ব্যবহার করবেন। ঠিক আছে?”

“জি, স্যার।”

ফোনটা রেখে দেয়া হলেও এলাহী কিছু সময়ের জন্যে উদাস হয়ে থাকলো। আরেকটা বাঘের বাচ্চার গায়ে হাত দিয়েছে সে।

চা দেয়া হলে অন্যমনস্ক ভাবটা কেটে গেলো। চায়ে চুমুক দিতে দিতে একটা গালি দিলো মনে মনে, বড়লোকের মায়রে আমি...

ঠিক তখনই থানার বাইরে একটা দামি পোর্শে গাড়ি এসে থামলো। এলাহীর সামনের জানালা দিয়ে থানার প্রবেশপথটি দেখা যায়, যে-ই এখানে প্রবেশ করুক, জানালা দিয়ে দেখতে পায় সে।

এই রকম দামি গাড়ির সাথে সে পরিচিত। বিশেষ ক’রে গত বছর দূর্নীতি বিরোধী অভিযানের সময় এক ধানমণ্ডি থানা এলাকায়ই ত্রিশটি বিলাসবহুল গাড়ি জব্দ করা হয়েছিলো। আর এলাহী নিজেই করেছে দশটি গাড়ি। পোর্শে... হামার...ভলভো...বিএমডব্লিউ...কোটি কোটি টাকা দামের একেকটা গাড়ি। বৈধভাবে সারা জীবনে সে এক কোটি টাকাও কামাতে পারবে কিনা সন্দেহ আছে।

এলাহী চেয়ার ছেড়ে উঠে রিসেপশন রুমে চলে এলো।

সি ই এ সিদ্ধিকী আটদশ জন ধনীর মতোই দেখতে। এইসব ধনীদেব গায়ের রঙ কালো হোক আর সাদা হোক, একধরণের জেল্লা জেল্লা ভাব থাকে। তাদের পোশাক স্পষ্টতই অন্যদের চেয়ে তাদেরকে আলাদা ক’রে রাখে।

সিদ্দিকী সাহেবের বয়স হবে পঞ্চাশ কি ষাট। মাথার সব চুল পেকে গেলেও কলপ দেয়া আছে বোঝা যায়। ক্লিন শেভ করা। কপালের সামনের দিকে হেয়ার লাইন অনেকটা পিছু হটে গেছে। গায়ে তার দামি নাইটড্রেস। যেমনটি নাটক-সিনেমায় দেখা যায়। তবে আশ্চর্যের ব্যাপার হলো লোকটার চোখে যুন্মের কোনো লেশমাত্রও নেই। মনে হয় জেগেই ছিলেন।

বাবা রাত জেগে মদ খাচ্ছিলো আর ছেলে রাস্তায় রাস্তায় খুঁজছিলো মাগি।

এলাহী অবশ্য অন্য কিছুও ভাবছে। এই ছেলেটা কিছু একটা করার পরিকল্পনা করছিলো, এলাহী এ ব্যাপারে নিশ্চিত। তবে এখন আর এ নিয়ে বাড়াবাড়ি করার কোনো উপায় নেই।

রিসেপশন রুমে ঢুকেই তিনি একজন অফিসারকে জিজ্ঞেস করতে গেলে এলাহী এগিয়ে এসে বললো, “আমিই আপনাকে ফোন করেছিলাম...” এবার বেশ সচেতনভাবেই স্যার সম্বোধনটা এড়াতে পারলো সে।

সিদ্দিকী সাহেব হাত বাড়িয়ে দিলেন। এলাহী প্রস্তুত ছিলো না। বড়লোকেরা ছোটোখাটো পুলিশ অফিসারকে পাক্সা দেয় না। তাদের সাথে সম্পর্ক থাকে পুলিশের আইজি কিংবা কোনো মিনিষ্টারের। সে একটু খতমত খেয়ে বাড়িয়ে দেয়া হাতটা ধরলো।

“এলাহী নেওয়াজ। ইন্সপেক্টর।”

সিদ্দিকী সাহেব ভালো ক’রে দেখে নিয়ে বললেন, “খানার ইনচার্জ কে?”

“আলী হোসেন সাহেব। উনি ওসি। এখন ডিউটিতে নেই,” বললো এলাহী।

“আমার ছেলে কোথায়?” সিদ্দিকী সাহেব হাতটা ছেড়ে দিয়ে জানতে চাইলেন।

“লকাপে।”

কথাটা শুনে লোকটা তেমন প্রতিক্রিয়া দেখালো না।

“বসুন।” একটা চেয়ার দেখিয়ে বললো এলাহী।

সিদ্দিকী সাহেব চেয়ারে বসতেই আরেকজন লোক এসে হাজির হলো। এই সাত সকালেও কালো কোটটা পরতে ভুলে যায় নি।

“কে, ডিউটি অফিসার কে?” চারপাশে তাকাতে তাকাতে বললো লোকটা।

সিদ্দিকী সাহেব অনেকটা ধমকের সুরে বললেন, “রফিক উল্লাহ!”

সিদ্দিকী সাহেবকে দেখতে পেয়েই সঙ্গে সঙ্গে আচরণ বদলে গেলো লোকটার। “স্যার, আপনি? আপনি না এলেও তো হতো।”

লোকটার ভাবভঙ্গী দেখে এলাহীর মেজাজ খারাপ হয়ে গেলো।

পাশের একটা চেয়ারে তাকে বসার ইশারা করলেন সিদ্দিকী সাহেব।

“অস্থির হবে না। তেমন কিছু না। তোমার আসার কোনো দরকার ছিলো না।” লোকটা কিছু বলতে যাবে তখনই সিদ্দিকী সাহেব হাত নেড়ে তাকে থামিয়ে দিয়ে এলাহীকে বললেন, “তার বিরুদ্ধে অভিযোগ কি?”

“হ্যা, অভিযোগ কি?” উকিল লোকটি সিদ্দিকী সাহেবের কথার প্রতিধ্বনি করলো।

এলাহী কটমট চোখে উকিলের দিকে তাকিয়ে সিদ্দিকী সাহেবের দিকে ফিরে বললো, “না, মানে, ফিফটি ফোর-এ আটক করেছি। রাস্তায় সন্দেহজনকভাবে ঘোরাঘুরি করছিলো, স্যার,” কথাটা বলেই মনে মনে জিভ কাটলো এলাহী। আবারো মুখ ফস্কে স্যার ব’লে ফেলেছে।

উকিল ভদ্রলোক কিছু বলার আগেই আবারো সিদ্দিকী সাহেব বলতে লাগলেন, “ওকে বাড়িতে নিয়ে যেতে হলে কী করতে হবে?” বোঝাই যাচ্ছে সময়ক্ষেপন করতে চাচ্ছেন না।

এলাহী একটু ভেবে বললো, “কিছু করতে হবে না। নিয়ে যেতে পারেন।”

“ধন্যবাদ, আপনাকে।” সিদ্দিকী সাহেব উঠে দাঁড়ালে একজন কনস্টেবলকে ইশারা করলো এলাহী, কিছুক্ষণ পরে ইরামকে দু’জন কনস্টেবল ধরে নিয়ে এলো। তার বাম চোখের নিচে আঘাতের চিহ্ন। সেখানে তাকিয়ে রইলেন সিদ্দিকী সাহেব। ইরাম অনেকটা অপ্রকৃতিস্থ।

সিদ্দিকীর দৃষ্টি অনুসরণ ক’রে বুঝতে পারলো এলাহী। “দৌড়ে পালিয়েছিলো। ধস্তাধস্তির সময় একটু...”

হাত নেড়ে থামিয়ে দিলেন সিদ্দিকী সাহেব। “ঠিক আছে। আমরা তাহলে যাই, নাকি?”

“একটা কথা বলি, আপনাকে?” এলাহী আচম্কা কথাটা বললো। যদিও এর জন্যে তার কোনো পূর্ব প্রস্তুতি ছিলো না।

“বলুন,” সিদ্দিকী সাহেব তার উকিলকে ইশারা করলে ভদ্রলোক ইরামকে নিয়ে পোর্শে গাড়িতে গিয়ে উঠলো। সিদ্দিকী সাহেব আর দশজন বাবার মতো পিতৃত্ব বোধের কোনো উৎকট বহির্প্রকাশ ঘটালেন না।

“আমার মনে হয় আপনার ছেলে নেশা করে।”

সিদ্দিকী সাহেব এই প্রশ্নেও কোনো রকম অবাধ হলেন না। একটু চুপ থেকে বললেন, “হ্যা, করে।”


“কি নেশা করে সেটা কি আপনি জানেন?” কথাটা বলেই এলাহীর মনে হলো এই প্রশ্নটি না করলেই বোধহয় ভালো হতো।

সিদ্দিকী সাহেব এবার কোনোরকম সময় না নিয়েই আশ্তে ক’রে বললেন, “এল এস ডি।”

“কি!?” এলাহী কিছু বুঝে উঠতে না পেরে বললো ।

“একটা ভয়ংকর নেশা । এ দেশে খুব কমই পাওয়া যায় ।” বলেই তিনি গটগট ক’রে চলে গেলেন এমন ভঙ্গিতে যেনো তিনিই ঠিক ক’রে দিলেন আর কোনো প্রশ্ন করা যাবে না ।

এলাহী নেওয়াজ দেয়াল ঘড়িতে তাকিয়ে দেখলো ভোর সাড়ে চারটা বেজে গেছে ।



অধ্যায় ৩

টহল গাড়ি খেটার নেতৃত্বে আছে সাব-ইন্সপেক্টর সমীর দাস। একটু আগে ওয়াকিটকিতে ইন্সপেক্টর এলাহী নেওয়াজ তাকে ধানমণ্ডির ভিটা নুভা নামের একটি অ্যাপার্টমেন্ট বিল্ডিং চেক ক'রে আসতে বলেছে। তেমন কিছু না। কয়েক সপ্তাহ আগে এই এলাকায় এরকম একটি বিল্ডিংয়ে ডাকাতি হয়েছিলো। এলাহী নেওয়াজ আজ একটু আগে ভিটা নুভার সামনে থেকে এক ছেলেকে সন্দেহজনকভাবে ঘোরাঘুরি করার সময় অ্যারেস্ট করেছে। ইন্সপেক্টর সাহেবের সন্দেহ ভিটা নুভায় কিছু একটা হলেও হতে পারে। সমীর জানে গাজার নেশায় বৃন্দ হয়ে আছে বলে এলাহী তাকে পাঠিয়েছে এই বিল্ডিংটা একটু চেক ক'রে দেখার জন্য।

সমীর দাসকে স্পষ্ট ক'রে ব'লে দেয়া হয়েছে ভিটা নুভা'র ছয় তলার কর্নার ফ্ল্যাটটার দিকে ছেলেটা লক্ষ্য রাখছিলো। ঐ ফ্ল্যাটে গিয়ে একটু দেখে এলেই হবে। তার সঙ্গে আছে পাঁচজন কনস্টেবল। যদি কোনো ডাকাতির ঘটনা হয়ে থাকে সেজন্যে তাদের এই বড় দলটি পাঠানো হয়েছে। এলাহী নিজেই আসতে পারতো। কিন্তু ছেলেটাকে ধরতে গিয়ে থানার খুব কাছে চলে এসেছিলো ব'লে সে থানাতেই চলে গেছে, সমীরকে পাঠিয়েছে ব্যাপারটা একটু দেখে আসতে।

সমীর অবশ্য সেরকম কোনো কিছুর আশংকা করছে না। সাধারণত কোনো এলাকায় বড়সড় ডাকাতির ঘটনা ঘটে গেলে মাসখানেক পর্যন্ত আর তেমন কোনো ঘটনা ঘটে না। হয়তো এলাহীও তা জানে, এজন্যেই খামোখা একটা কাজে সময় নষ্ট করতে চায় নি, বেগাড় খাটুনি খাটতে পাঠিয়েছে তাকে। তারপরও একটু কনফার্ম হতে হবে।

ভিটা নুভার সামনে এসে গাড়িটা থামলে সমীর ছয় তলার কর্নার ফ্ল্যাটের বেলকনির দিকে তাকালো। বাইরে থেকে অবশ্য কিছু বোঝা যাচ্ছে না। তাকে ফ্ল্যাটে গিয়ে সেখানকার বাসিন্দাদের সাথে কথা বলে নিশ্চিত হতে বলেছে এলাহী নেওয়াজ। কিন্তু এই অসময়ে, প্রায় ভোর বেলায় এই কাজটা করতে গেলে ফ্ল্যাটের বাসিন্দারা যে খুবই বিরক্ত হবে সেটা নিশ্চিত। সেধে সেধে লোকজনের গালি খাওয়া আর কি!

সমীর গাড়ি থেকে নেমে একজন কনস্টেবলকে ডাকলো।

“রহিম? টর্চটা দাও।”

এক কনস্টেবল লম্বা একটি টর্চ সমীরের হাতে দিলে সে ভিটা নুভার ছয় তলার কর্নার ফ্ল্যাটের বড় বড় দুটি বেলকনি আর একটি জানালার দিকে ভালো ক’রে চেয়ে দেখলো। একটি জানালা আর বেলকনি অন্ধকার, কিন্তু ডান দিকের বেলকনি দিয়ে মৃদু ডিম লাইটের আলো দেখা যাচ্ছে।

সমীর সেই বেলকনিতে টর্চের আলো ফেললো।

যদিও সে জানে এটাতে তেমন কোনো কাজ হবে না। খালি খালি ফ্ল্যাটের বাসিন্দাদেরকে বিরক্ত করা। তার উদ্দেশ্য খুব পরিষ্কার। ইন্সপেক্টর এলাহী যে ছেলেটাকে ধ্রুফতার করেছে সে নাকি এই ফ্ল্যাটের বেলকনির দিকেই তাকিয়ে ছিলো। ঘরের বাসিন্দাদের কেউ যদি আলো দেখে জানালা দিয়ে উঁকি দেয় তো নিচ থেকেই কাজটা সেরে নেবে, কষ্ট ক’রে ছয় তলার ফ্ল্যাটে যাবার কোনো দরকার নেই।

কোনো সাড়া পাওয়া গেলো না।

সমীর এবার কনস্টেবলদের দিকে তাকিয়ে ইশারা করলো। “চলো, একটু দাড়াইয়ানকে জিজ্ঞেস ক’রে দেখি।”

তিন মাস ধরে চলা এই অভিসারে কোনো সমস্যা হয় নি। নির্বিঘ্নে একেকটা রাত কেটে গেছে প্রবল সুখের আবেশে। দু’জনের এই উদ্দাম মিলনের আকর্ষণ দিন দিন বেড়েই চলছে। এই ব্যাপারটি নিয়েই তারা একটু চিন্তার মধ্যে পড়ে গেছে ইদানিং। তবে আশা একটাই, খুব জলদিই এই অবস্থার অবসান ঘটবে।

পূর্বপরিকল্পনা মতোই সব হচ্ছিলো। ঘুণাঙ্করেও কেউ কিছু জানতে পারে নি। আজকের রাতটা তারা দারুণভাবে কাটিয়েছে। একে অন্যকে তীব্রভাবে ভালোবাসতে বাসতে হারিয়ে গিয়েছিলো তারা। সুখের আবেশে গাঢ় ঘুম দু’জনে ঢলে পড়েছে মাঝরাতে। কী যেনো একটা শব্দ হতেই বর্ষার ঘুম ভেঙে গেলো।

বিছানার পাশে ছেলেটাকে দেখতে না পেয়ে অ্যাটাচড বাথরুমের দিকে তাকালো সে। দরজার নীচ দিয়ে কোনো আলো দেখা যাচ্ছে না। চোখ দুটো কচলে ঘরের চারপাশে তাকালো। ছেলেটা কোথাও নেই। বুকটা কেঁপে উঠলো তার। উঠে বসলো সে। এমনিতেই হঠাৎ ক’রে ঘুম ভেঙে গেলে তার বুক ধরফর ক’রে ওঠে, এখন সেটা আরো বেড়ে যাচ্ছে। অন্ধকারে তার দু’চোখ সয়ে এলেও ছেলেটাকে দেখতে পেলো না। এক অজানা অশংকায় হাত-পা ঠাণ্ডা হয়ে এলো।

বিছানা থেকে উঠে যে খুঁজে দেখবে সেই শক্তি পর্যন্ত লোপ পেয়ে গেলো বর্ষার। টের পেলো নিঃশ্বাস দ্রুত হয়ে উঠছে। নিজেকে ধাতস্থ করার চেষ্টা করে

বুক ভরে দম নিয়ে যে-ই না বিছানা থেকে নামতে যাবে অমনি একটা শব্দে চমকে উঠলো সে।

দক্ষিণ দিকের বেলকনির স্লাইডিং ডোরটা খুলে একটা ছায়ামূর্তি চুপিসারে ঘরে ঢুকছে। প্রচণ্ড ভয়ে বর্ষার গলা শুকিয়ে গেলো।

ভিটা নুভার নাইটগার্ড আসলাম মেইন গেটের বক্সের ভেতরে ব'সে আরাম ক'রে দু'চোখ একটু বন্ধ করেছিলো মাত্র। পচিশ বছরের যুবক আসলাম ছয় মাস কুয়েতে কাজ করেছে, তারপর জন্ডিসে আক্রান্ত হলে ঐ দেশের সরকার তাকে দেশে পাঠিয়ে দেয়। গ্রামের বাড়ির জমিজমা বেঁচে দিয়ে বিদেশ গিয়েছিলো। ফিরে এসে একেবারে চোখে অন্ধকার দেখে। তার গ্রামেরই এক লোক এই চাকরিটা জুটিয়ে দিয়েছে তাকে।

থাকা খাওয়া ফ্রি। বেতন তিন হাজার টাকা। তারপরেও আসলাম কুয়েত যাবার স্বপ্ন দেখে। প্রচুর টাকা কামাবে, গ্রামের বাড়িটা পাকা করবে, লোকজন তার দিকে ঈর্ষার চোখে তাকাবে তখন। তোমার দিকে যদি লোকে ঈর্ষার চোখেই না তাকালো তাহলে কিসের সুখ!

রাতের এই ডিউটিটা তার প্রথম দিকে খুব খারাপ লাগতো। এখন, এই দু'বছরের চাকরি জীবনে অভ্যস্ত হয়ে উঠেছে। একেবারে নির্বাণ্ণাট একটা কাজ। শুধু বসে বসে রাত জাগা। তাকে অবশ্য প্রতি রাতে ডিউটি করতে হয় না। তারা দু'জন এ কাজটি করে। মহব্বত নামের অন্য আরেকটি ছেলে আছে। তার ডিউটি ভোর থেকে সন্ধ্যা পর্যন্ত।

হঠাৎ মেইন গেটে এমন জোরে শব্দ হলো যে বক্সে বসে ঝিমুতে থাকা আসলাম চমকে টুল থেকে পড়েই যাচ্ছিলো। তার বুকটা ধরফর ক'রে উঠলো। খুব দ্রুত ধাতস্থ হয়ে বোঝার চেষ্টা করলো ব্যাপারটা কি

“কে?” খুবই দুর্বল কণ্ঠে জানতে চাইলো সে।

কিস্ত ওপাশ থেকে কোনো জবাব এলো না, দরজায় আরো জোরে আঘাত করা হলো।

“আরে ভাই, কে?” এবার একটু জোরেই কথাটা বললে দরজায় আঘাতের শব্দটা থেমে গেলো। তারপরই একটা কণ্ঠ বললো, “আমরা পুলিশ, গেট খোল।” পাঁচজন কনস্টেবলের একজন জবাব দিলো।

“পুলিশ?” আসলাম ভয়ে ভয়ে জিজ্ঞেস করলো।

“আরে ব্যাটা, গেট খোল,” অন্য একজন কনস্টেবল অধৈর্য হয়ে বললো।

আসলাম এবার আর কোনো প্রশ্ন না করেই গেটটা খুলে দিলো। পাঁচ-

ছয়জন পুলিশকে এক সঙ্গে দেখে ভড়কে গেলো সে ।

“সালামালাইকুম, স্যার,” বললো আসলাম ।

বর্ষার মুখ দিয়ে অস্ফুটভাবে বের হয়ে এলো : “কে!?”

কথাটা শুনে চমকে উঠলো ছেলেটা । “আমি!” বিছানার কাছে এসে দাঁড়ালো সে । তার আচরণ খুবই অস্বাভাবিক । কপালে রীতিমতো বিন্দু বিন্দু ঘাম জমে গেছে । বর্ষা ভালো ক’রে তাকিয়ে দেখলো ছেলেটার হাতও কাঁপছে ।

চাপা কণ্ঠে ছেলেটা তাকে বললো, “আস্তে!” কথাটা বলেই বিছানার প্রান্তে বসলো সে ।

“কী হয়েছে!?”

“পুলিশ!”

“কী!” বর্ষার সারা দেহের রোমকূপ খাড়া হয়ে গেলো মুহূর্তে ।

“রাস্তা থেকে পুলিশ বেলকনিতে টর্চের আলো ফেলে কী যেনো দেখছে,” চাপা কণ্ঠে বললো ছেলেটা । তাকে বেলকনির স্লাইডিং ডোরের কাছে নিয়ে গিয়ে পর্দা একটু ফাঁক ক’রে দেখালে ভয়ে অসাড় হয়ে গেলো বর্ষা ।

ভুরু কুচকে বর্ষা ছেলেটার দিকে তাকালো । “তুমি ঘুম থেকে উঠলে কখন? বেলকনিতে কি করছিলে?”

“ঘুম ভেঙে গেছিলো । একটু সিগারেট খাওয়ার জন্য...”

শেষ রাতে পুলিশের এই আগমন তাদেরকে জীবনের সবচাইতে ভয়ংকর একটি পরিস্থিতিতে দাঁড় করিয়েছে । প্রায় দশ মিনিট তারা নিশুপ বিছানার উপর বসে রইলো । এক একেএকটি সেকেভকে যন্ত্রণাকাতর কয়েক ঘণ্টা ব’লে মনে হলো তাদের কাছে । তবে ভাগ্য ভালো, তেমন কিছু আর হলো না । রাস্তা থেকে তিনচারজন পুলিশ তাদের এই ফ্ল্যাটের দিকে চেয়ে চেয়ে কী যেনো দেখে চলে গেলো ।

দেশের সবচাইতে জনপ্রিয় লেখকের দ্বিতীয় স্ত্রী বর্ষা । বহুল আলোচিত আর প্রচারিত একটি ঘটনার মধ্য দিয়ে গত চার বছর আগে তারা বিবাহ বন্ধনে আবদ্ধ হয়েছে । তখন বর্ষার বয়স ছিলো মাত্র একুশ । সবে ছোটো পর্দায় নায়িকা হিসেবে ক্যারিয়ার শুরু করা এক তরুণী । কেবল লেখকের নিজের মেয়েরই সমবয়সী নয়, আক্ষরিক অর্থেই তার বান্ধবী ছিলো সে ।

আজ প্রায় এক বছর আগে লেখকের ওপেন হার্ট সার্জারি হয়েছে আর আট মাস আগে এক স্ট্রোকের আক্রান্ত হলে প্যারালাইসিস হয়ে বিছানায় পড়ে আছেন তিনি ।

বর্ষা খুব উদ্ভিগ্ন হয়ে আছে। কিছুতেই বুঝতে পারছে না পুলিশ কেন এতো রাতে তাদের ফ্ল্যাটের দিকে উৎসুক দৃষ্টিতে তাকিয়ে থাকবে। তাদের বেলকনিতে টর্চের আলো ফেলবে। কেউ কি তাদের এই ব্যাপারটা জেনে গেছে? অসম্ভব। তারা বেশ সতর্ক আর সজাগ। কিন্তু তাদের সব হিসেব পাল্টে দিয়েছে পুলিশের এই আগমন।

ভাগ্য ভালো পুলিশ অ্যাপার্টমেন্টে ঢোকে নি। কী যে অঘটন ঘটে যেতো কথাটা ভাবতেই বর্ষার গা শিউরে উঠলো। রাতের সমস্ত উত্তেজনা আর অভিসার তিরোহিত হয়ে এখন কেবল আশংকা আর অনুশোচনা হচ্ছে।

বর্ষা টয়লেটে ঢুকলে ছেলেটা নিজের টেনশন দূর করার জন্যে ঘরের ভেতর পায়চারি করতে করতে আরেকটা সিগারেট ধরালো কিন্তু কয়েক টান দেয়ার পরই মুখটা বিষ্মাদে ভরে গেলো তার। অর্ধেকটা খাওয়ার পরই বেলকনির দিকে ছুড়ে ফেলে বিছানায় এসে বসলো সে।

টয়লেট থেকে বের হয়ে এলো বর্ষা। টেনশনে থাকলে মেয়ে মানুষ কি ঘন ঘন টয়লেটে যায়? মনে মনে বললো ছেলেটি।

বর্ষা এখন পাতলা একটি নাইটি পরে আছে। এটা তাদের অভিসারের পোশাক। ঘুমানোর আগে তাদের প্রথম মিলনের পর এই উদ্বেগ আর উৎকর্ষা সমস্ত আনন্দটাকে মাটি ক'রে দিয়েছে। বর্ষাকে টয়লেট থেকে বের হতে দেখে আবারো উত্তেজনা অনুভব করছে ছেলেটা। বিছানা থেকে উঠে এসে তাকে জড়িয়ে ধরলো ড্রেসিংটেবিলের সামনে।

“উফ্। এসব এখন আর ভালো লাগছে না। ছাড়ো তো,” অনেকটা বিরক্ত হয়েই বর্ষা বললো, কিন্তু ছেলেটা তাতে একটুও দমে গেলো না। বর্ষার কাঁধে মুখ ঘষতে শুরু করলো।

ছেলেরা কী ক'রে টেনশনে থেকেও এসব করার মতো মুডে থাকে ভেবে পেলো না সে।

“অতো চিন্তা কোরো না তো।”

“তোমার কি মনে হয়, পুলিশ টর্চের আলো ফেলছিলো কেন?”

“মনে হয় অন্য কোনো ফ্ল্যাটে খোঁজ করতে গিয়ে ভুলে এখানে আলো ফেলেছে।”

“অন্য ফ্ল্যাটেই বা কেন টর্চ দিয়ে আলো ফেলবে?” ব্যাখ্যাটা বর্ষার পছন্দ হলো না।

“তাতো জানি না। তবে আমার মনে হচ্ছে ব্যাপারটা আমাদের নিয়ে নয়। বাদ দাও তো। যদি তেমন কিছু হোতো পুলিশ বাইরে থেকে টর্চের আলো ফেলে চলে যেতো না। এই ফ্ল্যাটে আসতো।”

“তারপরও আমার খুব ভয় হচ্ছে।”

“কিন্তু আমার খুব উত্তেজনা লাগছে।”

“টয়লেটে গিয়ে মথায় পানি দিয়ে ঠাণ্ডা ক’রে আসো,” একটু মুচকি হেসে বললো বর্ষা।

ছেলেটা আয়নায় তাকিয়ে বর্ষার হাসিটা দেখতে পেয়ে একটু উৎফুল্ল হলো। আরো বেশি জড়িয়ে ধরে বললো, “কাকতালীয় ব্যাপার, ডালির্। ভয় পেয়ো না।”

“আমাকে সাহস দিচ্ছে! তোমার অবস্থা তো আমার চেয়েও খারাপ।”

কথাটা আমলে না নিয়ে বর্ষার ডান স্তন মুঠোতে পুরে ফেললো সে। বর্ষা এবার আর কোনো বাঁধা দিলো না। নাইটির সামনের বোতাম খুলে ফেললে ছেলেটার হাত নাইটির ফাঁক গলে ঢুকে পড়লো ভেতরে।

মিনিট খানেক পরে তারা দু’জন আবার বিছানায়। আবারো দু’জনের শরীর দু’জনকে গ্রাস করার জন্যে মরিয়া হয়ে উঠলো। বর্ষার গলায় আর বুকে পাগলের মতো চুমু খাচ্ছে ছেলেটা। তারপর আচমকাই বিরতি। বর্ষা টের পেলো অন্ধকারে তার প্রেমিক কাগজের মতো কিছু একটা ছিঁড়ে বিছানার এক পাশে ছুঁড়ে ফেলে দিলো। বুঝতে পেরে মুচকি হেসে দ্বিতীয়বারের মতো প্রস্তুত হলো সে।

এবার তারা দু’জনে সচেতনভাবেই কোনো রকম শব্দ করলো না। যদিও পাশের ঘরে লেখক তাদের এই শব্দ শোনার মতো অবস্থায় নেই। তিনি এখন সব কিছুর উর্ধ্বে।

“আমি তো উল্টাপাল্টা কিছু দেখতাই না, স্যার,” সমীর দারোগাকে বললো ভিটা নুভার নাইটগার্ড আসলাম।

সমীর ছয় তলার বেলকনির দিকে তাকিয়ে আবার বললো, “ওখানেই তাহলে জায়েদ রেহমান থাকেন,” এটা কোনো প্রশ্ন ছিলো না, অনেকটা আপন মনে বিড় বিড় করেই কথাটা বললো। “ইন্টারকমের জবাব দিচ্ছে না কেন?” জানতে চাইলো সমীর। অবশ্য এর জবাব সে নিজেও জানে। এতো ভোর বেলায় কে ব’সে আছে ফোন ধরার জন্যে?

“ঘুমায় আছে,” আসলাম খুব সহজ ক’রে বললো। “তারা তো দেরি কইরা ঘুম খেইকা ওঠে।”

“ঠিক আছে। তুমি চোখকান খোলা রেখো।” কথাটা বলেই সে তার দলবল নিয়ে চলে গেলো।

“হালার পুলিশের কি কোনো কাম নাই, খালি বেহুদা কাজকারবার।” পুলিশের দলটি চলে গেলে আসলাম অনেকটা জোরেই বললো কথাটা।

প্রথমে ভেবেছিলো ফোনটা বাজছে, কিন্তু পরক্ষণেই বুঝতে পারলো ইন্টারকমে রিং হচ্ছে।

সবেমাত্র তাদের দ্বিতীয়বারের মতো মিলনপর্ব শেষ হলে ছেলেটা চিৎ হয়ে শুয়ে সিলিংয়ের দিকে তাকিয়ে ছিলো আর মেয়েটা একপাশ ফিরে চেপ্টা করছিলো ঘুমাতে।

ইন্টারকমে রিং হলে তারা দু'জনে আবারো ভীষণভাবে চমকে যায়। কী করবে ভেবে না পেয়ে ইন্টারকমের জবাব দেয় নি।



এলাহী নেওয়াজ নিজের চেয়ারে বসে ঝিমিয়ে পড়েছিলো। গাজার নেশা আর সারা রাত জেগে থাকার ক্লান্তিতে গাঢ় ঘুম এসে লেগেছে দু'চোখে।

“স্যার, ঘুমিয়ে গেছেন নাকি?” সমীর দারোগা তার টেবিলের সামনে এসে বললো। এলাহীর কোনো সাড়া শব্দ নেই। “স্যার!” এবার বেশ জোরে, প্রায় চিৎকার দেবার মতো ক’রে বললে এলাহীর বুকটা ধরফর ক’রে উঠলো। চমকে উঠে দেখতে পেলো সমীর দাসকে। কয়েক মুহূর্ত তাকিয়ে থেকে কিছুটা ধাতস্থ হলো সে।

“স্যার, সব ঠিক আছে,” সমীর বললো।

“কি ঠিক আছে?”

“ভিটা নুভা’য়। ওখানে কোনো সমস্যা নেই, স্যার।”

এবার বুঝতে পারলো এলাহী। আধঘণ্টা আগে সমীরকে ভিটা নুভায় পাঠিয়েছিলো। “আচ্ছা,” বললো সে। একটু চুপ থেকে প্রশ্ন করলো, “অ্যাপার্টমেন্টের ভেতরে সব ঠিক আছে তো?”

সমীর একটু কাচুমাচু করলো। “না, মানে, ভেতরে তো যাই নি। ইন্টারকমে চেষ্টা করেছি, কেউ ধরে নি।”

এলাহীর চোখ দুটো কুচকে গেলো। “বলো কি! তাহলে সব আর ঠিক থাকলো কেমনে?”

সমীরও রাত জেগে ক্লান্ত। এ কথার কোনো জবাব দিলো না। মাথা নীচু ক’রে রাখলো।

এলাহী চেয়ারে সোজা হয়ে বসলো এবার। “ইন্টারকমে জবাব দেয় নি মানে, নিশ্চয় কোনো সমস্যা হয়েছে!?”

সমীর চোখ তুলে তাকালো। “ঘুমিয়ে আছে সবাই। এই ভোর বেলায় কে আর ইন্টারকমের জবাব দেয়ার জন্যে জেগে থাকবে?”

এলাহী একটু ভিমরি খেলো। এই ছেলে তো ঠিকই বলেছে। ইন্টারকমে জবাব না দেয়াটা মোটেও অস্বাভাবিক কোনো ঘটনা নয়। এলাহী বুঝতে পারলো সে অতিমাত্রায় সন্দেহপ্রবণ হয়ে উঠছে দিনকে দিন। এটা হলো চোরবাটপারদের

সাথে থাকার কুফল। সব কিছুতেই সন্দেহ করা তার বাতিক হয়ে গেছে। তার এই স্বভাবটি বদলাতে হবে। এটা কোনো সুস্থ মানুষের লক্ষণ নয়। ইদানীং সে নিজের বউয়ের অগোচরে তার মোবাইল ফোন চেক ক'রে দেখে। মনের মধ্যে কেবল সন্দেহ আর অবিশ্বাস। কিন্তু পরক্ষণেই সি ই এ সিদ্ধিকীর ছেলের কথাটা মনে পড়তেই তার সন্দেহের ব্যাপারটা আবার মাথা চাড়া দিয়ে উঠলো।

“ঠিক আছে, তুমি যাও।” সমীরকে বিদায় ক'রে দিলো সে। চেয়ার ছেড়ে উঠতেই মনে মনে একটা সিদ্ধান্ত নিয়ে ফেললো ইস্পেক্টর এলাহী নেওয়াজ।

* * *

বর্ষা খুব চিন্তায় পড়ে গেছে। পুলিশ তাদের অ্যাপার্টমেন্টে কেন ফোন করলো? ব্যাপারটা কি? বার বার পুলিশ আসছে কেন? অজানা আশংকায় রক্ত হিম হয়ে এলো তার। কেউ কি বুঝে ফেলেছে? অসম্ভব! তারা এতো বেশি সতর্ক যে, এই বাড়িতে যে দু'জন কাজের মানুষ আর একজন নার্স আছে তারাও কিছু বুঝতে পারে নি।

এই অ্যাপার্টমেন্টটা দুটো ফ্ল্যাটের সমন্বয়ে তৈরি করা হয়েছে, ফলে এর প্রবেশ দরজা দুটো। একটা ব্যবহার করা হলেও অন্যটা বন্ধ রাখা হয়। তবে সাত-আট মাস আগে স্ট্রাকের পর লেখক পক্ষাঘাতগ্রস্ত হয়ে পড়লে সেই দরজাটা খোলা হয়েছে আবার। এটি দিয়ে প্রবেশ করলে যে ঘরটা প্রথমে পড়ে সেটা আগে ড্রইংরুম থাকলেও এখন এটাকে বর্ষা তার বেডরুম হিসেবে ব্যবহার করে। লেখকের সাথে তার থাকা হয় না। তার পক্ষে পক্ষাঘাতগ্রস্ত একজন মানুষের সাথে রাত কাটানো সম্ভব নয়। লেখককে দেখাশোনা করার জন্যে নিয়োজিত আছে একজন সার্বক্ষণিক নার্স। সেই নার্স থাকে লেখকের ঘরের ঠিক পাশেই। আগে লেখক যে ঘরে লেখালেখির কাজ করতেন এখন সেখানেই তিনি থাকেন-থাকেন মানে, মরার মতো পড়ে থাকেন।

বর্ষার ঘর এই ফ্ল্যাট থেকে একেবারে বিচ্ছিন্ন, তবে এই ঘরের ডান দিকের দেয়ালের পেছনেই রয়েছে লেখকের ঘরটি।

বর্ষা আর তার প্রেমিকের চোখে এক ফোঁটাও ঘুম নেই। বেচারা টেনশন দূর করার জন্যে আরেকটা সিগারেট ধরিয়েছে। বর্ষার চেয়ে সে আরো বেশি চিন্তিত, তবে ভাব করছে একটুও ভয় পায় নি। বর্ষার কাছে নিজের পৌরুষ জাহির করার চেষ্টা করছে সে। একটু আগেই ফজরের আজান হয়েছে। দিনের আলো ফুঁটতে শুরু করেছে এখন।

নীচের রাস্তায় একটা গাড়ি থামার শব্দ শুনতে পেয়ে উদ্ভিন্ন হয়ে বেলকনির স্লাইডিং ডোরের পর্দার আড়াল থেকে দেখার চেষ্টা করলো বর্ষা ।

যে দৃশ্য সে দেখতে পেলো সেটা তার হৃদস্পন্দনকে কয়েক মুহূর্তের জন্যে থামিয়ে দিলো । হারিয়ে ফেললো নড়াচড়ার শক্তি ।

এলাহী নেওয়াজের দু'চোখ জুড়ে ঘুম নেমে এলেও চোখ দুটো টেনে টেনে ভিটা নুভার পাঁচ তলার কর্নার ফ্ল্যাটের দিকে তাকালো । পুলিশের জিপটা একটু আগে ভিটা নুভার'র সামনে এসে থেমেছে । ফজরের আজান হয়েছে কিছুক্ষণ আগে । পথে হাতেগোনা কিছু লোকজন দেখা যাচ্ছে । নামাজ পড়তে যাচ্ছে তারা । একটু পরে এই এলাকার অনেক লোকে জগিং করতে বের হবে । অ্যাপার্টমেন্টের সামনে এসে এলাহীর তেমন অস্বাভাবিক কিছু চোখে পড়ছে না । কিন্তু এমনও তো হয়, বাইরে থেকে সব ঠিকঠাক-ভেতরে অন্য কিছু । এর আগের ডাকাতির ঘটনাটি এ রকমই ছিলো ।

এলাহী সিদ্ধান্ত নিলো অ্যাপার্টমেন্টের ভেতরে না গিয়ে সে কোনোভাবেই নিশ্চিত হবে না । এখন ভোর হয়ে গেছে । এই সকালে কাউকে ঘুম থেকে ওঠালে খুব বেশি অন্যায্য হবে না । এখন তো অনেকে ঘুম থেকে উঠেও গেছে ।

দাডোয়ান ছেলেটা আবারো পুলিশের আগমনে শুধু অবাकই হলো না, তার চোখেমুখে স্পষ্ট বিরক্তি । এই অ্যাপার্টমেন্টে এমন কি হয়েছে যে একটু পর পর পুলিশ আসছে?

এলাহী তার তিন জন কনস্টেবলের দু'জনকে নিয়ে ভেতরে ঢুকে পড়লো, একজনকে রাখলো গেটের বাইরে ।

“ঐ ফ্ল্যাটের লোকজনকে এখান থেকে কেমনে ফোন করা যায় রে?” এলাহী জিজ্ঞেস করলো দাডোয়ান ছেলেটাকে ।

“ইন্টারকম দিয়া করা যায়, স্যার,” ছেলেটা জবাব দিলো ।

“ফোন কর ।”

কয়েক বার রিং হলেও কেউ ধরলো না । এলাহী নেওয়াজ আবারো ইশারা করলো রিং করার জন্যে ।

রিং হচ্ছে । কেউ ধরছে না ।

“স্যার, ধরছে,” দাডোয়ান রিসিভারটা এলাহীর দিকে বাড়িয়ে দিয়ে বললো ।

“হ্যালো ।” নারী কণ্ঠটা খুবই কাঁপা আর ভীত ।

“আমরা ধানমণ্ডি থানা থেকে এসেছি,” বললো এলাহী ।

“কি জন্যে?” কণ্ঠটা আরো ভয়াবহ শোনাচ্ছে এখন ।

ডাকাত দলের লোকজন মহিলাকে পিস্তল ঠেকিয়ে কথা বলাচ্ছে। ডাকাতির সময় এরকম ঘটনা হতেই পারে। এলাহীর উর্বর মস্তিষ্কের কল্পনার ডানা পাখা মেলতে শুরু করলো। গাজার নেশা খুব গাঢ় হতে শুরু করেছে। “আপনার অ্যাপার্টমেন্টে কোনো সমস্যা হয়েছে কি, ম্যাডাম?”

“সমস্যা!”

“মানে কোনো রকম—”

মহিলা তার কথা শেষ করতে দিলো না। “না। না। কোনো সমস্যা নেই। সব ঠিক আছে।”

এলাহীর সন্দেহ আরো বেড়ে গেলো। মহিলা এতো তাড়াহুড়ার ভাব করছে কেন? “ঠিক আছে, আমরা আপনার ফ্ল্যাটে একটু আসতে চাইছি।”

“কেন?” সঙ্গে সঙ্গে অনেকটা প্রতিবাদের সুরে বললো মহিলা।

“একটু দেখার জন্যে। কোনো সমস্যা না হলে তো ভালোই। আপনাদের ডিস্টার্ব করবো না। শুধু এসে দেখে যাবো।”

“আমি বুঝতে পারছি না, আপনারা খামোখা কেন আমাদেরকে এতো সকালে বিরক্ত করবেন? আপনারা কি জানেন না লেখক জায়েদ রেহমান এই ফ্ল্যাটে থাকেন। উনি খুব অসুস্থ।”

“জানি, ম্যাডাম। আর সেজন্যেই তো একটু চেক ক’রে—”

এলাহী কথাটা পুরোপুরি শেষ করতে পারলো না। টৌলিফোনের অপরপ্রান্ত থেকে চাপা একটা আর্তনাদ শোনা গেলো। আরেকটা মেয়েলী কণ্ঠ!

ফোনের অপরপ্রান্ত থেকে আর কোনো জবাব পাওয়া যাচ্ছে না এখন। এলাহীও সেই জবাবের অপেক্ষায় নেই। রিসিভারটা রেখে সোজা লিফটের দিকে ছুটে চললো দু’জন কনস্টেবলকে নিয়ে।

লিফটটা যখন ছয় তলার দিকে উঠে যাচ্ছে এলাহী টের পেলো তার হৃদপিণ্ডটা রীতিমতো লাফাচ্ছে। সেই সাথে এও মনে হচ্ছে, খুব ধীর গতিতে উঠছে লিফটটা।

চারতলায় পৌছাতেই এলাহীর কপাল বেয়ে ঘাম ঝরতে শুরু করলো শীতের এই কুয়াশাচ্ছন্ন ভোরে। সে বুঝতে পারছে বিরাট একটা সমস্যা হয়েছে। তার আশংকাই সত্যি হতে যাচ্ছে। ঘটনা খুবই খারাপ। খুব খারাপ!



শীতের দিনে ভোর বেলায় ঘুম থেকে উঠতে বেগ'র কোনো বেগ পেতে হয় না। বিগত তিন বছর ধরে সে ভোর বেলায় নিয়মিত জগিং ক'রে আসছে। ভার্জিনিয়ায় ট্রেনিং নিতে যখন গেলো তখন থেকেই এই অভ্যাস। তার রুমমেট ছিলো এক আমেরিকান তরুণ। আপাত দৃষ্টিতে তাকে বিট জেনারেশনের একজন মনে হলেও স্বাস্থ্য সচেতন এক যুবক। যৌন জীবন আরো বেশি সক্ষম আর দীর্ঘস্থায়ী করতেই নাকি সে জগিং করে। শরীরটাকে ফিট রাখে। বেগ অবশ্য এরকম কোনো কারণে নয়, তার পেশা এরকম ফিটফাট থাকাটা দাবি করে। সেই আমেরিকান তরুণ এখন এফবিআই'র উদীয়মান কর্মকর্তা। সে-ই তাকে জোর ক'রে ঘুম থেকে তুলে জগিং করতে নিয়ে যেতো। পুরো একটি বছর এরকম করতে করতে জগিং করাটা তারও অভ্যাস হয়ে গেছে। কেবল শরীর খারাপ থাকলে এর ব্যত্যয় ঘটে। বৃষ্টিতেও তার জগিং চলে সীমিত পরিসরে। এক নাগারে দু'তিন মাইল না দৌড়ালে এখন ম্যাজ ম্যাজ করে তার শরীর।

ধানমণ্ডির আট নাম্বারের লেকের সামনে ফুচকার যে ভ্রাম্যমান দোকানটা আছে সেখানে এসে হাপিয়ে গেলো সে। ব্যক্তিগত একটা কারণে তার মনমেজাজ ভালো নেই তাই দৌড়াতে দৌড়াতে প্রতিদিনকার চেয়ে অনেক বেশি পথ জগিং ক'রে ফেলেছে। রাশান কালচার সেন্টারের সামনে আসতেই বিপরীত দিকের ফুটপাতে ব'সে পড়লো বেগ।

কোমরে বেণ্টের সাথে লাগানো ক্যান থেকে পানি খেয়ে নিলো। দম ফুরিয়ে এখন হাফাচ্ছে। এক দু'মিনিটেই শ্বাসপ্রশ্বাস ঠিক হয়ে যাবে। সারাটা শরীর ঘেমে একেবারে ভিজে গেছে তার। গায়ের টি-শার্টটা ভিজে ঘাম চুইয়ে পড়ছে। ট্রাউজারের কিছু অংশ পর্যন্ত ভিজে একাকার। সব সময়ই এরকমটি হয়। এটাই জগিংয়ের উদ্দেশ্য। তোমার শরীর যতোক্ষণ না ঘেমে উঠবে, বুঝবে জগিং হয় নি। রবার্ট অ্যালান জিয়ারম্যান, সেই আমেরিকানটি তাকে সব সময় এ কথা বলতো।

ক্যানের অবশিষ্ট কিছু পানি দিয়ে মুখটাও ভিজিয়ে নিলো। ঘামে ভিজে

যাওয়া মাথার চুলগুলো হাত দিয়ে ব্যাক ব্রাশ ক'রে হাতের স্পোর্টস ঘড়িটায় দেখলো সকাল ৬টা ২০মিনিট।

রাশান কালচার সেন্টারের মূল প্রবেশ পথের ডান দিক থেকে একটা পরিচিত গাড়ি আসতে দেখে অবাকই হলো সে। গাড়িটা তার সামনে এসে থেমে গেলে সিটি হোমিসাইডের সহকারী ইনভেস্টিগেটর জামান বের হয়ে এলো।

বেশি দিন হয় নি ডিপার্টমেন্টে চুকেছে ছেলেটি। খুবই কর্মঠ। এখনও বিয়ে করে নি, ফলে রাতের ডিউটি তার ভাগেই বেশি পড়ে। এটাকে তারা বলে অনলাইন ডিউটি। একটা ফোনের সামনে সারাটা রাত বসে থাকা। খুব কমই ইমার্জেন্সি কল আসে। তারপরেও কাজটার গুরুত্ব অনেক। ছেলেটার রাত জাগার অভ্যাসের কারণে এই ডিউটিতে তাকে রাখা হয়।

জেফরি বেগ ব'সে থেকেই বললো, “কি ব্যাপার?” তার নিঃশ্বাস এখনও স্বাভাবিক হয় নি।

“ধানমণ্ডি থানায় একটা ঘটনা ঘটেছে,” বললো জামান। “হোমিসাইডকে প্রাথমিক তদন্ত করা জন্য বলা হয়েছে, স্যার।”

“ঘটনা কি?”

“লেখক জায়েদ রেহমান মারা গেছেন।”

বিস্মিত হলো বেগ। কেউ মারা গেলে পুলিশের কি? স্বাভাবিক মৃত্যু নিয়ে তো পুলিশকে মাথা ঘামাতে হয় না, সে যতো বড় ভিআইপি-ই হোক না কেন। এই ছেলেটা বলছে, লেখক জায়েদ রেহমান মারা গেছেন। খুন হয়েছেন বলছে না কেন? যদি বলতো খুন হয়েছে বেগ মোটেও অবাক হতো না। হোমিসাইডে ঢোকান পর এরকম কথা শুনে সে অভ্যস্ত হয়ে গেছে। অবশ্য জামান ভুল করেও খুন না বলে মারা গেছে বলতে পারে।

“কখন?” ছোট্ট ক'রে জানতে চাইলো সে।

“মনে হয় বেশিক্ষণ আগে নয়। আমরা কনফার্ম হয়েছি এইমাত্র। এক ঘণ্টা আগে,” গাড়িতে উঠতে উঠতে জামান বললো। সে আগে বেগকে ওঠার জন্যে পেছনের সাইড দরজাটা খুলে দিয়ে নিজে বসলো ড্রাইভারের পাশে।

“তুমি বলছো মারা গেছে, খুন হন নি। তাহলে আমাদের দরকার পড়লো কেন?” বেগ ধীর কণ্ঠে বললো।

“স্যার, আসলে কেউ বুঝতে পারছে না, উনি মারা গেছেন নাকি খুন হয়েছে। এজন্যেই হোমিসাইডকে ডেকে পাঠানো হয়েছে। ফারুক স্যার আপনার মোবাইলে কল করে পান নি। আমাকে বললেন আপনাকে বাড়ি থেকে তুলে ক্রাইমসিনে নিয়ে যেতে। কিন্তু আমি তো জানি আপনি এই সময় এখানে জগিং করেন।”

“আচ্ছা,” বেগ ব্যাপারটা নিয়ে মোটেও মাথা ঘামালো না। ঘটনাছিল গিয়েই দেখবে কী হয়েছে। আগেভাগে মাথা খাটিয়ে লাভ নেই। হত্যার ঘটনা সব সময়ই জটিল।

“ব্যাপারটা কি সবাই জানে?” বেগ জিজ্ঞেস করলো।

জামান বুঝতে পারছে সবাই বলতে আসলে মিডিয়ার কথাই বলা হচ্ছে। “না, এখনও জানে না, স্যার।”

“ভালো।” মিডিয়ার ব্যাপারে তাদের ক্ষোভ রয়েছে। সব সময়ই কাজে বিঘ্ন সৃষ্টি করে তারা। ঝামেলা বাধানো তাদের প্রধান কাজ। তদন্ত করার সময় তাদের প্রচারণা আর রিপোর্ট বেশিরভাগ ক্ষেত্রে কোনো কাজেই লাগে না। “আমাদের ইউনিট কি ওখানে পৌঁছে গেছে?”

“হ্যা, বাকিরা অনেক আগেই চলে গেছে।”

“জায়েদ রেহমান তো একটা অ্যাপার্টমেন্ট থাকেন, না?” বেগ বললো।

“হ্যা। আপনি চেনেন নাকি?” জামান জানতে চাইলো।

“হ্যা, চিনি। একবার একটা কাজে গিয়েছিলাম।” একটু চুপ থেকে আবার বললো, “আগে আমার বাড়িতে চलो। জামা কাপড় পাল্টে নিতে হবে। এই ফাঁকে তুমি ফটোগ্রাফার আর ফিসার-প্রিন্ট টিমকে ওখানে পাঠিয়ে দাও। ওদের বলে দাও আমি না আসা পর্যন্ত কেউ যেনো কোনো কিছু স্পর্শ না করে। মোবাইল এভিডেন্স টিমকেও রেডি হতে বলে দাও। আর ঐ অ্যাপার্টমেন্টের কেউ যাতে বাইরে যেতে না পারে সেটা নিশ্চিত করো। আমরা পনেরো মিনিটের মধ্যেই পৌঁছে যাবো।”

“নাস্তা করবেন না?” জামান জানতে চাইলো।

“না। কাজ শেষ ক’রে করবো।” জামানের দিকে তাকিয়ে বেগ বললো, “তুমি নাস্তা করেছো?”

“না, স্যার।”

“তাহলে আমরা দু’জনেই একসাথে নাস্তা করছি।”

“এখন করবেন নাকি পরে?” জানতে চাইলো জামান।

“আমারা একসাথেই নাস্তা করবো।”

“দেয়ি হয়ে যাবে না?”

“মনে হচ্ছে খুব বেশি সময় লাগবে না,” বেগ হেসে বললো।

কিন্তু তার ধারণাই নেই কতো সময় লাগতে পারে। দিনটা তার জন্যে স্বরণীয় হয়ে থাকবে বিভিন্ন কারণে। দীর্ঘ দিন পর সকালের নাস্তা ছাড়াই একটা দিন পার করতে যাচ্ছে সে।

তাদের গাড়িটা ভিটা নুভা'র সামনে আসতেই বেগ দেখতে পেলো গেটের সামনে কোনো জটলা নেই। সব কিছুই স্বাভাবিক। সকাল সাতটা। রাস্তায় অল্প কিছু যানবাহন আর লোকজন রয়েছে। পুরো শহরটা জেগে উঠছে আস্তে আস্তে। জগাররা জগিং করতে বের হচ্ছে, আর যারা আগেভাগে বের হয়েছিলো তারা ফিরতে শুরু করেছে এখন।

ভালো, মনে মনে বললো বেগ।

গাড়ি ড্রাইভ করতে করতে জামান পুরো ঘটনাটা যতোদূর সম্ভব বেগকে বলেছে ইন্সপেক্টর এলাহী মাঝরাতে টহলগাড়িতে করে ঐ অ্যাপার্টমেন্টের সামনে দিয়ে যাবার সময় এক তরুণকে সন্দেহজনকভাবে ঘোরাঘুরি করতে দেখা থেকে শুরু করে সবই সংক্ষেপে বলে গেলো সে।

ছেলেটাকে অবশ্য ধরতে পারে নি ইন্সপেক্টর। পালিয়ে গেছে। থানায় ফিরে এসে এলাহী সাহেবের মনে সন্দেহ হলে একজন সাব ইন্সপেক্টরকে পাঠায় ভিটা নুভায়। কিন্তু এতেও যখন এলাহী সন্তুষ্ট হতে পারে না তখন থানা থেকে বাড়ি ফেরার পথে ভিটা নুভায় যায়। বাইরে থেকে সব কিছু ঠিক থাকলেও ইন্সপেক্টর অদ্রলোক নিশ্চিত হবার জন্য পার্কিং এরিয়ার ইন্টারকম থেকে লেখক জায়েদ রেহমানের অ্যাপার্টমেন্টে কল করে। রিসিভার তুলে নিয়েছিলেন লেখকের স্ত্রী। তার সঙ্গে কথা বলার সময়ই ফোনের অপরপ্রান্ত থেকে একটা নারী কণ্ঠের চিৎকার শুনে ইন্সপেক্টর ছুটে যায় অ্যাপার্টমেন্টের ভেতর। ওখানে গিয়ে লেখক জায়েদ রেহমানকে নিজের শয্যায় মৃত অবস্থায় পায় সে।

পরে জানতে পারে লেখকের হাউজনার্স ভোর সাড়ে পাঁচটার দিকে যথারীতি ঘুম থেকে উঠে লেখকের মলমূত্র পরিষ্কার করার জন্য ঘরে ঢুকতেই এক ভয়ঙ্কর দৃশ্য দেখতে পেয়ে ভড়কে যায়। পঞ্চাশোর্ধ মহিলা বেশ শক্তসামর্থ্য হলেও নিজের আর্ত চিৎকার থামতে সক্ষম হয় নি। আর সেই চিৎকারই ইন্সপেক্টর এলাহীকে ঘটনাস্থলে টেনে নিয়ে আসে।

লেখকের মুখে একটা বালিশ চাপা দেয়া ছিলো। অভিজ্ঞ হাউজনার্স ভড়কে গেলেও সেই বালিশটা সরিয়ে দেখে নি। মহিলা তার দীর্ঘ নার্সিং জীবনে আইনপ্রয়োগকারী সংস্থার লোকজনকে অনেকবারই মোকাবেলা করেছে। সে জানে অস্বাভাবিক মৃত্যু ঘটলে আলামত সংগ্রহের জন্যে লাশের সুরতহাল অবিকৃত রাখতে হয়। অবশ্য লেখকের স্ত্রীকে মহিলা ব্যাপারটা বুঝিয়ে বলার আগেই পুলিশ এসে হাজির হয় তাদের অ্যাপার্টমেন্টে।

মহিলা শুধুমাত্র লেখকের নাড়িস্পন্দন পরীক্ষা করা ছাড়া আর কিছু করে নি। তার অবশ্য এ কাজটা করার কোনো দরকার ছিলো না। দীর্ঘ কর্মজীবনে সে অনেক লাশ দেখেছে। লেখকের বরফের মতো ঠাণ্ডা আর ফ্যাকাশে হাতটা

ধরতেই মহিলা বুঝতে পেরেছিলো বেশ কয়েক ঘণ্টা আগেই তিনি মারা গেছেন ।

পুরো বাড়িতে লেখক, তার স্ত্রী আর দুই বছরের সন্তান ছাড়াও দু'জন কাজের লোক আর একজন হাউজনার্স থাকে । লেখকের স্ত্রী অন্য একটা ঘরে ঘুমান । বাড়িতে কারো ঢোকা কিংবা বের হবার কথা জানা যায় নি । কেউ বলেও নি ।

“অ্যাপার্টমেন্টের অন্য অ্যালোটিরা কি জানে জায়েদ রেহমান মারা গেছেন?” জামানকে জিজ্ঞেস করলো বেগ ।

গাড়িটা ভিটা নুভায় প্রবেশ করলো । ওখানকার দাড়াওয়ান আসলামের জায়গায় এখন গেট নিয়ন্ত্রণ করছে ধানমণ্ডি থানার এক কনস্টেবল । সে-ই গেটটা খুলে তাদের গাড়িটা ঢুকতে দিলো । গাড়ির নাম্বার প্লেট দেখে পুলিশের চিনতে অসুবিধা হয় নি, এটা সিটি হোমিসাইডের গাড়ি । জামান নিজেই ডাইভ করছে । গাড়িটা পার্ক ক’রে সে বেগের প্রশ্নের জবাব দিলো । “জানে, তবে তাদের সবাইকে আপাতত মুখ বন্ধ রাখতে বলা হয়েছে । তাদেরকে জানানো হয়েছে সবাইকে জিজ্ঞাসাবাদ করা হবে । এটা শুনে ভয়ে চূপ মেরে আছে সবাই ।”

“ভালো,” মুচকি হেসে ছোট্ট ক’রে বললো বেগ । মুখ বন্ধ রাখার ভালো ব্যবস্থা এটা ।

গাড়ির ইঞ্জিন বন্ধ ক’রে জামান বললো, “খুব বেশি লোক এখানে থাকে না, স্যার ।”

বেগ কিছু বললো না । পার্কিং এলাকার দিকে তার চোখ । এলাকাটি বেশ বড় । নিজেই দরজা খুলে বের হয়ে এলো সে ।

ছয় তলার অ্যাপার্টমেন্টের গ্রাউন্ড ফ্লোরটার পুরোটাই পার্কিংএরিয়া, দাড়াওয়ানদের ছোটো ছোটো দুটো ঘরও আছে সেখানে ।

“স্যার, এই দিকে আসুন,” জামান লিফটের দিকে এগোতে এগোতে বললো ।



অধ্যায় ৬

সারা রাতে এক মিনিটের জন্যেও সি ই এ সিদ্দিকী ঘুমাতে পারেন নি।

জরুরি যে ফোনটার জন্য অপেক্ষা করছিলেন সেটা এসেছে অনেক দেরিতে কিন্তু সে কারণে নয়, তার মেজাজ খারাপ হয়ে আছে একমাত্র সন্তান ইরামকে ভোরবেলা থানা থেকে ছাড়িয়ে আনার ঘটনায়।

পুরো ব্যাপারটায় তিনি বিরক্ত এবং যারপরনাই হতাশ। এই ছেলেকে কোনোভাবেই আঁটকে রাখতে পারেন না। আজ দু'বছর ধরে মারাত্মক এক নেশায় আসক্ত হয়ে পড়েছে ইরাম। সিদ্দিকী সাহেব ব্যবসার কাজে ব্যস্ত থাকেন, মা মরা এই ছেলেটার দেখাশোনা করে সিদ্দিকী সাহেবের এক বিধবা খালাতো বোন। বাড়িতে সাত জন কাজের লোকের চোখ ফাঁকি দিয়ে বার বার এই ছেলেটা কিভাবে বাইরে চলে যায় সেটা সিদ্দিকী সাহেবের কাছে একটা রহস্যই বটে। তিন তিনবার তাকে রিহাব্যে ভর্তি করিয়েও কোনো ফল পাওয়া যায় নি। তার স্মার্ট ছেলে তিনবারই কড়া নিরাপত্তার মধ্য থেকে পালিয়েছে।

প্রথমবার যখন পালালো তখন ভাগ্য ভালো ছিলো। দু'ঘণ্টার মধ্যেই তাকে ধরে ফেলা সম্ভব হয়েছিলো পুলিশের কল্যাণে। দ্বিতীয়বার তাকে খুঁজে বের করতে আড়াই দিন লেগে যায়। সিদ্দিকী সাহেবের ঘনিষ্ঠ লোক অমূল্য বাবুর কারণে সেবার তাকে ধরা হয় বনানীতে তার মায়ের কবরের সামনে থেকে। কাকতালীয়ভাবে ঐদিনটি ছিলো তার মায়ের মৃত্যুবার্ষিকী।

কিন্তু মাসখানেক আগে যখন পালালো তখন বাপের ঘাম ঝরিয়ে ছেড়েছে। পুরো একটা সপ্তাহ তাকে পাওয়া যায় নি। তৃতীয় দিনের মাথায় পুলিশের কথামতো পত্রিকায় ছবিসহ বিজ্ঞাপন দিলে কয়েক দিন পর তার সন্ধান পাওয়া যায়। বলাই বাহুল্য বিজ্ঞাপনে পুরস্কার হিসেবে যে টাকার কথা ছিলো সেটা মোটা অঙ্কের ছিলো না। সিদ্দিকী সাহেবের জন্য অবশ্য মোটা অঙ্কের পুরস্কার দেয়া কোনো ব্যাপারই ছিলো না, কিন্তু তিনি ভালো করেই জানেন, এতে ক'রে লোভী আর অপহরণকারীদেরকেই প্রলুব্ধ করা হবে। খুব সতর্কতা অবলম্বন করেই বিজ্ঞাপনের ভাষা এবং পুরস্কারের টাকার পরিমাণ নির্ধারণ করা হয়েছিলো

মানসিক ভারসাম্যহীন এক ছেলে। এতিমখানা থেকে পালিয়েছে!

রাঙামাটি থেকে এক আর্মি অফিসার তাকে পাকড়াও ক'রে বিজ্ঞাপনে দেয়া এতিমাখানার নাম্বারে ফোন করলে ফোনটা আসলে ধরেছিলো অমূল্য বাবু ।

সিদ্ধিকি সাহেবের স্মার্ট ছেলে রাঙামাটিতে এক শিব মন্দির খুঁজতে বেরিয়েছিলো । একটা বইতে এ সম্পর্কে আজগুবি কিছু কাহিনী পড়ে তার ভেতর অ্যাডভেঞ্চারের নেশা চাপে ।

বই, মনে মনে বললেন সি ই এ সিদ্ধিকী । তার আরেকটা নেশা ।

অমূল্য বাবু ঘরে ঢুকতেই তার ভাবনায় ছেদ পড়লো ।

তার সব কর্মচারীর মতো অমূল্য বাবু কখনই তাকে সালাম কিংবা নমস্কার দেয় না । মৃদুভাষী এই লোক প্রতিদিন সকালে মৌনব্রত পালন করে । খুব ভোরে ঘুম থেকে উঠলেও সকাল দশটার আগে কোনো রকম কথাবার্তা বলে না । তবে আজ সেই ব্রত বজায় রাখা সম্ভব হবে না ।

তাকে দেখে সিদ্ধিকী সাহেব অনেকটা হাফ ছেড়ে বাঁচলেন । এই লোক হচ্ছে তার সমস্ত মুশকিল আসান । মাঝে মাঝে তার মনে হয় অমূল্য বাবুর মধ্যে অলৌকিক কোনো ক্ষমতা আছে বুঝি । এখন পর্যন্ত কোনো কাজে ব্যর্থ হয় নি এই লোক । দীর্ঘ চল্লিশ বছর ধরে আছে সিদ্ধিকী সাহেবের সঙ্গে । এটা বন্ধুত্ব কিংবা মালিক-কর্মচারী সম্পর্কের অনেক উর্ধ্ব ।

অমূল্য বাবু কোনো কথা না বলে সিদ্ধিকী সাহেবের সামনের চেয়ারে বসে পড়লো ।

তারা বসে আছে সিদ্ধিকী সাহেবের বাড়ির স্টাডিরুমে । এটা এক রকমের অফিসঘরই । এখান থেকে তিনি তার ব্যবসায়ী সাম্রাজ্য পরিচালনা করে থাকেন । দিন এবং রাতের বেশিরভাগ সময় এখানেই কাটিয়ে দেন তিনি । গতকাল রাত বারোটোর পর ঢাকা ক্লাব থেকে ফিরে এসে এ ঘরেই আছেন । মাঝে ভোরবেলায় অল্প সময়ের জন্য একটু বাইরে যেতে হয়েছিলো-ধানমণ্ডি থানায় ।

সিদ্ধিকী সাহেব বুঝতে পারছেন না অমূল্য বাবুর মৌনতা তিনি নিজে ভাঙবে কিনা । একটু সময় চুপ ক'রে থাকলেন এই আশায়, বাবু হয়তো নিজেই নিজের ব্রত ভাঙবে ।

তাই হলো ।

“থানায় কি রেকর্ড আছে?” নম্রকণ্ঠে জানতে চাইলো অমূল্য বাবু ।

ইরামের গ্রেফতার হওয়া এবং থানা থেকে তাকে ছাড়িয়ে আনার সব ঘটনাই অমূল্য বাবু জানে । তার উকিল রফিকউল্লাহ থানা থেকে অমূল্য বাবুর বাড়ি গিয়ে সব বলে এসেছে । অমূল্য বাবু তখনও নিজের মৌনতা ভঙ্গ করে নি । কেবল চুপচাপ শুনে গেছে । আর একতরফাভাবে পুরো ঘটনা বলতে গিয়ে রফিকউল্লাহর মনে হয়েছিলো এরচেয়ে বিরক্তিকর কাজ পৃথিবীতে দ্বিতীয়টি নেই । যেনো মরা

কোনো লাশের কানে কানে ঘটনাটা বলে যাচ্ছে সে ।

এ কেমন লোক! কোনো রকম কৌতুহলী হয়ে প্রশ্নও করলো না! অমূল্য বাবুর বাড়ি থেকে বের হবার সময় রফিকউল্লাহ ভেবেছিলো ।

“না । খান নিজে ফোন করে ব্যাপারটা মিটমাট করেছে,” সিদ্দিকী সাহেব বললেন । এই খান হলো বর্তমান স্বরাষ্ট্রমন্ত্রী ফরহাদ খান ।

বাবু কিছু বললো না । অনেকক্ষণ চুপ থেকে নিষ্পলক চোখে চেয়ে বললো, “এখন কি করতে চাচ্ছেন?”

“দেশের বাইরে পাঠাতে চাইছি,” কথাটা আগে থেকেই ভেবে রেখেছিলেন তিনি ।

“কোথায়?”

“কোথায় পাঠাবো সেটা বড় কথা নয়, কতো দ্রুত পাঠানো যাবে সেটাই হলো সমস্যা ।”

অমূল্য বাবু একটু ভাবলো । “কবে পাঠাতে চাচ্ছেন?”

“আজই । পারলে এক্ষুণি ।”

গাড়িতে ক’রে আসার সময়ই বাবু ভেবে রেখেছিলো সম্ভাব্য কি করা যেতে পারে । “ঠিক আছে ।” অমূল্য বাবু কথাটা এমনভাবে বললো যেনো সব সমস্যার সমাধান হয়ে গেছে ।

সিদ্দিকী সাহেব এই ছোট্ট কথাটা শুনে যে স্বস্তি পেলেন সেটা ভাষায় প্রকাশ করা যাবে না । যেনো তিনি নিজেও জানেন অমূল্য বাবু সমস্যার সমাধান করে ফেলেছেন । অনেকটা নির্ভর হয়ে বললেন, “তাহলে এখন কি করতে হবে?”

“আপনাকে কিছু করতে হবে না । আপনি একদম স্বাভাবিক থাকুন । আমি দেখছি ।”

সিদ্দিকী সাহেব এমনভাবে তাকালেন যেনো আরো কিছু জানতে চাইছেন তিনি ।

“ইরামকে বিদেশের কোনো রিহাবে অ্যাডমিট করিয়ে দেবো । ইউরোপ-আমেরিকায় এখন পাঠানো যাবে না । সময় লাগবে । বোম্বেতে একটা ভালো রিহাব আছে । প্রেয়ারহল । ওখানে ভর্তি করানো যাবে । আমি ব্যবস্থা করছি ।”

“বোম্বে? ওকে, ফাইন । আজ কখন ফ্লাইট ধরতে পারবো?” সিদ্দিকী সাহেব জানতে চাইলেন ।

একটু চুপ ক’রে রইলো অমূল্য বাবু । যেনো মনে মনে হিসেব ক’রে নিচ্ছে । “...দেখি কতো তাড়াতাড়ি করা যায় । আশা করছি বিকেলের মধ্যেই সম্ভব হবে ।”

সিদ্দিকী সাহেব এতোটা আশা করেন নি । অতীতের অজস্রবারের মতোই

আরেকবার অমূল্য বাবুর কাছ থেকে ম্যাজিকের মতো সমাধান পাচ্ছেন তিনি ।
“ওকে, দ্যাটস গুড । একাউন্ট ম্যানেজারকে বলে দিচ্ছি আপনার যা যা লাগবে
তা যেনো দিয়ে দেয় ।”


উঠে দাঁড়ালো অমূল্য বাবু । দরজার কাছে থেমে ফিরে তাকালো সে । “ইরাম
এখন কোথায়?”

সিদ্ধিকী সাহেব ছাদের দিকে চোখ তুললেন । স্বল্পভাষী লোকের সংস্পর্শে
এসে তিনিও প্রভাবিত হয়ে পড়েছেন ।

“বিকেলের আগপর্যন্ত সামলে রাখুন ।”

কথাটা শুনে ভেতরে ভেতরে কাচুমাচু বোধ করলেন সিদ্ধিকী সাহেব । যেনো
তার গাফলতির জন্য মৃদু ভর্ৎসনা করা হয়েছে ।

অমূল্য বাবু নিজের মৌনতা ভাঙার জন্য একটুও অনুতপ্ত হলো না, কারণ
দিনটা আর সব দিনের মতো স্বাভাবিক নয় । আজ তাকে অনেক ফোন করতে
হবে । অনেক কাজ করতে হবে ।



অধ্যায় ৭

ভিটা নুভা অ্যাপার্টমেন্টের ছয় তলার দুটো ইউনিট নিয়ে থাকেন লেখক জায়েদ রেহমান। দুটো ইউনিটকে এক ক'রে চমৎকার একটা ফ্ল্যাটে রূপান্তরিত করা হয়েছে। ভেতরের ডেকোরেশন করেছে দেশের সবচাইতে নামী এক স্থপতি। পাঁচ বছর আগে জায়গাটা কিনে নেন, পরে ডেভেলপারকে দিয়ে অ্যাপার্টমেন্ট বানিয়েছেন তিনি। নিজের জন্য একটা রেখে বাকিগুলো বিক্রি ক'রে দিয়েছেন।

ভিটা নুভা-অ্যাপার্টমেন্টের এই নামটি লেখক নিজে দিয়েছেন। হেনরি ওয়ার্ডসওয়ার্থ লংফেলোর কাব্যগ্রন্থ *ভিটা নুভা*’র নামানুসারে এ নাম রেখেছেন তিনি, যার মানে নতুন জীবন। আক্ষরিক অর্থে এখানে চলে আসাটা তার জন্যে তা-ই ছিলো।

কয়েক বছর আগে লেখক তার প্রথম স্ত্রীকে তালাক দিয়ে এখানে ওঠেন। দ্বিতীয় স্ত্রীকে বিয়ে করার আগে একবছর লিভ টুগেদার করেছেন এই ফ্ল্যাটেই।

দু'বছর বয়সী এক ছেলে আর দ্বিতীয় স্ত্রীকে নিয়ে এখানে তিনি বসবাস করে আসছেন আজ কয়েক বছর ধরে। সারা জীবন রহস্য ক'রে যাওয়া লোকটি আজ হঠাৎ করে মারা গেলে আরো বড় একটা রহস্য তৈরি হয়েছে তার মৃত্যুকে ঘিরে। পুলিশকে এখন খুঁজে বের করতে হবে এটা কি স্বাভাবিক মৃত্যু নাকি হত্যাকাণ্ড।

একজন সেলিব্টি হওয়ায় সিটি হোমিসাইডকে প্রাথমিক তদন্তের দায়িত্ব দেয়া হয়েছে। তাদেরকে আগে বের করতে হবে এটা হত্যা নাকি স্বাভাবিক মৃত্যু। যদি হত্যা হয়ে থাকে তবে নিশ্চিতভাবে তাদের উপরেই এই হত্যার তদন্ত কাজটি দেয়া হবে।

সিটি হোমিসাইডের উদীয়মান ইনভেস্টিগেটর জেফরি বেগ বিশেষ বিশেষ হোমিসাইড কেসগুলো দেখাশোনা করে। আমেরিকার এফবিআই যে প্রশিক্ষণ নেয়, জেফরিরও রয়েছে ঠিক সেই প্রশিক্ষণ। এজন্যে তাকে ডিপার্টমেন্টে একটু পঁধার চোখে দেখা হয়। তবে এই সুযোগটি সে পেয়েছে নিজ যোগ্যতার বলেই। সর্বশেষ পরীক্ষা দিয়ে তাকে অর্জন করতে হয়েছিলো ভার্জিনিয়ার টিকেট। এক বছরের প্রশিক্ষণে জেফরি বেশ ভালো করেছে। এটা তার ইন্সট্রাক্টরের দেয়া

মূল্যায়ন রিপোর্টে উল্লেখ আছে। এফবিআই'র সাথে যোগাযোগ থাকায় দুয়েকটি আন্তর্জাতিক কেসও সে বেশ সফলতার সাথে সমাধা করেছে।

গত বছরের একটি বহুল আলোচিত ঘটনা তাকে একজন গোয়েন্দা হিসেবে দেশে ছোটোখাটো পরিচিতি এনে দিয়েছে। পত্রিকাগুলো তার ডাক নাম দিয়েছে জেফরি হোমস বলে। এটা জেফরির একদম অপছন্দ। শব্দটা ডিটেক্টিভদের জন্য 'ক্রিশে' পরিণত হয়েছে।

অবশ্য তার নিজের ডিপার্টমেন্টে তাকে অনেকেই জেফবিআই বলে ডাকে-জেফরি বেগ দ্য ইনভেস্টিগেটরের সংক্ষিপ্ত রূপ।

অ্যাপার্টমেন্টের ভেতরটা বহুমূল্যবান আসবাব দিয়ে সাজানো হয়েছে। এটা লেখকের দ্বিতীয় স্ত্রী বর্বার রুচির বর্হিপ্রকাশ। বিদেশী জিনিসের প্রতি যার রয়েছে দুর্বীর আকর্ষণ।

বেগ সরাসরি ক্রাইম সিনে চলে এলো।

বিশাল ঘরটা দেখে হল রুম বলেই মনে হচ্ছে। এই ঘরটা বিশেষভাবে বানানো হয়েছে লেখকের ফরমায়েশে।

ঘরে ঢুকেই জেফরি বেগ দেখতে পেলো একটা মেডিকেল বেডের চারপাশে তিন চারজন পুলিশ ঘিরে রয়েছে, তারা নিজেদের মধ্যে কথা বলছে। তাকে ঢুকতে দেখে পুলিশের দলটি নিজেদের মধ্যে কথা বলা থামিয়ে বিছানার কাছ থেকে সরে যেতেই লেখকের নিখর-নিশ্চাপ্রাণ দেহটি জেফরির গোচরে এলো। মুখে এখনও বালিশটা অবিকৃত অবস্থায়ই আছে।

একজন পুলিশ বেশ আগ্রহভরে তার দিকে এগিয়ে এসে নিজের পরিচয় দিলো। “স্যার, আমি ধানমণ্ডি থানার ইনস্পেক্টর এলাহী নেওয়াজ।”

এখানে আসার পথেই জামানের কাছ থেকে বেগ জানতে পেরেছে ধানমণ্ডি থানার ইন্সপেক্টর এলাহী নেওয়াজের কল্যাণে এই ঘটনাটি উদঘাটিত হয়েছে। বেগ প্রশংসার সুরে বললো, “ও, আপনিই তাহলে এলাহী নেওয়াজ! ওয়েল ডান,” বলেই হাতটা বাড়িয়ে দিলো ইন্সপেক্টরের দিকে।

এলাহী বেশ গর্বিতভাবে হাত মেলালো জেফরি বেগের সাথে।

“জেফরি বেগ,” নিজের পরিচয় দিয়ে বললো সে।

“জানি, স্যার, আপনাকে আমি চিনি।”

“আচ্ছা,” বলেই আনমনা হয়ে গেলো সে। তার নজর এখন মেডিকেল বেডে পড়ে থাকা মৃতদেহের দিকে। ইন্সপেক্টর এলাহী মৃতের মুখ থেকে বালিশটা সরিয়ে দিলো।

চোখ দুটো এখনও খোলা অবস্থায় আছে। বলা ভালো কোটর থেকে দুটো যেনো ঠিকরে বের হবার চেষ্টা করছে।

মুখটা একটু খোলা। লেখকের আধ বোজা দৃষ্টি তার বাম দিকে ফেরানো।

মাথাটা সেদিকেই কাত হয়ে আছে। ডান হাতটা বুকের বাম পাশে রাখা। মৃত্যুর আগ মুহূর্তে হয়তো বুকটা চেপে ধরেছিলেন।

দুয়েকটা মাছি লেখকের মুখের চারপাশে ভন ভন ক'রে উড়ে বেড়াচ্ছে। দৃশ্যটা বীভৎস্য। যতো সময় গড়াতে থাকে ততোই ভয়ংকর হতে শুরু করে লাশ। এমন কি মৃতের নিকটজনেরাও তখন ভয় পেতে শুরু করে। তাদের কাছে আর মনে হয় না এটা তাদেরই ঘনিষ্ঠজনের মৃতদেহ।

একটা কটু গন্ধ নাকে এলো বেগের। লাশ পচতে শুরু করেছে। এই গন্ধটি বাড়তে থাকবে। এক সময় অসহ্য ঠেকবে। বোঝাই যাচ্ছে মধ্যরাতে মারা গেছেন। অথবা খুন!

গল্পটা বলার জন্যে অনেকটা মুখিয়ে ছিলো এলাহী নেওয়াজ তবে বেগের মধ্যে সে রকম কোনো আগ্রহ দেখতে না পেয়ে হতাশই হলো সে। চারপাশে তাকিয়ে কিছু একটা ভাবছে বেগ। তার কাছ থেকে গল্প শোনার ব্যাপারে যে তার মনোযোগ নেই সেটা বুঝতে পেরে চুপসে গেলো এলাহী।

“গ্লাভস নিয়ে আসো,” বেগ জামানকে বললে সে পাশের ঘরে চলে গেলো। ঐ ঘরে ফাইন্ডার ইউনিটের লোকজন এসে নিজেদের সরঞ্জাম গোছগাছ করছে।

“আপনি খুব ভালো কাজ করেছেন। পরে আপনার সাথে কথা বলবো,” এলাহীকে বললো বেগ।

“স্লামালেকুম, স্যার।” এলাহী ঘর থেকে বের হয়ে আসার সময় মনে মনে ভাবলো জেফরি বেগের ধর্মটা কি? এর আগে এই প্রশ্নটি তার মনে উদয় হয় নি। কিন্তু এখন হঠাৎ করেই কথাটা মনে পড়লো।

বেগের পূর্ণ মনোযোগ এবার নিখর দেহটার দিকে। হাতে গ্লাভস পরে নিলো এই ঘরে যাতে কোনো লোকের আঙুলের ছাপ না পড়ে। ঘর থেকে সবাইকে বের হয়ে যেতে বলে দিলে জামান সবাইকে চলে যেতে বললো, রয়ে গেলো কেবল সে নিজে।

লাশের শরীরে এমন কোনো চিহ্ন নেই যে এটাকে হত্যাকাণ্ড বলে মনে করা যাবে। নিখর দেহটা বিছানায় পড়ে আছে—আট মাস ধরেই এভাবে পড়ে আছে মি: রেহমান। মুখটা হা করা। চোখ দুটো আধ বোজা। এটা কোনো অদ্ভুত ব্যাপার নয়। যদিও দেখতে খুব ভয়ঙ্কর দেখাচ্ছে।

জায়েদ রেহমানের পরনে আছে একটা ফতুয়া জাতীয় নাইটড্রেস আর পাজামা। শীতকাল বলে মোটা একটা কম্বলও রয়েছে গায়ে। সেটা বুকের নীচে নামানো।

“স্যার, উনার ওপেনহার্ট সার্জারি হয়েছিলো এক বছর আগে,” পাশ থেকে জামান আশ্চর্যে ক'রে বললো। আরেকটু উৎসাহী হয়ে উঠলো সে, “সার্জারির পর হার্ট অ্যাটাক হয়। শরীরের অবস্থা এমনভাবেও খুব একটা ভালো ছিলো না।”

“তোমার ধারণা এটা নেচারাল ডেথ?” বেগ লাশের দিকে তাকিয়েই বললো।

“সেটা কি ক’রে বলি? লাশের মুখের উপর বালিশ চাপা দেয়া ছিলো।”

মাথা নেড়ে সায় দিয়ে জেফরি বেগ লাশের একেবারে সামনে চলে গেলো। ফতুয়ার বুকের দিকটা একটু ফাঁক করে ওপেন হার্ট সার্জারি করার জায়গাটা দেখলো। কমপক্ষে চৌদ্দ ইঞ্চির মতো দীর্ঘ একটা কাটা দাগ। বেশ স্পষ্ট। বুকের ঠিক মাঝখানে। নাভির দু’ইঞ্চি উপরে থেমে গেছে, আর শুরু হয়েছে গলার দু’ইঞ্চি নীচ থেকে।

বুকের বাম দিকে, যেখানে হৃদপিণ্ডটা থাকে, ঠিক সেখানে দুই ইঞ্চি বাই এক ইঞ্চির মতো ছোট্ট একটা বৃত্ত। চামড়ার উপর আবছা নীলচে একটা ছোপ। লেখক বেশ ফর্সা বলে এটা বোঝা যচ্ছে। তার গায়ের রঙ কালো কিংবা শ্যাম বর্ণের হলে হয়তো এটা খালি চোখে ধরা পড়তো না।

ময়নাতদন্ত করবে যে তাকে বলে দেবে এটা খতিয়ে দেখতে।

পকেট থেকে মোবাইল ফোনটা বের ক’রে লাশের সেই জায়গাটার এবং ঘরের ভেতরের কয়েকটা ছবি তুলে নিলো জেফরি। কাজটা জামানকে দিয়েও করানো যেতো, কিন্তু বেগ এই কাজটা নিজেই করতে চায়। জামান ঘরের এক কোণে দাঁড়িয়ে চুপচাপ দেখে যাচ্ছে। এরকম দৃশ্যের সাথে সে বেশ পরিচিত।

ছবি তোলা শেষ করে জামানের দিকে তাকালো সে। “অন্য ঘরগুলোর কি অবস্থা?”

“আনটাচ আছে,” জবাব দিলো জামান।

একটু ভেবে বেগ আবার বললো, “ভদ্রমহিলা কোন্ ঘরে থাকেন?”

“ভেতরের ঘরে।”

“উনি কোথায়?”

“লিভিংরুমে। এই অ্যাপার্টমেন্টের সবাইকে ওখানে জড়ো ক’রে রাখা হয়েছে,” জামান বললো। সে জানে কথাটা শুনে বেগ খুশি হবে।

“গুড।” কথাটা বলেই ঘরের চারপাশে আরেকবার তাকালো। নিজের মোবাইলটা নিয়ে ব্যস্ত হয়ে পড়লো সে।

জামান জানে এখন সে কি করবে। ক্রাইমসিনের অবিকৃত অবস্থা তদন্তের জন্য খুবই জরুরি। কারণ এই অবস্থা খুব বেশিক্ষণ অবিকৃত থাকে না।

মোবাইলটা মুখের কাছে ধরলো। “লাশের বাম বুক একটা লালচে ছোপ আছে...পোস্টমর্টেমে এটা দেখতে হবে...আর কোনো অস্বাভাবিকতা নেই...ঘরটা বিশ বাই পঁচিশ...আনুমানিক...একটা দরজা...পূর্ব দিকে...জানালা চারটা...দক্ষিণ দিকে একটা বেলকনি...স্লাইড ডোর...ভিকটিমের অবস্থান উত্তর-পূর্ব দিকে...মেডিকেল বেডে...” একটু থেমে আবার বলতে শুরু করলো সে।

“বেলকনির কাঁচের স্লাইড ডোর আর জানালাগুলো বন্ধ...ঘরে এসি আছে...”

ঘরের এক কোণে একটা কফি টেবিলের উপর খোলা অবস্থায় একটা ল্যাপটপ দেখতে পেলো, ল্যাপটপটাতে এখনও কানেকশান দেয়া আছে। কাছে এগিয়ে গিয়ে দেখতে পেলো সেটা চালু অবস্থায়ই রয়েছে। “একটা ল্যাপটপ আছে...এখনও সেটা চালু রয়েছে।”

বেলকনির স্লাইড ডোরের কাছে গিয়ে থেমে গেলো বেগ। স্লাইড ডোরটা খোলার প্রয়োজন নেই। কাঁচের মধ্য দিয়েই দেখতে পাচ্ছে নিচের মেইন রোডটা। “...ঘরে আর কিছু নেই—” কথাটা বলেই থেমে গেলো। তার চোখ গেলো ঘরের দক্ষিণ-পূর্ব কোণে একটা বাক্স আকৃতির জিনিসের দিকে। একটু কাছে এগিয়ে যেতেই বুঝতে পারলো সেটা কি।

“...ঘরে একটা আইপিএস আছে।” রেকর্ডিং করা থামিয়ে দিয়ে বেগ ভাবলো এই তথ্যটা হয়তো কোনো কাজেই লাগবে না। তারপরও অভ্যাশবশত তথ্যটা নিতে ভুল করলো না সে। খুঁটিনাটি সব তথ্য নেয়াই ভালো। তবে একটা খুনের সাথে আইপিএস’র সম্পর্ক থাকবে কিভাবে সেটা বেগ নিজেও ভেবে পেলো না। তবে পরে যখন সব জানতে পারবে তখন এ কথাটা ভেবে খুবই বিস্মিত হবে ইনভেস্টিগেটর জেফরি বেগ।

মোবাইলটা বন্ধ ক’রে জামানের দিকে ফিরলো এবার। “মিসেস রেহমানের ঘরটা কোথায়?”

“এখনই যাবেন?”

“হ্যাঁ। আর এই ঘরে ফিঙ্গারপ্রিন্ট টিমকে কাজ করতে শুরু ক’রে দিতো বলা। বেলকনির স্লাইড ডোরটা ভালো ক’রে যেনো চেক ক’রে দেখে।” মিসেস রেহমানের ঘরের দিকে যেতে যেতে বেগ আরো বললো, “প্রসিডিংগুলো কি করেছে?”

“জি, স্যার। এই ভবনের সব লোককে বলে দিয়েছি বাইরে যেনো না বের হয়। এই ঘরে যারা কাল রাতে ছিলো তাদের সবাইকে লিভিংরুমে রেখে দিয়েছি। পুরো এলাকা সিল করা আছে। নাইটগার্ডদের প্রাথমিক জিজ্ঞাসাবাদও করা হয়েছে। তেমন কিছু পাওয়া যায় নি।”

লিভিংরুম দিয়ে যাওয়ার সময় বেগ লক্ষ্য করলো এক যুবতী মেয়ে দু’হাতে মুখ ঢেকে সোফায় ব’সে আছে। লেখকের তরুণী স্ত্রী, বুঝতে পারলো সে। আরো কয়েকজন আশেপাশে আছে। আর আছে পুলিশের লোক। তারা সবাই সম্ভ্রমের সাথে বেগ আর জামানকে পথ ক’রে দিলো।

মিসেস রেহমানের শোবার ঘরটা বেশ বড়। প্রায় ফাঁকাই বলা যায়। চারদিকে একবার চোখ বুলিয়ে দেখে নিলো বেগ। বিছানা ছাড়া ঘরে একটা ড্রেসিং টেবিল আর টিভি আছে। আর কিছু নেই। আশ্চর্য!

এই বাড়ির জৌলুশের তুলনায় এটা একেবারেই বেমানান ।

“এটাই কি ভদ্রমহিলার শোবারঘর?” জামানকে জিজ্ঞেস করলো ।

“জি স্যার ।”

“কিন্তু ঘরটা খুব বেশি ফাঁকা, আসবাব তেমন নেই ।” অনেকটা আপন মনে বিড়বিড় ক’রে বললো সে । “আচ্ছা, জায়েদ সাহেব প্যারালাইজড হবার আগে কি এই ঘরে ঘুমাতেন?”

জামানের এটা জানা নেই । সে মাথা নেড়ে জবাব দিলো ।

“বাড়ির কাজের লোকদের জিজ্ঞেস ক’রে জেনে নাও ।”

“এক্ষুণি?”

“হ্যা ।”

ঘরে একটাই দরজা । দক্ষিণে একটা জানালা আর বেলকনি । একটা কটু গন্ধ আছে ঘরে । গন্ধটা কিসের বেগ খুব সহজেই বুঝতে পারলো ।

“স্যার ।”

বেগ পেছনে ফিরে দেখলো জামান ফিরে এসেছে ।

“আরেকটা বেডরুম আছে, কিন্তু ভদ্রমহিলা ওটা আর এখন ব্যবহার করেন না । এটাই উনি ব্যবহার করেন ।”

“আচ্ছা ।” বেগ অ্যাটাচ বাথরুমের ভেতর ঢুকলো ।

বাথরুমটা খুবই পরিষ্কার আর স্বাস্থ্যকর । একেবারে আধুনিক একটি টয়লেট । চমৎকার বেসিন আর কমোডের পাশাপাশি একটা পর্দা দিয়ে আলাদা করা আছে মাঝারি আকারের বাথটাব । বাথরুমে ঢুকে পড়লে জামান বুঝতে পারলো না সেও ভেতরে ঢুকবে কিনা । বাথরুমের দরজার সামনে দাঁড়িয়ে রইলো সে । এক মিনিট পরেই বেগ বের হয়ে এলো । তার মুখে কোনো কথা নেই । ভাবছে । ড্রেসিং টেবিলের সামনে দাঁড়িয়ে নিজের চুলটা ঠিক করতে ব্যস্ত হয়ে পড়লো যেনো ।

বেগের ভাবসাব দেখে জামানের কাছে মনে হচ্ছে ইম্পেক্টর এলাহী কাকতালীয়ভাবে একটা স্বাভাবিক মৃত্যুর সময় ঢুকে পড়ে পুরো পরিস্থিতিটাকে জটিল ক’রে তুলেছে । লেখক জায়েদ রেহমান খুন হন নি । একটাই খটকা মৃত লেখকের মুখের উপর বালিশ দেয়া ছিলো ।

জেফরি বেগ আয়নায় নিজের চুল ঠিক ক’রে বেডের চারপাশটা ভালো করে দেখতে লাগলো । এই ঘরের গন্ধটার উৎস খুঁজছে । কোথাও নেই । বিছানার পাশে যে জানালাটা আছে সেটার স্লাইড-ডোর খুলে নীচের মেইন রোডের দিকে তাকালো । এই ঘরের একটা বেলকনি আছে, বিশাল স্লাইড-ডোরটা একপাশে টেনে দিয়ে বেলকনিতে এসে দাঁড়ালো সে ।

যা ভেবেছিলো তাই । এখানে পাওয়া গেলো গন্ধের উৎসটা । হাটু ভেঙে বসে

বেলকনির মেঝেতে পড়ে থাকা সেই ছোট্ট বস্তুটা ভালো ক'রে দেখে পেছনে ফিরে জামানের উদ্দেশ্যে বললো, “এভিডেন্স ব্যাগ নিয়ে আসো।”

স্বচ্ছ প্লাস্টিকের ছোটো ছোটো চারকোণা ব্যাগগুলো এভিডেন্স সংগ্রহের কাজে ব্যবহার করা হয়। এগুলোর মুখ ক্লিপের মতো আটকে রাখা যায় খুব সহজে। এদেশের অনেক পণ্যে এই সব ব্যাগ ব্যবহার করা হয়। জামান যে ব্যাগগুলো নিয়ে এলো সেটা দেখে ক'ন পরিস্কার করা কটন-স্টিকের ব্যাগ বলেই মনে হবে।

গ্লাভ পরা হাত দিয়ে ছোট্ট জিনিসটা ব্যাগে ভরে জামানের হাতে দিয়ে দিলো বেগ। কোনো কথা না বলে ব্যাগটা হাতে নিয়ে দাঁড়িয়ে থাকলো জামান।

উঠে দাঁড়িয়ে চারপাশটা ভালো ক'রে তাকিয়ে দেখলো বেগ। ডান দিকে লেখক জায়েদ রেহমানের ঘরের যে বেলকনিটা আছে সেটা দেখতে পেলো। পাশাপাশি দুটো ঘর; পাশাপাশি দুটো বেলকনি। স্থপতিরা যাকে বলে হ্যান্ডশেক বেলকনি। জেফরি অবশ্য নিশ্চিত নয় দু'জন মানুষ এখান থেকে হাত মেলাতে পারবে কিনা।

আবারও ঘরের ভেতর বিছানার কাছে ফিরে এলো সে, তার সাথে সাথে জামানও। জেফরি বেগের মনোযোগ ব্যাঘাত হবে এই ভয়ে জামান কিছুই বলছে না। বিছানার ডান পাশে উপুড় হয়ে কী যেনো খুঁজতে শুরু করলো বেগ। জামান অবশ্য ভেবে পাচ্ছে না সেটা কি। দেয়াল থেকে খাটের এই অংশটার দূরত্ব দুই ফুটের মতো হবে।

সিলভার রঙের ছোট্ট দুটো কাগজের টুকরোর মতো জিনিস পড়ে আছে খাটের এখানটায়। অবিবাহিত হলেও এই জিনিসটা বেশ ভালো করেই চেনে জেফরি বেগ। তার চোখমুখ উজ্জ্বল হয়ে উঠলো। ছোট্ট এই জিনিসটা তাকে পুরো ঘটনাকে নতুন ক'রে ভাববার সুযোগ ক'রে দিচ্ছে এখন। কিছুক্ষণ আগেও নাস্তা করে নি বলে যে ফ্রিদের ভাবটা ছিলো সেটা এক নিমেষে উধাও হয়ে গেলো। জেফরি বেগ এই তদন্তে পুরোপুরি ঢুকে পড়েছে। এরকম একটা কু আর এভিডেন্স থাকলে ম্যাজিকের মতোই সে রহস্য উদঘাটন করতে পারবে সে বিশ্বাস তার রয়েছে। জামানের কাছ থেকে আরেকটা এভিডেন্স ব্যাগ হাতে নিয়ে খুব সাবধানে সিলভার রঙের ছোট্ট জিনিস দুটো ব্যাগের ভেতর ভরার সময় জামানও সেটা দেখতে পেলো। জেফরির মতো সেও চিনতে পারলো সেটা। একটু লজ্জা বোধ করলো সে। কারণ সেও অবিবাহিত।

“মিসেস রেহমানের সাথে কথা বলতে হবে,” জামানকে বললো সে।

সদ্য স্বামী হারানো মহিলাদের মতো লাগছে না মিসেস রেহমানকে। একটু

বিপর্যস্ত কিন্তু যতোটা হলে মৃতের বাড়ির আত্মীয়স্বজন আড়ালে-আবডালে এ কথা বলবে না যে, মহিলার হৃদয় পাষণ, স্বামীর প্রতি যথেষ্ট টান নেই, ততোটা ভেঙে পড়েন নি। দূরের আত্মীয় মারা গেলে যতোটুকু শোক শোক ভাব না করলেই চলে না মহিলার মধ্যে সেরকম পরিমিত শোক দৃশ্যমান। বেগের কাছে মনে হচ্ছে ভদ্রমহিলা স্বামী হারানোর চেয়ে অজ্ঞাত এক আশংকায়ই যেনো বেশি ঘাবড়ে আছেন। তবে সে এও জানে, তার ধারণা ভুল হতে পারে। আবেগ প্রকাশের বেলায় সবাই এক রকম হয় না। লিভিংরুমের সোফায় মিসেস রেহমানের সাথে কথাবার্তা বলতে শুরু করলো সে।

“আপনি তাহলে নিজের ঘরেই ছিলেন?” বেগ জানতে চাইলো মিসেস রেহমানের কাছে।

মহিলা মাথা নীচু করে রেখেছে। সে অবস্থায়ই মাথা নেড়ে সায় দিলো।

“ঘুমাচ্ছিলেন?”

আবারো একইভাবে মাথা নেড়ে জবাব দিলো।

একটু সময় নিয়ে আচমকা বেগ বললো, “স্মোক করেন?”

চমকে উঠে মহিলা মুখ তুলে তাকালো। যেনো সদ্য বিধবার সাথে নির্মম রসিকতা করেছে সে। “আমাকে বলছেন?”

“জি,” বেশ স্বাভাবিকভাবেই বললো সে।

মহিলা অনেক কষ্টে নিজের রাগ দমিয়ে অন্য দিকে মুখ ফিরিয়ে বললো, “না। আমার ওসব বদ অভ্যাস নেই।”

“ভালো। আমারও নেই।” আরো স্বাভাবিকভাবে বললো বেগ। মহিলার বিরক্তিকে আমলেই নিলো না।

পাশে দাঁড়িয়ে থাকা জামান জম্পেশ একটা জিজ্ঞাসাবাদের আশা নিয়ে অপেক্ষা করছে। কিন্তু তাকে অবাধ করে দিয়ে জেফরি বেগ সোফা থেকে উঠে দাঁড়ালো। “ঠিক আছে, আপনাকে ধন্যবাদ। আমি আসলে এরকম মুহূর্তে আপনাকে বিরক্ত করতে চাচ্ছিলাম না, নিতান্তই অফিসিয়াল কারণে দুয়েকটা তথ্য জেনে নিলাম। আপনার মনের অবস্থাটা আমি বুঝতে পারছি। আপনার প্রতি সমবেদনা প্রকাশ করার ভাষা আমার নেই।”

মহিলা এমনভাবে বেগের দিকে তাকালেন যেনো বুঝতে পারছেন না এটা নতুন কোনো ঠাট্টা কিনা। পুলিশ সম্পর্কে আগের যেসব ধারণা তার ছিলো তার সাথে এটা একেবারেই যাচ্ছে না। যেখানে তাকে সন্দেহ করে আক্রমণাত্মকভাবে জেরা করা হবে বলে আশংকা করেছিলো সেখানে কিনা এই ইনভেস্টিগেটর ভদ্রভাবে শোক প্রকাশ করছে!

মহিলাকে বিস্ময়ের মধ্যে রেখেই জেফরি বেগ ঘর থেকে বেরিয়ে গেলো। জামান এতোটাই হতভম্ব যে নড়তে পারলো না। কয়েক সেকেন্ড পর ধাতস্থ

হতেই তাড়াহুড়া ক'রে বেগের পেছন পেছন দৌড়ে গেলো সে ।

লেখকের ঘরে ঢুকলো বেগ, তার পেছন পেছন অনেকটা দৌড়ে চলে এলো জামান । “স্যার, মহিলাকে আর কিছু—”

বেগ তার কথার মাঝখানে বাধা দিলো হাত তুলে । থেমে ঘুরে তাকালো সে । “মোবাইল এভিডেন্স ভ্যান এসেছে?”

খতমত খেয়ে জামান বললো, “ফোন ক'রে দেখছি ।”


কিন্তু তাকে আর ফোন করতে হলো না । লেখকের ঘরে হলুদ রঙের ওভারঅল পরা এক লোককে ঢুকতে দেখেই বুঝে গেলো মোবাইল এভিডেন্স ভ্যান এরইমধ্যে এসে পড়েছে ।

“স্যার,” লোকটার দিকে ইঙ্গিত ক'রে বললো জামান ।

“ঠিক আছে । আমি নীচে যাচ্ছি । তুমি এখানকার সবার আঙুলের ছাপ নিয়ে রাখবে । আর ঘরের বিভিন্ন জায়গায় ফিঙ্গারপ্রিন্ট টিমকে খুঁজে দেখতে বলবে কিছু পাওয়া যায় কিনা । বিশেষ করে জায়েদ রেহমান এবং মিসেস রেহমানের ঘরে একটু বেশি চেক করতে বলবে । তুমি নিজে থেকে কাজটা তদারকি কোরো ।”

“এখানে আপনার কাজ শেষ?”

“আপাতত ।” কথাটা বলেই জেফরি বেগ ঘর থেকে দ্রুত বের হয়ে গেলো । ফ্রিডেটা আবার মাথা চাড়া দিয়ে উঠেছে । খুব দ্রুত কাজ সেরে নাস্তা ক'রে নিতে হবে । তার হাতে যে আলামতগুলো আছে তাতে ক'রে কাজটা খুব দ্রুত করতে পারবে ব'লে মনে করছে সে । তার পকেটে থাকা ছোট্ট দুটো আলামত এই হত্যারহস্য উন্মোচন ক'রে দেবে । একেবারে ম্যাজিকের মতো, মনে মনে বললো জেফরি বেগ ।



মোবাইল এভিডেন্স ভ্যান আদতে একটি বড়সড় মাইক্রোবাস। অত্যাধুনিক সব যন্ত্রপাতিতে সজ্জিত এই গাড়িটি ঢাকা সিটি হোমিসাইড ডিপার্টমেন্টের সবচাইতে মূল্যবান সম্পদ। প্রায় তিন কোটি টাকা দামের এই গাড়িতে রয়েছে একটি মিনি ফরেনসিক ল্যাব। তাৎক্ষণিকভাবে ফিঙ্গারপ্রিন্ট থেকে শুরু করে ডিএনএ টেস্ট পর্যন্ত করা যায় এই ভ্রাম্যমান ল্যাবে। মাত্র তিন মাস আগে এটি কেনা হয়েছে। এখনও পর্যন্ত এটির সর্বোত্তম ব্যবহার করা হয়ে ওঠে নি। জেফরি বেগ এই ভ্যান কেনার ব্যাপারে বেশ ভালো ভূমিকা রেখেছিলো। ফলে ডিপার্টমেন্টের ভেতরে ঘাপটি মেরে থাকা তার ঈর্ষাকাতর শত্রুরা ইদানিং আড়ালে আবডালে বলে বেড়াচ্ছে খামোখাই এতোগুলো টাকা গচ্চা দেয়া হয়েছে। কথাটা জেফরি বেগের কানেও গেছে। সে পাত্তা দেয় নি। অপেক্ষা করেছে এটির সর্বোত্তম ব্যবহারের দিনটির জন্য। লিফটে ক'রে নীচের পার্কিংলটে যাবার সময় তার মনে ক্ষীণ আশা উঁকি দিলো, হয়তো আজকের দিনটাই হতে পারে সেই দিন।

সাদা রঙের অ্যাম্বুলেন্সসদৃশ্য গাড়িটা অ্যাপার্টমেন্টের গ্রাউন্ডফ্লোরের পার্কিংলটে লিফটের পাশেই পার্ক করা আছে। এর পেছনের ডাবলডোরের একটা পাল্লা খোলা। ভেতরে ফরেনসিক টিমের প্রধান সাবের কামাল এবং ফিঙ্গারপ্রিন্ট-অ্যানালিসিস টিমের এডলিন ডি কস্তা বসে আছে। টিমের বাকি সদস্যরা আগেই এখানে এসে গেছে। তারা এখন জায়েদ রেহমানের ঘরের বিভিন্ন স্থানে ফিঙ্গারপ্রিন্ট আর ডিএনএ থাকতে পারে এরকম বস্তু সংগ্রহ করে যাচ্ছে।

জেফরি বেগকে দেখে সাবের কামাল হাত তুলে হ্যালো জানালেও এডলিন ডি কস্তা কম্পিউটার মনিটর থেকে একটুও চোখ তুললো না। এই মেয়েটি জেফরির উপস্থিতিতে আড়ষ্ট হয়ে যায়। কারণটা আন্দাজ করতে পারে বেগ, কিন্তু সেও ব্যাপারটা না বোঝার ভান করে। *টিনএজারদের মতো আচরণ করছে মেয়ে, মনে মনে বললো জেফরি।*

“কিছু পেলেন?” গাড়ি থেকে নেমে সাবের জানতে চাইলো।

পকেট থেকে দুটো এভিডেন্স ব্যাগ বের ক'রে তুলে ধরলো বেগ। “এই হলো তোমার চাবি। এখন এটা দিয়ে কি খোলা যাবে সেটা বের করার দায়িত্ব তোমাদের।”

ব্যাগ দুটো হাতে নিয়ে ভালো ক'রে দেখলো সাবের কামাল। সিলভার রঙের কাগজের টুকরো দুটো দেখে আশ্চর্য ক'রে শিখ বাজিয়ে সপ্রশ্ন দৃষ্টিতে তাকালো বেগের দিকে।

“এটাই আসল চাবি। এটাতে খুব সম্ভবত আঙুলের ছাপ আছে।”

“অবশ্যই আছে,” বেশ জোর দিয়ে বললো সাবের। “এই জিনিস কেউ পা দিয়ে খোলে না। আমি নিশ্চিত, দু'হাতের বুড়ো আঙুল আর তর্জনীর স্পষ্ট ছাপ থাকবে।”

“আমার একটা হলেই চলবে,” কথাটা বলে বেগ আড়চোখে এডলিনের দিকে তাকালে তাদের চোখাচোখি হয়ে গেলো ক্ষণিকের জন্য। যেনো কিছুই হয় নি এরকম একটা ভান করে আবারও কম্পিউটার মনিটরে নজর দিলো মেয়েটি।

সাবের প্লাস্টিকের ব্যাগ দুটো হাতে নিয়ে খুঁটিয়ে খুঁটিয়ে দেখে যাচ্ছে। সিলভার রঙের কাগজের টুকরোর ব্যাগটা তার হাত থেকে নিয়ে নিলো বেগ। “এটা তোমার জন্য নয়।”

“তা ঠিক। আমি তো এসব ব্যবহার করি না। আমার বউ পিল খায়।” অশ্লীল কথা বলতে পারঙ্গম সাবের কামাল নারী সহকর্মীর সামনে এরকম একটি সুযোগ হাতছাড়া করলো না।

এডলিন কথাটা স্পষ্ট শুনতে পেলেও অভিনয় চালিয়ে যাচ্ছে যথারীতি। যেনো দিন-দুনিয়ার কোনো বিষয় নিয়ে সে মাথা ঘামাচ্ছে না। তার চেয়ে অনেক জটিল আর জরুরি কাজ চোখের সামনে আছে।

নারী সহকর্মীর সামনে বেফাঁস কথা বলার জন্য সাবেরের দিকে ভৎসনার দৃষ্টিতে তাকালো বেগ।

“সরি, বস্।”

“নিজের কাজ করো,” অন্য একটা এভিডেন্স ব্যাগের দিকে ইঙ্গিত করে বললো বেগ।

মুচকি হেসে মাথা নেড়ে সায় দিতে দিতে ভ্যানের ভেতর তার ছোট্ট ল্যাবে বসে পড়লো সে। তার কাছে যে আলামতটি আছে সেটা থেকে ডিএনএ টেস্ট করা যায় কিনা খতিয়ে দেখবে এখন-আধখাওয়া সিগারেটের ফিল্টার। ওটাতে নির্ঘাত মুখের লাল লেগে আছে। তবে নিশ্চিত হবার জন্য একটা ছোটোখাটো কেমিক্যাল টেস্ট করতে হবে তাকে। একটু পর জায়েদ রেহমানের ফ্ল্যাটে গিয়ে ঘরের অন্যান্য বাসিন্দাদের কাছ থেকে ডিএনএ স্যাম্পলও সংগ্রহ করতে হবে এলিমিনেশন প্রসেসের জন্য।

জেফরি বেগ এডলিনের দিকে তাকিয়ে রইলো একদৃষ্টিতে। সুন্দরী মেয়েরা কতোটা অবলীলায়ই না চারপাশকে অবজ্ঞা ক'রে থাকতে পারে!

“এডলিন?” ভ্যানের ভেতর উঁকি মেরে বললো সে।

যেনো এইমাত্র তাকে দেখতে পেয়েছে এরকম একটা ভান করে এডলিন ডি কস্তা মুখে জোর ক'রে হাসি এঁটে বললো, “গুডমর্নিং, স্যার।”

“গুডমর্নিং। কি করছেন?”

“কিছু না। সার্চ-ইঞ্জিনটা একটু ঘাটাঘাটি করছিলাম।”

এই মেয়েটা অভিনয়ে গেলে ভালো করবে, ভাবলো বেগ। প্রশ্নটা করার আগে আড়চোখে তাকিয়ে বেগ মনিটরটা দেখেছে। এই মেয়ে হরোস্কপিক সফটওয়্যারটি ঘাটাঘাটি করছিলো। এরকম সফটওয়্যার মোবাইল এভিডেন্স ভ্যানে থাকা শক্তিশালী কম্পিউটারে ইনস্টল করা ছোটোখাটো বে-আইনী কাজের মধ্যে পড়ে। অবশ্য বিজ্ঞানের ছাত্রি হয়ে জ্যোতিষশাস্ত্র নিয়ে মাতামাতি করাটা বে-আইনী কাজের মধ্যে পড়ে কিনা ভাবলো জেফরি বেগ।

সিলভার রঙের কাগজের টুকরোর এভিডেন্স ব্যাগটা এডলিনের দিকে বাড়িয়ে দিলো সে। “এটা থেকে ফিঙ্গারপ্রিন্ট নিতে হবে। কতোক্ষণ লাগবে?”

“এটা কি?” ব্যাগটা হাতে নিয়ে এডলিন জানতে চাইলো।

বেগকে আর কষ্ট ক'রে বিব্রতকর কথাটা বলতে হলো না। ঘাড় ঘুরিয়ে সাবের কামাল গুরুগম্ভীরভাবে বললো, “কনডমের প্যাকেট।”

“কী?” এডলিনের মুখ ফস্কে কথাটা বের হয়ে গেলো।

“কনডম চেনেন না?!” সাবের কামাল এমনভাবে প্রশ্ন করলো যেনো কনডম প্রতিদিন ভাতের সাথে খাওয়া ডাল জাতীয় জিনিস। এডলিনকে বিব্রত হতে দেখে সাবের কামাল আরো উৎসাহী হয়ে কিছু বলতে যাবে অমনি বাধা দিলো জেফরি বেগ।

“সাবের!”

“সরি, বস্।” জিভ কেটে নিজের কাজে মন দিলো সাবের। তার ঠোঁটে এখনও দুষ্টমিডরা হাসি লেগে আছে।

নিজের বিব্রত হওয়া ভাবটা আবারো দক্ষ অভিনয়ের সাহায্যে সামলে নিতে পারলো এডলিন। “স্যার, এটা থেকে ফিঙ্গারপ্রিন্ট নিতে দশ মিনিটের বেশি লাগবে না। কিন্তু ডাটা-ব্যাঙ্ক থেকে প্রিন্টটার ম্যাচিং বের করতে অনেক সময় লাগবে।”

এভিডেন্স ভ্যানে একটি অত্যাধুনিক স্ক্যানার রয়েছে যার সাহায্যে খুব দ্রুত যেকোনো বস্তুর উপর থেকে আঙুলের ছাপ নেয়া যায়। আগে এই কাজটি করতে অনেক সময় লাগতো।

“ঠিক আছে। আপনি আগে প্রিন্টটা নেয়ার চেষ্টা করুন। কাজ হলে আমাকে ফোন করবেন।”

“আপনার নাম্বারটা...?” একটু ইতস্তত ক'রে বললো এডলিন।

“আমার নাম্বার আপনার কাছে নেই?”

“না, স্যার,” দুর্বল কণ্ঠে বললো এডলিন।

কথাটা শুনে ভুরু কুচকালো বেগ। তার বিশ্বাস হচ্ছে না। ডিপার্টমেন্টের সবার কাছেই তার নাম্বার রয়েছে। এই মেয়েটা আসলে নার্ভাস হয়ে উল্টাপাল্টা কথা বলছে।

আবারো সাবের কামাল ঢুকে পড়লো তাদের মধ্যে। “আমার কাছে আছে।”

“ঠিক আছে, তাহলে ওর কাছ থেকে নিয়ে...” কথাটা শেষ করলো না।

“...সাবের, তুমিই আমাকে ফোন দিও।”

মেজাজটা একটু খারাপ হয়ে গেলো বেগের। আর কিছু না বলে সোজা চলে গেলো ভিটা নুভার প্রধান দরজার সামনে।

মেইন গেট দিয়ে বের হবার সময় গেটের দায়িত্বে থাকা পুলিশ স্যাঁলুট দিলো তাকে। পুরো অ্যাপার্টমেন্টটা সিল করে দেয়া আছে দেখে খুশি হলো সে। আরো কিছুটা সময় এরকম থাকবে। তারপর খুন না স্বাভাবিক মৃত্যু সেটা নিশ্চিত হবার পর এই অবস্থা তুলে নেয়া হবে।

রাস্তাটা পেরিয়ে ওপার থেকে পুরো ছয় তলা ভবনটি দেখে নিলো জেফরি বেগ। ইন্সপেক্টর এলাহী এখান থেকেই অজ্ঞাত এক তরুণকে সন্দেহজনকভাবে দাঁড়িয়ে থাকতে দেখেছিলো। ছেলেটাকে ধরতে পারলে অনেক কিছু জানা যেতো—কেন এতো রাতে এখানে এসেছিলো, কারা কারা ছিলো তার সাথে। ফুটপাথের বন্ধ চায়ের দোকানটার সামনে দাঁড়িয়ে জেফরি বেগ ভিটা নুভার ছয় তলার জায়েদ রেহমানের ঘরের বেলকনি আর জানালার দিকে তাকালো। এখান থেকে লেখকের স্ত্রীর শোবার ঘরের জানালা আর বেলকনিটাও দেখা যায়। পাশাপাশি তাদের অবস্থান। *ঐ ছেলেটা এখান থেকে কি দেখেছিলো?*

মোবাইল এভিডেন্স ভ্যানে এইমাত্র যে আলামত দুটো দিয়ে এসেছে সেটা যদি ঠিকঠাক উদঘাটন করা যায় তো এই রহস্যটা মুহূর্তেই সমাধান করা যাবে।

একটা কিছু যেনো তার সামনে এসে আচমকা উদয় হলো। জেফরি বেগ একটু চমকে ভিটা নুভার ছয় তলা থেকে চোখ সরিয়ে আনতেই দেখতে পেলো তার ঠিক সামনে এইমাত্র একটা মোটরসাইকেল এসে থেমেছে।

ফ্ল্যাগ সাংবাদিক এবং লেখক দিলান মামুদ।

এ মুহূর্তে কোনো সাংবাদিককে দেখে খুশি হবার কথা নয় কিন্তু দিলান মামুদকে দেখে খুশি হলো বেগ। ২০০৬ সালের সেপ্টেম্বর মাসে একটা দিন এই দিলান মামুদ পশ্চিমা বিশ্বের অসাধারণ ক্ষমতাধর ব্যক্তিদের কাছে আলোচনার বিষয় হয়ে উঠেছিলো। তাকে ঘিরেই আবর্তিত হয়েছিলো বিশাল একটি অপারেশন। ঘটনাক্রমে জেফরি বেগও জড়িয়ে পড়েছিলো সেই অপারেশনে। সেই থেকে তাদের মধ্যে বন্ধুত্বের সূচনা।

অনেক দিন পর দিলানকে দেখে খুশি হলেও মনের গহীনে একটা আশংকাও উঁকি মারছে জেফরি বেগের : *সাংবাদিকরা কি তবে জেনে গেছে?*

“এতো সকালে আপনি এখানে?” বেগ বললো।

“দাঁড়ান দাঁড়ান। প্রশ্নটা আসলে আমার। আপনি এতো সকালে এখানে কি করছেন?” পাল্টা জানতে চাইলো দিলান মামুদ।

জেফরি বেগ বুঝতে পারলো না কী বলবে। দিলান মামুদের সাথে তার যে সম্পর্ক তাতে ক’রে মিথ্যে বলাটা অনুচিত হবে। বোকার মতো কাজই হবে সেটা। আবার এই মুহূর্তে লেখক জায়েদ রেহমানের মৃত্যুর খবর জানাতে চাচ্ছে না সে। সাংবাদিক আর মিডিয়ার লোকজন আরো এক-দেড় ঘণ্টা পর জানলেই সে খুশি হবে। নইলে এই তদন্ত কাজে ঝামেলা তৈরি হবে।

সম্ভবত দিলান মামুদ কিছুটা আঁচ করতে পেরেছে। “এটা তো লেখক জায়েদ রেহমানের অ্যাপার্টমেন্ট, তাই না?”

মাথা নেড়ে সাই দিলো বেগ।

“তার কি কিছু হয়েছে?”

বেগ হেসে ফেললো। এখন আর না বলে উপায় নেই। “মাঝরাতে মারা গেছেন।”

দিলান মামুদ মোটেও অবাক হলো না। “মারা গেছে?” মোটর সাইকেলের ইঞ্জিন বন্ধ ক’রে দিলো সে। ভিটা নুভার দিকে তাকিয়ে জেফরির দিকে ফিরলো। “তো, বিখ্যাত ইনভেস্টিগেটর জেফরি বেগ এতো সকালে এখানে কি বিখ্যাত লেখকের জন্য শোক প্রকাশ করতে এসেছে? আমি জানতাম না আপনি তার বইয়ের একজন পাঠক!” মুখে মুচকি হাসি দিলানের।

“ব্রাদার, সেলিব্রিটি মানুষ। স্বাভাবিক মৃত্যু হলেও একটু খতিয়ে দেখতে হয়।”

“আপনার কাছে কি মৃত্যু বলেই মনে হচ্ছে, নাকি...”

“আরেকটু নিশ্চিত হতে হবে;” বেগ বললো।

হাতটা বাড়িয়ে দিলো দিলান মামুদ। “ওকে, তদন্ত করতে থাকুন। আমি যাই। সারা রাত ঘুমাই নি। এখন খুব ক্লান্ত লাগছে।”

হাতটা ধরেই বেগ জানতে চাইলো, “পার্টি ছিলো নাকি?”

“না। ডব্লির জেডের ওখানে ছিলাম। গতকাল তো পূর্ণিমা ছিলো।”

ডব্লির জেড / জেড থিওরির প্রবক্তা এই রহস্যময় লোকটির সাথে এখনও বেগের সাক্ষাত হয় নি। দেশ-বিদেশের একটা নির্দিষ্ট মহলে তাকে নিয়ে এক ধরণের মিথ আর গালগল্প চালু রয়েছে। অনেকেই তাকে সবজান্তা বলে অভিহিত ক’রে থাকে। আবার তাকে ভণ্ড আর শয়তান বলার লোকও কম নেই। বেগ অবশ্য বিশ্বাস করে না মানুষের পক্ষে সবজান্তা হওয়া সম্ভব। তবে লোকটি যে সাধারণ কেউ নয় সেটা মানতেই হবে। দিলান মামুদ হলো সেই রহস্যময় জ্ঞানী ডব্লির জেডের একনিষ্ঠ ভক্ত।

“দিলান, একটা অনুরোধ করবো—”

“বলতে হবে না। আমি জানি। এই খবরটা কাউকে বলবো না, তাই তো?” বলেই হেসে ফেললো সে।

“ঠিক।” বেগ অবাধ হলো। এই দিলান মামুদও কি ডক্টর জেডের সাথে মিশতে মিশতে অতিপ্রাকৃত ক্ষমতার অধিকারী উঠছে নাকি? “ধন্যবাদ।”

“ঐ লেখককে নিয়ে আমার কোনো আগ্রহ নেই। আপনি নিশ্চিত্তে কাজ করে যান। পরে কথা হবে।” বলেই মোটরসাইকেলটা ছুটে গেলো ফাঁকা রাস্তা দিয়ে।

অপসূয়মান মোটরসাইকেলটার দিকে কিছুক্ষণ তাকিয়ে রইলো জেফরি বেগ। এতোক্ষণ মাথার মধ্যে তদন্ত বিষয়ক যেসব জিনিস ঘুরপাক খাচ্ছিলো সেটা ক্ষণিকের জন্য চাপা পড়ে গিয়েছিলো। বাউডুলের মতো জীবন যাপন করা দিলান মামুদকে দেখলে তার খুব ঈর্ষা হয়। জেফরি বেগ খুবই নিয়মের মধ্যে বেড়ে ওঠা মানুষ। এরকম একটা অনিয়মের জীবনের জন্য মাঝেমধ্যেই সে লালায়িত হয়ে ওঠে।

মোবাইল ফোনের বিপ্ হলে পকেট থেকে সেটা বের করে হাতে তুলে নিলো।

এডলিন।

কলটা রিসিভ না করে কেটে দিয়ে দ্রুত রাস্তা পার হয়ে ভিটা নুভার পার্কিংলটে থাকা এভিডেন্স ভ্যানের সামনে চলে এলো বেগ।

ভ্যানের পেছনের দরজা এখনও খোলা, এডলিন একাই বসে আছে। সাবের কামাল নেই। জেফরি জানে সাবের জায়েদ রেহমানের ফ্ল্যাটে গেছে নয়তো আশেপাশেই কোথাও সিগারেট ফুঁকছে। কাজের সময় এই লোক ঘন ঘন সিগারেট খায় কিন্তু এভিডেন্স ভ্যানে থাকা বহুমূল্যবান আর সূক্ষ্ম যন্ত্রপাতি থাকার কারণে এর ভেতরে সিগারেট খাওয়া নিষিদ্ধ।

বেগকে দেখেই এডলিন রিভলভিং চেয়ারটা ঘুরিয়ে বললো, “স্যার, দুটো প্যাকেটেই বুড়ো আঙুলের প্রিন্টটা বেশ ভালোমতোই পাওয়া গেছে। তবে একটাতে একটু বেশি ভালো অবস্থায় আছে। আমি সেটাই ডিজিটাইজ করছি। নব্বই পার্সেন্টেরও বেশি রিকভার করা গেছে।”

খবরটা শুনে খুশি হলো বেগ। “ওড। এখন কি ডাটা-ব্যাঙ্কের সাথে ম্যাচ করে দেখা যাবে?”

“স্যার, সাড়ে আটকোটি ফাইল। সার্চ করতে অনেক সময় লাগবে। কমপক্ষে চার-পাঁচ ঘণ্টা,” এডলিন বললো। “আমারা বরং হেড অফিসে গিয়ে—?”

“অতো সময় লাগবে না,” বললো বেগ। “ন্যারো-ডাউন করুন।”

“অপশনগুলো কি হবে?” এডলিন জানতে চাইলো।

বেগ একটু সময় নিলো ভাবার জন্য।

ফিস্সারপ্রিন্ট ডাটা-ব্যাঙ্ক হোমিসাইড ডিপার্টমেন্টের এমন একটি মূল্যবান সম্পদ যা কিনা অনেকটা বিনা পয়সায় পাওয়া গেছে। কয়েক বছর আগে সারা দেশে ছবিসহ ভোটার তালিকা তৈরি করা হয় সম্পূর্ণ ডিজিটাল ফর্মেটে। সেই ডাটা-ব্যাঙ্কটি তৈরি করতে হাজার হাজার মানুষের লক্ষ-লক্ষ শ্রমঘণ্টা লেগেছে, ব্যয় হয়েছে কয়েক শ' কোটি টাকা। দেশের মোট জনসংখ্যার প্রায় ষাট ভাগই ভোটার। সে হিসেবে এই ডাটা-ব্যাঙ্কে দেশের ষাট শতাংশ লোকের সমস্ত তথ্য ছবিসহ ডিজিটাইজ করা আছে।

এটার সঠিক ব্যবহার এখনও হয়ে ওঠে নি। মাত্র পাঁচ মাস আগে এই ডাটা-ব্যাঙ্কটি তারা হাতে পায়। এটার সার্চ-ইঞ্জিন সফটওয়্যারটিও বিনা মূল্যে আমেরিকার এফবিআই'র কাছ থেকে সহযোগীতার নির্দশন হিসেবে পেয়েছে নতুন গঠন করা হোমিসাইড ডিপার্টমেন্ট। এখানেও ছিলো জেফরি বেগের ভূমিকা। ভার্জিনিয়াতে এফবিআই'এর অধীনে ট্রেনিং নেবার কল্যাণে ওখানকার কিছু কর্তাব্যক্তির সাথে তার বেশ ঘনিষ্ঠতা তৈরি হয়। সেই সম্পর্ককে কাজে লাগিয়ে এ রকম একটি উন্নতমানের সফটওয়্যার উপহার হিসেবে পেয়েছে হোমিসাইড ডিপার্টমেন্ট।

“মিস্ এডলিন,” বেগ বললো।

“জি, স্যার?”

ভ্যানের ভেতর উঠে এসে এডলিনের পাশের টুলের উপর বসে পড়লো সে। লক্ষ্য করলো মেয়েটি এখন আর নার্ভাস হচ্ছে না। তার মধ্যে দৃঢ় একটা ভাব চলে এসেছে। কিন্তু বেগ টের পেলো তার নিজের ভেতরে অজ্ঞাত এক কাঁপুনি শুরু হয়ে গেছে।

“জেভার-ওয়াইজ সার্চ করুন। শুধুমাত্র পুরুষ,” বললো বেগ।

চোখেমুখে রহস্য মেখে জেফরির দিকে তাকিয়ে বললো সে, “শুধু পুরুষ!”

মাথা নেড়ে সায় দিলো বেগ।

“ঠিক আছে।” মোনালিাসর চেয়েও দুর্বোধ্য হাসি তার ঠোঁটে।

তার মানে আট কোটির জায়গায় ফাইলের সংখ্যা গিয়ে দাঁড়াবে প্রায় সোয়া চার কোটিতে। যেহেতু এ দেশের নারী-পুরুষের অনুপাত প্রায় সমান সমান।

“বয়সের রেঞ্জ হবে...বিশ থেকে পঞ্চাশ।”

এডলিন কি-বোর্ডে ব্যস্ত হয়ে পড়লো। এবার ফাইলের সংখ্যা কমে এলো পৌনে দুই কোটিতে।

“শুধুমাত্র ঢাকা সিটির মধ্যে থাকুন। এখানে ম্যাচিং না পেলে আমরা রেঞ্জ আরেকটু বাড়াবো।”

আবারো কি-বোর্ডে টাইপ করার শব্দ শোনা গেলো। এখন ফাইলের সংখ্যা এক লাফে কমে গিয়ে দাঁড়ালো প্রায় বিশ লাখে।

“স্যার, ফাইল অনেক কমে গেছে। এখন মনে হচ্ছে না বেশি সময় লাগবে,” এডলিন প্রশংসার সুরে বললো।

মাথা নেড়ে সায় দিলো বেগ। “উমমম...এক কাজ করুন। বয়সের রেঞ্জটা রি-অ্যারেঞ্জ ক’রে বিশ থেকে পাঁচচল্লিশ ক’রে দিন।”

খটাখট টাইপ করার শব্দ হলো আবারও সেই সঙ্গে কমে এলো ফাইলের সংখ্যা।

“কতোক্ষণ লাগতে পারে এখন?”

মিস্ এডলিন মনিটর থেকে চোখ সরিয়ে সরাসরি বেগের দিকে তাকালে বেগ বুঝতে পারলো তাদের মধ্যে মাত্র এক ফুটের ব্যবধান। সকাল সকাল ইমার্জেন্সি কল পেয়ে ছুটে এলেও তার সাজসজ্জা বেশ পরিপাটি। চুল থেকে মিষ্টি একটা গন্ধ পাচ্ছে বেগ। শরীর থেকে হালকা যে পারফিউমের গন্ধটা ভেসে আসছে সেটা আরো বেশি মোহনীয়। রেবাও ঠিক এই পারফিউমটা ব্যবহার করতো। কতো দিন তার গন্ধ নেয়া হয় না!

বেগ বুঝতে পারলো এতোক্ষণ মেয়েটির দিকে তাকিয়ে ছিলো। একটু চমকে উঠে সামলে নিলো নিজেকে। এডলিনের ঠোঁটে সেই রহস্যময় হাসি।
মেয়েরা কি না তাকিয়েও দেখতে পায়?

“আমাদের ডাটা-ব্যাঙ্কের ফাইলগুলো বর্ণানুক্রমে রয়েছে। আঙুলের ছাপটি যে লোকের তার নাম যদি প্রথম দিককার কোনো অক্ষর দিয়ে হয়ে থাকে তবে অনেক জলদি ম্যাচিং বের করা যাবে। সুতরাং যেকোনো সময় ম্যাচিং হতে পারে। তবে সবগুলো ফাইল ব্রাউজ হতে...ত্রিশ মিনিট লাগবে।” এডলিন এখন আর স্যার সম্বোধন করছে না।

বেগ বুঝতে পারলো এই মেয়ের সংস্পর্শে এসে সে নিজেই এখন নার্ভাস বোধ করছে। তাড়াতাড়ি ভ্যান থেকে নেমে গেলে তার দিকে তাকালো এডলিন।

“ম্যাচিং হলে আমাকে ডাকবেন।”

“ঠিক আছে।” এবারও স্যার বললো না মেয়েটি।

ব্যাপারটা বেগও লক্ষ্য করেছে। তার নার্ভাস ভাবটা আরো বেড়ে গেলো। ভ্যান থেকে কয়েক পা বাড়াতেই জামানের মুখোমুখি হলো সে।

“স্যার, পোস্টমর্টেমের জন্য লাশ কখন নিয়ে যাবো?”

“আরেকটু অপেক্ষা করতে হবে।”

“আপনি কি আবারো দেখবেন?”

“না। তবে লাশ নিয়ে যাবার পর রেহমান সাহেবের ফ্ল্যাটে আবার যাবো। আরো কিছু জিনিস দেখতে হবে,” বললো বেগ।

“তাহলে আমরা কি এখন এখানেই থাকবো, নাকি নাস্তা ক’রে আসবো?”

“একটু ওয়েট করো। ডাটা-ব্যাঙ্ক সার্চ করা হচ্ছে। দেখি কি পাওয়া যায়।”

“অনেক সময় লাগবে তো।”

জেফরি বেগ মাথা নেড়ে বললো, “আশা করছি দশ-বিশ মিনিটের বেশি—”

কথাটা শেষ করতে পারলো না সে, ভ্যানের ভেতর থেকে এডলিনের মিষ্টি কণ্ঠটা ডেকে উঠলো। “স্যার! ম্যাচিং পাওয়া গেছে!”

এতোটা দ্রুত হবে আশা করে নি জেফরি বেগ। সঙ্গে সঙ্গে ছুটে গেলো ভ্যানের ভেতর। তার পেছন পেছন জামান।

কম্পিউটারের পর্দায় একটা ফাইল ভেসে উঠেছে। ছবি আর বিস্তারিত তথ্য সহ একটি ডকুমেন্ট ফাইল। স্ক্যান করা আঙুলের ছাপের সাথে এই ডক-ফাইলের ব্যক্তির আঙুলের ছাপের প্রায় পঁচানব্বই পার্সেন্ট ম্যাচিং হয়েছে।
অসাধারণ!

ছবিটা ত্রিশ-বত্রিশ বছরের এক সুদর্শন যুবকের। ছবির নীচে তার নাম, বাবা-মা’র নাম, ঠিকানা, ফোন নাম্বারসহ যাবতীয় তথ্য রয়েছে। লোকটির নাম ইংরেজি ‘এ’ আদ্যক্ষরে হওয়াতে অসম্ভব দ্রুতগতিতে সার্চের ফল পাওয়া গেছে। জামান আর বেগ একে অন্যের দিকে মুখ চাওয়াচাওয়ি করলো।

“এডলিন। আমাকে এই পেজটার একটি কালার প্রিন্ট বের করে দিন,” বেগ বললো প্রচণ্ড বিস্ময় আর উত্তেজনার সাথে।

“স্যার, এখন কি করবেন?” ভ্যান থেকে জামান আর বেগ বের হয়ে পার্কিংলটের এক কোণে দাঁড়িয়ে আছে। তারা দু’জনেই কম্পিউটার প্রিন্টআউটটা ভালো ক’রে দেখেছে কয়েক বার।

“ফোন করো,” জামানের দিকে তাকিয়ে বললো বেগ।


নিজের মোবাইল ফোনটা বের ক’রে প্রিন্টআউট থেকে নাম্বারটা নিয়ে কল করলো জামান।

“রিং হচ্ছে, স্যার,” জামানের চোখ দুটো চক চক ক’রে উঠলো।

ঠিক সেই সময়েই জেফরি বেগ ব্যাপারটা টের পেলো। তার সমস্ত গা শিউরে উঠলো যেনো।

“স্যার, লাইন কেটে দিয়েছে!” হতাশ হয়ে বললো জামান। কানে ফোন চেপে রাখার কারণে ব্যাপারটা ধরতে পারে নি। কেবল দেখলো জেফরি বেগ ডান দিকে তাকিয়ে বিড় বিড় ক’রে কী যেনো বলছে।

অসম্ভব একটা ঘটনা ঘটে গেছে এখানে!



ভিটা নুভার ফায়ারএক্সেপ সিঁড়ির ল্যান্ডিংয়ের খুব কাছে দাঁড়িয়ে আছে জেফরি বেগ আর জামান। এভিডেন্স ভ্যানটা পার্কিংলটের যেখানে পার্ক করা আছে তার ডানে মাত্র পাঁচ গজ দূরে সেটা অবস্থিত। ঘোরানো সিঁড়িটা নীচের পার্কিংলটে এসে থেমেছে। বাইরে থেকে কেবলমাত্র মেঝেতে নেমে আসা আটটি ধাপ দেখা যায়। সিঁড়ির বাকি অংশ পৌঁচিয়ে পৌঁচিয়ে চলে গেছে ছয়তলা পর্যন্ত।

জামান কিছু বলতে যাবে কিন্তু বেগ তাকে হাত তুলে থামিয়ে দিলো। এইমাত্র ডাটা-ব্যাঙ্ক থেকে তারা যে লোকের ফাইলটা পেয়েছে সেই লোকের মোবাইল ফোনে কল করলে তিন বার রিং হতেই লাইন কেটে দেয়া হয়। কিন্তু বিস্ময়ের ব্যাপার হলো ঠিক তখনই তিন তিনটি ফোন রিংয়ের শব্দ তারা খুব কাছ শুনতে পায়। বেগ একদম নিশ্চিত রিংয়ের শব্দটি এসেছে ফায়ারএক্সেপ সিঁড়ির ভেতর থেকে।

বেগ আরেকবার জামানকে ফোন করার জন্য ইশারা করলে সে কোনো কথা না বলে ডায়াল করলো।

যা ভেবেছে তাই। রিং হবার স্পষ্ট শব্দ শোনা গেলো ফায়ারএক্সেপ সিঁড়ির ল্যান্ডিংয়ের ভেতর থেকে।

একটা আক্ষিপে মুখটা বিকৃত হয়ে গেলো জেফরি বেগের। তাড়াহুড়া করে চলে আসার কারণে সঙ্গে ক'রে পিস্তলটা নিয়ে আসা হয় নি। এ নিয়ে দ্বিতীয়বার এ রকম একটি ভুল করলো সে। যদিও তার ট্রেনিংয়ে সব সময় সঙ্গে পিস্তল রাখার কথা বলা হয়েছে তারপরও এই ভুলটা করায় সে যারপরনাই বিরক্ত। ঘুণাঙ্করেও ভাবতে পারে নি আজকের ঘটনায় পিস্তলের প্রয়োজন হবে।

কোনো কথা না বলে জামানকে ব্যাকআপে থাকার জন্য ইশারা করে এগিয়ে গেলো সে। অ্যাপার্টমেন্টের ভেতরে এবং গেটে পুলিশ আছে। সেই ভরসায় একটা সিদ্ধান্ত নিয়ে ফেললো জেফরি বেগ।

এভিডেন্স ভ্যানের ভেতর থেকে এডলিন ডি কস্তা পুরো ব্যাপারটা দেখে ভয়ে স্থির হয়ে আছে। এরকম পরিস্থিতিতে সে কখনও পড়ে নি। একেবারে ঘটনাস্থলে...?

বেড়ালের মতো পা টিপে টিপে ফায়ারএক্সপ সিঁড়ি দিয়ে উঠে পড়লো জেফরি বেগ ।

ভেতরটায় কোনো বাতি নেই । আধো-আলো-অন্ধকার । উপরের দিকে ভালো ক'রে তাকাতেই বুঝতে পারলো কেউ একজন তার মাথার কিছুটা উপরে পেঁচানো সিঁড়ির একটি ধাপে বসে আছে । হাতে এখনও মোবাইল ফোনটা ধরা । জ্বল জ্বল করতে থাকা ডিসপ্লেয় আলোতে লোকটার চেহারা ভুতুরে দেখাচ্ছে । তবে লোকটা এখনও জেফরি বেগের উপস্থিতি টের পায় নি । সম্ভবত মোবাইল ফোনের রিং-টোন বন্ধ করতে ব্যস্ত আছে ।

“মি: আলম! একদম নড়বেন না!” বেশ দৃঢ়ভাবে বললো জেফরি বেগ ।



ঘটনা খুব দ্রুত পাল্টে গেছে। লেখক জায়েদ রেহমান মারা গেছেন নাকি খুন হয়েছেন সে রহস্যের সমাধানই শুধু হয় নি, স্বয়ং হত্যাকারীকে গ্রেফতার করা হয়েছে ঘটনাস্থল থেকে। আর এসবই ঘটেছে বেশ দ্রুত গতিতে।

ব্যাপারটা নব-প্রতিষ্ঠিত হোমিসাইড ডিপার্টমেন্টের জন্য গৌরবের একটি মুহূর্ত। প্রচুর টাকা খরচ ক'রে শ্বেতহস্তি কেনার মতো বিলাসিতা যে করা হয় নি সেটা বুঝিয়ে দেবার সময় এসেছে। আইন-শৃঙ্খলা তদারকি কাজে নিয়োজিত পার্লামেন্টারি কমিটি কয়েক দিন আগেও এই ডিপার্টমেন্টের কাজের ব্যাপারে উদ্ভা প্রকাশ করেছিলো। তারা নাকি যথেষ্ট কাজ করছে না। এর প্রতিষ্ঠাতা মহাপরিচালক ফারুক আহমেদ খবরটা শুনে বেশ ফূর্তির মেজাজে আছে। নিজের ডেস্কে বসে পেপারওয়েটটা নিয়ে নাড়াচাড়া ক'রে যাচ্ছে মনের আনন্দে।

মাত্র দশ মিনিট আগে ঘটনাস্থল থেকে টেলিফোন করে তাকে জানানো হয়েছে খবরটা। টিভি চ্যানেল আর পত্রিকাগুলো এরকম একটি খবর কিভাবে লুফে নেবে সেটা ভেবে বেশ মজা পাচ্ছে সে। আজকে কমপক্ষে চারটা টিভি চ্যানেলে তার ইন্টারভিউ যাবে। সে না চাইলেও এটা হবে। অবশ্য দুয়েকটা পত্রিকাও তার ইন্টারভিউ নিতে চাইবে, তবে ফারুক আহমেদ সেটা অধীনস্তদের উপর ছেড়ে দেবার কথা ভাবছে।


নিজের সেলফোনটা বেজে উঠলে পেপারওয়েটটা রেখে কলার আইডির দিকে চোখ যেতেই নড়েচড়ে উঠলো মহাপরিচালক। *হোমমিনিস্টার!* অবাধ হয়ে আপন মনে বললো ফারুক সাহেব। সঙ্গে সঙ্গে রিসিভ করলো কলটা।

“স্নামালাইকুম, স্যার,” নিজের চেয়ারে সোজা হয়ে বসে বললো সে। “ধন্যবাদ স্যার...জি, স্যার...গ্রেফতার করা হয়েছে...না, ভদ্রমহিলাকে এখনও গ্রেফতার করা হয় নি...আমি অবশ্য এম্ফুণি বলতে যাচ্ছিলাম সেটা...হ্যা, হ্যা...তাতো নিশ্চয়...স্যার, নিশ্চিন্তে থাকতে পারেন...জি, জি...এখনও জানানো হয় নি...ঠিক আছে, স্যার...স্নামালেকুম, স্যার...”

কলটা শেষ হতেই তার খুশির ভাব আরো বেড়ে গেলো। স্বয়ং হোমমিনিস্টার তাকে ফোন করে ধন্যবাদ জানিয়েছেন। বোঝাই যাচ্ছে মিনিস্টার সাহেব নিজেও এ ঘটনা জানতে পেরে খুশি।

সুখবরটা পাওয়া মাত্র নিজের এপিএস'কে হোমমিনিস্টারের দপ্তরে ফোন করে জানাতে বলেছিলো ফারুক আহমেদ। এরকম একজন সেলিব্টির মুহূর্ত নিয়ে সন্দেহ দেখা দিলে প্রশাসনের সবাই তৎপর হয়ে ওঠে। বিশেষ করে হোমমিনিস্টার সেই সকাল থেকেই এ বিষয়ে খোঁজখবর নিচ্ছেন। কারণ লেখক জায়েদ রেহমানের দেশের বাড়ি তার নিজের জেলায়। স্থানীয় রাজনীতির ব্যাপার আছে এখানে। কিন্তু ফারুক আহমেদ অবাক হচ্ছে লেখকের যুবতী স্ত্রীকে গ্রেফতারের নির্দেশ দেয়ায়। স্বয়ং হোমমিনিস্টার মহিলাকে গ্রেফতার করতে বলছেন!

মন্ত্রী নিজে না বললেও কিছুক্ষণ পর ফারুক আহমেদ নিজেও এটা বলে দিতো তার টিমকে। তারচেয়েও বড় কথা মহিলা এবং তার প্রেমিক প্রবরটিকে গ্রেফতার করে জিজ্ঞাসাবাদ করার জন্য খুব তাগাদা দিলেন মন্ত্রী মহোদয়। মিডিয়াকেও জানাতে বলে দিয়েছেন তিনি। ব্যাপারটা নিয়ে একটু খটকার সৃষ্টি হলেও ফারুক আহমেদ খুব একটা আমলে নিলো না। একটা নাম্বার ডায়াল করার জন্য ব্যস্ত হয়ে পড়লো সে। তার সবচেয়ে প্রিয় মানুষের একজনকে ফোন করবে এখন।



ভিটা নুভার ফায়ারএক্সপ সিঁড়ি থেকে আলম শফিক নামের এক উঠতি নাট্য নির্মাতাকে গ্রেফতার করার পরই লেখক জায়েদ রেহমানের সদ্য বিধবা স্ত্রী বর্ষাকে গ্রেফতার করা হয়েছে। আলম শফিকের আসল নাম ছিলো শফিকুল আলম, কিন্তু অন্য অনেকের মতো মিডিয়াতে নিজের নাম উল্টেপাল্টে আলম শফিক ক'রে নিয়েছে সে। যদি এ কাজটা না করতো তাহলে হয়তো এতো দ্রুত ধরা পড়তো না। কারণটা খুব সহজ, ইংরেজি বর্ণের প্রথম অক্ষর 'এ' দিয়ে তার নাম শুরু হওয়াতে ডাটা-ব্যাঙ্ক থেকে খুব দ্রুত খুঁজে বের করা গেছে।

আলম শফিকের গ্রেফতারের কথাটা অবশ্য মিসেস রেহমান জানে না। তাকে আসলে জানানো হয় নি। জেফরি বেগ ইচ্ছে করেই সেটা করেছে।

মহিলা মাথা নীচু করে দু'হাতে মুখ ঢেকে রেখে বসে আছে হোমিসাইড ডিপার্টমেন্টের ইন্টেরোগেশন সেলে। ভিটা নুভা থেকে তাকে সরাসরি এখানে নিয়ে আসা হয়েছে।

ইন্টেরোগেশন সেলটি পঁচিশ বাই পঁচিশ ফিটের জানালাবিহীন বিশাল একটি ঘর। একটা মাত্র দরজা। সলিড লোহার। ঘরের দেয়াল আতঙ্কজনক রকমেরই ধবধবে সাদা টাইলসের। পশ্চিম দিকের দেয়ালে বিশাল একটি দ্বিমুখী আয়না রয়েছে। ঘরের ভেতরে থাকা লোকজনের কাছে এটা নিছক আয়না, তবে আয়নার ওপাশে থাকা ছোট্ট একটি কক্ষে যারা বসে থাকে তাদের কাছে এটি স্বচ্ছ কাঁচ ছাড়া আর কিছু নয়। ইন্টেরোগেশন সেলের ভেতরে কি ঘটছে না ঘটছে সবই দেখতে পায় তারা। এখান থেকে প্রত্যক্ষদর্শীরা সন্দেহভাজনদেরকে চিহ্নিতও ক'রে থাকে। তবে সাধারণত জেরা করার কাজে বিশেষ পারদর্শী লোকজন এখান থেকে সন্দেহভাজনকে 'অবজার্ড' করে।

বিশাল ঘরের মাঝখানে একটা আয়তক্ষেত্রের কাঠের টেবিল আর চার-পাঁচটা চেয়ার রয়েছে। টেবিলের উপর উজ্জ্বল পাওয়ারের একটা বাতি আর বিশেষ একটা চেয়ারের সামনে মাইক্রোফোন ছাড়া ঘরে তেমন কিছু নেই। সন্দেহভাজনকে যে চেয়ারে বসানো হয় সেটা আসলে পলিথ্রাফ টেস্টের চেয়ার। এই বিশেষ চেয়ারের সাথে লাগোয়া কতোগুলো ক্যাবল আর সেন্সর

সন্দেহভাজনের শরীরের বিভিন্ন নার্ভ-পয়েন্টে লাগিয়ে দিলেই সত্য-মিথ্যার কারসাজি ধরা পড়তে শুরু করে ।

মহিলা ব'লে ঘরে একজন মহিলা পুলিশ রাখা হয়েছে । হ্যাপি নামের এই তরুণী পুলিশ কনস্টেবল ঘরের এক কোণে একটা চেয়ারে বসে আছে চুপচাপ । জেফরি বেগ ছাড়া ঘরের চতুর্থ মানুষটি হলো জামান ।

তারা দু'জন বসে আছে মহিলার ঠিক বিপরীতে । টেবিলের উপর কিছু নেই । মাথার উপর কেবল মৃদু আলোর একটি বুলবুল ইলেক্ট্রিক বাস্‌ জ্বলছে ।

মিসেস রেহমান বুঝতে পারছে তাকে হত্যার সন্দেহে গ্রেফতার করা হয়েছে । তবে নিজের নির্দোষিতা প্রমাণ করার জন্য কোনো প্রচেষ্টা করে নি সে । শুধু গ্রেফতার করে গাড়িতে নিয়ে আসার পাথে দৃঢ়ভাবে বলেছে, খুনটা সে করেন নি ।

লেখক জায়েদ রেহমানের খুনের ঘটনাটি জেফরির কাছে এখন পানির মতোই পরিষ্কার ব'লে মনে হচ্ছে । এ নিয়ে খুব একটা মাথা ঘামানোর দরকার নেই । পুরো ঘটনাটিই ঐ একটা গ্রেফতারের মধ্য দিয়েই উন্মোচিত হয়ে গেছে । আসামীদের স্বীকারোক্তি খুবই দরকারি একটি জিনিস । আর সেটাই এখন আদায় করতে হবে ।

“মিসেস রেহমান,” বেগ বলতে শুরু করলো, “আপনি কাল রাতে কখন বাড়ি ফিরেছিলেন?”

মহিলা মুখ তুলে তাকালো । “সাতটা-আটটা হবে ।”

“কোথায় গিয়েছিলেন?”

“একটু কেনাকাটা করতে ।” ডান হাতের একটা আঙুলের নখ বাম হাতে খুটতে খুটতে জবাব দিলো মহিলা ।

“কি কিনতে গিয়েছিলেন?”

মহিলা একটু সময় নিলো । “মেয়েলী জিনিস...”

জেফরি স্থির চোখে তাকিয়ে রইলো কয়েক মুহূর্ত । “আপনার তো গাড়ি আছে । নিজেই চালান?”

“মাঝেমধ্যে নিজেই চালাই । আমার ড্রাইভিং লাইসেন্স আছে ।”

“কাল কি আপনি নিজেই গাড়ি চালিয়েছিলেন?”

“হ্যাঁ ।” ছোট্ট ক'রে বললো সে । এবার বেগের চোখের দিকে তাকালো ।

বুকের উপর দু'হাত ভাঁজ ক'রে বেগ একদৃষ্টিতে মহিলার দিকে তাকিয়ে বললো, “বাড়িতে কি একাই ফিরেছিলেন?”

মহিলা চমকালো না ব'লে বেগ একটু অবাকই হলো ।

“হ্যাঁ ।”

“তারপর কি করলেন?”

সপ্রশ্ন দৃষ্টিতে তাকালো মিসেস রেহমান। “বুঝলাম না?”

“বলতে চাচ্ছি, এরপর কি করলেন? কেনাকাটা ক’রে বাড়ি ফিরলেন... বেশ। তারপর যা যা করলেন সব বলুন।”

“ও!” প্রশ্নটা বুঝতে পেরে মহিলা বললো, “বাচ্চাকে খাওয়া-দাওয়া করিয়ে নিজে ডিনার করলাম। তারপর বোধহয় একটু টিভি দেখেছিলাম...ওর ঘরে গিয়ে ওকে দেখে এসে নিজের ঘরে চলে আসি। এরপর ঘুমাতে চলে যাই।”

দারুণ! বেগ ভাবলো। “আপনার অ্যাপার্টমেন্টে বেশ কয়েক বার পুলিশ গিয়েছিলো। আপনি কি সেটা টের পেয়েছিলেন?”

“ভোর রাতে ইন্টারকমে পুলিশ কল করলে আমার ঘুম ভেঙে যায়। তারপর তো...”

“হ্যা। কিন্তু তার আগেও আরেক বার পুলিশ গিয়েছিলো।”

“আমি তখন ঘুমিয়ে ছিলাম।”

“অবশ্যই। অতো রাতে তো ঘুমিয়ে থাকারই কথা,” কথাটা বলেই বেগ তার সহকর্মী জামানের দিকে তাকালো। জামান এতোক্ষণ ধরে কিছু না বললেও নিজের অভিব্যক্তি লুকাতে পারছে না। তোমাকে আরো অনেক শিখতে হবে, বেগ ভাবলো। তারপর মহিলার দিকে ফিরে বললো, “আপনি নিজের অ্যাপার্টমেন্টে ফিরে আসার পর কেউ কি আপনার ফ্ল্যাটে এসেছিলো?”

মহিলা নির্বিকারভাবে বললো, “না।”

“আপনি নিশ্চিত?”

“হ্যা।”

আবারো মহিলার দৃঢ়তায় মুগ্ধ হলো বেগ। “তার মানে দাঁড়ালো মি: জায়েদকে যে-ই খুন ক’রে থাকুক সে তার ফ্ল্যাটেই ছিলো সারা রাত।”

এই প্রথম মহিলা একটু ভড়কে গেলো বলে মনে হলো বেগের কাছে। তবে কথাটার কোনো প্রতিবাদ করলো না ভদ্রমহিলা।

“আপনি কি কাউকে সন্দেহ করেন, মিসেস রেহমান?”

বেগের এই প্রশ্নে মহিলা বিস্মিত হলো। সেটা লুকাতেও পারলো না। “আমি নিজেই যেখানে সন্দেহের মধ্যে আছি সেখানে অন্য কাউকে সন্দেহ করি কিভাবে!” একটা কাষ্ঠ হাসি দেখা গেলো মহিলার ঠোঁটে। যেনো তার সাথে নির্মম রসিকতা করা হচ্ছে।

“কেন, আপনার বাড়িতে যারা থাকে তাদের মধ্যে কি কেউ এ কাজ করতে পারে না? আমরা তো সবাইকেই সন্দেহ করছি।”

“সেটা আপনারা করতেই পারেন। তবে আমি কাউকে সন্দেহ করতে পারছি

না। কোনোভাবেই হিসেব মেলাতে পারছি না, ওকে কেন খুন করা হবে!”

“মিসেস রেহমান,” বেগ গভীর কণ্ঠে বললো। “আপনার স্বামীকে হত্যা করা হয়েছে ব’লে আমরা সন্দেহ করছি। কেন করছি সেটা আপনিও ভালো করেই জানেন। সব কিছু বিবেচনা ক’রে আমার কাছে মনে হচ্ছে আপনাকে আরেকটু সহযোগীতা করতে হবে আমাদেরকে।”

“কি ধরণের সহযোগীতা করবো আমি? খুনটা আমি করেছি বললেই বোধহয় সেটা করা হবে! কিন্তু সেটা তো আমি করি নি! ওকে খুন ক’রে আমার লাভ কি... একটা কথাই শুধু বলতে পারি, ও যদি খুন হয়ে থাকে সেটা আমার কাছেও দুর্বোধ্য। আমি এসবের কিছুই জানি না।”

“মিসেস রেহমান,” বেগের ঠোঁটে মুচকি হাসি। “আমি বুঝতে পারছি না, খুনটা যদি আপনি না-ই ক’রে থাকেন তাহলে এতোক্ষণ ধরে আমাদের কাছে মিথ্যে বলে যাচ্ছেন কেন?”

মহিলা নিজেই চেয়ারে সোজা হয়ে বসলো। তার চোখেমুখে প্রচণ্ড ক্রোধ। এক দৃষ্টিতে চেয়ে রইলো বেগের দিকে। বেগও মহিলার দিকে নিস্পলক চেয়ে রইলো।

কয়েক সেকেন্ড ধরে পালাক্রমে তাদের দু’জনের দিকে তাকালো জামান। বিশাল একটি নাটকীয় মুহূর্তের জন্য উন্মুখ হয়ে আছে সে।

বেগ পরিস্থিতি শান্ত করার উদ্যোগ নিলো। দু’হাত তুলে মহিলাকে প্রশমিত করার ইশারা ক’রে বললো, “আপনি উত্তেজিত হবেন না। আপনাকে এখনও আমরা খুনি হিসেবে সন্দেহ করছি না—”

“তাহলে আমাকে এখানে নিয়ে এসেছেন কেন?” কথার মাঝখানে বাধা দিয়ে মিসেস রেহমান বললো।

“আমার কথা শেষ করতে দিন।” একটু সময় নিয়ে আবারো বলতে শুরু করলো জেফরি বেগ। “আপনি হয়তো জানেন না এরইমধ্যে আমরা একজন সম্ভাব্য খুনিকে ধরে ফেলেছি...”

মহিলা শুধু বিস্ফারিত চোখে চেয়ে রইলো। তারপর নিজেকে সামলে নিয়ে অনেকটা অনিচ্ছায় প্রশ্ন করলো : “কে সে?”

“আপনি তাকে চেনেন।”

মহিলার মধ্যে অস্থিরতা দেখা যাচ্ছে স্পষ্ট।

“আমাদের দৃঢ় বিশ্বাস খুনটা সে-ই করেছে। তবে এখনও তদন্তের প্রাথমিক অবস্থায় আছি আমরা। আরেকটু খতিয়ে দেখতে হবে।”

“আপনার কথা যদি সত্যি হয় তাহলে আমাকে এখানে নিয়ে এসেছেন কি জন্যে? আমার স্বামী খুন হয়েছে। তার লাশ পড়ে আছে পোস্টমর্টেম টেবিলে।

আমার মানসিক অবস্থাটা বুঝতে পারছেন?”

“সবই বুঝতে পারছি। কিন্তু এটা বুঝতে পারছি না আপনি কেন আমাদের কাছে মিথ্যে বলছেন?”

মহিলা আর নিজের রাগ সামলাতে পারলো না। চিৎকার ক’রে বললো, “আমি কোনো মিথ্যে কথা বলি নি। আপনি আমার কাজের লোকদেরকে জিজ্ঞেস ক’রে দেখতে পারেন।”

“মিসেস রেহমান, আমি আপনাকে সত্যি বলার জন্য চাপচাপি করবো না। কিন্তু মনে রাখবেন, মিথ্যে বললে আপনি ফেঁসে যাবেন।”

“আমি আবারো বলছি, আমি আপনাকে যা বলেছি তার মধ্যে কোনো মিথ্যে নেই।”

“আপনি যদি মিথ্যে না বলে থাকেন তাহলে আমরা যাকে অ্যারেস্ট করেছি সে মিথ্যে বলেছে।”

“কার কথা বলছেন, আমি তো কিছুই বুঝতে পারছি না?” মহিলাকে এখন অসহায়ের মতো লাগছে। তার মধ্যে আগের সেই দৃঢ় ভাবটা আর নেই।

“যার সাথে কাল রাতটা কাটিয়েছেন আপনি!” কথাটা বলেই জেফরি বেগ উঠে দাঁড়ালো।

“স্যার, বিশ্বাস করুন আমি খুন করি নি। আমি কিছুই জানি না।”

ধরা পড়ার পর সব অপরাধী যেমনটি বলে লেখক জায়েদ রেহমানের অ্যাপার্টমেন্টের ফায়ারএক্সপ সিঁড়ি থেকে গ্রেফতার হওয়া আলম শফিকও বার বার সে কথা বলে গেছে।

সবার আগে তাকেই নিয়ে আঁশা হয়েছিলো হোমিসাইড ডিপার্টমেন্টের হেডকোয়ার্টারে অবস্থিত অত্যাধুনিক ইন্টেরোগেশন সেলে। লেখকের তরুণী স্ত্রী বর্ষাকে গ্রেফতার করা হলেও তাকে অন্য একটি রুমে রাখা হয়। জেফরি বেগ সিদ্ধান্ত নিয়েছিলো তাকে পরে জিজ্ঞাসাবাদ করবে। মহিলা অবশ্য জানতো না আলম শফিক গ্রেফতার হয়েছে।

ভিটা নুভার ফায়ারএক্সপ সিঁড়ি থেকে আলম শফিককে গ্রেফতার করা হয়েছে একেবারেই নির্ভঙ্গুটভাবে। কোনো রকম হৈহল্লা হয় নি। অ্যাপার্টমেন্টের কেউ বুঝতেই পারে নি তাদের বিল্ডিং থেকে একজন সম্ভাব্য খুনিকে ধরা হয়েছে। জেফরি বেগ সম্পূর্ণ খালি হাতে আলম শফিককে গ্রেফতার করতে পেরেছে তার কারণ এই যুবক নিজে থেকেই অনেকটা আত্মসমর্পনের ভঙ্গিতে ধরা দিয়েছে। দৌড়ে পালাবার চেষ্টা করে নি সে। বেগ জানে এটা অস্বাভাবিক নয়। অনেক

সময়ই খুনি খুন করার পর নাভাস ব্রেকডাউনে ভুগে থাকে। কোনো রকম প্রতিরোধ ছাড়াই আত্মসমর্পন করে।

সনাতন-পদ্ধতিতে সন্দেহভাজন অপরাধীকে শারীরিকভাবে নির্যাতন ক'রে জিজ্ঞাসাবাদ করা হয়, জেফরি বেগ অবশ্য সেসব করে না। এফবিআই'র আদলে গড়ে ওঠা এই ডিপার্টমেন্টে অত্যাধুনিক পলিগ্রাফ মেশিন রয়েছে, যা দিয়ে সন্দেহভাজনের কথা সত্য নাকি মিথ্যে সেটা জানা যায়। অবশ্য এই পলিগ্রাফের ফলাফল আদালতের কাছে গ্রহণযোগ্য নয়, তবে তদন্তকাজে এটা বেশ সাহায্য করে। জেফরি বেগ এই যন্ত্রটি খুব ভালোবাসে। অমানুষিক নির্যাতন করার বদলে এটা অনেক সভ্য আর মানবিক। তার মানে এই নয় যে, হোমিসাইড ডিপার্টমেন্টে কোনো রকম নির্যাতন করা হয় না। এখনও আগের মতো, অনেকক্ষেত্রে তারচেয়েও বেশি নির্মম পদ্ধতি প্রয়োগ ক'রে জিজ্ঞাসাবাদ করার ব্যবস্থা আছে এখানে। অনেক সময় জেনেভা কনভেনশনে নিষিদ্ধ ঘোষিত ড্রাগ প্রয়োগেও সন্দেহভাজনের কাছ থেকে তথ্য আদায় করা হয়। ব্যাপারটা নির্ভর করে ঘটনার গুরুত্ব আর সন্দেহভাজনের সামাজিক অবস্থানের উপর। লেখক জায়দ রেহমানের হত্যাকাণ্ডের ঘটনায় সে রকম কিছু ব্যবহার করার দরকার পড়বে না বলেই মনে করে জেফরি বেগ। আলম শফিক নামের যুবকটিকে কিছুক্ষণ জেরা করলেই পুরো ঘটনা বেড়িয়ে আসবে।

আলম শফিককে ঠিক সেই চেয়ারে বসানো হয়েছিলো। তার শরীরে যথারীতি লাগানো হয়েছিলো ক্যাবলগুলো। তার সামনে জেফরি বেগ আর তার পাশের চেয়ারে বসেছিলো জামান। ঘরে আর কেউ ছিলো না।

জেফরি বেগ ধীরস্থিরভাবে জেরা করতে শুরু করে।

“আপনাকে আমরা কেবল হত্যাকারী হিসেবে সন্দেহ করছি। এর বেশি কিছু না,” জেফরি বেগের কণ্ঠ বেশ বন্ধুত্বাপন্ন।

আলম শফিক নামের যুবকটি মানসিকভাবে ভেঙে পড়েছিলো। কথাটা শুনে কিছুটা বিস্মিত হয় সে।

“এখন আপনার দায়িত্ব এই সন্দেহ থেকে নিজেকে বের ক'রে আনা,” বেগ বলেছিলো তাকে।

“স্যার, আপনি বিশ্বাস করুন, আমি খুন করি নি,” বার বার এই একটি কথাই বলে গেছে সে।

“খুনের কথা বাদ দিন। আমাকে বলুন, আপনার সাথে মিসেস জায়দ রেহমানের সম্পর্কটা কি?”

“স্যার, আমি সব বলবো, কিন্তু বিশ্বাস করুন আমি খুন করি নি।” আবারো নাছোরবান্দার মতো একই কথা বললো সে।

“মি: আলম শফিক,” কথাটা বলে বেগ জামানের দিকে তাকাতেই জামান ডান হাতের তিন আঙুল উঁচিয়ে হাই ফাইভ করে। “পরিস্থিতি জটিল করলে আপনার কোনো লাভ হবে না। সব বলুন। আস্তে আস্তে বলুন।”

মাথা নীচু ক’রে রাখে আলম শফিক। বেগ তাকে সিদ্ধান্ত নেবার জন্য কিছুটা সময় দেয়। তার মধ্যে তাড়াহুড়ার কোনো লক্ষণ নেই। “সব খুলে না বললে সবাই আপনাকেই হত্যার জন্য অভিযুক্ত করবে। আর এজন্যে কাউকে দোষ দিতে পারবেন না আপনি।”

ঘরের একমাত্র দরজাটা খুলে গেলে হাতে চায়ের ট্রে নিয়ে এক লোক ঢোকে। কোনো কথা না বলে সে তিন কাপ চা আর এক প্যাকেট সিগারেট রেখে যায় টেবিলের উপর। আলম শফিক চা আর সিগারেটের প্যাকেটের দিকে অর্থাৎ চোখে তাকিয়ে বেগের দিকে তাকায়।

“চা নিন। একটা সিগারেটও ধরান। এ ঘরে ধূমপান করা যায়।”

বেগের কথা শুনে আলম শফিক আরো বিস্মিত হয়।

বেগ একটা কাপ তুলে নিয়ে চায়ে চুমুক দেয়। আজ সকালে এটাই তার প্রথম কোনো খাবার মুখে দেয়া, অবশ্য চা’কে যদি খাবার হিসেবে গন্য করা হয় তো। জামান চায়ের তেষ্টিয় ছটফট করছিলো। হাতে কাপটা নিয়েই অস্থিরভাবে কয়েক চুমুক চা খেয়ে নেয় সে।

জেফরি বেগ ভুরু উঁচিয়ে আলম শফিককে চায়ের কাপ নিতে ইশারা করে আবার।

চায়ের কাপে আস্তে আস্তে চুমুক দেয় শফিক।

“সিগারেট ধরতে পারেন,” বেগ বললে ফ্যাল ফ্যাল ক’রে চেয়ে থাকে আলম শফিক। “আপনি যে ব্র্যাণ্ডের খান সেটাই আনা হয়েছে।”

চা আর সিগারেট খাওয়া শেষ ক’রে সুবোধ বালকের মতো আলম শফিক গীত গাইতে শুরু করে। হোমিসাইড ডিপার্টমেন্টে সন্দেহভাজনের মুখ দিয়ে কথা বের হলে তারা সেটাকে ‘গীত’ বলেই সম্বোধন করে।

প্রথমেই সে স্বীকার করে তার সাথে মিসেস রেহমানের প্রণয়ের কথা। কতো দিন ধরে চলছে, কিভাবে শুরু, সব। তারপর জানালো ইদানিং তারা মাঝেমধ্যেই ভিটা নুভা অ্যাপার্টমেন্টে অভিসারে লিপ্ত হয়। গতকাল রাতেও সেরকম এক অভিসারে গিয়েছিলো।

রাত আটটার দিকে মিসেস রেহমান নিজে গাড়ি চালিয়ে বাইরে গিয়ে আলম শফিককে গাড়িতে ক’রে তুলে নিয়ে ভিটা নুভায় ফিরে আসে। অবশ্য তার এই আগমন প্রধান গেটের কাছে থাকা দাড়োয়ানের কাছে অজ্ঞাত ছিলো। কেননা মহিলা গাড়ির পেছনের সিটে লুকিয়ে রেখে শফিককে নিয়ে ভিটা নুভায় ফিরে

এলেও তাকে সঙ্গে নিয়ে অ্যাপার্টমেন্টে প্রবেশ করে নি। মিসেস রেহমান চলে যাবার অনেকক্ষণ পর শফিক গাড়ি থেকে বের হয়ে সবার অগোচরে পাকিৎ এরিয়া থেকে লিফটে করে উপরে চলে আসে। অ্যাপার্টমেন্টের একটা অব্যবহৃত দরজা ভেতর থেকে খুলে রেখেছিলো মিসেস রেহমান। ঐ দরজাটা শফিকের প্রেমিকা বর্ষার শোবার ঘর। ফলে অ্যাপার্টমেন্টের ভেতর থাকা হাউজনার্স আর গৃহপরিচারিকাদের কেউই ব্যাপারটা টের পায় নি।

নিজেদের উদ্দাম রাতের কথা সংক্ষেপে বললেও জেফরি বেগ এ নিয়ে আর কোনো প্রশ্ন করে নি। কনডমের ছেঁড়া প্যাকেটই সব বলে দেয় ওখানে কি ঘটেছিলো।

শফিক বার বার জোর দিয়ে বলেছে লেখক জায়েদ রেহমানের ঘরে সে ঢোকে নি। ওখানে কি হয়েছে সে সম্পর্কে তার কোনো ধারণাই নেই। তবে শেষ রাতের দিকে ভিটা নুড়ার সামনে পুলিশের আনাগোনা আর তাদের বেলকনিতে টর্চের আলো ফেলা ঘটনায় তারা দু'জন বেশ ঘাবড়ে গিয়েছিলো। এরপর ভোর রাতের দিকে ইন্টারকমে পুলিশের আগমনের কথা শুনে তারা রীতিমতো ভড়কে যায়। লেখকের তরুণী স্ত্রী বর্ষা ইন্টারকমের জবাব দেবার সময়ই হাউজনার্স প্রতিদিনকার মতো ভোরে ঘুম থেকে উঠে লেখকের মলমূত্রের প্যানটা পরিষ্কার করার জন্যে ঘরে ঢুকেই দেখতে পায় লেখকের মুখে বালিশ চাপা দেয়া। দৃশ্যটা দেখে মহিলা ভড়কে গিয়ে চিৎকার করে উঠলে মিসেস রেহমানের ইন্টারকমের অপর প্রান্তে থাকা পুলিশ ইন্সপেক্টর সেটা শুনে ছুটে আসে তাদের ফ্ল্যাটে।

চিৎকার শুনে বর্ষা ছুটে যায় লেখকের ঘরে। পুরো ঘটনা দেখে একদম ভড়কে যায় সে। তবে পরক্ষণেই বুঝতে পারে তাদের ফ্ল্যাটে পুলিশ আসছে। সঙ্গে সঙ্গে উপস্থিত বুদ্ধি খাটিয়ে নিজের প্রেমিককে ফায়ারএক্সপ সিঁড়িতে লুকিয়ে থাকতে বলে মহিলা। শফিক দরজা খুলে ফায়ারএক্সপ সিঁড়িতে ঢুকতেই হুরমুর ক'রে লিফট থেকে বের হয়ে আসে ইন্সপেক্টর এলাহী নেওয়াজ। মাত্র কয়েক সেকেন্ডের জন্য শফিক পুলিশের হাত থেকে বেঁচে যায় কিন্তু মেইন গেটে পুলিশ থাকার কারণে ফায়ারএক্সপ সিঁড়ি থেকে আর বের হতে পারে নি। অনেকটা ফাঁদে আটকা পড়ে যায়, অবশেষে ওখানে দীর্ঘক্ষণ লুকিয়ে থাকার পর জেফরি বেগের হাতে ধরা পড়ে শফিক।

“বিশ্বাস করুন, আমি খুন করি নি,” কাতর কণ্ঠে আবারো নিজের নিদোষিতা ঘোষণা করে আলম শফিক।


জেফরি বেগ একদৃষ্টিতে চেয়ে থাকে শফিকের দিকে। অনেকক্ষণ পর সে মুখ খোলে। “দেখুন আমরা অনেকটা নিশ্চিত, লেখক জায়েদ রেহমানকে খুন করা হয়েছে। পোস্টমর্টেম রিপোর্ট পেলে সেটা অবশ্য কনফার্ম জানা যাবে।

আপনার কথা যদি সত্যি হয়ে থাকে তবে তাকে হত্যা করলো কে?” একটা দীর্ঘশ্বাস ফেলে আবারো বলে সে, “শয্যাশায়ী এক লোক এমন এক দিনে খুন হলেন যেদিন তার স্ত্রী নিজের প্রেমিককে নিয়ে পাশের ঘরে গোপন অভিসারে লিগু। একশ’ জন লোককে এ ঘটনার কথা বললে তারা বলবে আপনি এবং আপনার প্রেমিকা মিলে এই হত্যাকাণ্ড ঘটিয়েছেন।”

“কিন্তু—”

হাত তুলে বাধা দেয় জেফরি বেগ। “বার বার ঐ এক কথা বলার কোনো দরকার নেই, মি: শফিক। আপনি যদি আমাদের কাছে সব স্বীকার না করেন তাহলে বেশ সমস্যায় পড়ে যাবেন। আপনাকে একটু সময় দেবো, এই সময়টাতে সিদ্ধান্ত নিন সব কিছু স্বীকার করবেন কিনা। মিসেস রেহমানকে জিজ্ঞাসাবাদ করার পর আবার আপনার সাথে কথা বলবো।”

শফিক ফ্যাল ফ্যাল ক’রে চেয়ে থাকে কেবল। বর্ষাকে যে গ্রেফতার করা হবে তাতে অবাক হয় নি সে। তারপরও কথাটা শুনে সে বিমূঢ় হয়ে যায়। নিজের নির্দোষিতার কথা বলতে বলতে ক্লান্ত হয়ে পড়ায় তার মুখে আর কোনো রা নেই। বুঝে যায় মারাত্মক এক বিপদে পড়ে গেছে। ভয়ঙ্কর বিপদ।



খুব সকালে ঘুম থেকে ওঠার অভ্যেস নেই আবেদ আলীর তারপরও আজ অনেক সকালেই উঠে পড়েছে। প্রথম কারণ ঘুম ভেঙে গেছে; তবে ইচ্ছে করলে আবার ঘুম দিতে পারতো, সেটা আর করে নি। ইচ্ছে করেই করে নি।

পঞ্চগন্ন বছর বয়সে নতুন এক নেশায় আসক্ত হয়ে পড়েছে। এতো তীব্র নেশা এই জীবনে কখনই আসক্ত হয় নি।

পঁচিশ বছর ধরে প্রকাশনা ব্যবসা নিয়ে আছে, বেশ নামও করেছে। দেশের অন্যতম বড় প্রকাশনী সংস্থা অবয়ব-এর সত্ত্বাধিকারী। তিন বছর ধরে বিপত্নীক। এক ছেলে, আজ তিন বছর ধরেই অস্ট্রেলিয়ায় সেটেল্ড। মায়ের মৃত্যুর পর পরই সে চলে যায় সেখানে। প্রথম বার দেশে এসে ঈদ ক'রে গেছে, তারপর থেকে আর আসে নি। ওখানেই এক বাঙালী মহিলাকে বিয়ে করেছে।

লেখক-সাহিত্যিকদের সঙ্গে ওঠাবসা করেই আবেদ আলীর সময় কেটে যায় এখন। ব্যবসায় আর আগের মতো সময় দেয় না। পুরনো ব্যবসা, কর্মচারীরাই সব করে থাকে। তাছাড়া ইদানীং তার ব্যবসা খুব একটা ভালো যাচ্ছে না। দিনে দুয়েক ঘণ্টার জন্য গেলোও চলে, না গেলোও ক্ষতি নেই। ফোনে কাজ সেরে নেয়। অথও অবসর। সেই অবসর ঘোচাতেই এক জুনিয়র লেখক-বন্ধুর প্ররোচনায় ফেসবুক নামের আজব জিনিসের গাটায় পড়েছে সে। সেই সুবাদে ইন্টারনেট ঘাটাঘাটি। এখন সেটা রীতিমতো আসক্তির পর্যায়ে চলে গেছে। সারাটা দিন এখন কেটে যায় কম্পিউটারের সামনে বসে থেকে।

আজ থেকে আট মাসে আগে ফেসবুকে মিলি নামের আমেরিকা প্রবাসী এক মাঝবয়সী মহিলার সাথে তার পরিচয়। সেই পরিচয় এখন অনেক গভীরে চলে গেছে। অবশ্য ব্যাপারটা কেউ জানে না, জানার মতো খুব বেশি লোক তার কাছে থাকেও না। কাজের লোক ছাড়া এখন একেবারেই একা বসবাস করে সে।

ইদানিং সকালে ঘুম থেকে উঠেই ফেসবুকে যাওয়াটা তার অভ্যেস হয়ে গেছে। মিলি থাকে আমেরিকার সিয়াটল শহরে। স্বামী আছে কিন্তু সম্পর্ক তেমন একটা ভালো না। এক মেয়ে ছিলো, বিয়ে হয়ে গেছে। থাকে কানাডায়। ভালো একটা চাকরি করে মিলি। খুবই স্বাধীনচেতা। নিয়মিত বই পড়ে। সেই সুবাদে

লেখকদের সাথে তার অনেক জানাশোনা। আবেদ আলীর সেই লেখক-বন্ধুর সুবাদেই মিলি প্রথম তাকে ফেসবুক থেকে ইনভাইটেশন পাঠায়। সেই থেকে তাদের পরিচয়।

মিলির কাছ থেকে গরম কিছু পাবার আশায় বিছানা ছেড়ে সোজা পিসির সামনে গিয়ে বসলো আবেদ আলী। কম্পিউটারটা চালু অবস্থায়ই ছিলো, গতকাল রাত দুটো পর্যন্ত চ্যাট করেছে তারা। মিলি বলেছিলো আজ সকালে ঘুম থেকে উঠেই গরম একটা চিঠি পাবে সে। সেই চিঠি পাবার উত্তেজনায় বাকি রাতটা ঠিকমতো ঘুমও হয় নি আবেদ আলীর।

ফেসবুকে চ্যাট করা ছাড়াও মিলি তার জন্য প্রতিদিন ইয়াহু মেইলে বাঙলা চিঠি লেখে। ইন্টারনেটে কিভাবে বাঙলা চিঠি লিখতে হয় সেটা মিলির কাছ থেকে সে নিজেও শিখে নিয়েছে। প্রতিদিন একটা করে ‘গরম’ চিঠি লেখে মিলি তার জন্য। সেই চিঠির ভাষা এমনই যে কাউকে সেটা বলা যায় না। তার যে বয়স তাতে করে এসব শুনলে লোকজন ভাববে সবই বিকৃত মানসিকতার লক্ষণ।

এরকম একটি গরম চিঠির আশায় ইয়াহু মেইলটা ওপেন ক’রে দেখলো। সঙ্গে সঙ্গে চেয়ারে সোজা হয়ে বসলো সে। যথারীতি মিলি তাকে গরম একটা মেইল পাঠিয়েছে কিন্তু সেটা দেখে নয়, তার বিস্ময় অন্য একটা মেইল দেখে।

মিলির মেইলটার ঠিক নীচে আরেকটা মেইল দেখে রীতিমতো ভিমড়ি খেলো সে। চোখ দুটো কচলে নিয়ে ভালো ক’রে দেখলো আবার। না, ঠিকই আছে। শুধু মেইলই নেই, সাথে বিশাল সাইজের একটি অ্যাটাচমেন্ট ফাইলও রয়েছে। দারুণ অবাক হলো আবেদ আলী। এমন এক লোকের কাছ থেকে মেইলটা এসেছে যা সে কখনও চিন্তাও করে নি। মেইলটা পাঠানো হয়েছে গতকাল রাতে। নির্দিষ্ট ক’রে বলতে গেলে রাত আড়াইটার পর পরই। এটাও একটা অস্বাভাবিক ঘটনা। ভুতের কাছ থেকে মেইল পেলেও এতোটা অবাক হতো না সে।

মিলির মেইলের কথা ভুলে গতরাতে পাঠানো সেই মেইলটা খুললো প্রকাশক সাহেব। এক ধরণের উত্তেজনা টের পাচ্ছে ভেতরে। মেইলটা যে লোক পাঠিয়েছে তার নাম দেখে যতোটা অবাক আর বিস্মিত হয়েছিলো তারচেয়ে অনেক বেশি বিস্মিত হলো মেইলটা পড়ে।

প্রতিটি শব্দ তার কাছে স্বপ্নের মতো মনে হচ্ছে। না। স্বপ্ন নয়, বানোয়াট। কেউ কি তার সাথে রসিকতা করছে? এরকম একটা আশংকাও তার মনে উঁকি দিলো কয়েক মুহূর্তের জন্য তবে সেটা বাতিল করে দিলো সেভারের মেইল অ্যাকাউন্টটা দেখে।

বেঙ্গমানটা কোন্ মতলবে এটা করেছে কে জানে!

এক ধরণের কাঁপুনি টের পেলো নিজের ভেতরে। মেইলের কথাগুলো তার কাছে অবিশ্বাস্য মনে হচ্ছে।


আর হয়তো তোমার সাথে দেখা হবে না!

মানে কি? কিন্তু অ্যাটাচমেন্ট ফাইলটা যখন ডাউনলোড ক'রে ওপেন করলো চেয়ার থেকে উঠে দু'হাত ঘষতে লাগলো আনমনে। কী করণে বুঝে উঠতে পারছে না।

এসব কি হচ্ছে!

আপনি যদি সকালে উঠে দেখেন কেউ আপনার ঘরে কোটি টাকা রেখে গেছে তাহলে বিস্মিত না হলে তো আপনাকে ডাক্তারই দেখাতে হবে। বুঝতে হবে আপনি স্বাভাবিক নন।

কিন্তু আবেদ আলী বেশ স্বাভাবিক একজন লোক। আর সেজন্যেই বিস্ময়ে হতবাক হয়ে গেলো সে, সেই সাথে লটারি পাওয়া কোনো ব্যক্তির মতো আনন্দে অস্থির আর চঞ্চল।



হেমিসাইড ডিপার্টমেন্টের ইন্টেরোগেশন সেলে জমজমাট নাটক চলছে। ডিপার্টমেন্টের প্রায় সবাই নিজের কাজ ফেলে সেই নাটক দেখার জন্য উসখুশ করলেও পাঁচ জন ব্যক্তি ছাড়া কারো পক্ষে সেই নাটক স্বক্ষে দেখা সম্ভব হচ্ছে না।

মেইন ইন্টেরোগেশন রুমে আছে ইনভেস্টিগেটর জেফরি বেগ আর ইন্সপেক্টর জামান, তবে একমুখী আয়নার ওপাশে ছোট্ট কক্ষে আরো তিনজন ব্যক্তি রয়েছে পলিগ্রাফ টেস্ট অপারেটর মুরাদ, অবজার্ভার হিসেবে সিনিয়র ইনভেস্টিগেটর রমিজ লক্ষর আর ডিপার্টমেন্ট প্রধান ফারুক আহমেদ।

ফারুক সাহেব অবশ্য কৌতুহলবশত এসেছে। লেখক জায়েদ রেহমানের হত্যাকাণ্ড নিয়ে সে খুব আগ্রহী। ট্যাবলয়েড পত্রিকায় ছাপা হতে যাওয়া রসালো খবরটা আগেভাগে দেখে নেয়ার দুর্লভ সুযোগ হাতছাড়া করতে চাচ্ছে না। তার এই উপস্থিতির কারণেই ডিপার্টমেন্টের বাকিরা নিজেদেরকে সংযত রাখতে বাধ্য হয়েছে, নইলে এই ছোট্ট কক্ষে সবাই হুমরি খেয়ে পড়তো।

এইমাত্র দিয়ে যাওয়া গরম গরম চায়ে চুমুক দিলো ফারুক সাহেব। তবে তার চোখ সামনের বিশাল আকারের আয়নাটার দিকেই নিবদ্ধ। যেনো সিনেমা হলে বসে কোনো ছবির টান টান উত্তেজনার দৃশ্য দেখছে।

জেফরি বেগ ঘড়ির দিকে তাকালো। দশটা বাজে। সকালের নাস্তা যে খাওয়া হয় নি সেটা ভুলেই গেছিলো। এখন পর্যন্ত দু'গ্লাস পানি আর এক কাপ চা তার পেটে পড়েছে।

তার সামনে বসে আছে মিসেস রেহমান আর তার প্রেমিক আলম শফিক। দু'জনেই মাথা নীচু করে রেখেছে। তবে দু'হাতে মুখ ঢেকে রেখেছে ভদ্রমহিলা।

জেফরির পাশে বসে আছে জামান। নিজের বসের উপস্থিতিতে খুব একটা কথা বলে না সে।

মাত্র বিশ মিনিট আগে মিসেস রেহমানের সামনে আলম শফিককে হাজির

করা হয়েছে। তারা দু'জনেই নিজেদের আসন্ন ভবিষ্যতের কথা ভেবে একেবারে মুগ্ধে পড়েছে এখন। কেউ কাউকে না চেনার ভান করে নি, সব কিছু মেনে নিয়েছে, শুধু একটা বিষয় বাদে : জায়েদ রেহমানকে তারা কেউ খুন করে নি।

জেফরির কাছে অবশ্য এটা নতুন কিছু নয়। খুনিরা এতো সহজে খুনের কথা স্বীকার করে না। ব্যতিক্রম যে নেই তা নয় তবে এটাই হলো সাধারণ চিত্র।

মিসেস রেহমানকে প্রশ্ন করার আগে ঘরের বিশাল আয়নাটার দিকে আড়চোখে তাকালো বেগ। সে জানে ওপাশে বসে আছে তার বস ফারুক সাহেব।

“তাহলে আপনাদের এই সম্পর্কটা অনেক দিন থেকেই চলছে?” ভিটা নুভায় লুকিয়ে লুকিয়ে অভিসারের কথা ইঙ্গিত করলো জেফরি।

তারা দু'জনে কিছু বললো না।

“আপনাদের পরিচয় কতো দিনের?”

শফিকই জবাব দিলো। “দু'বছর।”

“জায়েদ সাহেব কতো দিন ধরে শয্যাশায়ী ছিলেন?”

আলম শফিক তার পাশে বসা বর্ষার দিকে তাকালেও মহিলা মাথা নীচু করেই জবাব দিলেন, “আট মাস ধরে।”

“আপনাদের এই সম্পর্কের কথা আর কে জানে? মানে, আপনাদের দু'জনের ঘনিষ্ঠ লোকজনের কথা বলছি।”

মহিলা মাথা নাড়লো।

“কেউ না!” জেফরি অবাক হয়ে বললো। শফিকের দিকে তাকালো সে।

সেও মাথা নেড়ে একই জবাব দিলো।

“ভালো। মিসেস রেহমান, আপনার কি মনে হয়, যখন ঘুমিয়ে পড়েছিলেন তখন শফিক সাহেব জায়েদ রেহমানের ঘরে গিয়ে থাকতে পারে? তার ঘরটা তো আপনার ঘরের ঠিক পাশেই। এমনও তো হতে পারে আপনি যখন ঘুমিয়ে পড়লেন তখন...?”

আলম শফিকের চোখেমুখে ঘাবড়ে যাবার স্পষ্ট লক্ষণ দেখা যাচ্ছে। মিসেস রেহমান এমনভাবে মুখ তুলে তাকালেন যেনো কথাটা তার মাথায় না এলেও এখন এটাকে একটা সম্ভাবনা হিসেবে দেখছে।

“গুড!” আয়নার ওপাশে বসে থাকা ফারুক সাহেব তার পাশে বসে থাকা দু'জন অধস্তন কর্মচারীর দিকে হাসিমুখে তাকিয়ে বললো। “ডিভাইড অ্যান্ড...” কোটেশনটা ভুলে গেলো, আর বলতে পারলো না। বুঝতে পারলো অন্য একটা বিখ্যাত কোটেশনের সাথে গুলিয়ে ফেলেছে।

“মিসেস রেহমান?” তাড়া দিলো জেফরি বেগ।

মহিলা সন্দেহের দৃষ্টিতে তাকালো আলম শফিকের দিকে। এরই মধ্যে ছেলেটার কপালে ঘাম জমতে শুরু করেছে। “আমি বলতে পারবো না।”

“ভালো করে মনে করে দেখুন। আপনি ঘুমিয়ে ছিলেন... শফিক সাহেব সেই সুযোগে ঘর থেকে বের হয়ে কাজটা ক’রে এলো। এটা কি হতে পারে না?”

মিসেস রেহমান যে সন্দেহের ঘূর্ণিতে পড়ে গেছে, এটা বুঝতে পারছে বেগ। আলম শফিক অস্থির হয়ে উঠলো। “স্যার, বিশ্বাস—”

এবার জামান হাত তুলে মাঝপথে তাকে থামিয়ে দিলো।

“অস্থির হবেন না। আমাদের হাতে চারটা সম্ভাবনা রয়েছে এক, আপনি খুনটা করেছেন। দুই, মিসেস রেহমান সেটা করেছেন। তিন, আপনারা দু’জনে মিলে কাজটা করেছেন পরিকল্পনা করে। আর চার নাম্বারটা খুব দুর্বল বলে মনে হচ্ছে এখন : গৃহপরিচারিকা কিংবা হাউজ-নার্সও কাজটা ক’রে থাকতে পারে।”

সম্ভাবনার কথাগুলো শুনে মিসেস রেহমান আর তার প্রেমিকের গলা শুকিয়ে এলো।

“অপশন দেয়া হচ্ছে,” ফারুক সাহেব ফিসফিস ক’রে পাশের জনকে কথাটা বললো যদিও তার কোনো দরকার নেই। কারণ এই ঘরের কোনো কথা ইন্টেরোগেশন রুমে শোনা যাবে না। “দেখা যাক টোপটা প্রথমে কে গেলো!”

মিসেস রেহমানই টোপটা আগে গিললো। নিজের প্রেমিকের দিকে তাকিয়ে বললো “তুমি তো মাঝরাতে ঘুম থেকে উঠে...সিগারেট খাওয়ার জন্য বেলকনিতে গিয়েছিলে...তাই না!”

“হ্যা, হ্যা,” অসহায়ের মতো বললো আলম শফিক। “শুধু বেলকনিতে গেছি, ঘরের বাইরে যাই নি। বিশ্বাস করো!”

ঠিক এ সময় জেফরি বেগ ঢুকে পড়লো তাদের মধ্যে। “এই ঘটনাটা কখন ঘটেছিলো, মিসেস রেহমান?”

একটু ভেবে মহিলা বললো, “সেটা তো বলতে পারবো না। তবে দ্বিতীয়বার যখন পুলিশ এলো তখন।”

“আপনি কিন্তু বলেছিলেন শেষবার পুলিশের আগমন ছাড়া বাকি দু’বারের ঘটনা আপনি টের পান নি। ঘুমিয়ে ছিলেন,” জেফরি স্থির চোখে বললো কথাটা। ফ্যাল ফ্যাল ক’রে চেয়ে রইলো মহিলা।

“আপনি অনেক মিথ্যে কথা বলছেন, মিসেস রেহমান। এই ইন্টেরোগেশন রুমে মিথ্যে বললে আপনার কোনো লাভ তো হবেই না বরং অনেক ক্ষতি হয়ে যাবে। এটা আপনি ঠিক করছেন না।”

আয়নার ওপাশে বসে থাকা পলিগ্রাফ টেস্ট অপারেটর মুরাদ জানে জেফরি

বেগ কথাটা ঠিক বলে নি। তার সামনে থাকা ফলাফল একেবারেই অন্য রকম।
মি: জেফবিআই, এই কেসটা আপনাকে ভোগাবে, মনে মনে বললো মুরাদ।

“আপনি ঘুম থেকে উঠে বেলকনিতে গিয়েছিলেন কেন?” জেফরি প্রশ্ন করলো আলম শফিককে।

“সিগারেট খেতে।”

“অতো রাতে ঘুম থেকে উঠে সিগারেট খাওয়ার জন্য বেলকনিতে গেলেন!”

“না, মানে ঘরের মধ্যে সিগারেট খাওয়াটা বর্ষা পছন্দ করে না,” শফিক কথাটা বলেই বর্ষার দিকে তাকালো। “তাই না, বর্ষা?”

মহিলা মাথা নীচু করে রাখলো, কোনো জবাব দিলো না।

পালাক্রমে তাদের দু’জনের দিকে তাকিয়ে জেফরি বেগ বললো, “আপনার সাথে আর কে কে ছিলো?”

হকচকিয়ে গেলো শফিক। “আমার সাথে...মানে...কি বলছেন, স্যার!”


“আপনি যখন সিগারেট খাওয়ার জন্য বেলকনিতে গেলেন ঠিক তখন নীচের রাস্তার ফুটপাতে আরেকজন যুবক ছিলো। ছেলেটা গভীর মনোযোগ দিয়ে এই অ্যাপার্টমেন্টের দিকেই তাকিয়ে ছিলো বলে আমাদের কাছে খবর আছে।”

মিসেস রেহমান অবিশ্বাসে তাকালো তার প্রেমিকের দিকে।

“বিশ্বাস করেন, স্যার, আমার সাথে কেউ ছিলো না। বিশ্বাস করেন... কাঁদো কাঁদো গলায় বললো আলম শফিক।

“সেই ছেলেটা কে?” মিসেস রেহমান জানতে চাইলো বেগের কাছে। তার চোখেমুখে তীব্র অবিশ্বাস।

“সেটা আলম শফিক সাহেবই ভালো বলতে পারবেন। তবে মনে হচ্ছে উনি খুব সহজে বলবেন না। কী আর করা...আমদের কাছে সব স্বীকার না করলে আপনাদেরকে পুলিশ রিমান্ডে দেয়া হবে। আমি নিশ্চয়তা দিয়ে বলতে পারি, তারা আপনাদের সাথে এরকম ভদ্র ব্যবহার করবে না।”



আবেদ আলী টয়লেট থেকে বের হয়ে এলো ফুরফুরে মেজাজে। আজ আর ঘরে তৈরি নাস্তা খাবে না। তার পছন্দের রেস্টোরাঁয় গিয়ে কলিজার ভুনা আর পরোটা খাবে। ভাবতেই মুখে পানি এসে গেলো। খাদ্যরসিক হিসেবে তার খ্যাতি আছে।

নাস্তা করার আগে এক কাপ চা খেয়ে নেবে। এটা তার প্রতি দিনকার অভ্যাস। খালি পেটে চা না খেলে ভালো লাগে না। নাস্তার পরও অবশ্য আরেক দফা চা হবে। সকালের পত্রিকাটা ড্রইং রুমের টেবিলে রাখা আছে। এক হাতে সেটা তুলে নিয়ে অন্য হাতে রিমোটটা দিয়ে টিভি ছেড়ে আরাম করে বসে পড়লো সোফায়। শিষ বাজিয়ে বিটোফেনের ঔড টু জয় তোলায় চেষ্টা করলো ভুলভালভাবে।

কাজের ছেলেটা চা দিয়ে গেলে আবেদ আলী শিষ বাজাতে বাজাতে কাপটা তুলে নিয়ে টিভির চ্যানেলটা বদলে একটা দেশী চ্যানেলে সুইচ করলো। পত্রিকায় কোনো খবর নেই। গুলি খেয়ে কেউ মরে নি। লঞ্চ ডুবির ঘটনাও ঘটে নি। আর রাজনীতিবিদেরাও কোনো বাকবিতণ্ডায় জড়ায় নি। গতকাল সাংবাদিকদের জন্য একটা বাজে দিন গেছে।

তারপরও তার চোখ ঘুরে বেড়াচ্ছে পত্রিকায়। চায়ের কাপে মাত্র চুমুক দেবে ঠিক তখনই টিভির একটা খবর শুনে পত্রিকা থেকে চোখ তুলে সেদিকে তাকালো আবেদ আলী।

ব্রেকিং নিউজ!

পত্রিকাটা একপাশে রেখে হা করে টিভির দিকে তাকিয়ে রইলো সে। খবরটা শোনার পর ঔড টু জয় বাজানোটা নির্মম পরিহাস বলেই মনে হচ্ছে তার কাছে।


অল্পবয়সী সংবাদ পাঠিকা যে সংবাদটি পড়ে শোনাচ্ছে সেটা তার কাছে এতোটাই অবিশ্বাস্য মনে হচ্ছে যে, হাতের চায়ের কাপটা আরেকটু হলে হাত থেকে পড়েই যেতো।

হায়! হায়!

আবেদ আলীর বুকটা ধরফর ক'রে উঠলো । সকালের যে অবিশ্বাস্য একটা মেইল পেয়ে এতোক্ষণ ধরে ফুরফুরে মেজাজে ছিলো সেটা নিমেষে তিরোহিত হয়ে গেছে ।

আধ ঘণ্টার মধ্যে একটা লটারি পেয়ে সেটা নস্যাত্ হতে দেখলে যে কারোরই হৃদপিণ্ড বন্ধ হবার কথা । আবেদ আলীরও মনে হলো তার বুকের বাম পাশটায় চিন চিন ক'রে ব্যথা করছে ।

বেঙ্গমানটা...!



সারা দেশে একটা সংবাদ সুনামির মতো ছড়িয়ে পড়েছে জনপ্রিয় লেখক জায়েদ রেহমান খুন হয়েছেন!

এই সংবাদটি প্রথম দিতে পেরেছে চ্যানেল সিক্সটিন নামের নতুন একটি টিভি স্টেশন। তবে কিভাবে তারা এ রকম একটি এক্সক্লুসিভ নিউজ সবার আগে জানতে পারলো সেটা একটা রহস্যই বটে।

তারা সরাসরি লেখক জায়েদ রেহমানের বাড়ির সামনে থেকে লাইভ রিপোর্টিং দেখিয়ে যাচ্ছে এখন। অবশ্য দেশের বাকি টিভি চ্যানেল, সংবাদপত্র এমনকি বেশ কয়েকটি এফএম রেডিও প্রচার ক'রে যাচ্ছে খবরটা। একযোগে মাঠে নেমে পড়েছে সবাই।

একটা হুঁদুর দৌড় শুরু হয়ে গেছে বলা যায়।

নিহত লেখকের বাড়ির ভেতরে সাংবাদিকদের কেউ প্রবেশ করতে না পারলেও তারা বাইরে থেকে যে যার মতো ক'রে সংবাদ পরিবেশন ক'রে যাচ্ছে। প্রত্যেকের কাছেই একটা ক'রে নতুন খবর আছে। আছে অন্য রকম তথ্য।

ভিটা নুভার সামনে জড়ো হওয়া সাংবাদিকদের মধ্যে যারা ইলেক্ট্রনিক মিডিয়ার তারা অবজ্ঞার চোখে না দেখলেও প্রিন্ট মিডিয়ার সাংবাদিকেরা টেকনিক্যাল কারণেই একটু আপসেট হয়ে আছে।

ওরা লাইভ দেখাচ্ছে।

কিন্তু আমাদেরটা আগামীকালের আগে মুখ দেখবে না।

ইলেক্ট্রনিক মিডিয়ার নাক উঁচু সাংবাদিকেরা বেশ ভালো মতোই উপভোগ করছে এই ব্যাপারটা। এক ধরণের করুণার প্রকাশ নেখা যাচ্ছে তাদের আচরণে।

শতশত সাংবাদিক আর হাজার হাজার মানুষ। সেই সাথে আইনপ্রয়োগকারী সংস্থার লোকজনের ভীড়ের কারণে ভিটা নুভার সামনে দিয়ে সব ধরণের যানবাহন চলাচল বন্ধ হয়ে গেছে। ভীড় সামাল দিতে আণো পুলিশের দরকার ব'লে হেডকোয়ার্টারে খবর দেয়া হয়েছে একটু আগে। পরিস্থিতি আরো খারাপ

হবে। লেখক জায়েদ রেহমানের অল্পবয়সী পাঠকেরা এখনও ভীড় করতে শুরু করে নি। তারা এলে কি হবে কে জানে।

একটা স্কুপ আর এক্সক্লুসিভ পাবার জন্য সাংবাদিকের দল এদিক ওঁদিক ঘোরাঘুরি করছে। যাকে তাকে ধরে ইন্টারভিউ নিচ্ছে তারা। এই সুযোগে কিচ্ছু জানে না এমন লোকও দিব্যি টিভি ক্যামেরার সামনে অনেক কথা বলে চলেছে। তাদের ভাবসাব দেখে মনে হচ্ছে লেখক জায়েদ রেহমানকে তাদের সামনেই হত্যা করা হয়েছে কিংবা এরকম একটা ঘটনা যে ঘটবে সেটা তারা আগেই টের পেয়েছিলো।

“এই ভবনের ছয় তলার...ঐ কর্নার ফ্ল্যাটে লেখক জায়েদ রেহমানকে নির্মমভাবে হত্যা করা হয়েছে,” চ্যানেল সিক্সটিন-এর অন্যতম প্রতিপক্ষ একটি টিভি চ্যানেলের উঠতি বয়সী সাংবাদিক ভিটা নুভার দিকে লুক দিয়ে ক্যামেরার সামনে বললো। তার চারপাশে হাজার হাজার মানুষের ভীড়টাকে কোনো রকম আমলেই নিচ্ছে না সে। “আমরা জানতে পেরেছি নিহত লেখকের স্ত্রী আর তার প্রেমিককে সিটি হোমিসাইড গ্রেফতার করেছে। অবশ্য কর্তৃপক্ষ এখনও এ ব্যাপারে মুখ খুলছে না। নির্ভরযোগ্য সূত্রে জানা গেছে...” এক উজবুক টাইপের কৌতুহলী দর্শক রিপোর্টারকে আলতো ক’রে ধাক্কা মেরে উদাস ভঙ্গিতে চলে গেলে রিপোর্টার নিজেকে সামলে নিয়ে আবার বলতে লাগলো...“লেখকের স্ত্রীর সেই প্রেমিক প্রবরটি হলেন তরুণ নাট্য নির্মাতা আলম শফিক।”

আশেপাশের লোকজন বুঝে গেছে এই রিপোর্টার লাইভ রিপোর্ট করছে, ব্যস! সাংবাদিকের চারপাশে শত শত লোক নিজেদের চেহারা দেখানোর জন্য হুমরি খেয়ে পড়লে বেচারী সাংবাদিকের অবস্থা নাকাল হয়ে গেলো। কিন্তু সেই অবস্থায়ই রিপোর্ট ক’রে গেলো ছেলেটা।

পাভেল আহমেদ নামের দৈনিক দেশবিদেশ পত্রিকার সাংবাদিক ভিটা নুভার সামনে এসে দাঁড়ালো। তার মধ্যে রিপোর্ট করবার কোনো তাড়া নেই। অনেকটা অনসভঙ্গিতে তাকালো ভিটা নুভার দিকে।

তার পিঠে আলতো ক’রে কে যেনো চাপড় মারলে পেছন ফিরে দেখতে পেলো তার পরিচিত এক টিভি চ্যানেলের রিপোর্টার দাঁত বের ক’রে হাসছে। “এতো দেরি করলে?”

পাভেল আহমেদ মুচকি হাসলো। “আমি তো আর এখন ইলেক্ট্রনিক মিডিয়ায় কাজ করি না। দেরি ক’রে এলে সমস্যা কি?”

“তা ঠিক। তুমিই ভালো আছো। আর আমাকে দ্যাখো, নাস্তাও করতে পারি নি। ছুটে এসেছি এখানে।”

“আমি তো আসতে চাই নি। এডিটর বললেন ঘটনাগুলো যেতেই হবে।”

“তা আসতে চাইবে কেন! আমাদের রিপোর্টগুলো এদিক ওদিক ক’রে ছাপিয়ে দিলেই তো হয়ে যায়। আছো তো সুখে,” ইলেক্ট্রনিক মিডিয়ার সাংবাদিক পকেট থেকে দুটো সিগারেট বের ক’রে একটা বাড়িয়ে দিলো পাভেল আহমেদের দিকে।

সিগারেটটা হাতে নিয়ে পাভেল আহমেদ ভিটা নুভার দিকে তাকিয়ে বললো, “এক্সকুসিভ কিছু পেলে?”

“মিসেস রেহমান আর তার প্রেমিক আলম শফিক গ্রেফতার হয়েছে। আপাতত এটাই আমাদের এক্সকুসিভ।”

পাভেল আহমেদ ভুরু কুচকে তাকালো সাংবাদিকটির দিকে। “এটা তো আমি বাসায় বসে টিভিতেই শুনে এলাম। এরচেয়ে বেশি কিছু জানতে পারো নি?”

ইলেক্ট্রনিক মিডিয়ার সাংবাদিক মাথা নেড়ে জবাব দিলো। “নিউজ প্রডিউসার বার বার ফোন ক’রে তাড়া দিচ্ছে নতুন কিছু দেবার জন্য। চ্যানেল সিক্সটিন তো আজকে ছক্কা মেরে দিয়েছে। এখন আমাদেরকে একটা কিছু করতেই হবে। কিন্তু চাইলেই কি এক্সকুসিভ কিছু পাওয়া যায়?”

পাভেল আহমেদের মাথায় চট করে একটা আইডিয়া চলে এলো। একটু চুপ করে থেকে বললো, “চেষ্টা করে দ্যাখো কিছু পাও কিনা।”

“আরে আমি চাইলেই কি পারবো! এক্সকুসিভ ঘটনা তো ঘটতে হবে, নাকি?”

মাথা নেড়ে সায় দিলো পাভেল। “আমি যাই। সিগারেটের জন্য ধন্যবাদ।”

“চলে যাবে?” বিস্মিত হলো সাংবাদিক।

“এখানে আমার কোনো কাজ নেই। খামোখাই এসেছি। এডিটরের কথা রাখলাম আর কি।”

“রিপোর্ট করবে না?”

পাভেল আহমেদ মুচকি হেসে বললো, “রিপোর্টের কিছু বাকি রেখেছো তোমরা! সবই তো দেখিয়ে দিয়েছো।”

“নতুন কোনো ডেভেলপমেন্টও তো হতে পারে।”

“মনে হয় না। মাত্র তো গ্রেফতার করা হয়েছে। তাছাড়া আসামীর কোনো জবানবন্দী দিলেও আমরা সেটা দু’এক দিনের আগে জানতে পারবো না।”

“তা ঠিক...”

অনেকটা হুট করেই পাভেল আহমেদ তাকে বললো, “তোমার জন্য একটা এক্সকুসিভ আইটেম আছে, অবশ্য তুমি যদি সেটা চাও তো...”

“মানে? কিসের এক্সকুসিভ?”

মুচকি হাসলো পাভেল । একটু কাছে এসে কাঁধে হাত রেখে ফিস ফিস ক'রে সংক্ষেপে জানালো সেটা কি । কথাটা শুনেই সাংবাদিকের চোখ দুটো চক চক করে উঠলো ।


“নিয়ে আসো । এফুণি নিয়ে আসো ।”

“তার আগে তুমি আমাকে কনফার্ম করো তোমরা নেবে কিনা,” বললো পাভেল আহমেদ ।

“আমি ফোন করে নিউজ প্রডিউসারকে জানাচ্ছি, তুমি ওটা নিয়ে আসো ।”

“ঠিক আছে আমি বাসায় যাচ্ছি । তুমি এখনই ফোন ক'রে জেনে নাও ।”

কথাটা বলেই পাভেল আহমেদ ভীড় ঠেলে চলে গেলো ।



অধ্যায় ১৫

জেফরি বেগের টোপটা ঠিকঠাকমতোই গিলেছে মিসেস রেহমান। মহিলা সন্দেহের চোখে দেখতে শুরু করেছে তার প্রেমিককে। জেফরিকে একটা গুরুত্বপূর্ণ তথ্য দিয়েছে সে : প্রথমবার মিলনের পর তারা দু'জনেই ঘুমিয়ে পড়লে মাঝরাতে মিসেস রেহমানের ঘুম ভেঙে যায়, সে দেখতে পায় বিছানায় আলম শফিক নেই। পরে বেলকনি থেকে বেরিয়ে আসে শফিক। মহিলা নিশ্চিত করে বলতে পারে নি ঠিক কখন শফিক বিছানা ছেড়ে উঠে গিয়েছিলো।

ওদিকে আলম শফিক বিরক্তিকরভাবেই নিজের নির্দোষিতার কথা বলে গেছে। ব্যাপারটা বেগের কাছে অসহ্য লেগেছে এক পর্যায়ে।

সিগারেটের তেষ্ঠা পেলে সে নাকি বেলকনিতে গিয়ে সিগারেট ধরিয়েছিলো আর তখনই অ্যাপার্টমেন্টের সামনে পুলিশের গাড়ি থামতে দেখে ভয়ে ঘরের ভেতরে চলে যায়।

দেড় ঘণ্টার জেরায় অনেক তথ্য দিলেও হত্যার কথা তাদের কেউই স্বীকার করে নি। কিন্তু পরিস্থিতি এমনই যে, এ দু'জন ছাড়া এই হত্যাকাণ্ডটি যে অন্য কেউ ঘটায় নি সেটা মোটামোটি নিশ্চিত।

প্রচণ্ড ক্ষুধার কারণে জেফরি দেড় ঘণ্টা জেরা করে কোনো রকম স্বীকারোক্তি ছাড়াই ইন্টেরোগেশন পর্ব শেষ করেছে। এর অবশ্য কারণও রয়েছে। হোমিসাইড ডিপার্টমেন্ট তদন্তের স্বার্থে যে কাউকে রিমান্ডে নিতেও পারে নাও নিতে পারে, এটা তাদের ইচ্ছের উপর নির্ভর করে কিন্তু পুলিশ রিমান্ড থেকে কারোর রেহাই নেই। তাছাড়া বেগের কাছে মনে হয়েছে আপাতত এরচেয়ে বেশি মিসেস রেহমান আর তার প্রেমিক বলবেও না।

জেফরির ইচ্ছে ছিলো ইন্টেরোগেশন রুম থেকে বের হয়ে বাইরে গিয়ে একটু খেয়েদেয়ে আসবে কিন্তু সেটা আর হয় নি। রুম থেকে বের হতেই তার ডাক পড়ে মহাপরিচালকের রুমে।

এখন সে বসে আছে মহাপরিচালক ফারুক আহমেদের ডেস্কের বিপরীতে।

“ওরা স্বীকার করুক আর নাই করুক তাতে কিছু যায় আসে না,” ফারুক সাহেব বললো। তাকে খুব খুশি দেখাচ্ছে। কেন দেখাচ্ছে জেফরি সেটা আন্দাজ

করতে পারলো। “এটা নিশ্চিত, ওই মহিলা আর তার প্রেমিক পরিকল্পনা করেই খুনটা করেছে। পুরো ঘটনাটা একেবারে পানির মতোই পরিষ্কার।”

জেফরি কিছু বললো না। তার খিদেটা এখন অসহনীয় পর্যায়ে চলে গেছে। ডেস্কে রাখা এক গ্লাস পানি আছে, সেটা তুলে নিলো।

“অসাধারণ কাজ করেছো। আমি খুবই খুশি। একেবারে ঘটনাস্থল থেকে একজন সাসপেক্টকে অ্যারেস্ট করা...মাইগড! তোমার উপর আমার বরাবরই আস্থা আছে। তুমিও সেটা জানো।”

পানিটুকু এক ঢোকে খেয়ে গ্লাসটা রেখে বললো জেফরি, “ধন্যবাদ স্যার।”

“প্রেস তো জ্বালিয়ে যাচ্ছে,” ফারুক সাহেব জেফরির উপর থেকে চোখ সরালো না। “একটা ইন্টারভিউ দিয়ে দাও।”

“ইন্টারভিউ?” বেগ আৎকে উঠলো।

“হ্যাঁ। আরে সবাই তো এরকম সুযোগের জন্য মুখিয়ে থাকে। তাছাড়া এতোবড় একটা ঘটনা, সবাই জানে তোমার কারণেই এতো দ্রুত খুনিকে ধরা গেছে। তোমাকেই চাইছে সবাই।”

“স্যার, আপনি তো জানেন আমি প্রেসকে ফেস করতে পারি না। ইচ্ছেও করে না। আপনি দেন। ডিপার্টমেন্টের হেড হিসেবে আপনারই দেয়া উচিত।”

ফারুক সাহেব একটু সামনে ঝুঁকে এলো। “আমি তো দেবোই। বলছিলাম কি, তুমিও একটা দাও।”

“না, স্যার। এ ব্যাপারে আমাকে মাফ করবেন।” একটু থেমে বেগ প্রসঙ্গ পাল্টালো। “স্যার, পলিগ্রাফ টেস্টের খবরটা জানা দরকার।”

“ওহ, হ্যাঁ। ভুলেই গেছিলাম।” ফারুক সাহেব ইন্টারকমটা তুলে তার পিএ'কে বললো রমিজ লস্করকে এক্সুগি তার অফিসে চলে আসার জন্য।

“হোমমিনিস্টার তো খুব খুশি,” ইন্টারকমটা রেখে নিজের চুলে হাত বোলাতে বোলাতে বললো ফারুক সাহেব।

“তাই নাকি,” ছোট্ট ক'রে বললো বেগ।

“নিজে আমাকে ফোন করে বলেছেন। বুঝলে না, ঐ স্বরাষ্ট্রমন্ত্রণালয় বিষয়ক সংসদীয় কমিটির চাপে ছিলেন। আমাদের চেয়ে উনার খুশিটাও কম নয়।”

“স্যার, আসবো?”

দরজার কাছ থেকে একটা কণ্ঠ বলে উঠলে ফারুক সাহেব আর জেফরি বেগ দু'জনেই সেদিকে তাকালো। রমিজ লস্কর।

“আসো,” একটা চেয়ারের দিকে ইশারা করে তাকে বসতে বললো ফারুক সাহেব।

“পলিগ্রাফ টেস্টের রিপোর্টটা কি?” রমিজকে বললো বেগ।

গাল চুলকে তাদের দু'জনের দিকে একবার চেয়ে নিলো রমিজ। “রিপোর্ট ভালো না, স্যার।”

“মানে?” ফারুক আহমেদ বিস্মিত হলো।

“সাসপেক্টরা খুব কমই মিথ্যে বলেছে। মহিলা প্রথম দিকে মিথ্যে বললেও শফিক সাহেবের মুখোমুখি করার পর তেমন কোনো মিথ্যে কথা বলে নি। সবচাইতে আশ্চর্যের বিষয় হলো শফিক সাহেব কোনো মিথ্যেই বলে নি।”

“কি!” ফারুক সাহেব আবারো অবাক হলো। তবে বেগ কিছু বললো না।

“আমিও খুব অবাক হয়েছি,” রমিজ লঙ্কর বললো।

“মেশিনটা ঠিকমতো কাজ করেছো তো?” সন্দেহ করলো মহাপরিচালক।

“জি স্যার। একদম ঠিক আছে।”

“মিথ্যে বলে নি!?” এই প্রথম বেগ জানতে চাইলো। তাকে একটু চিন্তিত দেখাচ্ছে।

মাথা নেড়ে সায় দিয়ে বললো রমিজ লঙ্কর, “ভাইটাল প্রশ্নগুলোতে মিথ্যে বলে নি।”

“পলিগ্রাফ টেস্ট অবশ্য আদালতের কাছে গ্রহণযোগ্য নয়। এটা কেবলই আমাদের ইন্টেরোগেশন টুলগুলোর একটি। এ নিয়ে চিন্তার কিছু নেই। পুলিশ রিমান্ডে ওরা সব স্বীকার করবে,” ফারুক সাহেব আশ্বস্ত করে বললো।

“তা ঠিক,” সমর্থন করলো রমিজ লঙ্কর।


“স্যার, আদালতে গ্রহণযোগ্য না হলেও পলিগ্রাফ টেস্ট কিন্তু খুব নির্ভরযোগ্য। অন্তত আমরা তাই দেখে আসছি। এখন পর্যন্ত এটা ভুল প্রমাণিত হয় নি,” বেগ বললো।

“ব্যতিক্রম তো হতেই পারে। পারে না? ভুলে যাবে না, পলিগ্রাফ টেস্ট হাল্ভেড পার্সেন্ট ফুলশ্রুফ নয়। আর এজন্যেই এখনও পৃথিবীর কোথাও আদালতের কাছে এটা স্বীকৃত হয় নি।”

বেগের চেহারা দেখে মনে হলো না সে এই ব্যাখ্যায় সন্তুষ্ট হতে পারছে। তবে এটাও ঠিক, কথাটা মিথ্যে নয়। খুব বিরল প্রকৃতির মানুষ পলিগ্রাফ টেস্টকে ধোঁকা দিতে পারে। যারা এটা নির্মাণ করেছে তারা ই এরকম কথা স্বীকার করে। কিন্তু জেফরি বেগ কোনোভাবেই মনে নিতে পারছে না ঐ মিসেস রেহমান আর তার প্রেমিক সেই রকম বিরল কোনো ব্যক্তি।

একই দিনে দু'দুজন বিরল ব্যক্তি?

অসম্ভব!



হোমিসাইড ডিপার্টমেন্টের কেন্টিনটা ছয় তলা ভবনের একেবারে উপরে অবস্থিত। বিশাল ভবনের ছাদের এক তৃতীয়াংশ জায়গা জুড়ে এই কেন্টিনটা জেফরি বেগের একটি প্রিয় জায়গা।

সব সময় এক কোণের একটি টেবিলে বসে চা-নাস্তা খেলেও আজকে আর সম্ভব হলো না। কেন্টিনে ঢোকান পর পরই ডিপার্টমেন্টের সবাই তাকে জেঁকে ধরলো। আজকের সাফল্যে কংগাচুলেঙ্গ জানালো তাকে। এমন কি যেসব সহকর্মী তাকে ঈর্ষা করে, আড়ালের আবডালে উল্টাপাল্টা কথা বলে তারাও মুখে কৃত্রিম হাসি এঁটে জেফরিকে সাধুবাদ জানাতে বাধ্য হলো।

সবার কৌতুহল যতোটা সম্ভব মিটিয়ে অবশেষে কেন্টিনের এক কোণে তার পছন্দের টেবিলে বসতে পারলো জেফরি। পেটে ক্ষিধে থাকলেও মাথায় তার অন্য চিন্তা ঘুরপাক খাচ্ছে, তাই বেয়ারাকে খাবারের অর্ডার দিতে ভুলে গেলো।

ইন্টেরোগেশন রুম থেকে বের হয়ে ফারুক সাহেবের রুমে যাবার আগে সহকর্মী জামানকে ভিটা নুভায় পাঠিয়েছে সে। লেখক জায়েদ রেহমানের ঘরের অনেক কিছু জন্ম করতে হবে লেখকের ব্যক্তিগত ডায়রি (যদি থেকে থাকে), মোবাইল ফোন, ল্যাপটপ, ব্যক্তিগত জিনিসপত্র।

সবাই খুশি হলেও জেফরি বেগের মনে একটা খটকা লেগে আছে। সে এখনও পুরোপুরি সম্ভুষ্ট হতে পারে নি। পুরো ব্যাপারটা ভালো ক'রে খতিয়ে দেখতে হবে। সত্যি বলতে কি এই কেসটা নিয়ে খুব বেশি মাথা না ঘামালেও দ্রুত সাফল্য পেয়ে গেছে। তবে এখন তার কাছে মনে হচ্ছে কেসটা নিয়ে আরো বেশি সিরিয়াস হওয়া দরকার ছিলো। জগিং থেকে ক্রাইম সিনে চলে আসাতে মানসিকভাবে প্রস্তুত ছিলো না। যতোটা সহজ বলে মনে করেছিলো কেসটা বোধহয় ততোটা সহজ নয়। আবার এটাও ঠিক, পলিগ্রাফ টেস্টের ফলাফল থেকে এখনই কোনো সিদ্ধান্তে আসা ঠিক হবে না। ব্যাপারটা নিয়ে ভাবার জন্য তার হাতে যথেষ্ট সময় আছে। হঠাৎ তার ভাবনায় ছেদ পড়লো এডলিন ডি কস্তার আগমনে।

আলম শফিককে গ্রেফতার করার একটু আগে থেকেই এডলিনের সাথে আর কথা হয় নি তার।

এই মেয়ে যখনই কেন্টিনে আসে তখনই ডিপার্টমেন্টের পুরুষ সহকর্মীদের

ঘাড় বঁেকে যায়। এজন্যে অবশ্য কাউকে দোষ দেয় না বেগ। মেয়েটা দেখতে খুবই আকর্ষণীয়।

জেফরি একটু নড়েচড়ে বসলো, কারণ এডলিন তার কাছেই আসছে।

“কংথ্রাচুলেপ, স্যার,” মিষ্টি ক’রে হেসে বললো সে।

“থ্যাংকস।” জেফরি এরপর কি বলবে বুঝতে পারলো না। মেয়েটা দাঁড়িয়ে আছে। হঠাৎ করেই তার মনে হলো তাকে বসতে বলা উচিত। “বসুন।”

“থ্যাংকস।” একটা চেয়ার টেনে বসে পড়লো এডলিন।

অস্বস্তিতে পড়ে গেলো বেগ। দু’জন অবিবাহিত নারী-পুরুষ একসাথে বসবে আর ডিপার্টমেন্টে এ নিয়ে কোনো মুখরোচক গল্প হবে না তাতো হতে পারে না। ইতিমধ্যেই আশেপাশের টেবিলে ফিসফাস শুরু হয়ে গেছে।

“ভিটা নুভা থেকে কখন ফিরলেন?” বেগ জানতে চাইলো।

“ঘণ্টাখানেক আগেই। এলিমেনেশন প্রসেস এখনও করি নি। সেটার কি দরকার আছে?” বললো এডলিন।

একটু ভেবে নিলো বেগ। “না। আমরা যাকে গ্রেফতার করেছি সে স্বীকার করেছে রাতে অ্যাপার্টমেন্টেই ছিলো।”

“আমি সেজন্যে প্রসেস করি নি।” এডলিন একটু থামলো। “স্যার কি কিছু খাবেন? চা?”

“চা? না। আমি তো এখনও নাস্তাই করি নি। প্রচণ্ড ক্ষিধে পেয়েছে।”

“এখনও নাস্তা করেন নি?” এডলিন কৃত্রিম বিস্ময়ে বললে ব্যাপারটা বেগও টের পেলো। “আরেকটু পরে তো লাঞ্ছের সময় হয়ে যাবে।”

“হ্যা,” অন্যমনস্কভাবে বললো জেফরি।

“স্যার!” একটা জোরালো কণ্ঠের কারণে জেফরির অন্যমনস্কভাবটা কেটে গেলো। সাবের কামাল তার টেবিলের দিকে আসছে হাসিমুখে। কাছে এসে জেফরির হাতটা ধরে সে বললো, “আপনি তো দারুণ কাজ করেছেন। তাক লাগিয়ে দিয়েছেন। নীচে দেখে এলাম চার-পাঁচজন টিভি রিপোর্টার ঘুরঘুর করছে। আমার কাছে আপনার কথা জানতে চাইলো। ওদের কাছে আপনি এখন হটকেক।” এক নিঃশ্বাসে কথাগুলো বলে এডলিনের দিকে তাকালো সাবের কামাল।

বেগ তাকে বসার জন্য ইশারা করার আগেই সে চেয়ারে টেনে বসে পড়লো। “আরে এডলিন, আপনি বাসায় গেছিলেন নাকি?”

“বাসায়! না। কেন?” এডলিন অনেকটা বিরক্ত হয়েই বললো।

“না মানে, এই জামাটা পরেই কি আজ অফিসে এসেছিলেন?”

“হ্যা,” এডলিনের কাটাকাটাভাবে বললো কথাটা।

“আমি ভেবেছি বাড়িতে গিয়ে বোধহয় জামা পাল্টে এসেছেন।”

এডলিন বেগের দিকে ফিরলো। “স্যার, আমি উঠি।” সাবের কামালকে কিছু না বলেই কেন্টিন থেকে চলে গেলো মেয়েটা।

সাবের কামাল নারী সহকর্মীদের কাছে একটি বিরক্তিকর চিজ। সবাই তাকে এড়িয়ে চলে। জেফরি নিজেও তার আচরণে সন্তুষ্ট না। তবে খুব বেশি দূর যায় না সে। একটু খোঁচা মারবে তো একটু সুযোগ বুঝে বেমক্লা কথা বলে বিব্রত করে দেবে। এর বেশি নয়।

“কি খবর?” বললো জেফরি।

“খবর ভালো, স্যার,” চেয়ারটা সামনে টেনে আনলো কামাল যেনো জরুরি একটা কথা বলবে। “সিগারেটের ফিল্টার থেকে সালিভা পাওয়া গেছে। এখন মি: শফিকের নমুনা কালেক্ট করে ম্যাচিং ক’রে দেখতে হবে। তবে আমি নিশ্চিত পজিটিভ হবে।”

মাথা নেড়ে সায় দিলো বেগ। সেও জানে এটা পজিটিভ হবে। আলম শফিক স্বীকার করেছে মিসেস রেহমানের ঘরে সিগারেট খাওয়ার কথা। তারপরেও সন্দেহভাজনরা যখন হত্যার কথা স্বীকার করেছে না সেক্ষেত্রে আদালতে শক্ত প্রমাণ হিসেবে তাদেরকে কিছু কাজ করতে হবে। ডিএনএ টেস্ট এই কেসে বেশ বড় ভূমিকা রাখবে বলেই আশা করছে জেফরি।

“জায়েদ রেহমানের ঘরে কিছু পেয়েছো?” জানতে চাইলো বেগ।

“না, স্যার। একদম ক্লিন। ফিঙ্গারপ্রিন্ট টিমও ওখানে কিছু পায় নি।”

বেগ কিছু বলতে যাবে তার আগেই জামান এসে হাজির। তার ভাবসাব দেখে মনে হচ্ছে কিছু একটা ঘটেছে। হস্তদস্ত হয়ে জেফরির টেবিলের সামনে এসে দাঁড়ালো সে।

“স্যার!”

“কি হয়েছে?” বললো জেফরি।


“জায়েদ রেহমানের ল্যাপটপটা চেক ক’রে একটা জিনিস পেয়েছি। আমার মনে হয় এফুগি আপনার সেটা দেখা দরকার।”

জেফরি বেগ খবরটা শুনে উৎফুল্ল হতে পারলো না। খিদের চোটে তার হাত-পা রীতিমতো কাঁপছে। টেবিলে রাখা এক গ্লাস পানি দ্রুত খেয়ে উঠে দাঁড়ালো সে। “ল্যাপটপটা কোথায়?”

“আপনার অফিসে।”

“চলো।”

সাবের কামালকে রেখে জেফরি আর জামান তাড়াহুড়ো করে কেন্টিন থেকে বের হয়ে গেলো।



অধ্যায় ১৭

আবেদ আলী আর বাইরে গিয়ে নাস্তা করে নি। ইয়াহ্ন মেইলে গিয়ে মিলির গরম মেইলটাও খুলে দেখে নি এখন পর্যন্ত। অনলাইনে মিলি তাকে না পেয়ে তার মোবাইলে পাঁচ-ছয়টা এসএমএস করেছে, সেগুলোর জবাব দেয়া তো দূরের কথা একটাও পড়ে দেখে নি। জায়েদ রেহমানের হত্যার খবর শুনে কিংকর্তব্য বিমূঢ় হয়ে ড্রইংরুমে বসে আছে। বাড়ির কাজের লোক নাস্তা দিয়ে গেলেও পুরোটা খেতে পারে নি। অর্ধেক নাস্তা এখনও টেবিলে পড়ে রয়েছে। তিন বছর ধরে সিগারেট খাওয়া ছেড়ে দিয়েছিলো কিন্তু টেনশন দূর করার জন্য কাজের ছেলেটাকে দিয়ে কিছুক্ষণ আগে এক প্যাকেট সিগারেট আনিচ্ছে সে। এটাও তো ঠিক, বিগত তিন বছরে তার জীবনে এরকম একটা দিন আসে নি।

এরইমধ্যে তিনটা সিগারেট শেষ ক'রে ফেলেছে, চার নাম্বারটায় আঙুন ধরালো। সিগারেট যে কেন খাচ্ছে সেটাও জানে না। এক ধরনের ঘোরের মধ্যে পড়ে গেছে। তার মাথায় অসংখ্য চিন্তা ঘুরপাক খেলেও কোনো কিছুই বুঝে উঠতে পারছে না। কারো সাথে পরামর্শ করা দরকার, কথাটা ভেবেই আধ ঘণ্টা আগে তার এক লেখক বন্ধুর সাথে ফোনে এ নিয়ে কথা বলেছে। তারপর থেকে তার দুশ্চিন্তা বেড়ে গেছে কয়েক গুন। সেই লেখক বন্ধু সব শুনে যা বলেছে তা রীতিমতো গা শিউড়ে ওঠার মতো। অবশ্য তার কথায় যুক্তি আছে। আবেদ আলী নিজেও সেটা বুঝতে পারছে এখন।

নিজের অফিসে বসে আছে জেফরি বেগ। তার সামনে বসে আছে জামান। লেখক জায়েদ রেহমানের ল্যাপটপ চেক ক'রে অসাধারণ একটি তথ্য পাওয়া গেছে।

মৃত্যুর আগে জায়েদ রেহমান একজনের কাছে মেইল ক'রে গেছেন। শুধু মেইল না, সাথে একটা বিশাল আকারের ডকুমেন্ট ফাইলও অ্যাটাচ করেছেন তিনি।

অদ্ভুত।

মেইল আর অ্যাটাচমেন্ট ফাইলটা ওপেন ক'রে দেখেছে জেফরি। এটা আরেকটা বোমার মতো। সে ভাবতেও পারে নি এভাবে এতো দ্রুত সব আলামত আর কু পেয়ে যাবে।

যার কাছে লেখক মেইলটা পাঠিয়েছিলেন সেই ভদ্রলোককে জিজ্ঞাসাবাদ করতে হবে। আর সেটা করতে হবে খুব দ্রুত। ভদ্রলোকের ফোন নাম্বার যোগার করাটা তেমন কঠিন কাজ ছিলো না। ইয়েলো পেজ থেকে ভদ্রলোকের ব্যবসায়িক প্রতিষ্ঠানে ফোন করে তার ব্যক্তিগত মোবাইল নাম্বারটা নিয়ে নিয়েছে জামান।

ভদ্রলোক থাকে বেইলি রোডে, হোমিসাইড ডিপার্টমেন্টের খুব কাছে। জেফরি ঠিক করলো এফুণি ভদ্রলোকের সাথে কথা বলবে। তবে তার আগে ফোন করে জেনে নিতে হবে এখন সে কোথায় আছে। আবারো জামানকেই ফোনটা করার জন্য বললো সে।

আজকের সকালটা কতো দ্রুতই না বদলে যাচ্ছে! পেডুলামের মতো দুলছে আবেদ আলীর ভাগ্য। তার মনে আশংকা বেঈমানটা মরে যাবার আগে তাকে একটা গ্যাড়াকলে ফেলে দিয়ে গেছে। কিন্তু কেন? আবেদ আলী এর কোনো সদুত্তর খুঁজে পাচ্ছে না।

আরে, আমি তোর কী ক্ষতি করেছিলাম!

তাকে চমকে দিয়ে মোবাইল ফোনটা বেজে উঠলো।


নাম্বারটা অপরিচিত। প্রথমে ভেবেছিলো ধরবে না, তারপর সাত-পাঁচ ভেবে কলটা রিসিভ করলো সে।

“হ্যালো, আবেদ আলী সাহেব বলছেন?”

“জি...” ভয়ানকভাবে বললো সে।

“সিটি হোমিসাইড থেকে বলছি। ইন্সপেক্টর জামান।”

“সিটি হোমি...” আবেদ আলী আর কিছু বলতে পারলো না। যে আশংকা করেছিলো সেটাই বুঝি সত্যি হতে চলেছে। টের পেলো তার নিঃশ্বাস দ্রুত হয়ে গেছে।



অধ্যায় ১৮

পাভেল আহমেদ ভিটা নুভা থেকে একটু দূরে এসে পকেটে হাত দিলো। সেখানে ছোট্ট একটা জিনিস আছে।

নিজের দূরদর্শিতার কথা ভেবে খুব ভালো লাগছে তার। পাঁচ মাস আগেও যে জিনিসটার কোনো মূল্য ছিলো না আজ সেটাই হয়ে উঠেছে লোভনীয় একটি বস্তু। তার সাবেক বস্ চ্যানেল সিক্সটিনের নিউজ এডিটর মামুনুর রশীদ যখন এই জিনিসটা দেখতে পাবে তখন তার অবস্থা কী রকম হবে ভাবতেই পাভেলের হাসি পেলো।

কতো কষ্ট করেই না জিনিসটা যোগার করেছিলো সে অথচ এডিটর সেটার মূল্যই বুঝতে পারলো না! প্রিন্ট মিডিয়া থেকে অনেক শখ ক'রে ইলেক্ট্রনিক মিডিয়ায় গেছিলো সে, মাত্র দেড় মাসের মাথায় সে পাট চুকিয়ে ফিরে এসেছে পুরনো কর্মক্ষেত্রে।

পকেট থেকে সাদা কাগজে মোড়ানো জিনিসটা বের করলো, তাতে ছোট্ট ক'রে ইংরেজিতে লেখা আছে : Z.R-I

একটু সময় পার করে তাকে আবার ফিরে যেতে হবে ভিটা নুভার সামনে জটলার দিকে। সময় কাটানোর জন্য আশেপাশে একটা চায়ের দোকান খুঁজে সেখানে চলে গেলো সে। আধ ঘণ্টার মতো সময় কাটাতে হবে তাকে।

ভিটা নুভার সামনে লোকজনের জটলা এখন নিয়ন্ত্রণের বাইরে। একদল অল্পবয়সী পাঠক রীতিমতো মিছিল করতে শুরু ক'রে দিয়েছে। লেখকের স্ত্রী আর প্রেমিকের ফাঁসির দাবি তোলা হচ্ছে সেই মিছিল থেকে। প্রথমে মনে করা হয়েছিলো নিতান্তই ছেলেমানুষি ব্যাপার। পাগলামি। কিন্তু এখন আর সেটা মনে হচ্ছে না। এই হুজুগে যোগ দিয়েছে ভাসমান আর কৌতুহলী আরো কয়েকশ' মানুষ।

সবগুলো টিভি চ্যানেল এই দৃশ্য লাইভ দেখাচ্ছে। সাংবাদিকেরা ব্যস্ত হয়ে পড়েছে মিছিলের নেতাগোছের কারো সাক্ষাৎকার নেবার জন্য।

স্বদেশ টিভির রিপোর্টার হামিদ আলম তার ক্যামেরাম্যান ছেলেটাকে মিছিল কভার করার জন্য পাঠিয়ে সিগারেটের প্যাকেট থেকে একটা সিগারেট বের করে ধরালো। প্যাকেটে আর কোনো সিগারেট নেই। একটু আগে পাভেল আহমেদকে সিগারেট দেয়াটা ঠিক হয় নি। তার স্টক শেষ হয়ে গেছে।

চারপাশে প্রচণ্ড হৈহুটগোল থাকার কারণে প্রথমে সে বুঝতে পারে নি, পরে খেয়াল করলো পকেটে থাকা মোবাইল ফোনে রিং হচ্ছে। বিরক্ত হয়ে গেলো সে। শালার নিউজ প্রডিউসার এসি রুমে বসে বসে খালি অর্ডার দিয়ে যাচ্ছে একটা স্কুপ চাই! একটা স্কুপ চাই! পাঁচ মিনিট পর পরই তাকে ফোন করছে। তার ভাবসাব দেখে মনে হচ্ছে সে বুঝি এখানে বসে বসে বাল ফেলছে।

কিন্তু ডিসপ্লে'র নাম্বারটা দেখে সঙ্গে সঙ্গে কলটা রিসিভ করলো হামিদ আলম।

“হ্যা, বলো?” খুব জোরে বলতে হলো চারপাশের নয়জের কারণে।

“তুমি কি এখনও ভিটা নুভার সামনে আছো?” পাভেল আহমেদ জানতে চাইলো।

“আর কোথায় যাবো! সারাটা দিন মনে হয় এখানেই থাকতে হবে।”

“নিউজ প্রডিউসারের সাথে কথা বলেছো?”

“হ্যা, বলেছি। তুমি ওটা নিয়ে চলে আসো। ভালো দাম পাবে।”

“নগদ দিতে হবে কিন্তু।”

“নগদ মানে...আমি তো স্পটে আছি। এখানে টাকা দেবো কিভাবে?”

“এখন দিতে হবে সেটা বলছি না। আজকেই দিতে হবে।”

হামিদ আলম তাড়া দিয়ে বললো, “তুমি জলদি নিয়ে আসো। আজকেই পাবে। এ নিয়ে চিন্তা কোরো না।”

“ঠিক আছে, আমি আসছি।”

কলটা শেষ হতেই হামিদ আলম ভাবলো পাভেল তাকে যা বলেছে সেটা যদি ঠিক হয় তাহলে আজকের সন্ধ্যার মধ্যে তারা একটি ফাটাফাটি নিউজ করতে পারবে।

চ্যানেল সিক্সটিনের রিপোর্টার একটু দূরেই দাঁড়িয়ে আছে। বিজয়ীর ঔদ্ধত্য দেখা যাচ্ছে তার চোখেমুখে। হামিদ আলম তার দিকে তাকিয়ে মুচকি হাসলো।



অধ্যায় ১৯

জীবনে এই প্রথম পুলিশস্টেশনে এসেছে আবেদ আলী। অবশ্য হোমিসাইড ডিপার্টমেন্টকে পুলিশস্টেশন বলা যায় কিনা সেটা ভাববার বিষয়। তবে এটাও ঠিক, এরা পুলিশেরই লোক।

এর আগে স্বচক্ষে কোনো গোয়েন্দাকেও দেখে নি সে, ফলে ইনভেস্টিগেটর জেফরি বেগকে দেখে বুঝে উঠতে পারছে না এ দেশের সব গোয়েন্দা এই লোকের মতো হয় কিনা।

মানানসই উচ্চতা আর হালকা পাতলা শরীরের একজন আপাদমস্তক ভদ্রলোক। চোখ দুটো বুদ্ধিদীপ্ত এবং গভীর। পোশাক-আশাক বেশ পরিপাটি। হাটাচলার মধ্যে প্রবল ব্যক্তিত্বের বর্হিপ্রকাশ স্পষ্ট চোখে পড়ে। দেখে মনে হয় নরম মনের একজন মানুষ। খুবই বন্ধুবৎসল। এখানে আসার পর আবেদ আলীর সাথে যথেষ্ট ভালো ব্যবহার করছে সে। তার ব্যবহারের কল্যাণে আবেদ আলীর সমস্ত ভয় আর উদ্ভিগ্নতা কিছুটা কমে এসেছে।

এই তরুণ ইনভেস্টিগেটর সন্দেহভাজনদেরকে আসামী হিসেবে দেখে না, এ ব্যাপারে আবেদ আলী নিশ্চিত। যেমনটা সব পুলিশ করে থাকে। পুলিশ যেমন সবাইকে চোর-ডাকাত ভাবে এই লোক সে রকম নয়।

তবে লোকটার নাম একটু অদ্ভুত। প্রথমে শুনে আবেদ আলী বুঝে উঠতে পারে নি। *জেফরি বেগ! এটা আবার কেমন নাম? খুঁস্টান হবে হয়তো।*

তারা বসে আছে জেফরি বেগের অফিসে। আবেদ আলী এখানে এসেছে দশ মিনিট হলো। কিছুক্ষণ আগে জেফরি তাকে রেখে একটু বাইরে গেছে। এখন তার সামনে বসে আছে ইন্সপেক্টর জামান—যে লোক তাকে ফোন করেছিলো এখানে আসার জন্য।

জামান কিছু বলছে না। চুপচাপ মোবাইলে কাকে যেনো এসএমএস ক'রে যাচ্ছে আর ফাঁকে ফাঁকে আবেদ আলীর দিকে তাকাচ্ছে। আবেদ আলীর কাছে মনে হচ্ছে সময় কাটানোর জন্যই সে এটা করছে।

জামানকে এসএমএস করতে দেখে মিলির কথা মনে পড়ে গেলো তার। মোবাইলটা বের ক'রে দেখলো। যা ভেবেছিলো তাই। মিলির বারো-তেরোটা

এসএমএস জন্মে আছে। এখানে আসার আগে মোবাইলটা সাইলেন্ট মুডে রেখে দিয়েছে সে তাই বিপুলো শুনতে পায় নি। একটা এসএমএস ওপেন করলো আবেদ আলী। ইংরেজি অক্ষরে বাংলায় লেখা এসএমএস।

কি হয়েছে বেবি? প্লিজ আমাকে বলো।
আমি টেনশনে আছি। এনি প্লবলেম?
এসএমএস করছো না কেন? অনলাইনেও
নেই। প্লিজ আমাকে জানাও।

মেজাজটা খারাপ হয়ে গেলো আবেদ আলীর। মিলির এই বেশি বেশি কেয়ারিং তার কাছে ন্যাকামি ব'লে মনে হয় মাঝেমাঝে। সে আছে মহা ঝামেলায় আর এই মেয়েটা...ছেচল্লিশ বছরের একজনকে মেয়ে বলা যায় কিনা ভেবে হেসে ফেললো আবেদ আলী। আর কোনো মেসেজ ওপেন না ক'রে মোবাইলটা পকেটে রেখে জামানকে বললো, “আমাকে এখানে কতোক্ষণ থাকতে হবে?”

মোবাইল থেকে মুখ সরিয়ে জামান তার দিকে তাকালো। “বেশিক্ষণ লাগবে না। স্যার আপনার সাথে একটু কথা বলবে, তারপরই আপনি চলে যেতে পারবেন। ভয় পাবার কিছু নেই।”

“না, না। ভয় পাবো কেন,” বললো আবেদ আলী।

জামান তার দিকে তাকিয়ে মুচকি হেসে আবারো মোবাইলে ব্যস্ত হয়ে পড়লো।

প্রকাশক সাহেব হোমিসাইড ডিপার্টমেন্টে আসার পরপরই মহাপরিচালক ফারুক আহমেদ জেফরিকে ডেকে পাঠিয়েছে। কারণটা জামান জানে লেখক জায়েদ রেহমানের হত্যাকাণ্ডের ব্যাপারে এক টিভি চ্যানেলে ইন্টারভিউ দেবে মহাপরিচালক, সেজন্যে জেফরির কাছ থেকে পুরো ঘটনাটা সংক্ষেপে জেনে নিচ্ছে।

খুব তাড়াহুড়া ক'রে জেফরি নিজের অফিসে ঢুকলে জামান তার মোবাইলটা সঙ্গে সঙ্গে পকেটে ঢুকিয়ে রাখলো।

“সরি,” ছোট্ট ক'রে বলে ডেস্কের অপর পাশে নিজের চেয়ারে বসে পড়লো সে।

“না, না ঠিক আছে,” আবেদ আলী কথাটা বললে জেফরি তার দিকে তাকিয়ে নীরব একটা হাসি দিলো।

“আপনার সময় নষ্ট করবো না। কয়েকটা জরুরি প্রশ্ন করেই ছেড়ে দেবো।”

“বলুন। আমার যতোটুকু সাহায্য করার করবো,” বললো আবেদ আলী।

“উমমম...” কি বলবে সেটা একটু গুছিয়ে নিলো জেফরি। “আপনি কখন জানতে পারলেন লেখক জায়েদ রেহমান খুন হয়েছেন?”

“সকাল দশটার দিকে হবে। টিভি নিউজে দেখেছি।”

“আমরা জানতে পেরেছি উনি মারা যাবার আগে, রাত ২টার কিছু পরে আপনাকে একটা মেইল করেছেন। সাথে আস্ত একটা বইয়ের পাণ্ডুলিপিসহ?”

“হ্যাঁ। আজ সকালে সেটা পেয়েছি। খুবই অবাক হয়েছি আমি।”

“অবাক হয়েছেন! কেন?”

“কারণ দীর্ঘ দিন ধরে তার সাথে আমার কোনো যোগাযোগ নেই। বলতে পারেন আমাদের সম্পর্কটা ভালো ছিলো না।”

“তাই নাকি,” জেফরি একটু অবাক হলো। “আমি যতোদূর জেনেছি উনার অনেকগুলো বই আপনার প্রকাশনী থেকে বের হয়েছে।”

“হ্যাঁ। আগে আমার এখান থেকেই তার বই বের হতো। দু’বছর ধরে আর বের হয় না।”

“কেন?”

“মৃতলোক সম্পর্কে খারাপ কিছু বলতে ইচ্ছে করছে না...হাজার হোক এক সময় সে আমার খুব কাছের লোক ছিলো।” একটু থেমে আবার বলতে লাগলো সে, “জায়েদকে আমিই প্রথম সুযোগ করে দিয়েছিলাম। আমার এখান থেকেই তার প্রথম পঞ্চাশটি বই বের হয়েছে। এজন্যে আমার প্রতি কৃতজ্ঞও ছিলো। দু’বছর আগে হঠাৎ করেই অন্য এক নতুন প্রকাশককে বই দিতে শুরু করে। ব্যাপারটা আমার জন্য খুব কষ্টের ছিলো। শুধু মাত্র বেশি টাকা পাবার জন্যে সে এ কাজ করেছে। আমি অবশ্য তার কাছে কিছু জানতে চাই নি, সেও আমাকে কিছু বলে নি। এ ঘটনার পর থেকে তার সাথে আমার যোগাযোগ আস্তে আস্তে কমে আসে। এক পর্যায়ে আমাদের মধ্যে দূরত্ব তৈরি হয়।” আবেদ আলী থেমে আশেপাশে তাকালে জেফরি ভুরু তুলে জানতে চাইলে সে বললো, “একটু পানি হবে?”

“শিউর,” জেফরিকে কিছু বলতে হলো না, জামান উঠে গিয়ে ঘরের এককোণে থাকা ফিল্টার পট থেকে এক গ্লাস পানি ঢেলে আবেদ আলীকে দিলো।

“আপনি বলতে চাচ্ছেন বিগত দু’বছরে আপনারা মध्ये একদম যোগাযোগ ছিলো না,” আবেদ আলীর পানি খাওয়া শেষ হলে জেফরি জানতে চাইলো।

“হ্যাঁ।”

“তাহলে কাল রাতে উনি কি মনে করে আপনার কাছে একটা জরুরি মেইল করলেন? সেই সাথে একটা নতুন বইয়ের পাণ্ডুলিপিসহ?”

“আমিও এটার কোনো ব্যাখ্যা খুঁজে পাচ্ছি না। বিশ্বাস করুন, আমার মাথায় কিছুই ঢুকছে না।”

“জায়েদ রেহমান কাল রাতে নিজের ঘরে খুন হয়েছেন। খুন হবার আগে একজন পক্ষাঘাতগ্রস্ত লোক আপনার কাছে একটা মেইল করলেন, সাথে আনকোড়া একটা বইয়ের সফটকপি অ্যাটাচ করে। বিগত দু’বছর ধরে যে প্রকাশনা থেকে উনার বই বের হচ্ছে সেখানে না পাঠিয়ে আপনার কাছে পাঠালো...পুরো ব্যাপারটাই ঘোলাটে মনে হচ্ছে না আপনার কাছে?” জেফরি স্থির চোখে চেয়ে রইলো আবেদ আলীর দিকে।

মাথা নেড়ে সাই দিলো আবেদ আলী। “তা তো মনে হচ্ছেই।”

“ঝগড়া হবার আগে আপনাদের মধ্যে কেমন সম্পর্ক ছিলো?”

“ঝগড়া? আমাদের মধ্যে তো সেরকম কিছু হয় নি,” আবেদ আলী অনেকটা প্রতিবাদ করে বললো।

“আই মিন, কথাবার্তা বন্ধ হবার কথা বলছি,” শুধরে দিয়ে বললো জেফরি।

“ভালো। খুব ভালো সম্পর্ক ছিলো আমাদের মধ্যে। বয়সে আমরা প্রায় সমবয়সী ছিলাম। তার প্রথম বইটা আমার কারণেই বের হয়েছিলো। তখন আমি আমাদের পারিবারিক ব্যবসায় যোগ দিয়েছি মাত্র। আমার বাবা তার বই বের করতে রাজি ছিলেন না। এইসব ছেলেছেকরাদের বই বের করে কোনো লাভ হবে না বলে তিনি জায়েদকে ফিরিয়ে দিয়েছিলেন কিন্তু আমার খুব খারাপ লেগেছিলো। সে চলে যেতে লাগলে আমি তাকে ডেকে নিই। বাবাকে অনেক কষ্টে বুঝিয়ে রাজি করাই। শেষ পর্যন্ত আমাদের প্রকাশনী থেকেই তার প্রথম উপন্যাস বের হয়...সেই থেকে তার সাথে আমার বন্ধুত্ব।”

“তার মানে আপনাদের সম্পর্কটা অনেক দিনের?”

“হ্যাঁ। প্রায় ছাব্বিশ বছরের মতো হবে।”

“এই ছাব্বিশ বছরের সম্পর্কটা শুধুমাত্র একটা বই না দেবার কারণে নষ্ট হয়ে গেলো!”

আবেদ আলী কিছু বললো না, চুপ করে থাকলো।

“আপনার সাথে মিসেস রেহমানের সম্পর্ক কেমন ছিলো?”

“কোনুজনের কথা বলছেন?” জানতে চাইলো আবেদ আলী।

“কোনুজন মানে?” বুঝতে না পেরে বললো জেফরি।

“স্যার, জায়েদ রেহমান আগে আরেকবার বিয়ে করেছিলেন,” আবেদ আলী কিছু বলার আগেই জামান ধরিয়ে দিলো ব্যাপারটা।

ব্যাপারটা জেফরির মাথায়ই ছিলো না। মনে মনে জিভ কাটলো সে। তেমন কেনো প্রচেষ্টা ছাড়া অভাবিত সাফল্য পেয়ে গেলেও এই কেসটা নিয়ে যে খুব

বেশি মনোযোগ দিচ্ছে না এটা তারই প্রমাণ। এটা ঠিক হচ্ছে না, মনে মনে ভাবলো জেফরি বেগ। “বর্তমান স্ত্রীর কথা বলছি,” বললো সে।

“তার সাথে আমার তেমন একটা সম্পর্ক ছিলো না।”

আবেদ আলী দায়সারা গোছের জবাব দিলেও জেফরি সেটা ধরতে পারলো। “তার মানে খারাপ ছিলো?”

“হাঁক খারাপ বলবো না, বলতে পারেন তার সাথে আমার তেমন ঘনিষ্ঠতা ছিলো না।”

“উনার দ্বিতীয় বিয়ের ব্যাপারে আপনার অভিমত কি ছিলো?”

“নিজের মেয়ের বান্ধবীকে বিয়ে করবে কথাটা শুনে স্বাভাবিকভাবেই প্রথমে আমি আপত্তি জানিয়েছিলাম। কিন্তু সে আমাদের কারো আপত্তি কানে দেয় নি। আমরাও এ নিয়ে তাকে আর কিছু বলি নি।”

“আর প্রথম স্ত্রীর সাথে?” বেগ বললো।

“সম্পর্কের কথা বলছেন?”

“হ্যাঁ।

“ভালো। জায়েদের সাথে আমার সম্পর্কটা যতো দিনের গ্যাটের সাথেও প্রায় ততোদিনের সম্পর্ক।”

“...গ্যাট?” জেফরি ভুরু কুচকে জানতে চাইলো।

“সরি। গোলনূর আফরোজ তরফদার। সংক্ষেপে আমরা তাকে GAT বলে ডাকি।”

“আচ্ছা...মি: আলী, লেখক জায়েদ রেহমান আপনাকে মেইলে এমন কিছু কথা লিখেছেন যেগুলো আপনার কাছে লেখার কথা নয়। বিশেষ করে দু’বছর ধরে সম্পর্ক নেই এমন লোকের কাছে তিনি কেন এরকম কথা লিখতে যাবেন?”

“এটা আমি নিজেও সারাটা সকাল ভেবেছি কিন্তু কোনো সদুত্তর পাই নি,” আবেদ আলী গাল চুলকাতে চুলকাতে বললো।

সে আসলে অনেক প্রশ্নের উত্তরই খুঁজে পাচ্ছে না। হোমিসাইড ডিপার্টমেন্টের ফোন পাবার পর থেকেই এইসব প্রশ্ন তার মনে ঘুরপাক খাচ্ছে কি করে এরা জায়েদ রেহমানের পাঠানো মেইলটার কথা জানতে পারলো? সেই মেইলটাই বা কি ক’রে পড়তে পারলো কে জানে। এমন কি অ্যাটাচমেন্ট ফাইলটা সম্পর্কেও এরা জানে! কিন্তু কিভাবে?

খুব বেশি দিন হয় নি ইন্টারনেট আর ই-মেইলের জগতে প্রবেশ করেছে আবেদ আলী। এখনও অনেক কিছু সে জানে না। কেবল দরকারি কিছু বিষয় ছাড়া বলতে গেলে সে এ ব্যাপারে অনভিজ্ঞ একজন মানুষ।

প্রথম প্রথম বেশিরভাগ মেইল ব্যবহারকারীই জানে না সাইন-আউট না করে

মেইল একাউন্ট থেকে বের হলে যে কেউ সেটাতে ঢুকতে পারে। এরজন্য কোনো পাসওয়ার্ড লাগবে না, সরাসরি একাউন্টটা ওপেন হয়ে যাবে। আর একাউন্টের সেন্টবক্সে গেলেই দেখা যাবে পাঠানো মেইল আর অ্যাটাচমেন্টগুলো। ওখান থেকে মেইল ওপেন করা যাবে, অ্যাটাচমেন্ট ফাইলও নামিয়ে নেয়া যাবে অনায়াসে। পানির মতো সহজ কাজ। আর এই সহজ কাজটা করতে জেফরি বেগেব লেগেছিলো মাত্র পাঁচ মিনিট। সেন্টবক্সে লিস্ট থেকে কোনো কিছু ডিলিট না করলে সব কিছুই রেকর্ড থেকে যায়। বেশিরভাগ ব্যবহারকারীর মতো লেখক জায়েদ রেহমানও সেন্টবক্সের আইটেম ডিলিট করতেন না।

“কি ভাবছেন?”

জেফরির প্রশ্নে সম্বিত ফিরে পেলো আবেদ আলী। “না, তেমন কিছু না। ভাবছি জায়েদ তো একদমই নড়তে চড়তে পারতো না, তার উপর সে ছিলো হার্টের রোগি। রাত দুটোর দিকে আমাকে মেইল করলো? অতো রাতেও জেগেছিলো সে, কম্পিউটার নিয়ে কাজ করছিলো!”

যে প্রশ্ন একজন গোয়েন্দার মনে উদয় হওয়ার কথা সেটা কিনা উদয় হলো একজন প্রকাশকের মনে! আবেদ আলীর কথাটা জেফরিকে মুহূর্তেই আলোড়িত করলো।

তাই তো। লেখক জায়েদ রেহমান অতো রাতেও ল্যাপটপ নিয়ে কাজ করছিলেন...!

জেফরি স্থির চোখে কিছুক্ষণ চেয়ে রইলো আবেদ আলীর দিকে। তারপরই নিজের সহকারী জামানের দিকে ফিরলো সে। “জামান!”

“জি, স্যার?”

“জায়েদ রেহমানের ঘরে তার ল্যাপটপটা ছিলো কফি টেবিলের উপরে!”

বোকার মতো তাদের দু’জনের দিকে পর্যায়ক্রমে তাকালো আবেদ আলী। সে কিছুই বুঝতে পারছে না।

“জি, স্যার,” বললো জামান।

“হ্যা, কফি টেবিলেই ছিলো। আমি ঘরে অনেকগুলো ছবি তুলেছিলাম।” যেনো আপন মনে বললো কথাগুলো।

“জি, স্যার।”

জট পাকিয়ে থাকা মাথাটা যেনো চট করেই খুলে গেলো। আবারো নিজেকে ভর্সনা করলো কেসটা নিয়ে যথেষ্ট মনোযোগ দিতে পারে নি বলে। এরজন্য নিজের বক্তৃগত জীবনের একটি ঘটনাও যে দায়ি সেটা বুঝতে পারছে জেফরি। মানসিকভাবে সে পুরোপুরি স্থির নেই। ব্যাপারটা কেউ জানে না, কিন্তু জেফরির

মানসিক অবস্থা আসলেই ভালো নেই। কোনোভাবেই তার ধীরস্থির আর বুদ্ধিদীপ্ত মাথাটা কাজ করছে না।

পকেট থেকে মোবাইল ফোনটা বের ক'রে ইমেজ ফোল্ডার থেকে আজ সকালে তোলা জায়েদ রেহমানের ঘরের ছবিগুলো দেখতে শুরু করলো জেফরি বেগ।

ছবিগুলো ঘরের বিভিন্ন অংশের। মোট আটটা ছবি। পাঁচ নাম্বার ছবিটাতে স্পষ্ট দেখা যাচ্ছে লেখকের বেডের পাশে কফি টেবিলের উপর ল্যাপটপটা খোলা অবস্থায় রয়েছে। এটা কোনো অস্বাভাবিক ঘটনা নয়। তবে মারাত্মক একটি অসঙ্গতি আছে ছবিটাতে।

অসঙ্গতিটা অবশ্য সহজে চোখে পড়ার মতোও নয়, কিন্তু এখন এটা স্পষ্ট বলে দিচ্ছে ঘটনা অনেক বেশি জটিল।

মাই গড!



দরজা জানালা বন্ধ একটা ঘরে টিভি চলছে। ঘরে আর কোনো বাতি জ্বলছে না। টিভির আলোতে ঘরের অন্ধকার কিছুটা হয়েছে, সেই আলো বদলে যাচ্ছে খুব দ্রুত। কখনও বেড়ে যাচ্ছে তো পরক্ষণেই হয়ে যাচ্ছে ম্রিয়মান। আসলে টিভি সেটটার চ্যানেল বদল করা হচ্ছে খুব দ্রুত। সবগুলো দেশী চ্যানেল একের পর এক যেনো চক্রাকারে ফিরে আসছে। কোনো চ্যানেলই দশ সেকেন্ড বেশি স্থায়ী হচ্ছে না। কখনও কখনও সেটা দুই তিন সেকেন্ডও নেমে আসছে। এর ফলে আলো আর শব্দের এক ধরণের ছন্দময় দ্যোতনা সৃষ্টি হয়েছে ঘরের ভেতর।

...স্ত্রী আর তার প্রেমিককে গ্রেফতার করা হয়েছে... দেশের জনপ্রিয় লেখক জায়েদ রেহমান নিজ ঘরে খুন হয়েছেন... গতকাল রাতে স্বনামধন্য লেখক জায়েদ রেহমান...লেখকের বাড়ির সামনে হাজার হাজার ভক্ত...লেখকের তরুণী স্ত্রী আর তার প্রেমিককে...আমরা গভীর বেদনার সাথে জানাচ্ছি প্রখ্যাত লেখক...

সব চ্যানেলে একই খবর।

...হোমিসাইড ডিপার্টমেন্ট এখনও কোনো কিছু না জানালেও কিছুক্ষণ আগে নির্ভরযোগ্য এক সূত্রে জানা গেছে...

এই চ্যানেলটা আর বদলে গেলো না।

...দু'জন আসামী জিজ্ঞাসাবাদে গুরুত্বপূর্ণ তথ্য দিয়েছে। তারা সরাসরি হত্যাকাণ্ডের সাথে নিজেদের জড়িত থাকার কথা স্বীকার করে নিয়েছে। হোমিসাইড ডিপার্টমেন্টের মহাপরিচালক ফারুক আহমেদ আমাদের রিপোর্টারের কাছে এক সাক্ষাৎকারে জানিয়েছেন...

একটা হিংস্র চিতাবাঘ ছুটতে ছুটতে ঝাঁপিয়ে পড়লো পলায়ণরত হরিণ শাবকের উপর...নির্মমভাবে ঘাড় মটকে দিলো সেটার...

টিভির পর্দায় অ্যানিমেল প্লানেট চ্যানেলটায় স্থিরে হয়ে রইলো কিছুক্ষণ।

তারপর ঘন অন্ধকার।

টিভিটা বন্ধ ক'রে দেয়া হলে ঘরটা অন্ধকারে ঢেকে গেলো মুহূর্তে। সেই

সাথে গাঢ় নিস্তক্কতা । কেবল একজন মানুষের নিঃশ্বাসের শব্দ শোনা যাচ্ছে এখন ।

এই ঘরের একমাত্র ব্যক্তিটির ঠোঁটের কোণে যে তীর্যক হাসি ভেসে উঠলো সেটা অন্ধকারের কারণে দেখা গেলো না, শুধু বিছানায় লম্বা হয়ে শুয়ে পড়ার কারণে মৃদু একটা শব্দ হলো ।



পাভেল আহমেদ বেশ ফুরফুরে মেজাজে আছে। অন্যান্য দিনের মতো পত্রিকা অফিসের বিরক্তিকর কেবিন্টিন কিংবা সস্তা হোটেলে লাঞ্চ না করে ধানমণ্ডির পিজ্জা হাটে চলে এসেছে সে। চিকেন গার্লিক পিজ্জা খাচ্ছে এখন।

ডান পকেটে হাত দিয়ে একটা জিনিস স্পর্শ করতেই মুচকি হাসলো। তার পকেটে এখন পঁচিশ হাজার টাকা। মাত্র পঁচিশটা নোট!

কিছুক্ষণ আগে স্বদেশ টিভির হামিদ আলমের কাছ থেকে টাকাটা নিয়ে ছোট্ট একটা জিনিস বেঁচে দিয়েছে সে। অবশ্য পুরো টাকার অর্ধেক হাতে পেয়েছে, কালকের মধ্যে বাকিটা পেয়ে যাবে। তার আনন্দের আরেকটি কারণ হলো হামিদ আলমের কাছ থেকে সমস্ত তথ্য রেডিমেড নিয়ে নিয়েছে। তাকে আর কষ্ট করে সংবাদ সংগ্রহ করতে হবে না।

একটা সুড়সুড়ি টের পেলে পাভেল আহমেদ। মোবাইল ফোনটায় ভাইব্রেশনে দেয়া ছিলো, বুক পকেট থেকে সেটা বের ক'রে দেখলো।

নিউজ এডিটর।

কি বলবে সব আগে থেকেই ঠিক ক'রে রাখা আছে।

“এইমাত্র ওখান থেকে অফিসের দিকে রওনা দিয়েছি, ভাই,” বললো পাভেল আহমেদ। “...হ্যা, দশ মিনিটের মধ্যে চলে আসতে পারবো...তেমন কোনো খবর নেই...না, পুলিশের কারোর সাথে কথা হয় নি...মুখ খুলছে না...জি, ভাই...আমি বরং লাঞ্চ করেই আসি...আচ্ছা...স্নামালাইকুম।”

ফোনটা পকেটে রেখে কোকের গ্লাসটা তুলে নিলো সে।

হামিদ আলমের কাছ থেকে মোটামোটি সব তথ্যই পেয়ে গেছে, এখন শুধু অফিসে গিয়ে আরাম করে টিভিতে ভারত-পাকিস্তানের ওয়ান ডে ম্যাচ দেখবে আর নিউজটা দাঁড় করাবে। আজ একটু আগেভাগে বের হয়ে যাবে অফিস থেকে। সাতটার দিকে হামিদ আলম তাকে গুলশানের *লা ডিপ্লোম্যাট*-এ আসতে বলেছে। অনেক দিন ধরে স্কটল্যান্ডের পানি খাওয়া হয় না। আজ আকর্ষণ পান করবে কারণ বিলের চিন্তা তাকে করতে হবে না।

*

আবেদ আলী নিজের বাসায় ফিরে এসেছে। ইনভেস্টিগেটর জেফরি বেগ জিজ্ঞাসাবাদের মাঝখানে হুট ক'রে ক্ষান্ত দিয়ে তাকে ছেড়ে দিয়েছে। শুধু বলেছে পরবর্তীতে তার সাথে আরো কথা বলবে, আর লেখক জায়েদ রেহমান যে তাকে মেইল করেছে সেটা যেনো কাউকে না বলে।

ড্রইংরুমে বসে থাকলেও আবেদ আলী টিভি দেখছে না। টিভিতে ঐ এক খবরই চলছে সকাল থেকে। আবেদ আলী জানে এটা আরো দু'তিন দিন ধরে চলবে—কিংবা কে জানে আরো বেশিও হতে পারে।

ফেসবুকে যেতে ইচ্ছে করছে না তার। মিলিকে যে একটা এসএমএস ক'রে আশ্বস্ত করবে, তার উদ্ভিগ্নতা কমাতে সেটাও করতে ইচ্ছে করছে না। সে জানে মিলি এতো বেশি জানতে চাইবে যে অতিষ্ঠ ক'রে তুলবে তাকে। মিলির এই একটি দিক তার ভালো লাগে না। সব জানতে চাইবে। না বললে অভিমান করে বলবে 'তুমি আমাকে ভালোবাসো না,' 'আমাকে আপন মনে করো না,' 'আমার কি জানার অধিকার নেই?' এরকম কতো ন্যাকামি মার্কা কথা!

কিন্তু এখন কিছুই করতে ইচ্ছে করছে না। আবেদ আলী জানে মিলি আরো অনেকগুলো এসএমএস করেছে এই সময়ে। আমি ভালো আছি। চিন্তা কোরো না। এক বন্ধু মারা গেছে। ব্যস্ত আছি। পরে জানাবো, এরকম কিছু লিখে একটা এসএমএস করার জন্য অনিচ্ছায় ফোনটা হাতে তুলে নিলো সে।

কিন্তু মোবাইলের ডিসপ্লেতে তাকিয়ে দেখলো পাঁচটা মিস কল জমে আছে। হোমিসাইডে ঢোকান আগে সাইলেন্স মুডে রেখেছিলো তাই কল হলেও বুঝতে পারে নি। কে কল করেছে সেটা দেখতেই আবেদ আলী সঙ্গে সঙ্গে কলব্যাক করলো।

গ্যাট!

“হ্যা, ভাবি?”

“আপনাকে অনেক বার ফোন দিয়েছি ধরেন নি...” একটা নারী কণ্ঠ বললো।

“সরি, ভাবি। মোবাইলটা সাইলেন্স মুডে ছিলো। খবরটা নিশ্চয় জানেন?”

“হ্যা,” মহিলা বেশ ধীরস্থিরভাবে বললো। তার মধ্যে শোকের লেশমাত্র নেই। “আমি জানতাম এ রকম কিছু একটা হবে।”

আবেদ আলী কোনো কথা বললো না।

“ওইটার প্রেমিক তো অ্যাপার্টমেন্ট থেকে অ্যারেস্ট হয়েছে।”

“জি, ভাবি।”

“আপনাকে কেন হোমিসাইড ডেকে নিয়ে গিয়েছিলো?”

আবেদ আলী ভিমড়ি খেলো। তার এই খবরটা গ্যাট জানলো কি করে? আজব! “আপনি জানলেন কিভাবে?”

“হোমিসাইডে আমার এক খালাতো বোনের ছেলে কাজ করে। ওকে ফোন করলে কথা প্রসঙ্গে জানালো আপনাকে নাকি ডেকে পাঠিয়েছে ওরা।”

“আর বলবেন না, কী যে সমস্যায় পড়েছি কিছুই বুঝতে পারছি না।”

“এতো মানুষ থাকতে আপনাকে কেন ডাকবে?” মহিলার কণ্ঠে সাঙ্গুনার আভাস।

আবেদ আলী একটা দীর্ঘশ্বাস ফেলে গোলনূর আফরোজ তরফদারকে মেইল আর অ্যাটাচমেন্ট ফাইলের কথাটা বললো, যদিও জেফরি বেগ তাকে বারণ করে দিয়েছিলো।

“কী বলছেন?” গ্যাটের কণ্ঠে স্পষ্ট বিস্ময়।

আবেদ আলী নিশ্চুপ।

“খুন হবার আগে আপনাকে মেইল করেছে! মাই গড। মেইলে কি বলেছে? আপনার সাথে না তার কথাবার্তা পর্যন্ত হোতো না? আবার একটা বইও দিয়েছে!” এক নাগাড়ে বলে গেলো গ্যাট।

“আমার মাথায় কিছুই ঢুকছে না, ভাবি। পুলিশ তো আমাকেও সন্দেহ করছে এখন,” আবেদ আলী বললো।

“সন্দেহ করলেই হলো? কাজটা করেছে ঐ হারামি। নিজের প্রেমিককে নিয়ে পরিকল্পনা ক’রে খুন করেছে। সারা দেশের মানুষ জেনে গেছে। মামলা তো খুবই সোজা। খুনিদেরকে গ্রেফতারও করেছে পুলিশ। এখন আবার আপনাকে নিয়ে টানাটানি করার কী আছে?”

“ঐ যে মেইলটা, ওটাই আমাকে বিপদে ফেলে দিয়েছে।”

“আচ্ছা, বললেন না তো ও আপনাকে মেইলে কি লিখেছে?”

একটু দ্বিধায় পড়ে গেলো আবেদ আলী। জেফরি বেগের নিষেধের কথাটা স্মরণ করলো সে।

“আমাকে বলতে সমস্যা আছে?” ওপাশ থেকে তাড়া দিয়ে বললো গ্যাট।

“না, ভাবি। আসলে হয়েছে কি, হোমিসাইডের ইনভেস্টিগেটর মেইলের কথা কারো কাছে না বলার জন্য বলে দিয়েছে। আপনাকে যে বলছি সেটা কাউকে বলবেন না।”

“আরে আমি আবার কাকে বলতে যাবো! আপনি নিশ্চিত্তে বলতে পারেন।” মহিলা অভয় দিলো।

“আসলে বেশি কিছু লেখে নি। ‘তোমাকে এই বইটা দিলাম। প্রকাশ করো। যতো বাধাই আসুক এটা প্রকাশ করবে। এখানে আমার সব কথা লেখা

আছে। আর হয়তো তোমার সাথে দেখা হবে না। পারলে আমাকে ক্ষমা করে দিও।”

জায়েদ রেহমানের মেইলটা আবেদ আলীর প্রায় মুখস্ত হয়ে গেছে। সেই সকাল থেকে মেইলটা পাবার পর কম করে হলেও দশ-বারো বার পড়েছে।

“ও তাহলে বুঝতে পারছিলো কিছু একটা হবে?” প্রশ্ন করলেও গ্যাটের কথাটা প্রশ্নের মতো শোনালো না।

আবেদ আলী চুপ ক’রে থাকলো।

“আচ্ছা, বইটাতে কি বলেছে?”

“আমি তো সেটা এখনও পড়ে দেখি নি।”

“কী বলেন! এখনও পড়েই দেখেন নি?” গ্যাট অবাক হয়ে বললো।

“কখন পড়বো, বলুন? মেইলটা পাবার পরই টিভি সংবাদে দেখলাম জায়েদ খুন হয়েছে...তার উপর হোমিসাইডে গিয়ে দেখা করতে বললো। এই তো কিছুক্ষণ আগে ফিরেছি ওখান থেকে।”

“ও আচ্ছা,” বললো গ্যাট। “তাহলে এক কাজ করুন, পড়তে শুরু করে দিন। আমার মনে হয় বইয়ে অনেক কিছু আছে। আর শুনুন, দেরি না করে যতো তাড়াতাড়ি সম্ভব বইটা বের ক’রে ফেলুন। লক্ষ-লক্ষ কপি বিক্রি হবে।”

এতোটা সময় ধরে আবেদ আলী ভুলেই গেছিলো মেইলটা শুধু তার জন্য বিড়ম্বনাই বয়ে আনে নি, সেই সাথে নিয়ে এসেছে বিশাল পরিমাণের লাভের সম্ভাবনা।

নড়েচড়ে বসলো আবেদ আলী। “এই মুহূর্তে বইটা বের করলে আমার আবার কোনো সমস্যা হবে না তো?”

“আপনার কি সমস্যা হবে? কী যে বলেন না। সাহস রাখুন। আপনি তো আর এমনি এমনি বের করছেন না। ও খুন হবার আগে এটা আপনার কাছে মেইল করে গেছে, এর নিশ্চয় কারণ আছে। যতো যাই হোক না কেন, শেষে বুঝতে পেরেছে আপনিই হলেন একমাত্র সত্যিকারের বন্ধু। বাকিরা তো সব চামচার দল। ওকে বানিয়ে খেয়েছে। আপনাকে বইটা বের করার জন্য ও-ই তো বলেছে। বন্ধুর শেষ ইচ্ছেটা রাখবেন না?”

আবেদ আলী উদ্যম ফিরে পেলো যেনো। গ্যাট তো ঠিকই বলেছে!

“আবেদ ভাই, বইটা কাকে উৎসর্গ করেছে, জানেন?” গোলনূর আফরোজ তরফদার জানতে চাইলো।

“আমি তো এখনও পড়ে দেখি নি। অনেক বড় বই। পাঁচশ’ পৃষ্ঠার বেশি হবে।”

“কী বলেন! আপনার তো কপাল খুলে গেলো। কোটি টাকার ব্যবসা

করবেন। জলদি দেখুন তো, কাকে উৎসর্গ করেছে? আমি লাইনেই আছি।”

আবেদ আলী বুঝতে পারছে না বইটার উৎসর্গ নিয়ে গ্যাট এতো আগ্রহ দেখাচ্ছে কেন।

কম্পিউটারটা চালু অবস্থাতেই ছিলো, মোবাইলটা কানে চেপে চেয়ারে বসে সকালে ডাউনলোড করা ফাইলটা ওপেন করলো আবেদ আলী। সে নিশ্চিত মেইলে কাকে উৎসর্গ করা হবে সে ব্যাপারে জায়েদ-কিছু লেখে নি। প্রথম পৃষ্ঠায় বড় বড় ক’রে লেখা : কথা

দ্বিতীয়-তৃতীয়-চতুর্থ-পঞ্চম পৃষ্ঠা...

আবেদ আলী নিজের চোখকে বিশ্বাস করতে পারছে না।

উৎসর্গ-

গোলনূর আফরোজ তরফদার

যার প্রতি আমি সবচাইতে বেশি অবিচার করেছি।

...আমাকে ক্ষমা করে দিও

তার নীচে এক লাইনের আরেকটা কথা লেখা আছে। সেই লেখাটা পড়েও আবেদ আলী অবাক হলো।


“তবে আমি অবাক হচ্ছি না,” আবেদ আলী জায়েদ রেহমানের উৎসর্গের কথাটা জানালে গোলনূর আফরোজ তরফদার ধীরস্থিরভাবে বললো কথাটা। “আমার প্রতি তো আর কম অবিচার করে নি! শেষের দিকে হয়তো বুঝতে পেরেছিলো।”

“ভাবি...” আবেদ আলী ইতস্তত ক’রে বললো।

“কি?”

“এই বইটার স্বত্ত্ব দিয়ে গেছে আপনাকে,” আন্তে ক’রে বললো অবয়ব প্রকাশনীর স্বত্ত্বাধিকারী।

মহিলা কিছু বললো না। একটু পর কণ্ঠটা নীচে নামিয়ে এনে শুধু বললো, “বিশ্বাস করেন আমি একটুও অবাক হই নি।”



অধ্যায় ২২

দীর্ঘ ত্রিশ বছরের কর্মজীবনে অনেকবারই পুলিশের মুখোমুখি হতে হয়েছে আলাতুল্লাহাকে, তবে কোনো হত্যাকাণ্ডের ঘটনায় এই প্রথম। তারপরও মহিলা নিজেস্ব স্বাভাবিক রেখেছে। অন্তত বাইরে থেকে সে রকমই দেখাচ্ছে তাকে।

জেফরি বেগ আর ইন্সপেক্টর জামান ভিটা নুভায় এসে পৌঁছেছে দশ মিনিট হলো। বাড়ির সামনে লোকজনের যে ভীড় তারা দেখেছে সেটা অভাবনীয়। সেই ভীড় ঠেলেঠেলে হোমিসাইড ডিপার্টমেন্টের একটি আনমার্ক করা গাড়িতে করে জেফরি আর জামান ভেতরে প্রবেশ করেছে অ্যাপার্টমেন্টে। ইচ্ছে করেই জেফরি আনমার্ক গাড়ি নিয়ে এসেছে। সে জানে সাংবাদিকের দল হোমিসাইড ডিপার্টমেন্টের গাড়ি দেখলে ছেঁকে ধরবে।

জায়েদ রেহমানের বাড়িতে পুলিশের প্রহরা জোরদার করা হয়েছে মিসেস রেহমান আর তার প্রেমিককে গ্রেফতার করার পর থেকেই। বাড়ির অন্যান্য বাসিন্দা বলতে হাউজনার্স আর দু'জন কাজের মহিলা। তাদের সবাইকে পুলিশ প্রহরায় রাখা হয়েছে ভিটা নুভায়। এদের ব্যাপারে সিদ্ধান্ত নেয়া হবে বিকেলের মধ্যেই।

আলাতুল্লাহা ড্রইংরুমে বসে আছে, তার সামনে আছে জেফরি বেগ আর জামান। এই হাউজনার্সই সর্বপ্রথম আবিষ্কার করে জায়েদ রেহমান খুন হয়েছেন।

“আপনি ঘরে ঢুকে কি দেখলেন সেটা বলুন?”

জেফরির প্রশ্নটা শুনে মহিলা কিছুক্ষণ চেয়ে রইলো। “এ কথা তো এর আগেও বলেছি।”

“হ্যা, বলেছেন। আবার বলুন। একটা বিষয় পরিষ্কার হওয়া দরকার,” জেফরি যতদূর সম্ভব নরম ক’রে বললো। এই মহিলার কাছ থেকে সহযোগীতা পাবার দরকার আছে।

“ঘরে ঢুকে দেখি জায়েদ সাহেবের মুখে বালিশ চাপা দেয়া। এটা দেখেই চিৎকার দিয়ে উঠি...”

“হ্যা, বলতে থাকুন,” মহিলা থেমে গেলে জেফরি বললো।

“তারপর তো মিসেস রেহমান নিজের ঘর থেকে দৌড়ে এলেন। আমি উনাকে বালিশ সরাতে দেই নি। উনার নিস্তেজ শরীর দেখেই বুঝে গেছিলাম মারাত্মক একটা ঘটনা ঘটে গেছে। নিজেকে ধাতস্থ করে জায়েদ সাহেবের নাড়িস্পন্দন পরীক্ষা করে কনফার্ম হই উনি আর বেঁচে নেই। হাতটা একেবারে শক্ত হয়ে গেছিলো। মনে হলো অনেক আগেই মারা গেছেন।”

“পুলিশ আসার আগে জায়েদ রেহমানের ঘরে সব কিছুই কি আগের মতো ছিলো? কেউ কি কোনো কিছু সরিয়েছে?”

“কোনো কিছুই সরানো হয় নি। সরানোর কোনো উপায়ও ছিলো না। কয়েক সেকেন্ডের মধ্যেই তো পুলিশ চলে এলো। এরপর থেকে পুরো অ্যাপার্টমেন্টের দায়িত্ব চলে যায় পুলিশের কাছে।”

“আচ্ছা, উনি তো ল্যাপটপ ব্যবহার করতেন, তাই না? খুন হবার রাতে উনি কি সেটা ব্যবহার করেছিলেন?” এই প্রশ্নটার উত্তর জানা জেফরির জন্য খুবই জরুরি।

“হ্যাঁ।”

“কখন?”

“রাত এগারোটার দিকে উনার ঘরে গিয়ে দেখি ল্যাপটপ নিয়ে কাজ করছেন। আমি তাকে ঘুমের ওষুধ খাইয়ে দিয়ে ল্যাপটপটা রেখে ঘুমিয়ে পড়তে বললাম।”

“তারপর?”

“উনি বললেন, আপা ঘুম তো আসে না। আমাকে উনি আপা বলে ডাকতেন। আমি বললাম, চেষ্টা করেন। আপনি হার্টের রোগি, এতো রাত পর্যন্ত জেগে থাকা ঠিক না। এ কথা বলার পর উনি আর কিছু বলেন নি। তারপর আমি ল্যাপটপটা উনার কোল থেকে নিয়ে পাশের ছোটো টেবিলে রেখে বিছানাটা সোজা করে বালিশ ঠিকঠাক করে তাকে শুইয়ে দেই।”

“আপনি নিজে ল্যাপটপটা রেখেছিলেন?” জেফরি জানতে চাইলো।

“হ্যাঁ।”

“ওটা কি চালু অবস্থায় ছিলো?”

“হ্যাঁ।”

“আপনি কি ওটা বন্ধ করেন নি?”

“ল্যাপটপ কিভাবে বন্ধ করতে হয় সেটা তো আমি জানি না। আমি ওটা উনার কোল থেকে নিয়ে টেবিলে রেখে দেই।”

“এরপর কি করলেন?”

“উনাকে শুইয়ে দিয়ে ঘরের সব জানালা বন্ধ করতে গেলে উনি বললেন

দক্ষিণ দিকের বেলকনির স্লাইডিং ডোরটা যেনো খোলা রাখি, পূর্ণিমার আলো যাতে ভেতরে আসতে পারে। তারপর আমি ঘরের বাতি বন্ধ করে দরজাটা ভিজিয়ে দিয়ে নিজের ঘরে চলে আসি।”

“আপনি চলে আসার পর কি তার ঘরে কেউ গিয়েছিলো?”

“মনে হয় না। গেলেও আমি জানতে পারবো না। আমি তো বারোটোর আগেই ঘুমিয়ে পড়েছিলাম।”

জামানের দিকে তাকালো জেফরি তারপর মহিলার দিকে ফিরে বললো, “ঠিক আছে, আপনি এখন যেতে পারেন। আমরা কোনো নির্দেশ না দেয়ার আগ পর্যন্ত আপাতত এই বাড়িতেই থাকবেন।”

“আমি আমার বাড়িতে যেতে চাচ্ছিলাম,” মহিলা বললো।

“বিকেলের দিকে যেতে পারবেন। এখন এখানেই থাকতে হবে।”

মহিলা আর কিছু না বলে উঠে চলে গেলো।

“জায়েদ রেহমানের ঘরে চলো,” জামানকে বললো জেফরি।

জায়েদ রেহমানের ঘরটা তালা মারা। দায়িত্বরত পুলিশ কনস্টেবলের কাছে থেকে চাবিটা নিয়ে তালা খুললো জামান।


জেফরি বেগ ঠিক যেভাবে দেখে গিয়েছিলো সেভাবেই সবকিছু আছে। বিছানার পাশে কফি টেবিলটার দিকে তাকিয়ে আরেকবার নিশ্চিত হলো অসঙ্গতিটা খুবই ভয়াবহ।

জায়েদ রেহমানের হসপিটাল বেড থেকে কফি টেবিলটা কমপক্ষে ছয় ফিট দূরে। একজন পক্ষাঘাতগ্রস্ত লোকের পক্ষে বিছানা থেকে কফি টেবিলটার নাগাল পাওয়া অসম্ভব ব্যাপার।

তাহলে কি জায়েদ রেহমান নিজেই উঠে গিয়ে...

অসম্ভব!

জেফরি বেগ শুধু বুঝতে পারলো একটা গোলকধাঁধার মধ্যে পড়ে যাচ্ছে সে। এ পর্যন্ত যা জেনেছে তার মধ্যে অনেক অসঙ্গতি রয়েছে।



“তোমার কথা শুনে তো কিছুই বুঝতে পারছি না,” ফারুক আহমেদ বললো বেগকে।

ভিটা নুভা থেকে জেফরি সোজা চলে এসেছে ফারুক আহমেদের অফিসে।

“স্যার, এই কেসে দুটো মারাত্মক অসঙ্গতি আছে,” বলতে শুরু করলো বেগ। “পলিগ্রাফ টেস্টের ব্যাপারটা আর—”

“ওটা নিয়ে তুমি খামোখাই চিন্তা করছো,” তার কথার মাঝখানে বাধা দিয়ে বললো ফারুক আহমেদ।

“ঠিক আছে। পলিগ্রাফ টেস্টের কথা না হয় বাদ দেয়া গেলে...ল্যাপটপের ব্যাপারটা কি বলবেন? একজন প্যারালাইজড লোক কি ক’রে নিজের বিছানা থেকে উঠে মাঝরাতে ল্যাপটপ থেকে মেইল করবে?”

ফারুক সাহেব চূপ মেরে রইলো। তবে তার মধ্যে চিন্তা করার কোনো লক্ষণ দেখা যাচ্ছে না, বরং কিছুটা বিরক্তি ফুঁটে উঠেছে চোখেমুখে।

“সব কিছুর ব্যাখ্যা এখনই পেয়ে যাবে এরকমটি ভাবছো কেন? সময় এলে সব জানতে পারবে। ল্যাপটপের যে কথাটা বললে, আমার কাছে সেটাকে বড় কোনো অসঙ্গতি ব’লে মনে হচ্ছে না। সেটারও নিশ্চয় ব্যাখ্যা আছে। সবাইকে জিজ্ঞাসাবাদ করার পর ব্যাপারটা জানা যাবে। এখনও তো প্রাইমারি অবস্থায় রয়েছে। এরকম ছোটোখাটো দুয়েকটি অসঙ্গতির কারণে তো আমরা এক লাফে অন্য কোনো ব্যাখ্যা দাঁড় করাতে পারি না। ভুলে যাচ্ছে কেন দু’জন খুনি ধরা পড়েছে হাতেনাতে।”

কথাটা মেনে নিলো বেগ। মহাপরিচালক ভুল বলে নি। সময়ে সব জানা যাবে।

“শুনলাম সকাল থেকে কিছু খাও নি। বাসায় চলে যাও। আজ আর অফিস করতে হবে না। রেস্ট নাও,” ফারুক আহমেদ বললো তাকে।

“স্যার, ভিটা নুভায় দু’জন কাজের মহিলা আর হাউজনার্স আছে পুলিশের প্রহরায়। তাদের কি হবে?”

“পুলিশ কাস্টডিতে রাখতে হবে। কিছু করার নেই।”

বেগও জানে এ ছাড়া আর কোনো উপায় নেই। চেয়ার থেকে উঠে দাঁড়ালো

সে। “তাহলে আমি যাই, স্যার?”

“ওকে, মাই বয়। গেট রেস্ট,” কথাটা বলেই দাঁত বের ক’রে হাসলো ফারুক সাহেব।

বেগ যখন দরজার কাছে তখনই ফারুক সাহেব বলে উঠলো, “থ্যাংকস ফর অল দিস।”

পেছনে ফিরে মুচকি হেসে চলে গেলো জেফরি বেগ।

হোমিসাইড ডিপার্টমেন্ট থেকে বের হয়ে জেফরি ভাবলো ভালো একটা রেস্তোরাঁয় গিয়ে দুপুরের খাবার খেয়ে নেবে। জামান ছেলেটাকেও সঙ্গে নেবার ইচ্ছে ছিলো কিন্তু সেটা আর সম্ভব হয় নি। সারা রাত অনলাইন ডিউটি ক’রে একেবারে ক্লান্ত হয়ে পড়েছে সে। জেফরির মতো সেও সকাল থেকে কিছু খাওয়ার সুযোগ পায় নি। ছেলেটা বাড়ি চলে গেছে।

মোবাইলটা বিপ্ ক’রে উঠলে পকেট থেকে সেটা বের ক’রে দেখলো জেফরি।

অজ্ঞাত একটি নাম্বার থেকে মেসেজ এসেছে। ওপেন করলো মেসেজটা।

আই এম সরি

তিনটি ছোট্ট শব্দে একটি এসএমএস। নাম্বারটা অজ্ঞাত হলেও জেফরি জানে মেসেজটা কে পাঠিয়েছে। একটা চাপা দীর্ঘশ্বাস বেরিয়ে এলো তার ভেতর থেকে। গত দু’তিন ধরে তার ব্যক্তিগত জীবনে একটা ওলপালট ঘটে গেছে। কেউ জানে না। কাউকে বলার মতোও নয়। কিন্তু ভেতরে ভেতরে তাকে কুড়ে কুড়ে খাচ্ছে। কোনো কাজেই মন বসাতে পারছে না। আজকের কেসটায় যতোটুকু সাফল্য এসেছে সেটা নেহায়েতই ঘটনাচক্রে। এখানে জেফরির তেমন ভূমিকা ছিলো না। কথাটা আর কেউ না জানুক জেফরি নিজে সেটা ভালো করেই জানে।

আই এম সরি। এই ছোট্ট কথাটা দিয়ে কিভাবে সব কিছু মুছে ফেলা যাবে? প্রচণ্ড কষ্টে হেসে ফেললো সে।

তুমি না, রেবা, আমিই দুঃখিত। জেফরি বেগ হবার জন্য। তোমাকে....

আর কিছু ভাবতে পারলো না সে। অনেক ঘটনা, অনেক স্মৃতি হ্রমুর করে এসে ভীড় করলো তার মধ্যে।

রেবা। তার একমাত্র ভালোবাসা। এখন জীবন থেকে ছিটকে পড়েছে।

দু'দিন আগে কাবিন হয়ে গেছে রেবার। কিছু দিন পর হয়তো কানাডায় চলে যাবে প্রবাসী স্বামীর সাথে। তাদের দীর্ঘ দিনের সম্পর্কটা যে এভাবে, এতো দ্রুত শেষ হয়ে যাবে সেটা জেফরি কল্পনাও করতে পারে নি।

প্রায় এক বছর ধরেই একটা টানাপোড়েনের মধ্যে ছিলো তাদের সম্পর্কটা কিন্তু জেফরির কেন জানি মনে হতো শেষ পর্যন্ত সব ঠিক হয়ে যাবে। কারণ তাদের এই সমস্যাটা নিজেদের তৈরি ছিলো না। তাদের কোনো ভুলে সম্পর্কটা হুমকির মুখে পড়ে নি। রেবার বাবা, জাঁদরেল আমলা আনজার হোসেন বাধা হয়ে দাঁড়ান। জেফরির এখনও সেদিনের কথা স্পষ্ট মনে আছে, লোকটার প্রতিটি কথা তাকে প্রতিনিয়ত খোঁচায়। তাকে অপমান করে। সে দিনের কথা এ জীবনে কখনও ভুলবে না। ভোলা সম্ভবও নয়।

ভার্জিনিয়া থেকে এফবিআইএ'র ট্রেনিং শেষে ফিরে এসেছে দেশে। রেবার জোরাজুরিতেই তার বাবার সাথে দেখা করতে রাজি হয় জেফরি। কুশল বিনিময়ের পরই ভদ্রলোক জানতে চাইলেন জেফরির বাবা-মায়ের কথা। এখানেই জেফরি এই পৃথিবীতে সবচেয়ে নীরব। অসহায়।

“আমি ফাদার জেফরি হোবার্টের কাছে মানুষ হয়েছি,” বলেছিলো জেফরি।
“উনি আর এখন বেঁচে নেই।”

“আচ্ছা,” চায়ের কাপে চুমুক দিয়ে আনজার হোসেন বললেন, “তো উনি তোমাকে কিভাবে পেলেন? আই মিন উনার সাথে তোমার কানেকশানটা কিভাবে হলো?”

এই পৃথিবীতে যতো অপ্রিয় বিষয় আছে এটা হলো জেফরির কাছে সবচাইতে অপ্রিয়তম। কিন্তু কিছু করার নেই। একান্ত অনিচ্ছায় জেফরিকে বলতে হলো সেটা। “উনি আমাকে রাস্তা থেকে তুলে এনেছিলেন।”

আনজার সাহেব স্থির চোখে চেয়ে রইলেন। জেফরি টের পেলো তার নিজের নিঃশ্বাস বেড়ে যাচ্ছে। একটা সুতীব্র অস্বস্তি জমাট বেঁধে যাচ্ছে বুকের ভেতর।

“রাস্তা থেকে...তখন তোমার বয়স কতো ছিলো?”

“সাত-আট মাস।”

“আর তোমার বাবা-মা?”

“উনারা...” গলায় একটা গিট পাকিয়ে এলো, তারপরও জোর করে বললো, “...উনারা ৭৪-এ মারা গেছিলেন।”

“৭৪-এ?”

“হ্যাঁ।”

আনজার সাহেব স্থিরচোখে চোখে চেয়ে রইলেন। “আমার মেয়ে অবশ্য আমাকে এসব কথা বলেছে কিন্তু আমার বিশ্বাস হয় নি,” কথাটা নিজের মেয়ে

রেবার দিকে তাকিয়ে বললেন তিনি। রেবা মাথা নীচু করে রেখেছিলো কথাটা শুনে অবিশ্বাসে তাকালো বাবার দিকে।

“আপনার কথাটা বুঝলাম না?” বললো জেফরি বেগ।

আনজার সাহেব নিজের মেয়েকে বাড়ির ভেতরে যেতে বললে রেবা চুপচাপ চলে গেলো। এটা জেফরির কাছে খুব বিস্ময়ের মনে হয়েছিলো। কারণ রেবা খুবই দৃঢ়চেতা মেয়ে।

“এমনও তো হতে পারে,” কথাটা বলে আনজার সাহেব দরজার দিকে তাকালেন, নিশ্চিত হলেন রেবা ঘর থেকে চলে গেছে কিনা। “তোমার মা তোমাকে ফেলে চলে গেছেন?”

“আপনি কি বলতে চাচ্ছেন?” অবিশ্বাসে জেফরি বললো।

“অবৈধ সন্তান ফেলে দেয়াটা তো বিরল কোনো ঘটনা নয়।”

নিজের কানকেও যেনো বিশ্বাস করতে পারলো না জেফরি বেগ। এ জীবনে অনেক অপ্রিয় কথা সে শুনেছে কিন্তু কেউ কখনও তার জন্মবৃত্তান্ত নিয়ে এমন নোংরা আর কুৎসিত কথা বলে নি। জেফরির বিশ্বাস হচ্ছে না তার সামনে বসে থাকা লোকটি দেশের একজন উচ্চপদস্থ আমলা। সুশিক্ষিতও বটে।

“বড় বড় কথা অনেকেই বলতে পারে আমি সেরকম কিছু বলবো না। সমাজে আমার একটা অবস্থান আছে। তুমি নিশ্চয় বুঝতে পারছো ব্যাপারটা।” আনজার সাহেব কাটাকাটাভাবে বললেন।

“বুঝতে পারছি।”

“তোমাকে নিয়ে অনেক সমস্যা। একে তো তোমার কোনো জন্মপরিচয় নেই, তার উপর একজন খৃস্টান ফাদারের কাছে মানুষ হয়েছে। লোকজনকে ব্যাপারটা ব্যাখ্যাই করতে পারবো না।”

“আপনার মেয়ে কিন্তু আমার সব কিছু জেনেই—”

জেফরির কথার মাঝখানে হাত তুলে বাধা দিলেন আনজার সাহেব। গম্ভীরভাবে বললেন, “সব জানে না। তুমি যা বলেছো কেবল তাই জানে, আর আমার সহজ সরল মেয়ে সেসব কথা বিশ্বাস ক’রে নিয়েছে।”

জেফরি ভুরু কুচকে অবিশ্বাসে চেয়ে রইলো আনজার সাহেবের দিকে। “আপনি বলতে চাচ্ছেন আমি আপনার মেয়েক মিথ্যে বলেছি?”

“না, না,” সঙ্গে সঙ্গে বললেন আনজার হোসেন। “তুমি বলতে যাবে কেন। তুমি যে কাহিনীটা বললে সেটা নিশ্চয় ফাদার তোমাকে বলেছে?”

বেগ মাথা নেড়ে সায় দিলো।

“আমার ধারণা ফাদার তোমার কাছে একটা বানোয়াট গল্প বলেছেন। উনি জানতেন আসল সত্যটা বললে তুমি সহ্য করতে পারবে না।”

অনেকক্ষণ ধরে জেফরি বাকরুদ্ধ হয়ে থাকলো। এ জীবনে নিজের মা'র সম্পর্কে এই প্রথম এতো বাজে কথা শুনতে পেলো সে। তার কল্পনায় তার মা এমন একজন অসহায় নারী যে কিনা ক্ষুধার যন্ত্রণায় মরে গেছে কিন্তু নিজের সন্তানকে মরতে দেয় নি। তার অল্পবয়সী মা তার কাছে চিরদুঃখি। কিন্তু এখন এসব কী শুনছে! তার কল্পনার মায়ের ছবিটা এই ভদ্রলোক এক হলকায় বিকৃত করে দিয়েছে। জেফরি টের পেলো তার হাত-পা রীতিমতো অসাড় হয়ে যাচ্ছে।

“কোথায় যাচ্ছে?” হঠাৎ করে জেফরি উঠে দরজার দিকে পা বাড়ালে আনজার সাহেব বললেন।

দরজার কাছে গিয়ে থামলো সে। “আমার মনে হয় আপনার সাথে আর কথা বলার কোনো দরকার নেই...”

“সত্য সব সময়ই—”

জেফরি হাত তুলে কথার মাঝখানেই থামিয়ে দিলো। “আপনি আপনার মনগড়া সত্য নিয়ে থাকুন। আর আমাকে আমার সত্য নিয়ে থাকতে দিন।”

এরপর আনজার সাহেব পেছন থেকে কিছু বললেও জেফরির কানে সেসব পৌঁছায় নি। একটা ঘোরের মধ্যে ঘর থেকে বের হয়ে যায় সে। কতোক্ষণ পথে পথে ঘুরে বেরিয়েছিলো সেটা তার মনে নেই। তবে রাতে বাড়ি ফিরে এক ফোটাও ঘুমাতে পারে নি।

পরের দিনই রেবার সাথে জেফরির দেখা হয়।

“তুমি ওভাবে চলে এলে কেন? কি হয়েছিলো?” রেবা জানতে চেয়েছিলো তার কাছে।

“কেন, তুমি জানো না?” পাল্টা বললো জেফরি।

“না!?”

চুপ করে রইলো সে। অনেকক্ষণ পর বললো, “আমার মনে হয় তোমার বাবা আমাদের বিয়েতে রাজি না। উনি আমাকে মেনে নিতে পারছেন না।”

“আমি ভেবেছিলাম তোমাকে দেখার পর, তোমার সাথে কথা বলার পর উনি হয়তো রাজি হয়ে যাবেন,” মুখ ভার করে বললো রেবা। তারপর অনেকক্ষণ চুপ করে থেকে বললো, “এখন আমি কি করবো, জেফ?”

সুতীত্র যন্ত্রণায় অবাক হয়ে বেগ চেয়ে থাকলো রেবার দিকে। “আমি জানি না।”

জেফরির হাতে হাত রেখে রেবা তাকে আশ্বস্ত করলো। “একটু সময় দাও। আমি সব ঠিক করে ফেলবো। আমার মনে হয় কিছু দিন পর সব ঠিক হয়ে যাবে।”

রেবা খুব জোর দিয়ে বললেও সেদিনের পর থেকে আর কোনো কিছুই ঠিক

হয় নি। নিজের বাব-মা, পরিবার নাকি একজন জেফরি বেগ—এই দ্বন্দ্ব পড়ে যায় সে। জেফরি বুঝতে পারে সে হেরে যাচ্ছে। দিনের পর দিন তাদের মধ্যে দূরত্ব বাড়তে থাকে। কমে আসতে থাকে যোগাযোগ। আস্তে আস্তে রেবা নামের মেয়েটি, যার সাথে দীর্ঘ পাঁচ বছরের সম্পর্ক, জেফরির কাছ থেকে চিরকালের জন্যেই দূরে চলে যায়। দু’দিন আগে হঠাৎ রেবার কাছ থেকে একটা এসএমএস পায় সে। নিজের মুখে হয়তো বলার মতো সাহস অর্জন করতে পারে নি, তাই এসএমএস’র সাহায্যে জানায় আগামীকাল তার কাবিন। তাকে যেনো জেফরি ক্ষমা করে দেয়।

খবরটা পাওয়ার পর থেকে জেফরির ভেতরে ভেতরে যে ঝড় বয়ে যাচ্ছে সেটা কেউ জানে না। নিজের ভেতর লুকিয়ে রেখেছে সে। কিন্তু কাজেকর্মে কোনোভাবেই মন বসাতে পারছে না।

এমন একটা কারণে সে রেবাকে হারিয়েছে যেটার জন্য সে নিজে দায়ী নয়। ইচ্ছে করলেও সে এসব কিছু মুছে ফেলতে পারে না।

খুব কাছে একটা রেস্টোরাঁ থেকে চিকেন গুলের সুস্বাদু অ্রাণ তার ভাবনায় ছেদ ঘটালেও কোনো কিছু খেতে ইচ্ছে করছে না এখন। তিক্ত আর করুণ একটা স্মৃতি এসে ভর করেছে তার মাঝে। যে স্মৃতি প্রথম ধাক্কাতেই ক্ষুধা নামক জিনিসটাকে তাড়িয়ে দেয়।

জেফরি বেগ দ্রুত পায়ে এগিয়ে গেলো রেস্টোরাঁটা পাশ কাটিয়ে।



১৯৭৪ সাল এ দেশের জন্যে একটি স্মরণীয় বছর হয়ে থাকবে। স্বাধীনতার পর পরই যুদ্ধবিধবস্ত একটি দেশ দুর্ভিক্ষের কবলে পড়ে। কতো লক্ষ লোক সেই দুর্ভিক্ষে মারা গিয়েছিলো সেই হিসেব কারো কাছে নেই। তবে অনুমাণ করা যায় সংখ্যাটা নেহায়েত কম হবে না।

দলে দলে লোক ছুটে আসতে থাকে ঢাকা শহরে। ছোট্ট এই শহর এতো মানুষের ভার সহ্যে পারে নি। অনেককে ঠাই দিতে পারলেও অসংখ্য মানুষ ঝরে যায় অকালে। খাদ্যের অভাবে ভিক্ষার জন্য হাত পাততে দ্বিধা করে নি এক সময়কার সচ্ছল পরিবারের লোকজনেরাও। ভাতের অভাবে ভাতের মাড় হয়ে ওঠে অনেকের কাছে বিকল্প খাদ্য।

শহরের পথেঘাটে হাজার হাজার নরনারীর কঙ্কালসার দেহ এখনও বন্দী হয়ে আছে সেই সময় তোলা অসংখ্য স্থিরচিত্রে আর মানুষের স্মৃতিতে। রাস্তায় নামলেই মানুষের হাহাকার টের পাওয়া যেতো।

ফাদার জেফরি হোবার্ট একজন ধর্মপ্রাণ খৃস্টান পাদ্রী। পয়ষট্টি সাল থেকে এই ঢাকা শহরে আছেন। একান্তরের যুদ্ধ দেখেছেন, আর এখন দেখছেন দুর্ভিক্ষ। এ দেশের অভাগা মানুষের জন্যে তার হৃদয়টা ডুকরে ডুকরে কেঁদে ওঠে। কিন্তু তিনি একা একজন মানুষ কতোটুকুই বা করতে পারেন।

ফাদার জেফরি হোবার্ট যাজকের দায়িত্ব পালনের পাশাপাশি পুরনো ঢাকার প্রসিদ্ধ সেন্ট গ্রেগরি হাইস্কুলে প্রধান শিক্ষক হিসেবেও কাজ করেন। প্রথম দিকে শিক্ষকতাকে শেখের বিষয় হিসেবে নিলেও এখন এটাই হয়ে উঠেছে তার প্রধান মিশন। শিক্ষা দিয়ে মানুষের সেবা করাকে তিনি মনে করেন শ্রেষ্ঠ কাজ। সুতরাং যাজকের কাজের চেয়ে এটাকে তিনি কোনো অংশেই ছোটো ক'রে দেখেন না।

চিরকুমার জেফরি হোবার্ট আমেরিকার ম্যাসাচুসেটসের বাসিন্দা-কেনেডিদের নেটিভ ল্যান্ড। আমেরিকার একমাত্র ক্যাথলিক সংখ্যাগরিষ্ঠ রাজ্য এটি। বাবা-মা বেশ সচ্ছল হবার পরও মানুষের সেবা করবেন বলে যাজকের পেশা বেছে নিয়েছিলেন। এখনও তার দেশে যে সম্পদ রয়েছে তা দিয়ে বাকি জীবনটা আরামে কাটিয়ে দিতে পারেন কিন্তু তিনি চান এইসব গরীব মানুষগুলোর জন্য কিছু করতে। দুর্ভিক্ষ তাকে ভারাক্রান্ত করে রেখেছে। কাজে মন দিতে পারেন

না। নাখাভুখা মানুষগুলোর মুখের দিকে তাকালে তার বুকটা হু হু করে ওঠে। মাত্র কয়েক বছর আগেই তার ঘনিষ্ঠ বন্ধু করিম বেগ স্বাধীনতা যুদ্ধে গিয়ে আর ফিরে আসে নি। অসংখ্য শহীদের কাতারে চলে গেছে সে। প্রিয় বন্ধুকে হারানোটা ছিলো তার জন্যে চরম বেদনার একটি ঘটনা।

তার এই বন্ধুটি আট বছরের এক ছেলে সন্তান রেখে গেছে। এখন যার বয়স এগারো। তারই স্কুলে পড়াশোনা করে। দু'দিন হলো ছেলেটা স্কুলে আসছে না। ফাদার ঠিক করলেন স্কুল ছুটির পর কিছু কাজ সেরে বিকেলের দিকে ছেলেটার বাড়িতে যাবেন।

নিজের প্রিয় বাহন সাইকেলটা নিয়ে হেলেদুলে পুরনো ঢাকার অলিগলি দিয়ে খুব দ্রুত পৌঁছে গেলেন রামকৃষ্ণ মিশন রোডে। তার বন্ধুর বাড়ি কমলাপুর রেলস্টেশনের পরেই।

যাবার সময় দেখতে পেলেন রেললাইনের দু'পাশে অসংখ্য কঙ্কালসার মানুষ শুয়ে-বসে আছে। দুর্ভিক্ষের করুণ চিত্র। কিছুক্ষণ থেমে দৃশ্যটা দেখলেন ফাদার। অসহ্য লাগলো তার কাছে।

এক হাড্ডিসার মহিলা, বয়স বড়জোর পঁচিশ-ছাব্বিশ হবে, রেললাইনের একপাশে চটের উপর পড়ে আছে। কিন্তু ফাদারের দৃষ্টি আটকে রইলো মহিলার পাশে ফুটফুটে এক বাচ্চার দিকে। সাত-আট মাস বয়সী একটা বাচ্চা ছেলে। সদ্য জন্ম নিয়েই এমন এক ভয়ংকর পরিস্থিতির মুখোমুখি হয়েছে সে। ছেলেটার পাঁজরের হাঁড় বের হতে শুরু করেছে। দুর্ভিক্ষের ছোবল থেকে সেও যে রেহাই পাবে না ফাদার সেটা ভালো করেই জানেন। বাচ্চাটার মায়ের অবস্থা খুবই নাজুক। জোরে জোরে নিঃশ্বাস নিচ্ছে। চোখ দুটো যেনো কোটর থেকে বের হতে চাচ্ছে। ফাদার জেফরি হোবার্ট আর সহ্য করতে পারলেন না। সাইকেল চালিয়ে চলে গেলেন রেললাইনের ওপারে।

বন্ধুর বাড়ি গিয়ে জানতে পারলেন ঘটনা তেমন গুরুতর নয়, বন্ধুর ছেলে জ্বরের কারণে স্কুল যেতে পারে নি। যাহোক ছেলেটার পাশে কিছুক্ষণ বসে ছেলের মায়ের সাথে গল্পগুজব করে রওনা হলেন নিজের স্কুলের দিকে-ওখানেই তিনি থাকেন।

রেললাইনের কাছে আসতেই হঠাৎ কী যেনো মনে করে থামলেন তিনি। একটু আগে এখান দিয়ে যাবার সময় বাচ্চাসহ যে মহিলাকে দেখেছিলেন তার খোঁজ করতেই দেখতে পেলেন মহিলার অসাড় দেহের সামনে এক হ্যাংলা-পাতলা যুবক দাঁড়িয়ে আছে। মুখে চাপ দাড়ি, কাঁধ পর্যন্ত চুল। হালফ্যাশনের বেলবটমের ফুলপ্যান্ট পরা যুবকটি যে কিছু দিন আগে মুক্তিযুদ্ধে অংশ নিয়েছিলো সেটা বুঝতে পারলেন তিনি। বেশিরভাগ যুবা মুক্তিযোদ্ধাই যুদ্ধ শেষে মুখে দাড়ি রেখে দিয়েছে। এদেরকে দেখলেই চেনা যায়।

যুবকটির চোখেমুখে প্রচণ্ড ক্রোধ দেখে ফাদার হোবার্ট নিজের সাইকেলটা নিয়ে এগিয়ে গেলেন।

ফাদারকে দেখে যুবকটি লাল টকটকে চোখে তাকালো। মুখে কিছু না বললেও ফাদার জেফরি হোবার্ট বুঝতে পারলেন বাচ্চাটার মা আর বেঁচে নেই। নীরবনিখর মায়ের দেহের পাশে ফুটফুটে বাচ্চাটা ফ্যাল ফ্যাল ক'রে চেয়ে আছে আর আপন মনে দু'পা শূন্যে লাথি মেরে যাচ্ছে। অবোধ শিশু জানে না এতিনম হয়ে গেছে সে।

“ওর বাবা কোথায়?” ইংরেজি টানে স্পষ্ট বাংলায় বললেন ফাদার। দীর্ঘদিন এদেশে থাকার কারণে বেশ ভালোই রপ্ত ক'রে ফেলেছেন ভাষাটি।

“কেঠায় জানে!” যুবকটি রেগেই বললো। স্থানীয় আঞ্চলিক ভাষায় বললেও ফাদারের বুঝতে অসুবিধা হলো না।

“এখন ওর কি হবে?” জেফরি হোবার্ট উদ্বিগ্ন হয়ে জানতে চাইলেন।

“জানি না! কিচ্ছু জানি না,” যেনো কারোর বিরুদ্ধে ক্ষোভ ঝারছে এমনভাবে বললো যুবকটি। “হালায় এইসব দ্যাহনের লাইগ্যা দ্যাশ স্বাধীন করছিলাম নাকি!”

ফাদার রাগি যুবকটির কাঁধে আলতো ক'রে হাত রাখলে যুবক ঘুরে তাকালো তার দিকে। ক্রোধ ছাপিয়ে এখন দু'চোখ ভরে অশ্রু ছলছল করছে।

অবোধ শিশুটির দিকে তাকিয়ে ফাদার জেফরি হোবার্টের বুকটা হাহাকার করে উঠলো। সঙ্গে সঙ্গে কোলে তুলে নিলেন বাচ্চাটাকে।

“আমি একে নিয়ে যাবো?” কম্পিত কণ্ঠে ফাদার বললেন।

যুবক ফ্যালফ্যাল ক'রে চেয়ে রইলো ফাদারের দিকে। “নিয়া যান, ফাদার। অশুভ একজন রে বাঁচান। আমার নিজের তো কোনো চালচুলা নাই। আমি তো এরে পালতে পারুম না।” কথাটা বলেই দু'চোখ মুছে যুবকটি হনহন ক'রে চলে গেলো।

রাগি সেই যুবক টুকটাক গানবাজনা করতো, এই ঘটনাটি নিয়ে সেদিন রাতেই একটা গান লিখে ফেললো সে আর ফাদার জেফরি হোবার্ট নিজের ঘরে ফিরে এলেন জীবনের আরেকটি মিশন শুরু করার জন্য।

স্কুল কম্পাউন্ডে ফাদারের বাসায় ঠাঁই পেলো ছেলেটি। বেঁচে গেলো দুর্ভিক্ষের ছোবল থেকে। ছেলেটিকে ফাদার জনি বয় নামে ডাকতেন, কিন্তু স্কুলে ভর্তি করার সময় যখন এলো তখন একটা নাম রাখার প্রয়োজন দেখা দিলো। অনেক ভেবেও ফাদার কোনো নাম ঠিক করতে না পেরে অবশেষে নাম রাখলেন নিজের প্রথম নাম জেফরি। কিন্তু একজন মুসলিম ছেলের নাম শুধু জেফরি হবে সেটা যেনো ফাদারের মনোপুত হলো না; অগত্যা নিজের প্রিয় বন্ধুর টাইটেল বেগ মিলিয়ে নাম রাখলেন জেফরি বেগ।



সিদ্দিকী সাহেব নিজের অফিস থেকে আজ তাড়াতাড়ি ফিরে এসেছেন। সাধারণত অফিস থেকে ফিরতে ফিরতে অনেক রাত হয়ে যায় তার। কাজ শেষে প্রতিদিনই ঢাকা ক্লাবে যান। তার সামাজিক জীবন বলতে এখন এই ক্লাব জীবনটাই। কিন্তু আজ তিনি ক্লাবে যেতে পারবেন না। সত্যি বলতে কি, আগামী দু'দিন তিনি যেতে পারবেন না ওখানে। তাতে অবশ্য তার মনে কোনো আফসোস নেই, বরং বিরাট একটা দুশ্চিন্তা থেকে মুক্ত হওয়াতে বেশ নির্ভার লাগছে।

কী যে ঝামেলায় পড়ে গিয়েছিলেন, ভাবাই যায় না।

লেখক জায়েদ রেহমান যখন নিজঘরে খুন হয়েছেন তার ছেলে কিনা তখন লেখকের বাড়ির বাইরে দাঁড়িয়ে ছিলো? শুধু কি তাই! পুলিশের কাছে ধরা পড়ে থানা-হাজতে পর্যন্ত যেতে হয়েছে তাকে। সিদ্দিকী সাহেব খুব দ্রুত থানা থেকে তাকে ছাড়িয়ে না আনলে কী যে হতো ভাবতেই গা শিউড়ে ওঠে তার।

কিন্তু থানা থেকে শুধু ছাড়িয়ে আনলেই যে ঝামেলা থেকে মুক্ত হওয়া যাবে না সেটা সিদ্দিকী সাহেব ভালো করেই জানতেন, সেজন্যই স্বয়ং স্বরাষ্ট্রমন্ত্রীকে দিয়ে থানার রেকর্ড থেকে ছেলের গ্রেফতার হওয়ার প্রমাণ যেমন রাখেন নি সেই সঙ্গে যে পুলিশ অফিসার তাকে গ্রেফতার করেছিলো তার মুখও বন্ধ করার ব্যবস্থা নিয়েছেন। অবশ্য কাজটা করতে তাকে খুব বেশি বেগ পেতে হয় নি। তবে আরেকটু দেরি করলেই সব ওলটপালট হয়ে যেতো।

ধানমণ্ডি থানার ইন্সপেক্টর এলাহী নেওয়াজ ভালোমতোই সব সামলেছেন। সিদ্দিকী সাহেব এজন্যে তার উপর খুবই খুশি। লোকটা খুব কাজের। তার কথা তিনি মনে রাখবেন।

অমূল্য বাবু আবারো অসাধ্য সাধন করেছে, নিজের কারিশমা দেখিয়ে লোকটা সব ব্যবস্থা করে ফেলেছে জাদুর মতো। সিদ্দিকী সাহেবের মতো ক্ষমতাস্বত্ব ব্যক্তিও অমূল্য বাবুর ক্ষমতায় মুগ্ধ।

শাওয়ার থেকে বের হয়ে এক পেগ হুইস্কি খেয়ে নিলেন তিনি। ব্যাগট্যাক সব গুছিয়ে রাখা হয়েছে। বিকেল সাড়ে পাঁচটায় তার ফ্লাইট। ঢাকা থেকে বোম্বাই।

ঘড়িতে সময় দেখলেন চৌধুরি ইমরান আহমেদ সিদ্দিকী। চারটা। সাড়ে চারটায় বিমানবন্দরের দিকে রওনা দেবেন তিনি। হাতে এখনও আধঘণ্টা সময় আছে। ড্রইংরুমের সোফায় বসে টিভিটা ছেড়ে দিলেন।

সব চ্যানেলে একটাই খবর জনপ্রিয় লেখক জায়েদ রেহমান খুন হয়েছেন।

অন্য কোনো চ্যানেলে না গিয়ে স্বদেশ টিভি নামের একটি চ্যানেলে সুইচ করলেন খবর দেখার জন্য। এই চ্যানেলটি তার কাছে বিশেষ প্রিয় হবার কারণ খুবই সহজ সরল চ্যানেলটির পঞ্চাশ শতাংশ মালিকানা তার নিজের। তার মানে তিনিই এই চ্যানেলের সর্বসর্বা।

এ সময় তার মোবাইল ফোনটা বিপ্ ক'রে উঠলে একটু বিরক্তই হলেন তিনি। ডিসপ্লে'তে নাম্বারটা দেখে সঙ্গে সঙ্গে কল রিসিভ করলেন।

“হ্যা, কি হয়েছে?” বললেন সি ই এ সিদ্দিকী।

“স্যার, একটা জরুরি প্রয়োজনে ফোন করলাম। খুবই জরুরি,” ওপাশ থেকে সিদ্দিকী সাহেবের সমস্ত ব্যবসা প্রতিষ্ঠানের জেনারেল ম্যানেজার রাইসুল আনাম শিকদার উদ্ভিন্ন কণ্ঠে বললো।

“তুমি জানো না একটু পরই আমার ফ্লাইট,” সিদ্দিকী সাহেবের কণ্ঠে বিরক্তি। “যা বলার সংক্ষেপে বলো।”

“সরি, স্যার। স্বদেশ টিভির মহাপরিচালক ইকরাম সাহেব ফোন দিয়েছিলেন...” ম্যানেজার বললো।

“কি হয়েছে!”

“...উনি আপনার সাথে সরাসরি কথা বলতে চাচ্ছেন। আমি উনাকে বলেছি একটু পরই আপনার ফ্লাইট আছে তারপরও ভদ্রলোক চাপাচাপি করলেন। তবে আপনি যদি বলেন আমি নিজেই কথা বলতে পারি?”

একটু ভাবলেন সিদ্দিকী সাহেব। “আচ্ছা, এফুণি ফোন করতে বলো। আমার হাতে বেশি সময় নেই।”

ম্যানেজারের সাথে কথা শেষ হবার মিনিটখানেক পরই স্বদেশ টিভির মহাপরিচালক ইকরাম সাহেবের কাছ থেকে একটা কল পেলেন সিদ্দিকী সাহেব। ভদ্রলোক খুব বেশি সময় নিলেন না, সংক্ষেপে যা বললেন তাতে করে সিদ্দিকী সাহেবের কপালে বেশ কয়েকটি ভাঁজ পড়ে গেলো।

নতুন একটা সমস্যার আবির্ভাব হলেও এ যাত্রায় অনেকটা ভাগ্যের জোরেই সিদ্দিকী সাহেব পার পেয়ে গেছেন। তাকে কিছু করতে হয় নি। যা করার স্বদেশ টিভির মহাপরিচালকই করেছেন। লোকটার কাণ্ডজ্ঞানের প্রশংসা করলেন মনে মনে। এই কাজের পুরস্কার তাকে দেয়া হবে।

ঘড়ির দিকে তাকিয়ে দেখলেন সাড়ে চারটা বাজতে আর পাঁচ মিনিট বাকি। উঠে দাঁড়ালেন। সময় হয়েছে রওনা দেবার।



অধ্যায় ২৬

লেখক জায়েদ রেহমানের হত্যাকাণ্ডের দিনটি যদি ইলেক্ট্রনিক মিডিয়ার হয়ে থাকে তাহলে পরের দিনটি নিঃসন্দেহে প্রিন্ট মিডিয়ার।

সবগুলো জাতীয় দৈনিকে ব্যানার হেডলাইনে ঠাঁই পেলে এই প্রখ্যাত লেখকের হত্যাকাণ্ডের খবর। একেকজন একেকভাবে তুলে ধরলো জায়েদ রেহমানের ঘটনাটি। সবার মধ্যেই একটা প্রবণতা ছিলো—গতকাল ইলেক্ট্রনিক মিডিয়ায় যেসব খবর বের হয়েছে তারচেয়ে ভিন্ন কিছু দিতে হবে। এরফলে লেখকের হত্যাকাণ্ডের চেয়ে বেশি জায়গা বরাদ্দ পেয়েছে তার তরুণী স্ত্রীর পরকীয়া প্রেম আর লেখকের বিতর্কিত জীবনের ঘটনাগুলো।

তবে এদের মধ্যে আসমান-জমিন পত্রিকাটি লেখকের প্রেম ও যৌন জীবন নিয়েই বেশি ঘাটাঘাটি করেছে। তারা কতোগুলো ফিচার রিপোর্ট ছেপেছে যার অনেকগুলোই সত্য।

জেফরি বেগ সকালে ঘুম থেকে উঠে যথারীতি জগিং করে নিজের ঘরে ফিরে এসে দুটো দৈনিক পত্রিকা পড়ে ফেলেছে। একটা পত্রিকার ছোট্ট একটা বক্স আইটেমের দিকে তার দৃষ্টি গেলো।

তার একটা পুরনো ছবি দিয়ে এক কলামের একটা রিপোর্ট ছেপেছে তারা। শিনেরানাম দিয়েছে : একজন জেফরি বেগ...

মুচকি হাসলো সে। কারণ রিপোর্টার এমনভাবে তার কথা লিখেছে যে পাঠক পড়ে মনে করবে গতকাল সে রিপোর্টারের কাছে একটা ইন্টারভিউ দিয়েছে।

জেফরি বেগ কিভাবে অতি দ্রুত ঘটনাস্থল থেকে মিসেস রেহমানের প্রেমিককে শ্রেফতার করলো সেটার মনগড়া একটা কাহিনী বিবৃত করেছে রিপোর্টার। নিউজটা খুব বেশি বড় নয়।

ভেতরের পৃষ্ঠায় লেখক জায়েদ রেহমানের জীবনবৃত্তান্ত দেয়া আছে। মোটামোটি তার জীবনে ঘটে যাওয়া সব ঘটনাই উল্লেখ করা আছে তাতে। জেফরি মনোযোগ দিয়ে পড়লো সেটা। এই লেখাটাসহ আরো যেসব লেখায় জায়েদ রেহমানের জীবনবৃত্তান্ত কিংবা তার জীবনের টুকরো টুকরো ঘটনার

উল্লেখ আছে সেসবই সংগ্রহ করতে হবে। লেখক জায়েদ রেহমানের সম্পর্কে জেফরির তেমন কোনো ধারণাই নেই। এই বিখ্যাত লেখককের কোনো বই পড়েছে বলেও মনে করতে পারলো না সে। সিদ্ধান্ত নিলো লেখকের কিছু বইও পড়বে। তবে মৃত্যুর কিছুক্ষণ আগে মেইল করে যে বইটা তিনি একজন প্রকাশককে পাঠিয়েছেন সেটা পড়তে হবে সবার আগে। প্রায় ৫০০ পৃষ্ঠার একটি বই। অনেক সময় লাগবে।

গতকাল রাতে তার সহকারী জামান বাড়িতে এসে পলিগ্রাফ টেস্টের প্রিন্ট কপি দিয়ে গেছে। সেই সাথে আরো জানিয়ে গেছে, লেখক জায়েদ রেহমানের পোস্টমর্টেম করা হয়েছে। অভিনব কিছু নেই। এটি যে হত্যাকাণ্ড সে ব্যাপারে প্রমাণ পাওয়া গেছে তবে রিপোর্ট তৈরি করতে আরো দু'একদিন লেগে যাবে।

জায়েদ রেহমান যে খুন হয়েছেন সেটা ফরেনসিক রিপোর্ট পাওয়ার আগেই মোটামোটি নিশ্চিত হওয়া গেছে তারপরেও জেফরির মনে হচ্ছে কোথাও যেনো একটা সমস্যা আছে। এই কেসটার পেছনে যতোটুকু মনোযোগ দেবার দরকার ছিলো সেটা সে দিতে পারে নি অথচ পরিহাসের বিষয় হলো এটাই এখন পর্যন্ত তার ক্যারিয়ারে সবচাইতে দ্রুত সমাধান করা কেস-অন্তত সবাই সেরকমই মনে করছে।

নাটকীয়ভাবে দ্রুততার সাথে সবকিছু ঘটে যাওয়াতে এই হত্যাকাণ্ডের অনেক কিছুই জেফরির চোখ এড়িয়ে গেছে। পুরো বিষয়টা ভালো করে খতিয়ে দেখতে হবে। কেসটা নিয়ে ধীরস্থিরভাবে ভাবতে শুরু করার আগে ভালো ক'রে এক কাপ গরম চা বানিয়ে নিলো সে।

চায়ের কাপে চুমুক দিয়ে নিজেকে যতোটা সম্ভব ধীরস্থির করে পুরো ব্যাপারটা খতিয়ে দেখলো। এ পর্যন্ত সে যা জানে তার মধ্যে অসঙ্গতিগুলো কি এবং সেটা কতোটা শক্তিশালী।

প্রথম অসঙ্গতি, পলিগ্রাফ টেস্টের ফলাফল। হোমিসাইড ডিপার্টমেন্টে এখন পর্যন্ত পলিগ্রাফ টেস্টের ফলাফল নেগেটিভ হয় নি। কিন্তু এই ঘটনায় আশ্চর্য রকমেই সেটা নেগেটিভ। অবশ্য তার বস্ ফারুক সাহেব এটাকে তেমন আমলে নিতে চাচ্ছে না।

দ্বিতীয় অসঙ্গতিটা ল্যাপটপ নিয়ে। হাউজনার্সের কথা যদি ঠিক হয় তাহলে একজন চলৎশক্তিহীন মানুষ কিভাবে তার নাগালের বাইরে থাকার কফি টেবিলের উপর রাখা ল্যাপটপ থেকে মেইল করলো?

অনেক দিন আগে জেফরি একটা হলিউডি ছবি দেখেছিলো, নামটা অবশ্য এ মুহূর্তে মনে করতে পারলো না; সারা ছবিতে প্রধান চরিত্রটি অন্ধ হলেও শেষে দেখা যায় সে আসলে অন্ধ নয়, অন্ধ হবার ভান করেছিলো কেবল, আর সেই

সুযোগে একের পর এক হত্যাকাণ্ড ঘটিয়ে যায় সন্দেহের উর্ধ্ব থেকে ।

মুচকি হেসে ফেললো জেফরি । লেখক জায়েদ রেহমানের বেলায় এমন কিছু হয়েছে বলে বিশ্বাস করতে পারলো না ।

সম্ভাব্য খুনি হিসেবে আটক থাকা মিসেস রেহমান আর তার প্রেমিক আলম শফিক যে এই হত্যাকাণ্ডটি ঘটিয়েছে সে ব্যাপারে এখন সবাই নিশ্চিত । কিন্তু জেফরির মনে একটা খটকা লেগেই আছে—এটা হলো তার কাছে তৃতীয় অসঙ্গতি ।

আলম শফিক আর মিসেস রেহমান—যদি তারা খুনটা করেই থাকে তাহলে সেই রাতে দু'দুবার শারিরীকভাবে মিলিত হলো কিভাবে?

পাশের ঘরে খুন করে এসে এরকম একটি কাজ করা কি স্বাভাবিক কোনো মানুষের পক্ষে সম্ভব? এরজন্য যে পরিমাণ শক্ত নার্ভের দরকার সেটা এই দু'জনের কারো মধ্যেই নেই, বিশেষ করে আলম শফিকের তো মুরগি কাটার মতো নার্ভ আছে কিনা তাতেও জেফরির সন্দেহ রয়েছে ।

অনেক খুনি দেখেছে জেফরি । তাদের অনেকেই পেশাদার । কিন্তু খুন করার আগে-পরে তারাও নিজেদের নার্ভ ঠিক রাখার জন্য মদ পান করে থাকে । অনেকে আবার শক্তিশালী ড্রাগও নেয় ।

প্রথমে এই ব্যাপারটা জেফরির কাছে ধরা পড়ে নি কিন্তু এখন যখন পুরো কেসটা নিয়ে ঠাণ্ডা মাথায় ভাবতে বসেছে এক এক করে সব তার কাছে ধরা পড়ছে ।

হঠাৎ উঠে দাঁড়ালো সে । একটা সিদ্ধান্ত নিয়ে ফেলেছে । ভিটা নুভায় যেতে হবে ।

নাস্তা করার আগেই জামান ফোন পেলো জেফরি বেগের কাছ থেকে । তড়িঘড়ি নাস্তা করেই রওনা দিলো সে । বেগ তাকে সরাসরি ভিটা নুভায় চলে যেতে বলেছে ।

লেখক জায়েদ রেহমানের অ্যাপার্টমেন্টের দরজাটা খোলা দেখে সে বুঝতে পারলো জেফরি বেগ তার অনেক আগেই এসে পৌঁছেছে ।

পুরো অ্যাপার্টমেন্টটি পুলিশ সিজ ক'রে রেখেছে । হাউজনাস আর দু'জন কাজের মহিলাকে আপাতত পুলিশ কাস্টডিতে রাখা হয়েছে । পুরো অ্যাপার্টমেন্টে কেউ নেই । লেখকের দুই বছরের একটি ছেলে সন্তান আছে, তাকে তার নানা-নানী নিয়ে গেছে । দু'জন পুলিশের সার্বক্ষণিক পাহারা বসানো হয়েছে সেখানে । তাদের কোনো কাজ নেই । শুধুমাত্র লেখক জায়েদ রেহমানের অ্যাপার্টমেন্টের

দরজার সামনে বসে থেকে নিরাপত্তা নিশ্চিত করা ।

ঘরে লেখকের অনেক ব্যবহার্য জিনিসপত্র সিজার লিস্টে ঠাঁই পেয়েছে তবে আসবাবপত্র আর বাকি সব জিনিস আগের মতোই আছে । জামান লেখকের ঘরে ঢুকতেই দেখতে পেলো জেফরি বেগ এক মনে লেখকের ফাঁকা বিছানার দিকে চেয়ে আছে । তার উপস্থিতি টের পেলে ঘুরে তাকালো কেবল ।

“কখন এসেছেন, স্যার?”

“দশ-পনেরো মিনিট হবে,” বললো বেগ ।

জামান তার কাছে এগিয়ে গেলো । “স্যার, পোস্টমর্টেমের রেজাল্ট তৈরি হচ্ছে । তবে আমার কাছে খবর আছে, জায়েদ রেহমানের মৃত্যু শ্বাসরোধ করে করা হয় নি ।”

“তাহলে কজ অব ডেথ কি?” জানতে চাইলো জেফরি ।

“হার্ট অ্যাটাক ।”

“উমমম ।” একটু ভেবে তারপর বললো সে, “ফরেনসিক টিম কি একেবারে নিশ্চিত?”

মাথা নেড়ে সায় দিলো জামান ।

“বুকের বাম পাশে যে একটা লালচে দাগ ছিলো সেটার ব্যাপারে কিছু জানা গেছে?”

“ওখানে আঘাত করার আলামত পেয়েছে তারা । পাঁজরের ঐ জায়গার হাঁড়ে নাকি ফ্র্যাকচার আছে ।”

জেফরি এটা আগেই আন্দাজ করেছিলো ।

“স্যার, আমি তো ভেবেছিলাম উনাকে শ্বাসরোধ করে হত্যা করা হয়েছে । মুখে একটা বালিশ চাপা দেয়া ছিলো ।”

“মুখ দিয়ে যাতে শব্দ না বের হয় সেজন্যে দেয়া হয়েছিলো,” বললো জেফরি বেগ ।

“সেটা তো হাত দিয়েও করা যেতো?”

“বালিশ দিয়ে করলে কাজটা অনেক সহজ হয় ।”

যুক্তিটা যুতসই বলেই মনে হলো জামানের কাছে । “কিন্তু মিসেস রেহমান আর তার প্রেমিক এতো বড় একটা ভুল করলো কেন? তারা তো কাজ শেষে বালিশটা মুখ থেকে সরিয়ে রাখতে পারতো? এমনভাবে রাখতে পারতো যাতে মনে হতো জায়েদ সাহেব ঘুমের মধ্যে মারা গেছেন । ন্যাচারাল ডেথ ।”

“আমরা সবাই ভুল করি, জামান । যেভাবে পরিকল্পনা করা হয় সেভাবে সব ঠিকঠাক মতো করা যাবে এটা ভাবছো কেন । হয়তো নার্ভাস হয়ে তারাও কিছু ভুল করেছে । আবার এমনও হতে পারে, তারা সব কিছু ঠিকঠাক করার আগেই

অপ্রত্যাশিতভাবে পুলিশ এসে পড়াতে তালগোল পাকিয়ে ফেলেছে। আমার অবশ্য সেরকমই মনে হচ্ছে” জেফরি বললো।

“তাহলে ল্যাপটপের ব্যাপারটা?”

“সেটাই তো সবচাইতে বড় খটকা।” কথাটা বলে জেফরি একটু চুপ থেকে আবার বললো, “এই কেসে তিনটি খটকা আছে যার ব্যাখ্যা এখন পর্যন্ত আমরা জানি না।”

“তিনটি?” অবাক হলো জামান। “আমি তো ভেবেছিলাম ল্যাপটপের ব্যাপারটাই শুধু...বাকি দুটো কি, স্যার?”

“পলিগ্রাফ টেস্টের রেজাল্ট। ওদের ভাইটাল কোয়েশ্বেনের জবাবগুলো একদম সঠিক।”

“কিন্তু ফারুক স্যার যে বললেন এটা তেমন কোনো—”

জামানের কথা মাঝখানে বাধা দিয়ে জেফরি বললো, “টেকনিক্যালি উনার কথাই ঠিক। পলিগ্রাফ টেস্ট একেবারেই আমাদের নিজেদের সুবিধার্থে করা হয়ে থাকে। এটা আমাদেরকে ইন্টেরোগেশনে সাহায্য করে। এ ছাড়া আর কিছু না।”

“তাহলে...?”

“এই প্রথম পলিগ্রাফ টেস্টের ফলাফল এরকম হলো। এটাই আমাকে ভাবাচ্ছে। তবে এটা তেমন বড় কোনো কারণ নয়।”

“এরচেয়েও বড় কারণ আছে, স্যার?”

“তিন নাম্বার কারণটা একটু জটিল। তবে ল্যাপটপের চেয়ে এটাই এখন আমার কাছে বেশি বড় ব’লে মনে হচ্ছে।”

জামান কথাটা শুনে আরো বেশি আগ্রহী হয়ে উঠলো। “সেটা কি?”

“জায়েদ রেহমান খুন হবার আগে এবং পরে মিসেস রেহমান আর তার প্রেমিক আলম শফিক শারিরীকভাবে মিলিত হয়েছেন...এটা আমরা তাদের জবানবন্দী থেকেও জেনেছি...আর আমাদের কাছে তো এর সপক্ষে প্রমাণও আছে...”

জামান একটু লজ্জা পেলো। কোনো প্রশ্ন করলো না সে।

“...দু’জন নারী-পুরুষ খুন করার আগে এবং পরে এরকম কিছু করবে, ...ভাবাই যায় না।”

“আপনি এখন কি করতে চাচ্ছেন, স্যার?” জানতে চাইলো জামান।

“জামান, গতকাল আমাদের ভাগ্য খুবই ভালো ছিলো। কোনোরকম প্রচেষ্টা ছাড়াই আমরা অভাবনীয় সাফল্য পেয়ে গেছি। সত্যি বলতে কি, এই কেসে আমাকে তেমন কিছুই করতে হয় নি, অথচ দ্যাখো, কতো দ্রুত সাফল্য পেয়েছি আমরা।”

জামান চুপ ক'রে থাকলো ।

“পুরো কেসটা একেবারে প্রথম থেকে তদন্ত করতে চাই আমি ।”

জামান মাথামুণ্ডু কিছুই বুঝতে পারলো না । “আপনি কি মনে করছেন এই হত্যাকাণ্ডটি মিসেস রেহমান আর আলম শফিক করেন নি?”

বেগ মাথা নাড়লো । “ব্যাপারটা সেরকম নয়, জামান । আমি কিছুই মনে করছি না । শুধু অসঙ্গতিগুলো বুঝতে চাইছি ।”

“মিসেস রেহমান আর আলম শফিক ছাড়া কে এই কাজ করতে যাবে?”

“সম্ভবত কাজটা তারাই করেছে, কিন্তু এখানে আরো কিছু ঘটনা রয়ে গেছে ।”

“ফারুক স্যার কি ব্যাপারটা জানেন?”

মুচকি হাসলো বেগ । “বলেছিলাম তবে সিরিয়াসলি বলি নি ।”

জামান চুপ ক'রে রইলো ।

“আমাদের কাজ কিন্তু খুনি ধরা নয়, জামান,” বললো জেফরি । “আমাদের কাজ সত্যিকার ঘটনাটি তদন্ত ক'রে বের করা ।”

মাথা নেড়ে জামান সায় দিলো ।

“গতকাল হয়তো আমরা খুনি ধরতে পেরেছি কিন্তু ঘটনাটি আসলে কি সেটা এখনও জানতে পারি নি ।”

“আপনি কি মিসেস রেহমান আর আলম শফিককে আবারো জিজ্ঞাসাবাদ করবেন?” জামান বললো ।

“তাদেরকে নয়,” কথাটা বলেই দরজার দিকে পা বাড়ালো জেফরি বেগ । “আমি এই অ্যাপার্টমেন্টের দাড়ায়েন আর অন্যান্য অ্যালোটিদেরকে জিজ্ঞাসাবাদ করতে চাই ।”

“এইটা তো আমি কইবার পারুম না, স্যার,” ভিটা নুভার নাইটগার্ড আসলাম জেফরির প্রশ্নের উত্তরে ভয়ে জড়োসড়া হয়ে বললো ।

গতকাল থেকে সে প্রচণ্ড ভয়ে আছে । ভেবেছিলো নাইটগার্ডের চাকরিটার চেয়ে নিরাপত্তা চাকরি এ দুনিয়ায় দ্বিতীয়টি নেই, কালকের পর থেকে অবশ্য সেটা আর তার কাছে মনে হচ্ছে না । কী জানি কোন্ বিপদে পড়ে যায় এই ভয়ে তটস্থ হয়ে আছে সে ।

“কাল রাতে তো তুমিই ডিউটিতে ছিলে?” বললো জেফরি ।

“আমি তো সন্ধ্যা সাতটার পর থেইকা ডিউটি দেই,” আসলাম সতর্ক হয়ে বললো ।

“তাহলে তুমি ডিউটিতে যোগ দেবার পর কারা কারা এখানে ঢুকেছে আর বের হয়ে গেছে সেটা বলো?”

“এতো মানুষ থাকে এখানে আমি কেমনে কমু? আমার তো, কিছু মনে নাই।”

“এই ফ্ল্যাটের লোকজনের কথা বলছি না, বাইরের লোকদের কথা বলছি,” জেফরি বললো।

“না, স্যার। বাইরে থেইকা কেউ আসে নাই,” আসলাম নিশ্চিত হয়ে বললো ইনভেস্টিগেটরকে।

জেফরি জানে ছেলেটা ঠিকই বলছে কারণ মিসেস রেহমান তার গাড়িতে করে আসলাম শফিককে যে ভিটা নুভায় নিয়ে এসেছিলেন সেটা তার জানা কথা নয়।

তারা বসে আছে নীচের পার্কিংলটের শেষমাথায় দাড়োয়ানদের ছোটো ছোটো দুটো ঘরের সামনে। “কোনো অপরিচিত লোকজনকে তুমি দ্যাখো নি?” জেফরি আবাবো জানতে চাইলো।

“সন্ধ্যার পর থেইকা দেহি নাই, তয়...”

“তাহলে কি...বলো?” ছেলেটাকে তাড়া দিয়ে জামান বললো পাশ থেকে।

“ভোর বেলা ফজরের আজান দিবার পর এই ফ্ল্যাটের দোতলার হানিফ স্যার নামাজ পড়তে বাইর হইছিলেন, উনার সাথে বোধহয় উনার এক গেস্টও ছিলো। আমি উনারে চিনি না, স্যার।”

“তুমি চেনো না মানে আগে কখনও দ্যাখো নি?”

“না, দেহি নাই।”

“ঐ গেস্ট এখন কোথায়?”

“তাতো কইবার পারুম না। উনারে আর দেখতাই না।”

“হানিফ সাহেব কি নিজের ফ্ল্যাটেই আছেন?” জেফরি জানতে চাইলো।

“মনে হয় আছেন।”

জামানের দিকে ফিরলো জেফরি। “হানিফ সাহেবের সাথে দেখা করতে হবে। চলো।”

হানিফ সাহেব যেনো আকাশ থেকে পড়লেন। “আমার গেস্ট ঐ ইডিওটটা কি আপনাদেরকে এ কথা বলেছে?”

পুলিশের লোক পরিচয় দেবার পর এই লোক প্রথমে একটু ভড়কে গেছিলেন, দরজা ফাঁক করেই পুরো আলাপ সেরে নিতে চেয়েছিলেন তিনি। তার

ধারণা ছিলো লেখক জায়েদ রেহমানের হত্যাকাণ্ডের সমস্ত রহস্য উন্মোচিত হয়ে গেছে, সুতরাং খামোখা কেন অ্যালোটদের জিজ্ঞাসাবাদ করা হবে এখন? জেফরি যখন বললো তার ঘরে বসে তার সাথে কিছু জরুরি কথা বলতে হবে তখন অনেকটা অনিচ্ছায় জামান আর জেফরিকে ভেতরে ঢুকতে দিয়েছেন ভদ্রলোক। বিশাল ড্রইংরুমের রাজকীয় দুই সেট সোফার একটাতে বসেছে তারা। জেফরি খেয়াল করেছে ভেতরের ঘর থেকে দু'জন মহিলা উঁকি মেরে তাদের কথা শোনার চেষ্টা করছে।

“আপনি বলছেন আপনার কোনো গেস্ট ছিলো না?” জেফরি বললো।

“গতকাল তো দূরের কথা বিগত এক মাসে আমার কোনো গেস্ট আসে নি।” ভদ্রলোক পুলিশের জেরার ভয়ে কৃত্রিম রাগ দেখানোর চেষ্টা করছেন।

“আমি বিগত এক মাসের কথা জানতে চাই নি, গতকালকের কথা জানতে চাইছি।”

মুখ টিপে হাসছে জামান। ভদ্রলোককে খুব মজার মানুষ মনে হচ্ছে তার কাছে।

“না। আমার কোনো গেস্ট ছিলো না,” কাটাকাটাভাবে বললেন হানিফ সাহেব।

“দাডোয়ান ছেলেটা যে বললো আপনার সাথে আরেকজন ছিলো। আপনারা ফজরের আজান দেবার পর পরই বের হয়েছিলেন?”

“ঐ ইডিওটটা কেন এ কথা বলছে আমি জানি না। আমার স্পষ্ট কথা শুনে রাখুন, আমি একাই বের হয়েছি। সব সময় একাই বের হই। এই অ্যাপার্টমেন্টে ফজরের নামাজ পড়ার লোক আছে নাকি!” হানিফ সাহেব দৃঢ়তার সাথে বললেন।

“জামান, দাডোয়ান ছেলেটাকে নিয়ে আসো এখানে,” জেফরি জামানকে বললে সে উঠে চলে গেলো।

“আপনি কি নিয়মিতই নামাজ পড়েন?” হানিফ সাহেবকে প্রশ্ন করলো বেগ।

“ফজরের নামাজ যে পড়তে পারে ধরে নিতে হবে সে নিয়মিতই নামাজ পড়ে।”

“এই অ্যাপার্টমেন্টে তাহলে আর কেউ নামাজ পড়ে না?”

ভদ্রলোকের মুখে তিক্ত হাসি দেখা দিলো। “নামাজ পড়বে এরা! হা। একেকটা বদমাশ। আকাম কুকাম করেই সময় পায় না নামাজ পড়বে কখন?”

“তাহলে পুরো ফ্ল্যাটে আপনি একাই নামাজ পড়েন?”

“সেটা আমি বলতে পারবো না। তবে আমি কাউকে ফজরের নামাজ পড়ার

জন্য মসজিদে যেতে দেখি নি। জুম্মার নামাজ অবশ্য অনেকেই পড়ে। এই অ্যাপার্টমেন্টে ফ্ল্যাট কিনে কী যে ভুল করেছি! একেকটা পিশাচ থাকে এখানে। আর এখন তো সারা দেশ জেনে গেলো এখানে কী সব ঘটনা ঘটে!”

“কিন্তু দাড়াইয়ান ছেলেটা বলছে আপনার সাথে আরেকজন ছিলো। নিশ্চয় কোথাও কোনো ভুল হয়েছে। ভালো ক’রে ভেবে দেখুন,” বললো জেফরি।

“ভাবাবাবির কিছু নেই। অবশ্যই ভুল হয়েছে, তবে সেটা আমার নয়, ঐ ছেলেটার,” বললেন হানিফ সাহেব।

আড়চোখে তাকিয়ে ড্রইংরুমের শেষমাথায় একটা দরজার পর্দার আড়ালে দু’জন মহিলাকে দেখে নিলো জেফরি।

জামান ফিরে এলো দাড়াইয়ান ছেলেটাকে সাথে নিয়ে।

“এই হারামজাদা! আমার সাথে কাকে দেখেছিস...অ্যা?” দাড়াইয়ান ছেলেটাকে ঘরে ঢুকতে দেখেই রেগেমেগে বললেন হানিফ সাহেব।

“প্লিজ, হানিফ সাহেব। আপনি কিছু বলবেন না। আমাকে বলতে দিন,” জেফরি লোকটাকে নিবৃত্ত করে বন্ধুসুলভ কণ্ঠে দাড়াইয়ান ছেলেটাকে বললো, “তুমি কি নিশ্চিত দেখেছো, হানিফ সাহেবের সাথে আরেকজন ছিলো?”

“জি, স্যার,” নাইটগার্ড আসলাম বললো জবাবে।

“তুমি তো বলেছো লোকটাকে তুমি চেনো না, তাহলে কি করে বুঝলে ঐ লোক হানিফ সাহেবের গেস্ট হতে পারে?”

ছেলেটা মনে হলো ধন্দে পড়ে গেছে। “না, মানে...উনারা দু’জন একসাথে বের হইছিলেন তো...”

“আরে ব্যাটা তুই কি বলছিস! তোর...”

“প্লিজ,” জেফরি আবারো নিবৃত্ত করলো হানিফ সাহেবকে। “হানিফ সাহেব কি ঐ লোকটার সাথে কথা বলতে বলতে বের হইছিলেন?” আসলামকে প্রশ্ন করলো সে।

“না।”

“তাহলে...?”

“আজান দেয়ার কিছুক্ষণ পর হানিফ স্যার নাইমা আসেন...তার পেছন পেছন আরেকজন লোক ছিলো...মাথায় টুপির দেয়া...পাঞ্জাবি পরা...উনার ঠিক পেছনেই ছিলো...তাই আমি ভাবলাম—”

“অ্যাই ব্যাটা, আমার পেছনে দেখেছিস মানে?” হানিফ সাহেব আবারো ফেঁটে পড়লেন।

জেফরি লোকটার দিকে স্থির চোখে তাকালো। “হানিফ সাহেব, আমি কিছু

না বললে আপনি কোনো কথা বলবেন না। এটা একটা খুনের ঘটনা। ব্যাপারটা খুবই সিরিয়াস।”

এ কথায় কাজ হলো। খুনের ঘটনা শুনেই চুপসে গেলেন তিনি।

“যে লোককে উনার পেছন পেছন তুমি বের হতে দেখেছো তার বয়স কেমন হবে?” আসলামকে বললো জেফরি বেগ।

একটু চিন্তা ক’রে বললো সে, “আপনার মতোই বয়স অইবো।”

“আমার বয়সী?” আসলামের কথাটার প্রতিধ্বনি করলো সে।

“জি, স্যার।”

“দেখতে কেমন?”

“আপনার মতোই সুন্দর—”

“হা-হা-হা—” হানিফ সাহেব হেসে ফেললেন। “ভাগ্য ভালো যে বলে নি আপনাকেই দেখেছে...হা হা হা!” হানিফ সাহেব কথাটা বলেই বুঝতে পারলেন কথার মাঝখানে তার মুখ খোলাটা ঠিক হয় নি। চুপ মেরে গেলেন সঙ্গে সঙ্গে।

জেফরি কিছুটা বিরক্ত। এই লোকের মুখ বন্ধ রাখা খুব সহজ কাজ নয়। “লোকটাকে দেখলে তুমি চিনতে পারবে?”

“ঠিক কইরা কইতে পারতাছি না, স্যার। তয় চিনতে পারুম মনে হয়...”

“ঐ লোকটাকে আগে কখনও তুমি দ্যাখো নি, না?”

“না, দেহি নাই।”

“হানিফ সাহেব বোধহয় তার পেছনে থাকা লোকটাকে দেখতে পান নি?”

“উনি ঘুম খেইকা মাত্র উঠছিলেন তো...দুই চোখ তহনও ঘুমে ঢুলুঢুলু করতছিলো। ঐ লোকের সাথে অবশ্য স্যারকে কোনো কথা কইতে দেহি নাই। উনিও পিছন ফিরা তাকান নাই।”

“তাহলে তুই ব্যাটা বুঝলি কি ক’রে ঐ লোক আমার গেস্ট?” হানিফ সাহেব আবারো নিজেকে সামলাতে পারলেন না।

“না, মানে...আইডিয়া কইরা কইলাম আর কি...”

“ব্যাটা মূর্খ, আইডিয়া ক’রে বলে দিলি আমার গেস্ট হয়!”

বেগ নিরুপায় হয়ে মাথা চুলকালো। হানিফ সাহেব লোকটাকে কোনোভাবেই থামানো যাচ্ছে না। “মি: হানিফ...”

“সরি...সরি,” ভদ্রলোক হাত তুলে নিজেকে বিরত রাখার ইশারা করলেন।

“আপনি নামাজ পড়ে ফিরলেন কখন?” হানিফ সাহেবকে জিজ্ঞেস করলো বেগ।

“ঘড়ি তো দেখি নি...তবে নামাজ পড়া শেষ হতেই নিজের ফ্ল্যাটে চলে আসি আমি। ঢুকতেই দেখি গেটের সামনে পুলিশ।”

ভিটা নুভার নাইটগার্ড আসলামকে এবার বললো বেগ, “উনি যখন ফিরে এলেন তুমি সেটা দ্যাখো নি?”

“না, স্যার। তহন তো গেটে পুলিশ ছিলো। তারা আমারে ভিতরে বসাইয়া রাখছিলো তাই উনি কখন ঢুকছেন আমি কইবার পারুম না।”

এক অজ্ঞাত যুবক ফজরের আজান দেবার পর পরই হানিফ সাহেবের পেছন পেছন নামাজ পড়তে বের হয়ে গেছে যাকে এই অ্যাপার্টমেন্টের দাড়াওয়ান চেনে না। আগে কখনও দেখেও নি। তারপর হানিফ সাহেব নামাজ পড়ে ফিরে এলেও সেই রহস্যময় লোকটি ফিরে আসে নি।

বেগ বুঝতে পারছে হানিফ সাহেব মিথ্যে বলেন নি, আর এই দাড়াওয়ান ছেলেটাও সত্যি কথাই বলছে। এই কেসটা তার কাছে আরো জটিল বলে মনে হচ্ছে। মনে হচ্ছে একটা বিশাল গোলকধাঁধায় ঢুকে পড়েছে সে, যার অনেকগুলো পথ কিন্তু নির্মম ব্যাপার হলো তার বেশিরভাগই কানাগলি।

এই ফ্ল্যাটের সবাইকে জিজ্ঞাসাবাদ করতে হবে। যেভাবেই হোক বের করতে হবে কে এই যুবক। জেফরির জন্য তার পরিচয়টা জানা খুবই দরকারি হয়ে পড়েছে এখন।



অধ্যায় ২৭

পাভেল আহমেদ ভেবে পাচ্ছে না কি কারণে গতকাল রাতে অনুষ্ঠানটি প্রচার হলো না। রাতে বার থেকে দ্রুত বাড়ি ফিরে এসেছিলো কেবল অনুষ্ঠানটি দেখার আশায়। হামিদ আলম তাকে জানিয়েছিলো রাত সাড়ে নটার দিকে প্রোগ্রামটা দেখাবে। এরকম একটা জিনিস তো পাবলিক খুব ভালো মতোই খেতো। হয়তো শিডিউলে কোনো সমস্যা হয়েছে। মোবাইল ফোনটা হাতে নিয়ে হামিদ আলমকে ফোন করলো সে।

“প্রোগ্রামটা গেলো না কেন?” পাভেল আহমেদ জানতে চাইলো হামিদ আলমের কাছে।

“বুঝতে পারছি না। নিউজ প্রডিউসারকে জিজ্ঞেস করেছিলাম উনি যা বললেন তাতে তো মনে হচ্ছে এই প্রোগ্রামটা আর যাবে না...”

“বুঝলাম না?”

“আমিও তো কিছু বুঝতে পারছি না,” হামিদ আলম বললো। “কথাটা কাউকে বোলো না, নিউজ প্রডিউসার আমাকে ডেকে নিয়ে বলেছে, এই ইন্টারভিউয়ের কথা যেনো কারো সাথে আলাপ না করি। আর তোমার পাওনা বাকি পঁচিশ হাজার টাকা আজই দিয়ে দেবে তারা। আমি তো কিছুই বুঝতে পারছি না।”

পাভেল আহমেদ অবশ্য কিছু একটা বুঝতে পারলো। একটা স্কুপের গন্ধ পাচ্ছে সে। “আমার বিক্রি করার দরকার ছিলো বিক্রি ক’রে দিয়েছি। এখন তোমরা প্রচার করবে নাকি ডাস্টবিনে ফেলে দেবে সেটা তোমাদের ব্যাপার। তাহলে আমার বাকি টাকাটা কখন দিচ্ছে?”

“সন্ধ্যার পর।”

“কালকে যেখানে বসেছিলাম সেখানেই?”

“হ্যাঁ,” হামিদ আলম বললো। কাল সন্ধ্যার পর তারা দু’জনে বসেছিলো লা ডিপ্লোম্যাট বারে।

পাভেল আহমেদ ফোনটা রেখে ভাবতে লাগলো। দীর্ঘ দিন ক্রাইম রিপোর্টারের কাজ করে সে অসুস্থ এটুকু বুঝতে পারছে ব্যাপারটা অনুসন্ধান

করলে কিছু একটা পাওয়া যাবে হয়তো। পঞ্চাশ হাজার টাকায় বিক্রি করে ভেবেছিলো বেশ লাভ হয়েছে কিন্তু এখন তার মনে হচ্ছে ওটার মূল্য আরো বেশি।

ইনভেস্টিগেটর জেফরি বেগ আর জামান একটা কফিশপের এককোণে বসে আছে। ভিটা নুভা থেকে কাজ সেরে সোজা এখানে চলে এসেছে তারা। ওখানকার অন্যান্য অ্যালোটিদের জিজ্ঞাসাবাদ করে তারা নিশ্চিত হয়েছে গতকাল তাদের কারোরই কোনো গেস্ট ছিলো না। দাডোয়ান ছেলেটার বর্ণনা অনুযায়ী কোনো যুবককে তারা গতকাল দেখেও নি।

“স্যার, এমনও তো হতে পারে কোনো অ্যালোটির গেস্ট ঠিকই এসেছিলো কিন্তু জায়েদ সাহেবের হত্যাকাণ্ডের কথা শুনে ভয়ে কেটে পড়েছে। এখন ভয়ে আর সেটা স্বীকার করতে চাচ্ছে না কেউ। আমাদের দেশের মানুষ তো পুলিশকে ঠিক আস্থায় নিতে পারে না। ওরা মনে করে থাকতে পারে এতে করে খামোখাই ঝামেলায় জড়িয়ে পড়বে।”

বেগ মাথা নেড়ে সায় দিলো। “ফজরের আজানের পর হানিফ সাহেব যখন নামাজ পড়ার জন্য বের হলেন তখনও জায়েদ সাহেবের খুন হবার কথা কেউ জানতো না। নামাজ শেষে ফিরে এসে হানিফ সাহেব ভিটা নুভায় ঢুকতে গিয়ে জানতে পারলেন কিছু একটা হয়েছে। তোমার কথা যদি ঠিক হয় তাহলে ধরে নিতে হবে ঐ অজ্ঞাত যুবক জানতো জায়েদ রেহমান খুন হয়েছেন। সেজন্যেই ভিটা নুভা থেকে বের হয়ে আর ফিরে আসে নি। সেই সাথে এটাও ধরে নিতে হবে তাকে আশ্রয় দিয়েছে এই অ্যাপার্টমেন্টেরই কোনো লোক। ব্যাপারটা তো আরো জট পাকিয়ে যাচ্ছে।”

“তা ঠিক,” বললো জামান। “স্যার, আপনি কি মনে করছেন মিসেস রেহমান আর শফিক সাহেব ছাড়াও অন্য কেউ এই খুনের সাথে জড়িত থাকতে পারে?”

“এটা আমার আগেও মনে হয়েছে। ধানমণ্ডি থানার ইন্সপেক্টর এলাহী সাহেব এক ছেলেকে ভিটা নুভার সামনে সন্দেহজনকভাবে দাঁড়িয়ে থাকতে দেখেছিলো। ছেলেটাকে ধরতে পারে নি সে কিন্তু তারও মনে হয়েছিলো ছেলেটা কোনো অঘটন ঘটানোর উদ্দেশ্যে ওখানে দাঁড়িয়ে ছিলো...” জেফরি একটু অন্যমনস্ক হয়ে থেমে গেলো।

“স্যার, আলম শফিক কি আরো কয়েকজনকে নিয়ে এই কাজটা করেছে?”
একটু ভেবে মাথা নেড়ে সায় দিলো বেগ। “হতে পারে।”

“স্যার?” জামান বললে জেফরি অন্যমনস্কতা কাটিয়ে উঠে তার দিকে তাকালো। “আপনি মনে হয় নিশ্চিত হতে পারছেন না খুনটা মিসেস রেহমান আর আলম শফিক করেছে?”

বেগ চূপ করে থাকলো।

“আগামীকাল আসামী দু’জনকে পুলিশ রিমান্ডে নেয়া হবে। একটু অপেক্ষা করেই দেখুন না পুলিশের কাছে আলম শফিক আর ঐ মহিলা কোনো স্বীকারোক্তিমূলক জবানবন্দী দেয় কিনা।”

“তাদেরকে আগামীকালই রিমান্ডে নেয়া হবে? তোমাকে কে বললো?”

“লেখকের ছোটো ভাই সাহেদ রেহমান আজ সকালে তার ভাইয়ের হত্যাকাণ্ডের জন্য থানায় কেস করেছে। পুলিশ এখন সেই কেসে তাদেরকে রিমান্ডে নেবে। অবশ্য জায়েদ রেহমানের ভাই কেস না করলে পুলিশ নিজেই বাদী হয়ে মামলা করতো।”

“তাহলে দেখি পুলিশের কাছে তারা কি বলে,” বেগ কথাটা বলে আবারো অন্যমনস্ক হয়ে গেলো।

“স্যার, একটা কথা বলবো?”

জামানের দিকে ফিরে তাকালো বেগ। “বলো।”

“এই কেসের তদন্তে আপনি যা করার করেছেন। দু’জন সন্দেহভাজনকে ধরেছেন। এখন বাকিটা পুলিশের উপর ছেড়ে দিন। ওদের কাছে তো আপনি যথেষ্ট প্রমাণ আর আলামত তুলে দিয়েছেন। এখন ওরা খুব সহজেই কেসটার ফয়সালা করতে পারবে।”

“কিন্তু আমার কেন জানি মনে হচ্ছে পুলিশ এই কেসটা নিয়ে হিমশিম খাবে। আমরা এখন পর্যন্ত যা জানি তারচেয়ে অনেক জটিল আর কঠিন বলেই মনে হচ্ছে কেসটাকে।”

জামানের কাছে অবশ্য কেসটা জটিল বলে মনে হচ্ছে না তবে মুখে কিছু বললো না।

“অসঙ্গতিগুলো দূর না করে কিভাবে সন্তুষ্ট হই যে কেসটা সলভ হয়েছে?” বেগ বললো।

“স্যার, এখন পর্যন্ত আমাদের কাছে যেসব প্রমাণ আর আলামত আছে তা দিয়ে আদালতে আসামীদের খুব সহজেই কনভিক্টেড করা যাবে,” জেফরিকে আশ্বস্ত করার জন্য বললো জামান।

“তা যাবে...কিন্তু হোমিসাইড ডিপার্টমেন্টের কাজ হচ্ছে সুষ্ঠু তদন্ত করা। আদালতে কি হবে না হবে সেটা আমাদের দেখার বিষয় নয়।”

জামান আর তর্কে গেলো না।

“আমি এই কেসটা নিয়ে এখনও পুরোপুরি সন্তুষ্ট হতে পারছি না,” কফির মগে একটা চুমুক দিলো জেফরি। “যেকোনো হত্যাকাণ্ডের তদন্তের মূল কাজ আসলে দুটো। কে বা কারা খুন করেছে সেটা বের করার পাশাপাশি কিভাবে খুন করেছে সেটাও বের করতে হয়। আমরা হয়তো খুনিদেরকে চিহ্নিত করতে পেরেছি কিন্তু তারা কিভাবে কাজটা করেছে সেটা এখনও জানি না।”

“ঠিক আছে, পুলিশ রিমান্ড পর্যন্ত আমরা অপেক্ষা ক’রে দেখি...” বললো জামান।

জেফরির মোবাইলটা বিপ্ ক’রে উঠলে সে পকেট থেকে বের ক’রে দেখলো একটা মেসেজ এসেছে। ওপেন করলো সেটা।

ফরগিভ মি

তিক্ত মুখে ফোনটা পকেটে রেখে দিলো সে। রেবার এইসব মেসেজ তাকে দু’দণ্ড শাস্তি তো দিচ্ছেই না বরং দগদগে ঘায়ে নতুন ক’রে আঘাত দিয়ে যাচ্ছে।

“স্যার, কোনো সমস্যা?” জেফরির মুড অফ হতে দেখে জামান বললো।

“না।” ছোট্ট ক’রে বললো সে।

গত পরশু রেবার কাবিন হয়ে গেছে। এখনও তাকে যখন তখন মেসেজ ক’রে যাচ্ছে, ব্যাপারটা জেফরির কাছে মোটেই ভালো লাগছে না। এ পর্যন্ত অনেকগুলো মেসেজ পাঠালেও জেফরি একটারও জবাব দেয় নি। দেয়ার আছে কি! কী বলবে সে?

“স্যার?”

জামানের কথায় অন্যান্যমনস্কতা কাটিয়ে উঠলো জেফরি। “কি?”

“আপনি কি জায়েদ রেহমানের মেইল করা বইটা পড়েছেন?”

“প্রথম দিকের কয়েক পৃষ্ঠা পড়েছি।”

“আমি অনেকটুকু পড়েছি...ভেতরের দিকে, মানে উনার দ্বিতীয় স্ত্রীর ব্যাপারে উনি এমন কিছু কথা লিখেছেন যা পড়লে বুঝতে পারবেন উনি নিজেও মহিলাকে সন্দেহ করতেন।”

জেফরি একটু কৌতুহলী হয়ে উঠলো। “কি রকম?”

“জায়েদ রেহমান আশংকা করছিলেন তার দ্বিতীয় স্ত্রী বর্ষা তাকে মেরে ফেলার ষড়যন্ত্র করছে...”

“তাই নাকি!?”

“জি, স্যার। তার এই বইটা কিন্তু অনেকটা কনফেশনের মতো। অনেক কিছুই তিনি স্বীকার ক’রে গেছেন। বইটা প্রকাশ হলে বেশ বিতর্কের সৃষ্টি হবে।”

জামান ছেলেটা যে বেশ বই-টাই পড়ে সেটা জেফরি জানে। কিন্তু বাড়িতে বসে বই পড়ার মতো মনের অবস্থা নেই তার। “তুমি বইটার যেসব জায়গায় এ রকম তথ্য আছে সেগুলো হাইলাইটস করে আমাকে দিতে পারবে?”

“অবশ্যই পারবো, স্যার।”

“থ্যাঙ্কস।”

“স্যার, বইটাও প্রমাণ করে মিসেস রেহমান আর তার প্রেমিকই খুনটা করেছে।”

মাথা নেড়ে সায় দিলো জেফরি।

“তবে বইটা বের হলে লেখকের অনেক অজানা কথা জানা যাবে। উনি অনেক বিষয়েই খোলামেলা স্বীকার করেছেন।”

“যেমন?”

“বিশেষ করে নারীঘটিত ব্যাপারগুলো... যদিও আমরা অনেকেই সেসব কাহিনী জানি তারপরও তিনি নিজে বিস্তারিত স্বীকার করে গেছেন। এজন্যে নিজের অনুতপ্ত হবার কথাও বলেছেন বার বার।”

“তা হতেই পারে। জীবনের অন্তিম অবস্থায় এসে অনেকেরই এরকম বোধোদয় ঘটে,” বললো বেগ। “তবে কোনো বাঙালী লেখক এরকম স্বীকারোক্তি করে গেছেন নিজের আত্মজীবনীতে সেটা বোধহয় বিরল।”

“বইটা কি আবেদ আলী সাহেব প্রকাশ করবেন?”

“আমি তাকে এ ব্যাপারে মুখ খুলতে বারণ করে দিয়েছি। ভদ্রলোক বেশ ভয়ে আছেন। মনে হয় না প্রকাশ করার মতো সাহস দেখাবেন।”

“স্যার, আমার মনে হয় উনি বইটা খুব জলদিই প্রকাশ করবেন। কোটি টাকার প্রফিট হবে। এটা উনিও জানেন।”

“বলো কি! কোটি টাকা!?” অবাক হলো জেফরি।

“জি, স্যার। কম করে হলেও বইটা দু’লক্ষ কপি বিক্রি হবে। পাঁচশ’ পৃষ্ঠার বই... বিশাল আকার। কোটি টাকাই হবে।”

“আমি চাইছি না বইটি এখনই প্রকাশ হোক। এটা প্রকাশ করার আইনী অধিকার কি তার আছে?”

“সেটা আমি বলতে পারবো না। আমাদের নিজস্ব লিগ্যাল অ্যাডভাইজারের সাথে কথা বলে দেখতে হবে। তবে আমি নিশ্চিত, উনি প্রকাশ করার চেষ্টা করবেন। আর সেটা করবেন খুব দ্রুত।”

“আবেদ আলীকে দেখে আমার কিন্তু অতো সাহসী বলে মনে হয় নি। ভদ্রলোক বেশ ভয় পেয়ে গেছিলেন।”

“বিশাল অঙ্কের প্রফিট ভীত ব্যবসায়ীকেও সাহসী করে তোলে, স্যার।”

“এটা থামাতে হলে কি করতে হবে না হবে সে ব্যাপারে আমাদের লিগ্যাল অ্যাডভাইজারের সাথে আলাপ ক’রে দ্যাখো তো।”

“ঠিক আছে, স্যার।”

“আবেদ আলীর সাথেও কথা বলে জেনে নিও উনি বইটি প্রকাশ করার ব্যাপারে কিছু ভাবছেন কিনা।”

মাথা নেড়ে সায় দিলো জামান।

“পুরো তদন্ত শেষ হবার আগে বইটা প্রকাশ হওয়া ঠিক হবে না। পাবলিক সেন্টিমেন্ট চলে যেতে পারে ভিন্ন দিকে। যেভাবেই হোক উনাকে থামাতে হবে।”



অধ্যায় ২৮

আবেদ আলী আবারও অস্থির হয়ে উঠেছে তবে ভয়ে নয় বিশাল অঙ্কের মুনাফার কথা ভেবে।

লেখক জায়েদ রেহমানের পাঠানো নতুন বইটা সারা রাত জেগে জেগে অনেকখানিই পড়ে ফেলেছে সে। বই তো নয় যেনো বোমা। এই বোমাটা যখন ফাঁটবে সারা দেশ কেঁপে উঠবে। এভাবে আর কোনো বাঙালী লেখক নিজের জীবনের সব কথা অকপটে স্বীকার করেছে বলে মনে করতে পারলো না সে। এই বই শুধু লেখক জায়েদ রেহমানের ভক্তরাই কিনবে না তার চরম শত্রু আর তার লেখা যারা অপছন্দ করে তারাও কিনবে, আবেদ আলী এ ব্যাপারে নিশ্চিত।

জায়েদ রেহমানের সর্বোচ্চ বিক্রি হওয়া বইটি এক লাখ কপির মতো বিক্রি হয়েছে। আবেদ আলীর ধারণা এই নতুন বইটা যদি এক্ষুণি প্রকাশ করা হয় তাহলে তিন-চার লাখ কপি কয়েক মাসেই শেষ হয়ে যাবে। কোটি কোটি টাকার ব্যপার। দেরি করা যাবে না। এখনই সিদ্ধান্ত নিতে হবে। আর সেজন্যেই পরামর্শ নিতে সবচাইতে ঘনিষ্ঠ বন্ধু কবি হামিদ কায়সারকে ডেকে নিয়ে এসেছে নিজের প্রকাশনা অফিসে।

“আইনী ঝামেলা আছে কিনা বুঝতে পারছি না,” আবেদ আলী তার বন্ধুকে বললো।

“কি রকম?” জানতে চাইলো লম্বা দাড়ি আর বাবরি চুলের কবি।

“হোমিসাইড থেকে আমাকে এ ব্যাপারে কোনো কিছু না বলার জন্য বলে দেয়া হয়েছে। এখন যদি প্রকাশ করি—”

“আপনি খামোখাই ভয় পাচ্ছেন। এরকম একটা রেডি আর হটকেক পাণ্ডুলিপি হাতে পেয়ে এখনও বসে আছেন! কিসের আইনী ঝামেলা? জায়েদ রেহমান খুন হবার আগে আপনাকে মেইল করে এটা দিয়ে গেছেন। এমনকি কাকে উৎসর্গ করবেন, এর সত্ত্ব কে পাবে সবই তো বলে দিয়েছেন। সমস্যা কি?”

“কিন্তু ই-মেইলের কি আইনী কোনো ভিত্তি আছে?”

“ঠিক আছে, সেটার জন্য আমরা কোনো লিগ্যাল অ্যাডভাইজ নিতে পারি। আপনি চাইলে আমি আমার এক ব্যারিস্টার বন্ধুকে এখনই ফোন করে এ

ব্যাপারে পরামর্শ চাইতে পারি।”

আবেদ আলী আগ্রহী হয়ে উঠলো। ডেস্কে রাখা ল্যান্ডফোনটা বাড়িয়ে দিলো কবি হামিদ কায়সারের দিকে। “এক্ষুণি করুন।”

ফোনটা হাতে তুলে নিতেই রিং হবার শব্দ শোনা গেলে হামিদ কায়সার প্রথমে বুঝতে না পারলেও একটু পরই বুঝতে পারলো আবেদ আলীর মোবাইল ফোনটা বাজছে। তার মোবাইলে *নস্টালজিয়া* নামের রিংটোন সেটা করা আছে। এই টোনটা একেবারে পুরনো দিনের ল্যান্ডফোনের রিংটনের মতো।

কলটা রিসিভ করলো আবেদ আলী।

“জি, বলছি...হ্যা...” মুখটা ফ্যাকাসে হয়ে গেলো তার। তার সামনে বসে থাকা কবি হামিদ কায়সার ভুরু তুলে জানতে চাইলে আবেদ আলী মোবাইলটা একটু সরিয়ে ফিসফিস ক’রে বললো, “হোমিসাইড থেকে...”

কিছুক্ষণ ওপাশের কথা শুনে গেলো আবেদ আলী। “জায়েদ আমাকে এই বইটা বের করার জন্য স্পষ্ট তাগিদ দিয়ে গেছে...এখন বন্ধুর প্রতি আমারও তো একটা কর্তব্য আছে, নাকি...না, এখনও সিদ্ধান্ত নেই নি...বলতে পারছি না...উমমম...আমি আমার লিগ্যাল অ্যাডভাইজারের সাথে কথা বলে আপনাকে জানাচ্ছি...না, এখন বলতে পারছি না।”

কবি হামিদ কায়সার মাথা নেড়ে সায় দিলো।

“...আচ্ছা, ঠিক আছে...ওকে, আমি জানাবো।”

“কি বললো,” আবেদ আলী ফোনটা রাখতেই কবি জানতে চাইলো।


“লিগ্যাল অ্যাডভাইজারের কথা শুনে চূপসে গেছে,” আবেদ আলী আত্মবিশ্বাসী হয়ে বললো বন্ধুকে। “এক্ষুণি আপনার ব্যরিস্টার বন্ধুকে ফোন করুন।”

পাভেল আহমেদ খুব অবাক হয়েছে। তার ধারণাই ঠিক। কেঁচো খুঁড়তে সাপ বেরিয়ে আসবে। তবে খোঁড়াখুঁড়ি করার ইচ্ছে তার নেই যদি না তার সাথে সহযোগীতা করা হয়।

একটা নাম্বারে ফোন ক’রে বন্ধ পেয়ে অন্য আরেকটা নাম্বারে কল ক’রে জেনে নিয়েছে বন্ধ ক’রে রাখা নাম্বারের মালিক দেশের বাইরে চলে গেছে গতকাল।

হঠাৎ এক দিনের নোটিশে বিদেশে? অন্য কিছু গন্ধ পাচ্ছে এখন। পঞ্চাশ হাজার টাকা দিয়ে কেনার পরও এরকম জিনিস প্রচার করা হবে না! বিশাল কোনো কারণ আছে এর পেছনে। এতো আগ্রহ ক’রে জিনিসটা নেবার পরও...

পাভেল আহমেদ জানে কাকে ফোন করলে তার উদ্দেশ্য সফল হবে।



অব্যয় ২৯

সি ই সিদ্দিকী সাহেবের বিশাল ব্যবসায়িক সাম্রাজ্যে অমূল্য বাবু একটি গুরুত্বপূর্ণ ভূমিকা পালন করে, তবে সে কোনো কর্মচারী নয়, আবার সিদ্দিকী সাহেবের ব্যবসায়িক অংশীদারও যে নয় সেটাও নিশ্চিত। অমূল্য বাবু যে আসলে কি সেটা সবার কাছেই একটা রহস্য। সিদ্দিকী সাহেবের সমস্ত কর্মকর্তা-কর্মচারীরা অমূল্য বাবুকে বেশ সমীহের চোখে দেখে থাকে। তারা জানে সিদ্দিকী সাহেবের উপর এই লোকের অপরিসীম প্রভাব রয়েছে।

সিদ্দিকী সাহেব দেশের বাইরে গেছেন দু'তিন দিনের জন্য, তবে কোথায় গেছেন সেটা কেবল জানে অমূল্য বাবু, কারণ সে-ই সমস্ত ব্যবস্থা করে দিয়েছে। সিদ্দিকী সাহেবের অবর্তমানে অমূল্য বাবুই যে সব কিছুর দেখাশোনা করে সেটা রীতিতে পরিণত হয়েছে। জরুরি প্রয়োজনে কোনো দরকার হলে তার কাছেই ম্যানেজার লেভেলের কর্মকর্তারা যোগাযোগ করে থাকে।

সিদ্দিকী সাহেবের সমস্ত ব্যবসায়িক কর্মকাণ্ড যেখান থেকে পরিচালিত হয় সেই হেড অফিসের দশ তলায় অমূল্য বাবুর একটি প্রাইভেট রুম আছে, আজ দু'দিন ধরে সেখানেই অফিস করছে সে। তেমন কোনো কাজ নেই শুধু উপস্থিত থাকা। ব্যাপারটা অমূল্য বাবুর কাছে বিরক্তিকর হলেও চরম ধৈর্যশীল একজন মানুষ সে। ভারত-পাকিস্তানের ওয়ান ডে সিরিজ চলছে বলে তার জন্য সময়টা নিতান্ত মন্দ কাটছে না। সকাল থেকে বসে বসে টিভিতে খেলা দেখছে।

টিভির ভলিউমটা বেশি থাকার কারণে বুঝতে পারে নি মোবাইল ফোনটা বাজছে। তিনবার রিং হবার পর টের পেলো।

“হ্যা, বলুন?” বললো অমূল্য বাবু।

“স্যার, একটা সমস্যা হয়েছে,” স্বদেশ টিভির মহাপরিচালক ইকরাম সাহেব ফোনের অপরপ্রান্ত থেকে বললো।

“বলুন।”

দ্বিধাগ্রস্ত মহাপরিচালক গলা খাকারি দিয়ে বলতে শুরু করলো। সে জানে অমূল্য বাবু অল্প কথার মানুষ। যতোটুকু সম্ভব সংক্ষেপে বলে গেলো ঘটনাটি।

অমূল্য বাবু কোনো কথা বললো না, চুপচাপ শুনে গেলো। শেষে কেবল বললো, “ঠিক আছে। তাকে বলুন আগামীকাল দুপুরের মধ্যে টাকাটা পেয়ে যাবে। আর কাউকে কিছু বলার দরকার নেই।”

ফোনটা রেখে অমূল্য বাবুর মেজাজ খারাপ হয়ে গেলো। টিভিতে ক্রিকেট খেলা চললেও সেটাতে আর মনোযোগ দিতে পারলো না। একটা উটকো ঝামেলা তৈরি হয়েছে। সেটাকে ঝেড়ে ফেলতে হবে খুব দ্রুত।

মোবাইল ফোনটা হাতে নিয়ে একটা নাম্বার ডায়াল করলো সে।

রিং হবার সঙ্গে সঙ্গেই ওপাশ থেকে ফোনটা ধরা হলো। যে ফোনটা ধরেছে সে কোনো দিনই আগে থেকে কিছু বলবে না, অমূল্য বাবু সেটা জানে। লোকটার মৃদু নিঃশ্বাসের শব্দ শোনা যাচ্ছে। গভীর ক’রে দম নিয়ে নিলো অমূল্য বাবু।

“এক ঘণ্টার মধ্যে দেখা করো...ঠিক যেখানে এর আগে দেখা করেছিলাম।”

ফোনটা রেখে উদাস হয়ে পেছনের কাঁচের ভেতর দিয়ে দশ তলার নীচে ঢাকা শহরের ভিউ দেখতে লাগলো সে।

তার প্রিয় খেলোয়াড় শচীন টেন্ডুলকার ব্যাট করছে এখন কিন্তু সেদিকে তার ক্রমক্ষেপ নেই। এক নাদান এই পৃথিবীর সবচাইতে জঘন্য একটা কাজ করছে তাদের সাথে। সিদ্ধান্ত নিলো কোনো রকম অনুকম্পা দেখানো হবে না।

সব কিছু সহ্য করতে পারে কিন্তু ব্ল্যাকমেইল একদমই সহ্য করতে পারে না অমূল্য বাবু।

কিছুক্ষণ আগে একটা ফোন পাবার পর থেকেই পাতেল আহমেদের মেজাজ ফুরফুরে হয়ে আছে। ঠিক যা ভেবেছিলো তাই হয়েছে। তবে যে কাজটা সে করতে যাচ্ছে সেটা অনৈতিক। নিজের বিবেক একটু খচখচ ক’রে উঠলেও সেটাকে তেমন একটা পাত্তা দিলো না সে।

আগামীকাল এ সময় তার পকেটে চলে আসবে দু’লাখ টাকা।

ভাগিস আরেকটা কপি রেখেছিলো। ব্যাপারটা যে এক মুরগী দু’বার বিক্রি করার মতো হয়ে যাচ্ছে সেটা ভেবে মজা পেলো সে। স্বদেশ টিভির রিপোর্টার হামিদ আলমকে পাশ কাটিয়ে সরাসরি নিউজ প্রডিউসার কাশেম হাবিবকে ফোন করেছিলো। নিজের পরিচয় দিয়ে গতকাল বিক্রি করা একটি দুর্লভ সাক্ষাৎকার কেন প্রচার করা হলো না সে বিষয়ে জানতে চায়।

“আমি নিজে ঐ ইন্টারভিউটা নিয়েছিলাম। আপনারা গতকাল সেটা প্রচার করবেন বলে কথাও দিয়েছিলেন, কিন্তু সেটা প্রচার হয় নি। আমি জানতে পেরেছি ওটা আর প্রচার করবেন না আপনারা।”

“আমি এ ব্যাপারে কিছু জানি না, তাই আপনাকে কিছু বলতে পারছি না,”
প্রডিউসার কাশেম হাবিব বলেছিলো।

“তাহলে যে জানে তাকে ফোনটা দিন। তা না হলে আমি অন্য ব্যবস্থা নিতে
বাধ্য হবো।”

“মানে?”

“আমার কাছে ঐ ক্যাসেটটার আরেকটা কপি আছে। ব্যাকআপ কপি।
আপনারা প্রচার না করলে আমি সেটা অন্য জায়গায় দিয়ে দেবো,” পাভেল
আহমেদ ঝাঁঝালো কণ্ঠে বললো।

“আপনি কিন্তু ওটা আমাদের কাছে বিক্রি করেছেন—”

কাশেম হাবিবকে মাঝপথে থামিয়ে দিলো পাভেল আহমেদ। “আমি বিক্রি
করেছি ওটা প্রচার হবার জন্য, ডাস্টবিনে ফেলে দেবার জন্য নয়। আপনারা যদি
ওটা কালকের মধ্যে প্রচার না করেন তবে অন্য কোনো চ্যানেল সেটা প্রচার
করবে।”

কাশেম হাবিব একটু ভেবে বললো, “আমি আপনাকে একটু পর ফোন ক’রে
জানাচ্ছি।”

মাত্র দশ মিনিট পরই পাভেল আহমেদের কাছে ফোন করা হয় তবে সেটা
কাশেম হাবিব করে নি করেছিলো চ্যানেলের মহাপরিচালক ইকরাম সাহেব
নিজে। ভদ্রলোক সময় নষ্ট না ক’রে সরাসরি আসল কথায় চলে আসে।

“আপনার কাছে থাকা দ্বিতীয় ক্যাসেটটাও যদি আমরা কিনে নেই তাহলে
কতো দিতে হবে?”

“তার মানে আপনারা ইন্টারভিউটা প্রচার করবেন না?”

“আমরা প্রচার করি বা না করি সেটা নিয়ে আপনি মাথা ঘামাবেন না, এই
শর্তে দ্বিতীয় ক্যাসেটটা বিক্রি করতে হবে। কতো দিতে হবে বলুন?”

একটু ভেবে পাভেল আহমেদ বললো, “দুই লাখ?”

“ওকে। ক্যাসেটটা কখন দিচ্ছেন?” ঝটপট জানতে চাইলো ইকরাম
সাহেব।

পাভেল আহমেদ ভাবতেই পারে নি এক কথায় রাজি হয়ে যাবে। সে
ভেবেছিলো দু’লাখ চাইলে শেষ পর্যন্ত এক লাখে রফা হবে। “আগামীকাল।”

“কখন?”

“উমমম...দুপুরের দিকে?”

“ঠিক আছে।”

পাভেল আহমেদ কিছু বলতে যাবে অমনি ভদ্রলোক গম্ভীর কণ্ঠে বললো,
“আর কোনো চালাকি করবেন না। আর কোনো ব্যাকআপ কপি যদি থাকে

তাহলে সেটা আপনার জন্য ভালো হবে না। কথাটা মনে রাখবেন।”

একটু ভয় পেয়ে গেলো পাভেল। “ঠিক আছে। তাহলে—”

লাইনটা কেটে দেয়া হয় অপর পাশ থেকে।

ভয়টা তার মধ্যে অল্পক্ষণই ছিলো, তারপরই পাভেল আহমেদের ঠোঁটে মুচকি হাসি দেখা দেয়। *আমাকে ভয় দেখায়! শালা!*

অন্ধকার একটা ঘরে টিভি চলছে।

অ্যানিমেল প্লানেট। একটা সিংহ ওৎ পেতে আছে শিকার ধরার জন্যে। আন্তে আন্তে এগিয়ে আসছে সেটা। খুবই সতর্ক আর নিঃশব্দ। শিকারের খুব কাছে আসার পরই আচমকা ঝাঁপিয়ে পড়লো সেটার উপর...

টিভিটা বন্ধ করে দেয়া হলে ঘরে নেমে এলো নিকষ কালো অন্ধকার। কিছুক্ষণ সেই অন্ধকার থাকার পর ঘরে মৃদু আলোর ডিম লাইট জ্বলে উঠলো। আবছায়া এক মানব মূর্তি বিছানা থেকে উঠে অ্যাটাচড বাথরুমে চলে গেলো ধীরে ধীরে। সম্পূর্ণ নগ্ন সে। সুগঠিত শরীরটা ডিম লাইটের মৃদু আলোতেও স্পষ্ট দেখা যাচ্ছে।

আজ দু’দিন ধরে এই ঘর থেকে সে বের হয় নি। একটানা কয়েক দিন ঘরে বন্দী হয়ে থাকতে তার মোটেও খারাপ লাগে না। তিন-চারদিনের খাবারদাবার এক সঙ্গে কিনে এনে নিজের ঘরে বন্দী হয়ে থাকাটা তার প্রিয় মুহূর্ত। কিন্তু এখন তাকে আবারো বের হতে হবে। শীত হোক গ্রীষ্ম হোক, সব সময়ই ঠাণ্ডা পানিতে গোসল না করে সে বাইরে বের হয় না। ঠাণ্ডা পানিতে গোসল করলে তার মধ্যে এক ধরণের ধীরস্থিরতা চলে আসে। ধীরস্থির থাকাটা তার জন্যে অনেক বেশি জরুরি।



অধ্যায় ৩০

হোমিসাইড প্রধান ফারুক আহমেদ মুখ ভার করে বসে আছে। সে কিছুতেই বুঝতে পারছে না জেফরি কেন এ রকম কথা বলছে। কিছুর আগে তার এই প্রিয়পাত্রটি এসে তাকে যা বলেছে সেটাকে পাগলের প্রলাপ বলেই মনে হচ্ছে।

একটা মীমাংসিত কেস নিয়ে কেউ এরকম কথা বলতে পারে!

এখনও জেফরি তার সামনেই বসে আছে।

“ঐ অজ্ঞাত যুবকটি নিয়ে তুমি খুব বেশি মাথা ঘামাচ্ছো, জেফ,” বললো সে। “এটারও অনেক ব্যাখ্যা হতে পারে... অ্যালোটিদেরই কারো গেস্ট হয়তো। অ্যাপার্টমেন্টে একটা খুন হয়েছে জানার পর ঝামেলায় জড়িয়ে পড়তে পারে মনে করে ভয়ে সটকে পড়েছে।”

এ কথাটা জেফরির সহকারী জামানও তাকে বলেছিলো। মাথা নেড়ে সায় দিলো জেফরি। আরেকটা বিষয় আছে যেটা সে নিজের বসের কাছে খুলে বলতে পারছে না।

“আবার এমনও হতে পারে, কোনো ফ্ল্যাটে হয়তো অসামাজিক কার্যকলাপ চলে থাকে যেটা ওখানকার কেউ জানে না। আজকাল তো ফ্ল্যাটগুলোতে এরকম হচ্ছেই... সে ধরণের একজন ক্রায়েন্ট হয়তো ভোরের দিকে চলে গেছে।”

ফারুক সাহেবের উর্বর কল্পনা শক্তির প্রশংসা না করে পারলো না সে।

“ওরকম কিছু হবার সম্ভাবনা একবারেই কম। ভিটা নুভায় যারা থাকে তারা এই সমাজে বেশ প্রতিষ্ঠিত,” জেফরি বললো। একটু থেমে দ্বিধা কাটিয়ে উঠলো সে। “স্যার, জায়েদ সাহেব যে রাতে খুন হন সে রাতে তার স্ত্রী আর তার প্রেমিক আলম শফিক...”

ভুরু তুলে তাকালো ফারুক সাহেব।

“...মানে, উনারা দু’দুবার শারীরিকভাবে মিলিত হয়েছিলেন...”

“উমমম! তো?”

“এটা কি অস্বাভাবিক ব্যাপার না?”

ফারুক আহমেদ এবার ভুরু কুচকে ফেললো। “অস্বাভাবিক! কেন? তোমার কাছে এরকম কেন মনে হচ্ছে?”

জেফরি বেগ মুশকিলে পড়ে গেলো। এ রকম একটি ব্যাপার নিজের বসের

সামনে খোলামেলা আলোচনা করাটা তার জন্যে বিব্রতকর। তবে সাহায্যের জন্যে ফারুক আহমেদই এগিয়ে এলো।

“তুমি বলতে লজ্জা পাচ্ছে কেন? খুলে বলো?”

“ব্যাপারটা প্রথমে আমার কাছে গুরুত্ব পায় নি কিন্তু এখন মনে হচ্ছে এটা স্বাভাবিক না। খুন করার পরিকল্পনা করে কেউ কি এসব করবে?”

একটু চুপ থেকে ফারুক সাহেব বললো, “তা করবে না—”

“তাহলেই বুঝুন?”

“মানে সাধারণত করবে না...কিন্তু—”

“কিন্তু কি, স্যার?”

“সাইকোপ্যাথদের ব্যাপারে এরকম কাজ করা অসম্ভব নয়।”

উফ! মনে মনে বিরক্ত হলো জেফরি। তার এই স্যার মাঝেমাঝে খুবই হাস্যকর কথা বলে। “স্যার, আপনি কি মনে করছেন উনারা দু’জনেই সাইকোপ্যাথ?”

“ঠিক তা বলছি না তবে তারা দু’জন যে স্বাভাবিক নয় সেটা তো মানবে? স্বাভাবিক মানুষ ঠাণ্ডা মাথায় খুনখারাবি করতে পারে না।”

আশাহত হলো জেফরি। ব্যাখ্যাটা তার মনোপুত হচ্ছে না। ব্যাপারটা ফারুক সাহেবও হয়তো বুঝতে পারলো।

“শোনো, জেফ। খুন হবার আগে তারা দু’জন অনেকটা সময় একসাথে ছিলো...ছিলো না?”

মাথা নেড়ে সাই দিলো বেগ। “তিন-চার ঘণ্টার মতো।”

“তিন-চার ঘণ্টা! তো এই তিন-চার ঘণ্টায় দু’জন নারী-পুরুষের মধ্যে সেরকম কিছু হতেই পারেই। এজন্যে অবশ্য তাদেরকে সাইকোপ্যাথ ভাবাটাও ঠিক হবে না,” কথাটা বলেই হেসে ফেললো সে।

“কিন্তু খুন হবার পরেও তারা আরেকবার মিলিত হয়েছিলো। এটা কি অস্বাভাবিক না?”

একটু চিন্তায় পড়ে গেলো হোমিসাইড প্রধান।

“স্যার, আপনার কথা আমি মেনে নিচ্ছি, তারপরও আমি চাইছি একটু ভালোভাবে তদন্ত করে বিষয়টা পরিষ্কার ক’রে নিতে।”

“ভালোভাবে? এরচেয়ে ভালোভাবে এই দেশে আর কোনো তদন্ত হয়েছে কিনা আমি জানি না। কতো দ্রুত আসামী ধরা হলো! একেবারে ক্রাইমসিন থেকে! সবই তো পরিষ্কার। এ ঘটনার আর কি বাকি আছে?”

“স্যার, আমি কেবল কিছু অসঙ্গতি দূর ক’রে নিতে চাইছি।”

“অসঙ্গতি।” ফারুক সাহেব যেনো আপন মনে বললো কথাটা।

“পলিগ্রাফ টেস্টের কথাটা বাদই দিলাম। একবার ভেবে দেখুন, জায়েদ

রেহমান যখন খুন হচ্ছেন তখন তার অ্যাপার্টমেন্টের বাইরে এক যুবককে পুলিশ সন্দেহজনকভাবে ঘোরাঘুরি করতে দেখে। ছেলেটাকে অবশ্য পুলিশ ধরতে না পারলেও সেই সূত্রেই কিম্বা ভিটা নুভায় পুলিশ খোঁজ নিতে গিয়ে এই ঘটনাটি আবিষ্কার করে। তারপর ভোরবেলায় এক অজ্ঞাত যুবক অ্যাপার্টমেন্ট ভবন থেকে সটকে পড়লো। তারচেয়েও বড় কথা জয়েদ সাহেব খুন হবার ঠিক কিছুক্ষণ আগে একজনকে মেইল ক'রে গেছেন এমন একটি ল্যাপটপ থেকে যেটা কিনা তার হাতের নাগালের বাইরে ছিলো। এতোগুলো অসঙ্গতি দূর না ক'রে এই তদন্ত শেষ হয় কিভাবে?”

ফারুক সাহেব কিছুক্ষণ চুপ ক'রে থাকলো। “ওকে, তোমার যদি মনে হয় কেসটা আরো তদন্ত করতে হবে তুমি সেটা করতে পারো, কিম্বা...”

সপ্রশ্ন দৃষ্টিতে তাকালো জেফরি বেগ।

“...সেটা যেনো কেউ জানতে না পারে। অফিশিয়ালি এই তদন্ত এখন আমাদের জন্য ক্লোজড হয়ে গেছে। পুলিশকে আমরা সব তথ্য-উপাত্ত আর আলামত দিয়ে দিয়েছি। যদি তুমি নতুন কোনো ক্লু পাও শুধু আমাকে জানাবে। আর কাউকে না। তারপর আমি ভেবে দেখবো কি করা যায়।”

শর্তটা মেনে নিলো জেফরি। “ঠিক আছে, স্যার।”

উঠে দাঁড়ালো সে, দরজার দিকে পা বাড়াতেই পেছন থেকে ফারুক আহমেদ বললো, “ব্যাপারটা নিয়ে খুব বেশি সময় নষ্ট করো না। মনে রাখবে কেসটা এখন পুলিশ দেখছে।”

কোনো কথা বললো না জেফরি বেগ, শুধু মাথা নেড়ে সাই দিয়ে বের হয়ে গেলো ঘর থেকে।



পাভেল আহমেদ লা ডিপ্লোম্যাট বার থেকে সোজা বাড়ির উদ্দেশে রওনা হয়েছে একটা ইয়েলো ক্যাব নিয়ে। আজ একটু বেশিই খেয়ে ফেলেছে। পকেটে প্রচুর টাকা থাকার কারণে নিজেকে সামলাতে পারে নি।

কথা ছিলো স্বদেশ টিভির রিপোর্টার, তার বন্ধু হামিদ আলম বারে এসে তাকে বাকি পঁচিশ হাজার টাকা দিয়ে যাবে কিন্তু অনেকক্ষণ বসে থাকার পরও সে আসে নি।

শেষে হামিদ আলমের কাছ থেকে পাভেল একটা ফোন পায়; সে জানায় একটা জরুরি কাজে আটকা পড়ে যাওয়ায় আজ আর আসতে পারছে না, কাল নিজে পাভেলের বাড়ি এসে টাকাটা দিয়ে যাবে। অফিস থেকে টাকাটা তুলে নিজের কাছেই রেখে দিয়েছে সে। পাভেল যেনো এ নিয়ে কোনো চিন্তা না করে।

এতো গেলো পঁচিশ হাজার কিন্তু আগামীকাল দুপুরের মধ্যে যে দুই লাখ টাকা তার পকেটে চলে আসবে সেটা অবশ্য হামিদ আলম জানে না।

ইয়েলো ক্যাবে হাত পা ছড়িয়ে ভাবছে এরপর কি করবে।

পাভেল জানে স্বদেশ টিভির মালিক কে। ভদ্রলোক ঠিক কতো টাকার মালিক নিজেও জানে কিনা সন্দেহ। এ রকম একজন ধনীর কাছে দু'চার লাখ টাকা তেমন কিছু না। এখন তার আফসোস হচ্ছে দু'লাখ টাকা চেয়েছিলো বলে। *নজরটা একটু বড় করো*, মনে মনে বললো সে। এখনও কিছু চাইতে গেলে খুব বেশি চাইতে পারে না সে। জন্মগত স্বভাব। নিম্নবিত্ত পরিবারে জন্মালে এই এক সমস্যা। কিছু চাইতে গেলে নিজে থেকেই মনে হয় বেশি চেয়ে ফেললাম কিনা।

যা হবার হয়েছে। ইন্টারভিউটা নিয়ে আর বেশি কিছু করবে না। এক জিনিস দু'বার বিক্রি করছে এটাই অনেক বেশি। কিন্তু ইন্টারভিউতে ছোট্ট একটা ঘটনার উল্লেখ আছে, আর কেউ না জানলেও সে জানে। জায়েদ রেহমান তার স্ট্রোকের জন্য একজনকে দায়ি করেছেন। স্ট্রোকের পর পর ইন্টারভিউটা নেয়া হয়েছিলো তাই কথাটা তিনি মুখ ফস্কে বলে ফেলেছেন। এই ঘটনাটির জন্যেই চ্যানেল কর্তৃপক্ষ ইন্টারভিউটা চালাতে রাজি হয় নি। আর এখন এটাকে

ধামাচাপা দেবার জন্যে চ্যানেল কর্তৃপক্ষ উঠেপড়ে লেগেছে। তার পরবর্তী কাজ হবে সেই তথ্যটাকে কাজে লাগানো।

আবর্জনা যতো ঘাটা হবে ততোই দুর্গন্ধ বের হবে। তো আরেকটু ঘাটাঘটি করে দেখি না কি হয়!

ধনী হলেও অনেক সমস্যা! মানসম্মান রক্ষা করার ব্যাপারটা অনেক বড় হয়ে ওঠে তখন। সিদ্দিকী সাহেবও নিজের মানসম্মান রক্ষা করার জন্যে মরিয়া হয়ে উঠেছেন। ঠিক আছে, আপনার মান সম্মান অক্ষত থাকবে। নো প্রবলেম! তো একটু খরচাপাতি করেন।

কথাটা ভাবতেই তার মাতাল ঠোঁটে মুচকি হাসি দেখা গেলো।

ক্যাবের গতি কমে এলে আশেপাশে তাকিয়ে দেখতে পেলো নিজের বাড়ির কাছে চলে এসেছে।

অবিবাহিত পাভেল এক রুমের একটা ঘরে একা থাকে। কিছু দিন আগেও মেসে ছিলো কিন্তু এখন বেশ ভালো বেতন পায় বলে একটা আলাদা রুম ভাড়া নিয়েছে। সাংবাদিক বলে তাকে বেশ সমীহ করে বাড়ির মালিক। লোকটা আদম ব্যবসা করে সুতরাং পাভেলের মতো ক্রাইম রিপোর্টার তার বেশ উপকারে লাগে। দু'একবার ছোটোখাটো সমস্যায় পাভেল তাকে সাহায্যও করেছে যার পুরস্কার হিসেবে মাসের এক তারিখে বাড়ি ভাড়া দিতেই হবে এরকম একটি নিয়ম তার বেলায় প্রয়োগ করা হয় না।

ক্যাব থেকে নামার আগে চুলটা হাত দিয়ে আঁচড়িয়ে জামাকাপড় ঠিকঠাক করে নিলো সে। নিজেকে ভদ্রস্থ ক'রে সাবধানে পা ফেলে এগিয়ে গেলো যেনো কেউ দেখে বুঝে না যায় সে মদ খেয়ে এসেছে।

প্রচুর মদ খাওয়ার পর চার তলার সিঁড়ি বেয়ে উপরে উঠতে বেশ বেগ পেলো সে, হাফিয়ে উঠলো একেবারে। পকেট হাতরিয়ে চাবিটা বের করে ঘরে ঢুকেই অবাক।

তার চৌদ্দ ইঞ্চি রঙ্গিন টিভিটা চলছে! তবে কোনো শব্দ হচ্ছে না। এনিম্যাল প্লানেট নামের পাভেলের সবচাইতে অপছন্দের একটি চ্যানেলে চলছে টিভিতে!

দুপুরে ঘর থেকে বের হবার সময় টিভি সেটটা কি সে বন্ধ করে যায় নি?

নেশার ঘোরে মনে করতে পারলো না। দরজাটা বন্ধ ক'রে বাতি জ্বালিয়ে বিছানায় পড়ে থাকা রিমোটটা হাতে তুলে নিলো জঘন্য চ্যানেলটা বদলানোর জন্য। শুধু জন্তু জানোয়ারের কাজকারবার! মানুষ এই চ্যানেলটা দেখে কী করে!

রিমোটের বাটনে টিপ দেবার আগেই মাথার পেছনে প্রচণ্ড জোরে একটা আঘাত হতেই পাভেল আহমেদ টলে গেলো। আচমকা চারপাশ অন্ধকার হয়ে গেলে ক্ষণিকের জন্য তার কাছে মনে হলো বিদ্যুতের লোডশেডিং হয়েছে বুঝি।

কিন্তু আর কিছু ভাবার সুযোগ পেলো না সে।

কানে ভো ভো শব্দে পাভেল আহমেদের জ্ঞান ফিরে আসতে শুরু করলো। নিঃশ্বাস নিতে কষ্ট হচ্ছে কেন বুঝতে পারছে না। দু'চোখ টেনে খোলার চেষ্টা করলো সে।

প্রথমে ঘোলা ঘোলা দেখলেও কিছুক্ষণের মধ্যেই দৃষ্টিটা স্পষ্ট হয়ে আসতেই চোখের সামনে তার সবচাইতে অপছন্দের চ্যানেলটা দেখতে পেলো আবার।

শিকার ধরে উদরপূর্তি করছে দেখতে কদাকার একটি সিংহ।

টিভির আলো ছাড়া ঘরে আর কোনো আলো নেই। কয়েক সেকেন্ড পর সে বুঝতে পারলো টিভি সেটের সামনে একটা হাতাওয়ালা চেয়ারে বসে আছে। তার দু'হাত চেয়ারের হাতলের সাথে বাধা। তার দু'পা কি দিয়ে যেনো বেধে রাখা হয়েছে, পাভেল আন্দাজ করতে পারলো না। তবে তার মুখটা যে কাপড় দিয়ে শক্ত করে বেধে রাখা হয়েছে সেটা বুঝতে পারলো বেশ ভালোভাবেই।

এক অজানা আশংকায় পাভেল আহমেদের হৃদপিণ্ডটা হাতুড়ি পেটার মতো করে শব্দ করতে শুরু করলো। নিঃশ্বাস বন্ধ হয়ে আসার উপক্রম হলো তার। কিছুই বুঝতে পারছে না। যেনো আচমকা তাকে ধরে নরকে নিক্ষেপ করা হয়েছে। নিজের ঘরটাকে এর আগে আর কখনই তার কাছে এতোটা ভীতিকর লাগে নি।

হঠাৎ তার গা ছম ছম ক'রে উঠলো। শরীরের সমস্ত পশম দাঁড়িয়ে গেলো এক নিমেষে।

একটা আবছায়া মনুষ্যমূর্তি আস্তে করে পেছন থেকে চলে এলো তার ঠিক সামনে। ঘরের আলোর স্বল্পতার কারণে চেহারাটা স্পষ্ট দেখতে পাচ্ছে না। তবে খুব চেনা চেনা লাগছে তার কাছে। লোকটা একটু পিছিয়ে গিয়ে ঘরের এক কোণ থেকে একটা চেয়ার টেনে ঠিক তার সামনে বসে পড়লে টিভির আলোয় পাভেল আহমেদ চেহারাটা দেখতে পেলো।

হায় আল্লাহ্!



আবেদ আলীর মোবাইলে দশ-পনেরোটি মেসেজ এসে জমা হয়েছে, সবগুলোই করেছে মিলি। একটারও জবাব দিতে পারে নি সে। একদমই ফুরসত পাচ্ছে না। সারাটা দিন গেছে বিভিন্ন কাজ করে। দারুণ ব্যস্ততা যাচ্ছে আজ।

কবি হামিদ কায়সারের ব্যারিস্টার বন্ধু বলেছে বইটা প্রকাশ করার ব্যাপারে তার কোনো আইনী ঝামেলা হবে না। কপিরাইটের নিয়ম অনুযায়ী জায়েদ রেহমানের সাবেক স্ত্রী গোলনূর আফরোজ তরফদারকে প্রাপ্য টাকা দিয়ে দিলেই হবে।

কথাটা শোনার পর থেকেই আবেদ আলী দৌড়াদৌড়ি শুরু ক'রে দিয়েছে। অনেক দিন পর কাজকর্মে এতো ব্যস্ততায় সারাটা দিন কাটছে তার। বইটা যতো দ্রুত সম্ভব প্রকাশ করতে হবে। এটাই এ মুহূর্তে তার একমাত্র চ্যালেঞ্জ।

লেখক জায়েদ রেহমানের মৃতদেহ এখনও পড়ে আছে হাসপাতালের পোস্টমর্টেম রুমে। শোনা গেছে দু'দিন পর তার লাশ দাফন করার সভাবনা রয়েছে। আবেদ আলী চাচ্ছে যে করেই হোক দু'দিনের মধ্যেই বইটা প্রকাশ করতে। একেবারে তাক লাগিয়ে দেবে সবাইকে।

কিন্তু তার ম্যানেজার আর কর্মচারীরা এখনও এসবের কিছুই জানে না, তাদেরকে শুধু বলা হয়েছে 'পাঁচশ' পৃষ্ঠার একটি নতুন বই প্রকাশ করতে হবে দু'দিনের মধ্যে। বইটা বের হবার ঠিক আগে সবাইকে জানাবে বলে সিদ্ধান্ত নিয়েছে সে। আর এ কারণে তাকেই সব ব্যবস্থা করতে হচ্ছে।

পুরো পাণ্ডুলিপি একদম রেডি, তারপরও কবি হামিদ কায়সারকে দিয়ে একটু দেখিয়ে নিচ্ছে। 'পাঁচশ' পৃষ্ঠার পাণ্ডুলিপি দেখা মুখের কথা নয় তবে হামিদ কায়সার বন্ধুর জন্যে কাজটা করতে রাজি হয়েছে।

দুটো স্প্যানিশ ভদকা *স্মিরনফ* নিয়ে আবেদ আলীর বাড়িতে বসেছে তারা। কিছুক্ষণের মধ্যে তাদের সাথে যোগ দেবে আর্টিস্ট মাসুম তারেক। বিকেলের দিকে আবেদ আলী তাকে ফোন করে জরুরি ভিত্তিতে জায়েদ রেহমানের সর্বশেষ বই, তার আত্মজীবনীমূলক উপন্যাস *কথা*'র জন্য একটা প্রচ্ছদ করে দিতে বলেছে।

কয়েক ঘণ্টার মধ্যে একটা বইয়ের প্রচ্ছদ! কথাটা শুনে প্রথমে রাজি না হলেও নিয়মিত পারিশ্রমিকের তিনগুন প্রস্তাব দেয়াতে কাজটা করতে সম্মত হয়েছে সে। কথা দিয়েছে রাত এগারোটোর পর আবেদ আলীর বাড়ি এসে প্রচ্ছদটার সিডি দিয়ে যাবে সেই সাথে একটু পানাহার করবে গভীর রাত পর্যন্ত।

টাকা আর মদ দুটোর টোপই দেয়া হয়েছে। আবেদ আলী জানে দ্বিতীয়টার জন্যে এই আর্টিস্ট বেশি লালায়িত।

কবি হামিদ কায়সার সেই বিকেল থেকে বিরতিহীনভাবে ‘কথা’ নামের জায়েদ রেহমানের আত্মজীবনীমূলক উপন্যাসটির প্রফ দেখে যাচ্ছে। খুব একটা ভুল নেই। কিছু বানানের ভুল আর অনেক জায়গায় এক কথা দু’বার টাইপ করা হয়েছে। তারপরও পাঁচশ’ পৃষ্ঠার একটি বই পড়ে শেষ করা যেইসেই কথা নয়।

সন্ধ্যার পর থেকে তার পড়ার গতি আরো বেড়ে গেছে ভদকার আর্বিভাবে। আবেদ আলীর ড্রইংরুমের মেঝেতে কার্পেটের উপর তারা হাত-পা ছড়িয়ে বসে আছে। কবির চোখ প্রিন্ট করা পাণ্ডুলিপির দিকে থাকলেও ভদকার গ্লাসে চুমুক দিয়ে যাচ্ছে ঘনঘন।

বইটা যতোই পড়ছে ততোই অবাক হচ্ছে হামিদ কায়সার। উল্লেখযোগ্য অংশগুলো জোরে জোরে আবৃত্তি করে শোনাচ্ছে পাশে বসে থাকা আবেদ আলীকে, সে ব্যস্ত আছে প্রোডাকশন কন্সট্রাক্টর হিসেব নিয়ে।

বিশ্ববিদ্যালয় জীবনে ভালো আবৃত্তি করতো হামিদ কায়সার, এখনও মাঝেমধ্যে স্বরচিত কবিতাপাঠের অনুষ্ঠানে আবৃত্তি করতে হয় তাকে, দরাজ কণ্ঠে চুম্বক অংশগুলো রসিয়ে রসিয়ে আবৃত্তি করে বেশ মজা পাচ্ছে সে।

“জায়েদ রেহমান এতোটা সাহসী আগে জানতাম না,” পাণ্ডুলিপি থেকে চোখ না সরিয়েই বললো হামিদ কায়সার। শব্দ করে ভদকার গ্লাসে লম্বা একটা চুমুক দিলো।

“কিন্তু আমি যতোদূর জানি সে মোটেও সাহসী ছিলো না,” দ্বিমত পোষণ করলো আবেদ আলী। “সব সময় একটা ভগামির মুখোশ পরে থাকতো। নিজে একজন রহস্যময় মানুষ হিসেবে প্রজেক্ট করতো, আর এই কাজটা করতো একেবারে পরিকল্পনা করে।”

“তবে এখানে সে অনেক সাহসী কথা লিখেছে। হয়তো শেষের দিকে রিয়ালাইজ করতে পেরেছিলো। দেখো না এখানে কি লিখেছে :

“নিজের মেয়ের বান্ধবী বর্ষার সাথে কেন জড়াতে গেলাম? এই প্রশ্নটি আমি অনেকবারই করেছি নিজে। আমার প্রথম স্ত্রী গোলনূরকে নিয়ে আমার তো কোনো আক্ষেপ ছিলো না! তারপরও আমি আশ্তে আশ্তে বর্ষার দিকে ঝুঁকেছি। পরিবার, সমাজ সংসার সবকিছুকে তোয়াক্কা না করে এগিয়ে নিয়ে

গেছি এই সম্পর্কটি...আমার নিজের মেয়ে আর ছেলে লজ্জায় ঘৃণায় আমাকে পরিত্যাগ করেছে। এখন জীবনের এ পর্যায়ে এসে স্বীকার করতেই হচ্ছে আমি একজন উভকামী। হতে পারে এটা আমার এক ধরণের রোগ। মৃত্যুরদ্বারপ্রান্তে এসে আমি আরো স্বীকার করছি আমি একজন পেডেরাস্ট ছিলাম...”

পাণ্ডুলিপি থেকে মুখ তুলে তাকালো হামিদ কায়সার। “উভকামী! পেডেরাস্ট! আবেদ ভাই, অল্পবয়সী মেয়েদের ব্যাপারে জায়েদ রেহমানের ষাঁক ছিলো জানতাম কিন্তু উভকামী, পেডেরাস্ট!?”

আবেদ আলী কাঁধ তুললো। “আমি অবশ্য এরকম কোনো কথা শুনি নি।”

“জায়েদ সাহেব নিজের বারোটা বাজালেও আপনার কিন্তু কপাল খুলে দিয়ে গেছে।”

আবেদ আলীও জানে সেটা। তবে মুখে কিছু বললো না।

“আমি কোনো বাঙালী লেখকের আত্মজীবনীতে এরকম সাহসী কথা পড়ি নি। সাহিত্যিকদের মধ্যে একমাত্র ফরাসি ঔপন্যাসিক আঁদ্রে জিদই প্রথম নিজেকে পেডেরাস্ট ব’লে স্বীকার করেছিলেন।”

“কিন্তু পাঠক ব্যাপারটা কিভাবে নেবে ব’লে মনে করেন?” জানতে চাইলো আবেদ আলী।

“কমার্শিয়ালি এটা হবে এ দেশের সবচাইতে বেশি বিক্রিত বই, এটা আমি বলতে পারি...আর পাঠক কিভাবে নেবে? উমমম...একেকজন একেকভাবে নেবে। কেউ হয়তো জায়েদ রেহমানের এই স্বীকারোক্তিটাকে সাধুবাদ জানাবে, কেউ হয়তো তার এসব কথা পড়ে তাকে আরো বেশি ঘৃণা করবে। কিন্তু যা-ই করুক না কেন পকেট ভারি হবে আপনারই।”

আবেদ আলী এবারো কিছু বললো না। যেনো জবাব দেবার হাত থেকে বাঁচার জন্যেই ভদকার গ্লাসটা তুলে নিয়ে চুমুক দিতে লাগলো।

এমন সময় ড্রইংরুমে এসে হাজির হলো আর্টিস্ট মাসুম তারেক। বাড়ির কাজের লোককে আগে থেকেই বলে রাখা ছিলো সে এলে তাকে যেনো সরাসরি ড্রইংরুমে পাঠিয়ে দেয়া হয়।

“আরে আর্টিস্ট,” আবেদ আলী উঠে দাঁড়ালো। “আসো আসো। এখনও পুরো একটা বোতল ইনট্যাক্ট আছে।”

প্রথমে আবেদ আলী এবং পরে কবি হামিদ কায়সারের সাথে হাত মিলিয়ে কার্পেটের উপর বসে পড়লো সে। “ভাই, সেই বিকেল থেকে আপনার কাজ করে যাচ্ছি, একদম টায়ার্ড। আগে মাল দিন। একটু টেনে দম নিয়ে নেই।”

আবেদ আলী হাসতে হাসতে আর্টিস্টের জন্য এক গ্লাস ভদকা ঢেলে বাড়িয়ে দিয়ে বললো, “আমার কাজ কতো দূর?”

কথাটা আমলেই নিলো না আর্টিস্ট। পুরো এক গ্লাস ভদকার অর্ধেকটা এক
টোকে শেষ করে হাসি হাসি মুখে তাকালো আবেদ আলীর দিকে। “ফাটাফাটি
একটা কভার করেছি। এতো দ্রুত এরকম ভালো কাজ জীবনেও করি নি।”


“পুরো কাজ শেষ?”

গ্লাসের বাকিটুকু শেষ করে ফেললো আর্টিস্ট মাসুম তারেক। “শেষ!”

“কোন্টার কথা বলছো, ভদকার না আমার কাজের?” আবেদ আলী
ঠাট্টাচ্ছিলে বললো।

দাঁত বের করে হাসলো মাসুম তারেক। “দুটোই।”

তারা তিনজনেই হো হো করে হেসে উঠলো একসঙ্গে।



পাভেল আহমেদের দু'চোখ বিস্ফারিত হয়ে আছে। মুখ শক্ত ক'রে বাধা সেজন্যে কোনো কথা বলতে না পারলেও এক ধরণের চাপা গোঙানী বের হচ্ছে।

তার সামনে যে লোকটি তার দিকে ঝুঁকে আছে সে একেবারেই ধীরস্থির আর শান্ত। দেবদূতের মতো ফুটফুটে চেহারার এই যুবককে এ শহরে হাতেগোনা যে অল্প কয়েকজন লোক চেনে তাদের মধ্যে পাভেলও রয়েছে। ক্রাইম রিপোর্টার হিসেবে অনেক সন্ত্রাসী আর মাস্তানের মুখোমুখি হয়েছে সে কিন্তু তার সামনের এই যুবকটি সেরকম কেউ না, আর এটাই হলো তার ভয়ের কারণ।

একজন পেশাদার খুনি!

একটা ভয় জেঁকে বসলো তার মধ্যে। সঙ্গে সঙ্গে সারা গায়ের পশম দাঁড়িয়ে গেলো। যুবকটি ঠিক তার সামনে আরেকটা চেয়ারে বসে অনেকক্ষণ তাকিয়ে রইলো পাভেলের দিকে।

“তুমি জানো আমি কেন এখানে এসেছি।” খুব কোমল ক'রে বললো কথাটা।

গোঙানীর মতো একটা শব্দ করলো পাভেল।

“ওটা কোথায়?” জানতে চাইলো অজ্ঞাত যুবক।

আবারো গোঙানী হলো।

“ও!” কোমর থেকে একটা অটোমেটিক পিস্তল বের করলো সে। “আমি এখন তোমার মুখের বাধন খুলে দেবো, তুমি শুধু বলবে ওটা কোথায় রেখেছো। এর থেকে বেশিও না...কমও না। ঠিক আছে?”

পাভেল আহমেদ বিস্ফারিত চোখে চেয়ে রইলো।

“আমার কথা বুঝতে পারছো?”

উদভ্রান্তের মতো মাথা দোলালো সে।

“গুড।”

মুখের বাধন খুলে দেবার পর পাভেল আহমেদ বুক ভরে নিঃশ্বাস নিয়ে নিলো। কিন্তু যুবকের হাতে পিস্তলটা দেখে চিৎকার করার সাহস দেখাতে পারলো না।

“ওটা কোথায় রেখেছো?” আবারো জানতে চাইলো সে।

“কিসের কথা বলছেন?” ভয়ার্ত কণ্ঠে বললো পাভেল আহমেদ।

নিঃশব্দে মাথা নাড়লো যুবক। যেনো অবুঝের মতো একটা কথা বলে ফেলেছে সাংবাদিক। “যে জিনিস তুমি দু’বার বিক্রি করতে চাইছো।”

“আমাকে খুন করবেন না। প্লিজ। আমি ওটা দিয়ে দিচ্ছি। প্লিজ। আমাকে—”

হিস্ শব্দ করে মুখে আঙুল দিয়ে তাকে থামিয়ে দিলো অজ্ঞাত যুবক। “শুধু ওটা কোথায় রেখেছো সেটাই বলবে। অন্য কিছু না,” বলেই পিস্তলটা তার মুখের সামনে তুলে ধরলো।

“ঐ যে...টিভির পাশে যে ড্রয়ারটা আছে...”

“কোন ড্রয়ারে?”

“উপরেরটায়...” বলেই ফ্যালফ্যাল ক’রে চেয়ে রইলো পাভেল।

যুবক ড্রয়ারটা হাতরিয়ে ক্যাসেটটা পেয়ে গেলো খুব সহজেই। পাভেলের দিকে দেখিয়ে বললো, “এটাই তো?”

“হ্যা...”

পকেটে ভরে রাখলো সেটা। তারপর আবারো পাভেলের সামনে এসে বসলো সে। “আর কোনো ব্যাকআপ রেখেছো?”

“না।”

মুচকি হাসলো যুবক। “এখনও সময় আছে, পরে যদি জানতে পারি আরেকটা রেখে দিয়েছো তাহলে কিন্তু খুব খারাপ হবে।”

পাভেল আহমেদ একটু আশার আলো দেখতে পেলো। তার মানে আমাকে এখন খুন করবে না! “সত্যি বলছি। আর কোনো কপি নেই। আপনি পুরো ঘর তল্লাশী করে দেখতে—”

হাত তুলে তাকে থামিয়ে দিয়ে চেয়ার ছেড়ে উঠে দাঁড়ালো দেবদূতের মতো দেখতে যুবকটি। পাভেল এতোক্ষণে খেয়াল করে নি বিছানার সাইডটেবিলের উপর একটা বিদেশী মদের বোতল আর একটা গ্রাস রাখা আছে। যুবক সেই বোতলটা হাতে তুলে নিয়ে আয়েশী ভঙ্গিতে পাভেলের সামনে এসে বসলো আবার। “তোমার ঘরে একটাই গ্রাস দেখতে পাচ্ছি। মেহমান এলে কিভাবে আপ্যায়ন করো কে জানে। সমস্যা নেই। আমি গ্রাসে খাচ্ছি। তুমি বোতল থেকে খাও।” বলেই বোতলটা বাড়িয়ে দিলো পাভেলের দিকে।

ফ্যালফ্যাল ক’রে চেয়ে রইলো পাভেল।

“খাও।” তাড়া দিলো যুবক।

“বারে অনেক খেয়েছি...আর খেতে ইচ্ছে করছে না।”

“তোমাকে এখন খেতেই হবে। অর্ধেক বোতল খেয়ে মাতাল হবে তারপর আমি তোমার কাছ থেকে কিছু সত্য কথা জেনে নেবো। আমি জানি, মাতাল না

হলে তুমি সত্য বলবে না।”

“আপনি আমাকে বলুন, আমি সব বলবো। যা জানতে চান—”

যুবক তার পিস্তলটা পাভেলের কপালে ঠেকালো। “আমি যা বলবো তাই করবে। কোনো প্রশ্ন করবে না।”

“ঠিক আছে। খাচ্ছি,” কাঁপা কাঁপা কণ্ঠে বললো পাভেল। “এটা সরিয়ে রাখুন। আমি খাচ্ছি।” পিস্তলের দিকে ইঙ্গিত করলো সে।

যুবক পিস্তলটা নামিয়ে রাখলো। পাভেলের হাত-পায়ের বাধন না খুলেই বোতলটা তার মুখে ঠেসে ধরলো সে। ভয়ে বাধ্য ছেলের মতো আকণ্ঠ পান করে গেলো পাভেল আহমেদ। জীবনে আর কখনও মদ নামক জিনিসটা এতো বিশ্বাস আর তেতো লাগে নি তার কাছে। বুঝতে পারলো প্রচণ্ড ভয়ে খাচ্ছে বলে এমনটি হচ্ছে।

বোতলটা অর্ধেকের মতো খালি হয়ে গেলে যুবক সেটা তার মুখ থেকে সরিয়ে নিজের চোখের সামনে তুলে ধরলো। “চলবে।” কথাটা বলেই বোতলটা বিছানার উপর ফেলে দিলে বোতলের বাকি মদ গড়িয়ে পড়লো সেখানে।

পাভেল আহমেদ বিস্ময়ে চেয়ে রইলো সেদিকে। তারপর যুবকের দিকে ফিরে বললো, “কি জানতে চান, বলুন?”

যুবক স্থির চোখে তাকালো তার দিকে। নিজের মুখের কাছে তর্জনী এনে চূপ করতে ইশারা ক’রে পিস্তলটা পাভেলের মুখের কাছে ধরে শান্ত কণ্ঠে বললো, “আমি এখন চলে যাবো। মনে রাখবে তোমার সাথে আমার দেখা হয় নি...তুমি আমাকে চেনো না। ঠিক আছে?”

পাভেল আহমেদ ভয়ে মাথা নেড়ে সায় দিলো।

“তুমি বেশ বুদ্ধিমান। আশা করি বাকিটা আর বলে দিতে হবে না।”

“বুঝতে পেরেছি। কিছু বলবো না। কাউকে কিছু বলবো না।”

“শুভ।” যুবক এরপর পাভেলের হাত-পায়ের বাধন খুলে দিয়ে পাভেলকে উঠে দাঁড়াতে বললো। “আমি চলে গেলে চূপচাপ দরজা বন্ধ ক’রে গুয়ে থাকবে। কাউকে ফোন করবে না।”

পাভেল মাথা নেড়ে সায় দিলো আবারো।

“আমি বাইরে থেকে কিছুক্ষণ লক্ষ্য রাখবো। তুমি যদি কিছু করো...”

“আমি কিছু করবো না। আপনি নিশ্চিত থাকতে পারেন,” কাঁপাকাঁপা গলায় বললো পাভেল।

পাভেলের গালে আলতো ক’রে চাপড় মেরে দরজার দিকে পা বাড়ালো সে। দরজাটা আশ্তে ক’রে খুলে সিঁড়ির দিকটা দেখে নিয়ে পাভেলের দিকে ফিরলো আবার। “যা বললাম তাই করবে।”

পাভেল উদভ্রান্তের মতো মাথা দোলালো। এই দানব যতো জলদি তার ঘর

থেকে বের হয়ে যায় ততোই মঙ্গল ।

“গুড,” বললো অজ্ঞাত যুবক । “আরেকটা কথা মনে রাখবে...কোটিকোটি টাকার মালিকদের কখনই ব্ল্যাকমেইল করবে না...” কথাটা বলেই বাইরে থেকে দরজাটা বন্ধ ক’রে দিলো সে ।

পাভেল আহমেদ সঙ্গে সঙ্গে দরজার লক বন্ধ করে দিয়ে হাফ ছেড়ে বাঁচলো যেনো । প্রচুর মদ খাওয়াতে মাথাটা চক্কর দিতে শুরু করেছে । বিছানার উপর ধপাস করে বসে পড়লো সে । এ যাত্রায় অল্পের জন্যে বেঁচে গেছে । এখনও ভয়ে থর থর ক’রে কাঁপছে তার সারা শরীর ।

কিছুক্ষণ পরই টের পেলো তার নিঃশ্বাস আবার দ্রুত হয়ে উঠছে । কিন্তু কেন বুঝতে পারলো না ।

দশ মিনিট পর হাত-পা মৃগীরোগীর মতো কাঁপতে শুরু করলে অজানা এক আশংকায় পাভেল আহমেদ পকেট হাতরিয়ে মোবাইলটা বের করার চেষ্টা করলো ।

নেই!

মোবাইলটা গেলো কোথায়?

দম বন্ধ হয়ে আসছে তার । বিছানা থেকে উঠে দরজার কাছে এগোতেই বুঝতে পারলো দু’পা অবশ হয়ে গেছে ।

হুমড়ি খেয়ে পড়ে গেলো মেঝেতে ।

পাভেল আহমেদের বাড়ি থেকে দুশ’ গজ দূরে এক নিরিবিলা রাস্তা দিয়ে কালো জ্যাকেট আর কালো প্যান্ট পরা দেবদূতের মতো দেখতে এক যুবক ধীর পায়ে হেটে যাচ্ছে ।

রাস্তার পাশে ফুটপাতে প্রচণ্ড শীতের রাতে চট আর ছেঁড়াফাড়া কম্বল মুড়ে কুঁকড়ে পড়ে আছে এক বুড়ো । যুবকটি সেই লোকের দিকে এগিয়ে গেলো । আশ্বে ক’রে হাটু মুড়ে বুড়োর পাশে একটা দামি মোবাইল ফোন রেখে আবার হাটতে লাগলো ধীর পায়ে ।



অধ্যায় ৩৪

লেখক জায়েদ রেহমান খুন হবার তিন দিন পর তার আত্মীয়স্বজনের কাছে লাশ হস্তান্তর করা হলো। পোস্টমর্টেম খুব দ্রুত সম্পন্ন হলেও আইনগত কিছু ঝামেলার কারণে এই দেরি। ঐ দিন বিকেলেই তার জানাযা শেষে দাফন করার সমস্ত আয়োজন করা হয়েছে।

এদিকে বিস্ময়করভাবেই দ্রুততার সাথে জায়েদ রেহমানের সর্বশেষ বই কথা'র কাজ শেষ ক'রে ফেলেছে প্রকাশক আবেদ আলী। এমনিতে একটি পত্রিকা রাখলেও আজকের জন্যে তিনটি দৈনিক পত্রিকা রেখেছে সে। জায়েদ রেহমানের নতুন বইয়ের চমকপ্রদ বিজ্ঞাপন দিয়েছে এইসব পত্রিকায়।

তিনটি পত্রিকা খুলেই আবেদ আলী বিজ্ঞাপনগুলো ভালো ক'রে দেখে সন্তুষ্ট হলো। সে নিশ্চিত প্রকাশনা ব্যবসার সবাই নড়েচড়ে বসবে এই বিজ্ঞাপনগুলো দেখে। বিজ্ঞাপনের ভাষা লিখে দিয়েছে তার কবি বন্ধু হামিদ কায়সার। একেবারে ভিন্নভাবে তৈরি করা হয়েছে এই বিজ্ঞাপনটি। যতোই দেখছে আবেদ আলী ততোই মুগ্ধ হচ্ছে। জায়েদ রেহমানের চমৎকার একটি রঙ্গিন ছবি, তার পাশে কালো বর্ডারের উপর সাদা আর হলুদ রঙের অক্ষরে কিছু কথা লেখা

খুন হবার কিছুক্ষণ আগে জনপ্রিয় লেখক জায়েদ রেহমান তার ঘনিষ্ঠ বন্ধুর কাছে একটি ই-মেইল করে নিজের এই আত্মজীবনীটি প্রকাশ করার তাগিদ দেন

'...যতো বাধাই আসুক এই বইটি প্রকাশ করো...তোমার সাথে হয়তো আর দেখা হবে না...আমাকে ক্ষমা করে দিও...!'

না। আমরা কোনো বাধাই তোয়াক্কা করি নি। লেখকের শেষ ইচ্ছেকে সম্মান জানিয়ে প্রকাশ করা হলো **কথা** ! এটি জায়েদ রেহমানের শেষ কথা! এটি তাঁর সব কথা!

দু’দিন অমানুষিক পরিশ্রম করে একটি অসাধ্য কাজ করেছে সে। লেখক জায়েদ রেহমানের লাশ দাফন হওয়ার আগেই তার সর্বশেষ একটি বই প্রকাশ হতে যাচ্ছে অবয়ব প্রকাশনী থেকে—খুব সম্ভবত এরকম একটি কাজ ইতিহাসেই বিরল।

এমন সময় তার মোবাইল ফোনটা বেজে উঠলে আবেদ আলী সেটা রিসিভ করলো। তার কবি বন্ধু হামিদ কায়সার ফোন করেছে।

“হ্যা, কি খবর?”

“নির্মল প্রকাশনী থেকে ফোন করেছিলো আপনাকে?” কবি জানতে চাইলো।

“না!” বিস্মিত হলো আবেদ আলী। “ওরা কেন আমাকে ফোন করবে?”

এই নির্মল প্রকাশনী হলো আবেদ আলীর দু’চোখের বিষ। কাপড় ব্যবসায়ী থেকে প্রকাশক বনে যাওয়া এক অবচীন শুধুমাত্র টাকার জোরে লেখক জায়েদ রেহমানকে তার কাছ থেকে অনেকটা ছিনিয়ে নিয়েছে দু’বছর আগে।

“ওরা তো আজব একটা কথা বলছে...”

“কি বলছে?” উদ্ভিগ্ন হয়ে উঠলো অবয়ব প্রকাশনীর সত্বাধিকারী।

“বলছে লেখক জায়েদ রেহমানের সর্বশেষ বইয়ের পাণ্ডুলিপি নাকি তাদের কাছে আছে। তারাই নাকি এর বৈধ প্রকাশক।”

আবেদ আলী ক্রোধে ফেঁটে পড়লো। “তাদের কাছে যদি সত্যি পাণ্ডুলিপিটি থেকে থাকে তাহলে প্রকাশ করছে না কেন!?” দু’বছর ধরে তারা জায়েদ রেহমানকে কজা ক’রে রেখেছিলো, এখন আবার নতুন নাটক শুরু করেছে। “কে ফোন করেছিলো?”

কবি হামিদ কায়সার শান্ত কণ্ঠে বললো, “একটু আগে বিজ্ঞাপন দেখে কুদরত সাহেব নিজে আমাকে ফোন করে বললেন।”

এই কুদরত সাহেব হলো নির্মল প্রকাশনীর মালিক।

“আচ্ছা,” বললো আবেদ আলী। “আর কি বললো?”

“বললো বইটা যদি প্রকাশ করা তাহলে সে নাকি আদালতে যাবে।”

একটু ভাবলো আবেদ আলী। “আদালতে গেলে যাবে আমার কি করার আছে? আমি তো বইটা চুরি করে আনি নি, জায়েদ নিজে আমাকে সেটা দিয়ে গেছে।”

“আমাকে ফোন করে বার বার বললো আমি যেনো আপনাকে বুঝিয়েসুঝিয়ে এ কাজ করা থেকে বিরত রাখি। তা না হলে আজ সন্ধ্যায় তারা নাকি একটি প্রেসকনফারেন্স ডাকবে।”

“প্রেসকনফারেন্স ডাকবে!”

“হ্যাঁ।”

“শালার সাহস কতো বড়! আমি হাজার হাজার কপি বই বের করে তাদের ভয়ে গুদামে রেখে দেবো?” আবেদ আলী ক্ষিপ্ত হয়ে গেলো। “মনে করেছে তার এই হুমকিতে আমি পেছাব করে দেবো, অ্যাঁ?”

“আমার মনে হয় আমার ব্যারিস্টার বন্ধুর সাথে এ নিয়ে কথা বলা দরকার। আপনি কি বলেন?”

“অবশ্যই। এক্ষুণি কথা বলতে হবে।”

“তাহলে আমার এখানে চলে আসুন। দু’জন এক সঙ্গেই যাই।”

একটু ভেবে আবেদ আলী জানালো, “ঠিক আছে, আমি পনেরো মিনিটের মধ্যে আসছি।”

সাংবাদিক পাভেল আহমেদের মৃতদেহ উদ্ধার করা হলো সকাল দশটার দিকে। বাড়িওয়ালা নিজে কী একটা প্রয়োজনে পাভেল আহমেদের খোঁজ করতে গিয়ে আবিষ্কার করে সাংবাদিক নিজের ঘরে মরে পড়ে আছে।

একটু বেশি পান করে ফেলায় হৃদযন্ত্রের ক্রিয়া বন্ধ হয়ে রাতের কোনো এক সময় মৃত্যু হয়েছে তার—পুলিশ এটাই ধরে নিয়েছে।

ঘরের দরজা ভেতর থেকে লক্ করা ছিলো, আর বিছানায় একটা খালি মদের বোতলও খুঁজে পাওয়া গেছে। অতিরিক্ত মদ্যপানই যে মৃত্যুর একমাত্র কারণ সে ব্যাপারে কারোর মনে কোনো সন্দেহ দেখা দিলো না। অপমৃত্যুর জন্য কোনো মামলাও রেকর্ড করা হলো না পুলিশের খাতায়। ফলে তার এই মৃত্যু নিয়ে তেমন একটা হৈচৈ হলো না বলা চলে। কারো মনে হলো না জ্বলজ্যোস্ত একজন সাংবাদিক এভাবে মরে গেলো কেন।

পাভেল আহমেদের ঘরে সব কিছু অক্ষত অবস্থায় পাওয়া গেলেও পুলিশ তার ব্যক্তিগত মোবাইল ফোনটি খুঁজে না পেয়ে সেটাতে রিং দিতেই অনেকক্ষণ পর এক বৃদ্ধ ভয়ার্ত কর্তে জবাব দিলো। সে জানালো সকালে ঘুম থেকে উঠেই পায়ের কাছে এই ফোনটা পড়ে থাকতে দেখে। নিতান্তই একজন বাস্তবহারা, থাকে পাভেল আহমেদের বাড়ির খুব কাছের একটা ফুটপাতে।

পাভেল আহমেদ একজন সাংবাদিক হলেও তার মৃত্যুর খবর কোনো টিভি চ্যানেল আর পত্রিকায় গুরুত্ব পেলো না কারণ এদিনের সবচাইতে বড় খবর ছিলো লেখক জায়েদ রেহমানের নামাজে জানাযা এবং তার সর্বশেষ একটি বই প্রকাশের ঘটনা।

লেখকের জানাযা আর সৎকারের অনুষ্ঠান বেশিরভাগ চ্যানেলই লাইভ ব্রডকাস্ট করলো আর পরদিন সমস্ত দৈনিক পত্রিকায় এই একটি খবরই ঠাঁই পেলো প্রধান শিরোনাম হিসেবে।

অবশ্য পাবেল আহমেদ যে পত্রিকায় কাজ করতো তারা ভেতরের পৃষ্ঠায় দু'কলামের একটা বক্সনিউজ করলেও অন্য দুয়েকটি পত্রিকা এক কলামে ছোট্ট একটা দায়সারাগোছের নিউজ করলো। বাকিরা তাও করলো না।

জায়েদ রেহমান সংক্রান্ত সংবাদের ডামাডোলে খবরটা খুব বেশি লোকের চোখেও পড়লো না।



কুদরত হোসেনের মেজাজ বিগড়ে আছে। কোনোভাবেই ঘুম আসছে না তার। এমনিতেই দু'তিন ধরে মনের অবস্থা ভালো যাচ্ছে না, তার উপর এই ঘটনা তার ব্লাড প্রেসার আরো বাড়িয়ে দিয়েছে।

লেখক জায়েদ রেহমানের মৃত্যুতে কার কি ক্ষতি হয়েছে সে জানে না, সে শুধু জানে অপরিমেয় ক্ষতি হয়ে গেছে তার। সোনার ডিম পাড়া হাঁসের মৃত্যু হলে যেমন হয় আর কি।

এই যে তার আজকের প্রতিষ্ঠা সেটা তো এককভাবে লেখক জায়েদ রেহমানের কল্যাণেই সম্ভব হয়েছে। প্রকাশক হিসেবে সম্মান আর প্রতিপত্তির সাথে কোটি টাকার মালিকও বনে গেছে সে।

জায়েদ রেহমানের মৃত্যুতে অনেক কষ্ট পেলেও মেনে নিয়েছিলো। জন্ম-মৃত্যুর উপর তো মানুষের হাত থাকে না। সবাইকে একদিন না একদিন মরতেই হয়, কিন্তু অবয়ব প্রকাশনী এ কি বলছে! জায়েদ রেহমান তার শেষ বইটা তাদেরকে দিয়ে গেছে!?

এই বইটির কাজ লেখক শুরু করেছিলেন তার হার্ট অ্যাটাক হবারও আগে, ওপেন-হার্ট সার্জারির পর পর। এখনও তো সেটা শেষ হয় নি, অথচ অবয়ব প্রকাশনী আজকে বইটি প্রকাশ ক'রে ফেলেছে?

অসম্ভব।

বেশ বড় একটা বই-ধীরে ধীরে সময় নিয়ে লিখছিলেন লেখক। কুদরত হোসেন অধীর আগ্রহে অপেক্ষা করছিলো বইটির লেখা শেষ হবার জন্য। গত সপ্তাহে যখন জায়েদ রেহমানের সাথে দেখা করতে গেলো তখনও লেখক তাকে জানালেন বইয়ের কাজ অনেকটুকুই বাকি আছে। তাকে কথা দিলেন সামনের বই মেলার ঠিক আগে কাজটা শেষ করতে পারবেন বলে। বই মেলা আসতে তো এখনও দেড়মাস বাকি!

তাছাড়া মিসেস রেহমানের সাথে তার নিয়মিত যোগাযোগ আছে। জায়েদ রেহমান খুন হবার আগের দিনও তার সাথে কথাবার্তা হয়েছে, মিসেস রেহমান বলেছিলো জায়েদ রেহমান নাকি এখন অন্য একটা উপন্যাস লিখছে, আত্মজীবনীর কাজ আপাতত বন্ধ আছে।

কোনোভাবেই হিসেব মেলাতে পারছে না কুদরত হোসেন। মিসেস রেহমান নিজেই এখন খুনের দায়ে জেলে আছে, সে থাকলে জানা যেতো আসলে কি হয়েছে।

বিগত দু'বছর ধরে যে লেখকের বই ছেপে যাচ্ছে সে তার সবচাইতে আলোচিত এবং সাড়া জাগানো বইটি কিনা ছেপে বসেছে অবয়ব প্রকাশনীর আবেদ আলী! এই আবেদ আলী লোকটি যেমন তাকে অপছন্দ করে ঠিক তেমনি সেও তাকে প্রচণ্ড ঘৃণা করে।

কী অহংকার। তাকে বলে কিনা অশিক্ষিত প্রকাশক! তার কাপড়ের ব্যবসার কথা ইঙ্গিত করে সবার কাছে বলে বেড়ায় হাটু ভেঙে যে বসে বসে কাপড় কাটতো সে হয়েছে প্রকাশক!

এখন এই উন্মাসিক আর অহংকারী লোকটা তাকে টেক্সা মেরে দিয়েছে। এটা কোনোভাবেই মেনে নিতে পারছে না। তার সাথেই তো জায়েদ রেহমান কথাই বলতো না!

অসম্ভব!

প্রেসকনফারেন্স করেছে আজ সন্ধ্যার দিকে, তার আগে বিকেলের দিকে আদালতে গিয়ে মামলাও ক'রে এসেছে কিন্তু তাতে কিছুই হচ্ছে না। বইটা হটকেকের মতো বিক্রি হচ্ছে। আদালত থেকে নিষেধাজ্ঞা চেয়েছিলো কিন্তু সেটা পাওয়া যাবে এক সপ্তাহ পর।

নিজের টেনশন দূর করার জন্য স্লিপিং পিল খেলে কুদরত হোসেন। এক ঘণ্টা আগেও একটা খেয়েছিলো কাজ হয় নি।

বেডসাইড ঘড়ির দিকে তাকিয়ে দেখলো ১২:৫০।

তার পাশেই তার বউ কী নিশ্চিন্তে ঘুমাচ্ছে। এভাবে ঘুমাতে পারলে হাই প্রেসারটা একটু নিয়ন্ত্রণে আনা যেতো। দু'চোখ বন্ধ করে মাথা থেকে সব রকম ব্যবসায়িক চিন্তা বাদ দিয়ে ঘুমানোর চেষ্টা করলো নির্মল প্রকাশনীর কুদরত হোসেন।

মাঝরাতের দিকে তার ঘুম ভেঙে গেলো ল্যান্ডফোনের রিংয়ের শব্দে। প্রচণ্ড বিরক্তি নিয়ে উঠে বসলো বিছানায়। এতো রাতে কোন্ গর্দভ ফোন করলো তাকে?

রিংয়ের শব্দে তার বউয়েরও ঘুম ভেঙে গেলো। “আরে ফোনটা ধরো না।”

ফোনটা তুলে নিলো কুদরত হোসেন। “হ্যালো!”

“আমি মোরশেদ, স্যার,” একটা কণ্ঠ বললো তাকে।

“মোরশেদ...?” কুদরত সাহেবের নির্মল প্রকাশনীর ম্যানেজার।

“স্যার—”

“এতো রাতে আমাকে কেন ফোন করেছো?” তার কথার মাঝখানে বাধা দিয়ে জানতে চাইলো কুদরত হোসেন।

“স্যার, আমাদের অফিসে চুরি হয়েছে। ওখানকার দাড়াওয়ান একটু আগে আমাকে ফোন করে জানালো।”

“কি?” কুদরত সাহেব নড়েচড়ে বসলো।

“আমি এখন ওখানেই যাচ্ছি। পুলিশকে খবর দেয়া হয়েছে।”

“অফিসে চুরি হয়েছে! ওখানে তো আমরা টাকা-পয়সা রাখি না। শুধু কিছু বই আর...” কুদরত হোসেন আর বলতে পারলো না। “হায় হায়!”

“স্যার...?” উদ্বেগের সাথে বললো ম্যানেজার।

“জলদি যাও। দ্যাখো কি কি চুরি হয়েছে...”

কুদরত সাহেব জানে তার কম্পিউটারে অনেক বইয়ের পাণ্ডুলিপি রয়েছে কিন্তু সেটা তো চুরির করার মতো বস্তু নয়। পাণ্ডুলিপি চুরি করলেই তো আর সেটা প্রকাশ করা যাবে না। তাহলে...?

“জি, স্যার,” বললো ম্যানেজার। “আপনি চিন্তা করবেন না আমি এফুনি যাচ্ছি।”

“হ্যা, ওখানে গিয়ে আমাকে জানাও কি চুরি হলো।”

“ঠিক আছে, স্যার।”

কুদরত সাহেব ফোনটা রেখে দিলো। টের পেলো হৃদস্পন্দন বেড়ে গেছে। তার প্রকাশনা অফিসে চুরি করার মতো এমন কিছু থাকে না।

তবে হ্যা, একটা জিনিস আছে যেটা চোরের লক্ষ্যবস্তু হতে পারে। খুব সম্ভবত সেটাই চুরি হয়েছে।



অধ্যায় ৩৬

লেখক জায়েদ রেহমানকে চিরনিদ্রায় শায়িত করতে না করতেই তার সর্বশেষ বইটি নিয়ে আরেকটি নতুন বিতর্ক শুরু হয়ে গেছে, আর ব্যাপারটা শেষ পর্যন্ত গড়িয়েছে আদালতে।

এই খবরটা ইনভেস্টিগেটর জেফরি বেগকে বেশ কৌতূহলী ক'রে তুললো। সে জানে অবয়ব প্রকাশনীর সত্বাধিকারী আবেদ আলীকে লেখক নিহত হবার কিছুক্ষণ আগে এই বইটি মেইল ক'রে দিয়ে গেছেন। কিন্তু এখন দেখা যাচ্ছে বিগত দু'বছর ধরে জায়েদ রেহমানের বই যে প্রকাশনী থেকে বের হচ্ছিলো সেই নির্মল প্রকাশনী দাবি করছে তাদের কাছে লেখকের আত্মজৈবনীমূলক উপন্যাস কথা'র পাণ্ডুলিপি রয়েছে। তারাই নাকি এই বইটি প্রকাশ করার একমাত্র আইনগত অধিকার রাখে।

তবে নির্মল প্রকাশনীর মালিক কুদরত সাহেব দেরি ক'রে ফেলেছে। লেখক জায়েদ রেহমানকে যে দিন কবর দেয়া হলো সেদিনই কথা নামের তার সর্বশেষ বইটি প্রকাশ হয়ে যায়। সকালবেলা দৈনিক পত্রিকায় বিজ্ঞাপন দেখেই ভদ্রলোক প্রথম জানতে পারে জায়েদ রেহমানের এই বইটি আজ অবয়ব প্রকাশনী থেকে বের হচ্ছে। আদালতের শরণাপন্ন হবার আগেই হু হু করে বিক্রি হয়ে গেছে কয়েক হাজার কপি। শোনা যাচ্ছে আদালতে যাবার বিষয়টি আর এ সংক্রান্ত বিতর্কের খবর জানাজানি হবার পর বইয়ের বিক্রি আরো কয়েকগুন বেড়ে গেছে।

আবেদ আলীকে কোনোভাবেই থামিয়ে রাখা যায় নি। জেফরি অবশ্য জানে তাকে থামানোর মতো আইনগত ভিত্তিও তাদের ছিলো না। তারপরও চেষ্টা করেছিলো।

জামানের কথাই ঠিক। ব্যবসায়ী ভদ্রলোক লাভের গন্ধ আঁচ করতে পেরে ঠিক সময় দান মেরে দিয়েছেন।

তবে কুদরত সাহেবও বসে নেই, আদালতের দ্বারস্থ হয়েছে সে। এ নিয়ে পত্রপত্রিকায় বেশ খবর হয়েছে। ক্রমশ ঘোলা হয়ে উঠছে পরিস্থিতি। শুরুতে যে কেসটাকে মনে হয়েছিলো পানির মতো সহজ এখন সেটা ঘোলা পানির মতো অস্পষ্ট হয়ে যাচ্ছে; জেফরির আশংকা শেষ পর্যন্ত ব্যাপারটা কাদার মতো দলা পাকিয়ে পিচ্ছিল না হয়ে যায়!

এই মুহূর্তে জেফরির হাতে তিনটি রিপোর্ট আছে জায়েদ রেহমানের

পোস্টমর্টেম এবং সিগারেট ফিল্টার থেকে পাওয়া সালিভার রিপোর্ট আর পলিগ্রাফ টেস্টের প্রিন্ট কপি ।

লেখক জায়েদ রেহমানকে শ্বাসরোধ করে নয়, বরং তার বুকে প্রচণ্ড আঘাত করে হার্টের বাল্ব অকেজো করে হত্যা করা হয়েছে । আর সিগারেট ফিল্টারে যে লালা বা সালিভা পাওয়া গেছে সেটা অবধারিতভাবেই মিসেস রেহমানের প্রেমিক আলম শফিকের ।

কিন্তু তারচেয়ে বড় একটা তথ্য হলো গতকাল পুলিশ রিমাণ্ডে মিসেস রেহমান আর আলম শফিক এই হত্যাকাণ্ডে নিজেদের সম্পৃক্ততার কথা একদম অস্বীকার করেছে । জেফরি ভেবেছিলো পুলিশ রিমাণ্ডে হয়তো আসামীরা হত্যাকাণ্ডের কথা স্বীকার করে নেবে ।

জেফরি বেগের কাছে এগুলো নতুন কোনো তথ্য নয়, তারপরও তার মনে ক্ষীণ আশা ছিলো ফরেনসিক রিপোর্টে হয়তো এমন কিছু থাকবে যা তার সন্দেহকে দৃঢ় করবে । কিন্তু আবাবো গোলকধাঁধার মতো কানাগলিতে ফিরে এসেছে সে । সেই সাথে পুলিশ রিমাণ্ডে আসামীদের স্বীকারোক্তি তাকে অনেকটাই ভাবনায় ফেলে দিয়েছে । তার মনে হচ্ছে না মিসেস রেহমান আর তার প্রেমিক আলম শফিক এই হত্যাকাণ্ডটি ঘটিয়েছে । কিন্তু পরিস্থিতি এখন এমনই যে, সে যদি বলে লেখক জায়েদ রেহমানের হত্যাকাণ্ড অন্য কেউ করেছে তাহলে তাকে পাগল ভাবে সবাই ।

গতকাল লেখক জায়েদ রেহমানের নতুন উপন্যাসটির উল্লেখযোগ্য অংশ হাইলাইটস ক'রে মেইল ক'রে পাঠিয়েছে তার সহকারী জামান । তারপর থেকে কম্পিউটারের সামনে বসে বসে অনেকখানিই পড়ছে । এই বইটি যে পড়বে তার বন্ধমূল ধারণা হবে খুনটা করেছে মিসেস রেহমান আর তার প্রেমিক ।

জায়েদ রেহমান যে তার অল্পবয়সী স্ত্রীকে সন্দেহ করতেন, তার কাছ থেকে খারাপ কিছু আশংকা করতেন সেসবের অনেক বর্ণনা রয়েছে বইতে । এমন কি মিসেস রেহমান কয়েক মাস ধরে লেখককে তার সমস্ত স্বাবর-অস্বাবর সম্পত্তি তার এবং শিশু সন্তানের নামে লিখে দেয়ার জন্যে রীতিমতো চাপও দিচ্ছিলো ।

যতোই পড়ছে ততোই অবাক হচ্ছে সে । এ বই প্রকাশ হলে জায়েদ রেহমান সম্পর্কে যেসব মুখরোচক গালগল্প চালু আছে সেগুলো আরো দৃঢ় হবে, তার নিন্দুকেরা হয়ে উঠবে আরো উৎসাহী । এরকম একটি লেখা প্রকাশ করার জন্য জীবনের অন্তিম মুহূর্তে লেখকের মরিয়্যা হয়ে ওঠার কোনো কারণই খুঁজে পাচ্ছে না জেফরি ।

আর পড়তে ইচ্ছে করছে না বলে কম্পিউটারটা বন্ধ করে বিছানায় চিৎ হয়ে শুয়ে শুয়ে জায়েদ রেহমানের হত্যাকাণ্ডের বিভিন্ন দিক নিয়ে ভাবতে লাগলো সে ।

লেখক জায়েদ রেহমানের মৃত্যুতে সবচাইতে লাভবান হয়েছে কে?

অবধারিতভাবেই উত্তরটা হতে পারতো মিসেস রেহমান কিন্তু ভদ্রমহিলা এখন যে অবস্থায় আছে তাতে করে এ কথা বলার আর কোনো জো নেই। বেনিফিসিয়ারি তত্ত্ব দিয়ে সব সময় সব ঘটনাকে বিচার করা ঠিক নয়। অনেক সময় দৃশ্যমান সুবিধাভোগী আদতে কোনো সুবিধাই পায় না। আর কে লাভবান হচ্ছে না হচ্ছে সেটা বের করাও খুব একটা সহজ নয়।

তারপরও জেফরি জানে এখন পর্যন্ত জায়েদ রেহমানের মৃত্যুতে একজনই সবচেয়ে বেশি লাভবান হয়েছে : প্রকাশক আবেদ আলী।

তাকে কেউ সন্দেহের চোখে দেখছে না, অথচ লেখকের মৃত্যুর পর সে এখন কোটি টাকার মুনাফার স্বপ্নে বিভোর হয়ে আছে। সমস্ত সন্দেহ মিসেস রেহমান আর তার প্রেমিকের উপর নিবন্ধ। তাদেরকে কোনোভাবেই বেনিফিশিয়ারি বলার উপায় নেই।

জায়েদ রেহমানের শেষ বইটি এমন একজন প্রকাশক দাবি ক'রে বসেছে যে কিনা বিগত দু'বছর ধরে জায়েদ রেহমানের সমস্ত বই প্রকাশ ক'রে আসছে। আবেদ আলীর সাথে লেখকের কথাবার্তা পর্যন্ত বন্ধ ছিলো অথচ তাকেই দিয়ে গেলেন নিজের শেষ বইটি?

নিজের মনে উদয় হওয়া ভাবনাটি নিজের কাছেই খুব বেশি উর্বর কল্পনা বলে মনে হচ্ছে। তারপরও এ জগতে অনেক অসম্ভব ঘটনার মতো এই দূরকল্পনাটিও যে সম্ভব হতে পারে সেটা জানে জেফরি বেগ।

আবেদ আলীকে নিয়ে মাথা ঘামানোর সময় এসে গেছে।

মোবাইল ফোনটা হাতে নিয়ে একটা নাম্বারে ডায়াল করলো সে।

“হ্যা, জামান, কোথায় আছো?”

“অফিসে,” ওপাশ থেকে তার সহকারী জামান জবাব দিলো।

“নির্মল প্রকাশনীর প্রকাশকের সাথে যোগাযোগ করে তার কাছ থেকে জায়েদ রেহমানের শেষ বইয়ের পাণ্ডুলিপিটা জোগার করার চেষ্টা করবে। উনি হয়তো দিতে চাইবেন না কিন্তু তুমি তাকে বোঝাবে, সেটা দিলে আমরা আবেদ আলীর ব্যাপারে একটু তদন্ত ক'রে দেখবো জায়েদ রেহমানের হত্যাকাণ্ডের সাথে ভদ্রলোকের কোনো সম্পৃক্ততা আছে কিনা। বুঝেছো?”

জামান বুঝতে পেরেছে। এই মুহূর্তে নির্মল প্রকাশনীর প্রকাশক আবেদ আলীর উপর মহা ক্ষেপে আছে। এসব বললে ভদ্রলোক সোৎসাহে পাণ্ডুলিপি দিয়ে দেবে।

“ঠিক আছে, স্যার। আমি তার সাথে যোগাযোগ ক'রে আপনাকে জানাচ্ছি।”

ফোনটা রেখে দিলো বেগ।

জেফরির সহকারী জামান ইয়েলো পেজ ঘেঁটে নির্মল প্রকাশনীর নাম্বারটা বের করে সেখানে ফোন করলে তিনচার বার রিং হবার পর একজন ফোনটা ধরলো ।

“আমি একটু আপনাদের প্রকাশকের সাথে কথা বলতে চাইছিলাম,” বললো জামান ।

“কোথেকে বলছেন?” ওপাশ থেকে জানতে চাইলো ।

“হোমিসাইড ডিপার্টমেন্ট ।”

কোনো সাড়া শব্দ নেই ।

“হ্যালো?” জামান তাড়া দিলো ।

“জি, বলছি,” জবাবে বললো একটা কণ্ঠ ।

“আমি আপনাদের প্রকাশকের সাথে—”

“জি, আমিই প্রকাশক । বলুন ।”

“আপনার নাম?”

“কুদরত হোসেন ।”

“কুদরত সাহেব, আমি হোমিসাইড থেকে সহকারী ইনভেস্টিগেটর জামান আহমেদ বলছি ।”

“জি, বলুন?” কণ্ঠটা ভয়ানত শোনাচ্ছে এখন ।

“আমি লেখক জায়েদ রেহমান হত্যাকাণ্ডের সহকারী ইনভেস্টিগেটর । আপনারা দাবি করছেন লেখক তার সর্বশেষ বইটির পাণ্ডুলিপি আপনাদের দিয়ে গেছেন—”

“জি ।”

“আপনারা তো এই বিষয়টা আদালতে নিয়ে গেছেন, তাই না?”

“জি । গতকালকেই আমরা আদালতে একটি আর্জি দিয়েছি ।”

“আপনাদের কাছে জায়েদ রেহমানের যে পাণ্ডুলিপিটা আছে সেটার একটা কপি আমাদেরকে দিতে হবে ।”

ওপাশ থেকে কোনো সাড়া পাওয়া যচ্ছে না ।

জামান বলতে লাগলো । “আমরা জায়েদ সাহেবের হত্যাকাণ্ডের ব্যাপারে আবেদ আলীকে একটু জিজ্ঞাসাবাদ করতে চাচ্ছি । তো আপনাদের কাছে থাকা উনার পাণ্ডুলিপিটা আমাদের হাতে থাকলে অনেক সাহায্যে আসবে ।”

ওপাশ থেকে যেনো একটা দীর্ঘশ্বাস ফেলার আওয়াজ শোনা গেলো । “কিন্তু সেটা তো আমরা আপনাকে দিতে পারবো না ।”

জামান অবাকই হলো । সাধারণত হোমিসাইড ডিপার্টমেন্টকে সবাই সমীহ করে । আজ পর্যন্ত কোথাও থেকে সাহায্য চেয়ে বিমুখ হয় নি সে । “কেন দিতে পারবেন না সেটা কি জানতে পারি?”

“ওটা গতকাল রাতে চুরি হয়ে গেছে,” নির্লিপ্ত কণ্ঠে বললো ভদ্রলোক ।



জেফরি বেগের সন্দেহটা ক্রমশ গাঢ় হয়ে উঠছে। প্রকাশক আবেদ আলী লোকটার ব্যাপারে আরো ভালো ক'রে খোঁজ খবর নিতে হবে। পুরো ঘটনায় একমাত্র লাভবান এই লোককে নিয়ে আসতে হবে সন্দেহের মাইক্রোস্কোপের নিচে।

জায়েদ রেহমান খুন হবার আগে তাকে একটা মেইল করে সর্বশেষ বইয়ের পাণ্ডুলিপি দিয়ে গেছেন। এখন দেখা যাচ্ছে সেই পাণ্ডুলিপির দাবিদার আরেকজন প্রকাশক। সব কিছু বিবেচনায় নিলে সেই প্রকাশকের দাবিটাই বেশি গ্রহণযোগ্য বলে মনে হয়, কিন্তু এখন তার অফিস থেকে পাণ্ডুলিপি চুরির ঘটনায় মনে হচ্ছে তার দাবিটা একেবারেই সত্যি।

জামানকে সঙ্গে নিয়ে জেফরি এখন কুদরত সাহেবের অফিসে এসেছে। যেহেতু হোমিসাইড ডিপার্টমেন্ট এখন আর অফিশিয়ালি এই কেসের তদন্ত করছে না, সেটা অপর্ণ করা হয়েছে পুলিশের উপর তাই ওখানে প্রকাশককে ডেকে নিয়ে জিজ্ঞাসাবাদ করাটা ঠিক হবে না বলে নিজেই চলে এসেছে।

তারা বসে আছে কুদরত সাহেবের প্রাইভেট অফিসে। লোকটা হোমিসাইডের নাম শুনে প্রথমে একটু ভড়কে গেলেও এখন খুব সহযোগীতা করছে। বেশ আন্তরিকতার সাথে ব্যবহার করছে তাদের সাথে। কারণটা স্পষ্ট তার প্রধানতম ব্যবসায়িক প্রতিপক্ষকে ঘায়েল করার সম্ভাবনা দেখতে পাচ্ছে ভদ্রলোক।

“আপনি বলছেন মাসখানেক আগে পাণ্ডুলিপিটা হাতে পেয়েছিলেন?” জেফরি প্রশ্ন করলো কুদরত সাহেবকে।

“জি।”

“ওটা কি হাতে লেখা ছিলো?”

“না। স্ট্রোকের পর থেকে উনি হাতে লিখতেন না। ল্যাপটপে লিখতেন। পাণ্ডুলিপিটা সফট কপির ছিলো।”

“তাহলে কম্পিউটার থেকে ওটা চুরি হয়েছে?”

“হ্যাঁ।”

অবাক হলো জেফরি।

“চুরির কথা শুনে আমি ভেবেছিলাম অফিসের কম্পিউটার চুরি হয়েছে। কারণ এর আগেও এখান থেকে মূল্যবান কম্পিউটার আর প্রিন্টার চুরি হয়েছিলো। কিন্তু আজব ব্যাপার হলো অফিসের তালা ভাঙা থাকলেও জায়েদ রেহামনের পাণ্ডুলিপির প্রিন্ট কপি এবং সিডিটা ছাড়া আর কিছুই খোয়া যায় নি। সকালে এসে কম্পিউটার চেক ক’রে দেখি হার্ডডিস্কও একেবারে ফাঁকা।”

“আপনাদের কাছে কোনো প্রিন্ট করা পাণ্ডুলিপি ছিলো না?”

“এক কপি ছিলো। সেটাও চুরি হয়েছে।”

“বলেন কি!” জেফরির কাছে ব্যাপারটা স্পষ্ট হয়ে উঠছে। “তার মানে আপনাদের কাছে সেই পাণ্ডুলিপির আর কোনো কিছুই নেই...সিডি, প্রিন্ট কপি এমনকি কম্পিউটারে রাখা...সবগুলোই?”

“জি, সবগুলোই।”

“আপনি পাণ্ডুলিপিটা পড়ে দেখেছিলেন?”

একটু ইতস্তত করলো প্রকাশক সাহেব। “ইয়ে...মানে...আমি তো অনেক কাজে ব্যস্ত থাকি, সময় পাই না। তবে আমার এক লোক আছে পাণ্ডুলিপির প্রুফ দেখার জন্যে...সে ওটা পড়েছিলো।”

“আচ্ছা। সেই লোক কি এখন আপনার এখানে আছে?”

“হ্যা, আছে। এখানেই কাজ করে।”

“তার সাথে একটু কথা বলতে চাই।”

কুদরত সাহেব ইন্টারকমটা তুলে নিয়ে বাবু নামের এক লোককে তার কাছে পাঠিয়ে দিতে বললো। “কমল বাবুই আমার পাণ্ডুলিপি দেখেটেখে দেয়। বাংলা ভাষাটা তার ভালো জানা আছে। আমি এই ব্যবসা শুরু করার পর থেকেই আমার এখানে কাজ করছে।”

দরজায় নক হতেই কুদরত সাহেব ভেতরে আসতে বললে দরজা খুলে ভেতরে ঢুকলো ষাটোর্ধ বয়সের এক রোগাপাতলা বৃদ্ধ। দেখে মনে হয় সারা বছরই অসুস্থ থাকে এই লোক।

“বাবু, ঐ চেয়ারটায় বসেন,” কুদরত হোসেন বললো। তারপর জেফরি আর জামানের দিকে ফিরলো সে। “উনারা হলেন হোমিসাইড ডিপার্টমেন্টের লোক। আমাদের এখান থেকে জায়েদ সাহেবের যে পাণ্ডুলিপি চুরি হয়েছে সে ব্যাপারে উনারা কিছু জানতে চান।”

পুলিশের কথা শুনে বাবু নামের লোকটি যেনো কুঁকড়ে গেলো। মোটা কাঁচের চশমার ভেতর দিয়ে পিটপিট ক’রে তাকালো জেফরি আর জামানের দিকে।

“আমাদের বেশিরভাগ পাণ্ডুলিপি বাবুই দেখাশোনা করেন, তবে জায়েদ রেহামানের পাণ্ডুলিপি উনি ছাড়া আর কেউ দেখেন না। আপনাদের যা জানার উনাকে জিজ্ঞেস করুন।”

“কমল বাবু, জায়েদ সাহেবের শেষ পাণ্ডুলিপিটা কি আপনি পড়ে দেখেছিলেন?” জেফরি জানতে চাইলো।

মাথা নেড়ে জবাব দিলো বুড়ো। মুখে কিছু বললো না।

“পুরোটা পড়েছিলেন?”

আবারো মাথা নেড়ে জবাব দিলো। “পুরোটা তো হাতে পাই নি। জায়েদ রেহমান ওটা শেষ করে উঠতে পাবেন নি।” জবাব দিলো ভগ্ন স্বাস্থ্যের অধিকারী কমল বাবু।

জেফরি অবাক হয়ে তাকালো কুদরত সাহেবের দিকে। “আপনার কাছে পুরো পাণ্ডুলিপি ছিলো না?”

একটু ইতস্তত ক’রে জবাব দিলো প্রকাশক। “না...মানে, উনি বলেছিলেন সামনের বইমেলার আগে পুরো কাজ শেষ ক’রে ফেলবেন। প্রায় সত্তর-আশি ভাগ কাজ হয়ে গিয়েছিলো। উনি আমাকে বললেন, আপনি প্রফ দেখাতে থাকেন এই ফাঁকে আমার বাকি কাজ শেষ হয়ে যাবে...”

“আচ্ছা।” জেফরি একটু থেমে আবার বললো কমল বাবুকে। “আপনার কাছে তো একটা কপি ছিলো সেটার কি অবস্থা?”

“গত সপ্তাহে ওটার প্রফ দেখা শেষ হলে আমি অফিসে জমা দিয়ে দেই। ওটাও চুরি হয়ে গেছে।”

“এই চুরির ব্যাপারে আপনি কি কাউকে সন্দেহ করেন?” কুদরত সাহেবের দিকে ফিরে বললো জেফরি বেগ।

“অবশ্যই,” নিজের চেয়ারে সোজা হয়ে বসলো ভদ্রলোক। “এটা তো পানির মতো পরিষ্কার...আবেদ আলী এই কাজ করিয়েছে। একটা ভুয়া পাণ্ডুলিপি জায়েদের নামে চালিয়ে ব্যবসা করছে এখন। যে-ই জানতে পারলো আমার কাছে আসলটা আছে সঙ্গে সঙ্গে সেটাও চুরি ক’রে নিলো।”

“আপনার সাথে কি আবেদ আলীর সম্পর্ক খারাপ ছিলো?”

“আমাদের সাথে আসলে ওরকম কিছু হয় নি। ব্যাপরটা একেবারেই ব্যবসায়িক। জায়েদ রেহমানকে নিজের কজায় রেখে দীর্ঘদিন ব্যবসা করেছে সে...কোটিকোটি টাকা কামিয়েছে। বন্ধুত্বের সুযোগে লেখককে ঠকিয়ে গেছে দিনের পর দিন। জায়েদ সাহেবের আগের স্ত্রীর সাথে তার ছিলো ঘনিষ্ঠ সম্পর্ক, সেই সুযোগ কাজে লাগিয়ে আবেদ আলী লেখককে একেবারে নিজের পকেটে রেখে দিয়েছিলো...” একটু থেমে আবার বলতে লাগলো কুদরত হোসেন। “উনি যখন আমাকে উনার বই দেয়া শুরু করলেন তখন থেকেই আমার সাথে তার দ্বন্দ্ব। আমার নামে যা তা বলে বেড়াতো। জায়েদ সাহেবের সাথেও তার সম্পর্ক নষ্ট হয়ে যায় তখন থেকে—”

“আপনার সাথে জায়েদ রেহমানের পরিচয় কিভাবে হলো?” তার কথার মাঝখানে বাধা দিয়ে বললো জেফরি।

থতমত খেয়ে গেলো প্রকাশক ভদ্রলোক। জবাবটা মনে মনে গুছিয়ে নেবার জন্যে একটু ভেবে নিলো। “উনার দ্বিতীয় স্ত্রী আমার আত্মীয় হয়...বেশ ঘনিষ্ঠ আত্মীয় বলতে পারেন।”

একটু চুপ ক’রে থেকে জামানের দিকে তাকালো জেফরি। এতোক্ষণ ধরে সে কোনো কথা বলে নি। “কুদরত সাহেব, আপনি মনে করছেন লেখক জায়েদ রেহমানের যে বইটি অবয়ব প্রকাশনী থেকে বের হয়েছে সেটা আসলে তিনি লেখেন নি?”

“অবশ্যই। তার সাথে তো জায়েদ সাহেব কথাই বলতেন না। তাছাড়া উনার খুন হবার কয়েক দিন আগেও আমি দেখা ক’রে এসেছি। উনি আমাকে বলেছেন এই বইয়ের কাজ শেষ করতে আরো এক-দেড় মাসের মতো সময় লাগতে পারে।”

“আপনি কি অবয়ব প্রকাশনী থেকে বের হওয়া বইটি পড়ে দেখেছেন?”

“হ্যা, যেদিন বের হয় সেদিনই কিনে এনেছি কয়েক কপি। কিছুটা পড়েও দেখেছি। একেবারে জালিয়াতি। এরকম জালিয়াতি এ দেশের প্রকাশনা ইতিহাসে আর কখনও হয় নি।”

“আপনার কাছে যে পাণ্ডুলিপিটা ছিলো সেটা তো আপনি পড়েন নি তাহলে কি ক’রে বুঝলেন ওটা জাল?”

কুদরত সাহেব একটু ভ্যাচাচ্যাকা খেলো। “ইয়ে...মানে—”

“আমি পড়েছি...”

কুদরত সাহেবকে রক্ষা করতে কমল বাবু এগিয়ে এলে তার দিকে সপ্রশ্ন দৃষ্টিতে তাকালো জেফরি বেগ।

“উনি ঠিকই বলেছেন। যেটা বের হয়েছে সেটা জাল। আমাদের কাছে যে পাণ্ডুলিপি ছিলো সেটার সাথে এই বইয়ের কিছু কিছু জায়গায় একেবারেই মিল নেই।”

“কিছু কিছু জায়গায় মিল নেই! তার মানে কিছু কিছু জায়গায় মিল আছে?”

কমল বাবু ফ্যাল ফ্যাল ক’রে চেয়ে রইলো কিছুক্ষণ। “হ্যা, মিল আছে।”

কথাটা কুদরত সাহেবের পছন্দ না হলেও এ নিয়ে কিছু বললো না সে।

একটু ভেবে জেফরি বললো, “দুয়েকটি উদাহরণ দিতে পারবেন? মানে ঠিক কোন্ কোন্ জায়গায় অমিল আছে?”

“সব তো মনে নেই তবে একটা ব্যাপারে আমি নিশ্চিত...” কুদরত সাহেবের দিকে তাকালো ভদ্রলোক। “অবয়ব প্রকাশনী থেকে যে বইটি বের হয়েছে

সেখানে জায়েদ সাহেব নিজের জীবনে এমন কিছু কথা স্বীকার করেছেন যেটা আমাদের কাছে থাকা পাণ্ডুলিপিতে একদমই ছিলো না।”

“আরেকটু পরিষ্কার ক’রে বলুন?”

“...যেমন তার দাম্পত্য জীবন, নারীঘটিত ব্যাপারগুলো...ওখানে যেভাবে অকপটে লেখক স্বীকার করেছেন সেরকম কিছুই আমাদের কাছে থাকা পাণ্ডুলিপিটাতে ছিলো না।”

কুদরত সাহেবের দিকে তাকালো জেফরি। ভদ্রলোকের চোখেমুখে তিজ্জ হাসি লেগে রয়েছে। “বুঝলেন না, এক টিলে দুই পাখি মারা। বাণিজ্যও হলো প্রতিশোধও নেয়া হলো!”

“প্রতিশোধ?”

“হ্যা, জায়েদ রেহমানের উপর প্রতিশোধ। আমার কি মনে হয় জানেন, ঐ আবেদ আলীর সাথে জায়েদ সাহেবের আগের স্ত্রীও জড়িত আছে। তারা দু’জনে মিলেই কাজটা করেছে।”


“কোন কাজটা?”

কুদরত সাহেব ধন্দে পড়ে গেলো। তার খুব বলতে ইচ্ছে করছে জায়েদ রেহমান খুনের কথা কিন্তু সেটা বলা ঠিক হবে না। বেশি বাড়াবাড়ি করলে উল্টো তাকেই সন্দেহ করে বসতে পারে এই ইনভেস্টিগেটর। “মানে, এই চুরি আর জালিয়াতির কথা বলছি আর কি...”

“আপনার কথা যদি ঠিক হয় তাহলে তো এটাও ধরে নিতে হবে জায়েদ রেহমানকে খুন করার পেছনে তাদের হাত রয়েছে!” কথাটা বলে জেফরি স্থির চোখে চেয়ে রইলো কুদরত সাহেবের দিকে।

ভদ্রলোক কি বলবে বুঝতে পারলো না। একটু আমতা আমতা ক’রে অবশেষে বললো, “আমি তো সেটা বলতে পারবো না, তবে আপনারা তদন্ত করে দেখতে পেরেন তারা জড়িত আছে কিনা। আমার যা মনে হচ্ছে আমি কেবল সেটাই বলছি।”

জেফরি বেগ ভাবনায় পড়ে গেলো। তার আশংকাই সত্যি হয়ে উঠছে। এই কেসটা একেবারেই জটিল। গোলকধাঁধার মতো অসংখ্য গলি আছে কিন্তু বের হবার পথ পাওয়া যাচ্ছে না। বার বার একই জায়গা ফিরে আসছে নয়তো কানা গলিতে গিয়ে ঢুকে পড়ছে সে।



সি ই এ সিদ্দিকী ছেলেকে বোম্বের এক রিহ্যাবে রেখে দেশে ফিরে এসেছেন গতকাল রাতে । তার সাথে দেখা করতে এসেছে অমূল্য বাবু ।

এ ক’দিনে কি কি ঘটেছে সে সম্পর্কে জানার জন্যে সিদ্দিকী সাহেব উদগ্রীব হয়ে আছেন ।

তারা বসে আছে বিশাল ড্রইংরুমে ।

অমূল্য বাবু একটা ছোট্ট প্যাকেট বাড়িয়ে দিলো সিদ্দিকী সাহেবের দিকে ।
“এটা রাখুন । নষ্ট করার আগে একবার দেখে নিতে পারেন ।”

প্যাকেটটা হাতে নিয়ে ভালো ক’রে দেখলেন তিনি । “এটা কি?”

“জায়েদ রেহমানের সেই ইন্টারভিউয়ের টেপ ।”

“আপনি কিভাবে পেলেন?” কথাটা বলেই সিদ্দিকী সাহেব মনে মনে ভাবলেন তার এটা বলা ঠিক হয় নি । এই লোক যে কতোভাবে কতো কিছু করতে পরে সেটা তিনি নিজেও জানেন না ।

“লম্বা গল্প । পানভেল আহমেদ নামের এক সাংবাদিক এই ইন্টারভিউটা নিয়ে আমাদেরকে ব্ল্যাকমেইল করতে চেয়েছিলো ।”

“ব্ল্যাকমেইল!?”

অমূল্য বাবু আলতো ক’রে মাথা দোলালো ।

“তার মানে সে জেনে গেছে! কিভাবে জানলো?”

“জেনে গেছিলো কিনা জানি না তবে মনে হয় কিছু একটা আঁচ করতে পেরেছিলো ।”

অমূল্য বাবুর কথা শুনে সিদ্দিকী সাহেবের কাছে কেমন জানি খটকা লাগলো । “তাহলে তো বিপদের কথা—”

সিদ্দিকী সাহেবকে মাঝপথে থামিয়ে দিলো বাবু । “এটা নিয়ে চিন্তা করবেন না ।”

সিদ্দিকী সাহেব প্যাকেটটার দিকে একবার তাকিয়ে অমূল্য বাবুর দিকে তাকালেন । একটা আশংকা তার মনে উঁকি মারছে কিন্তু মুখে সেটা বললেন না ।

“ঐ সাংবাদিক এখন কোথায়?” আঙুলে ক’রে জানতে চাইলেন তিনি ।

অমূল্য বাবু দু'চোখ বন্ধ করে রাখলো কয়েক সেকেন্ড। তারপর চোখ খুলে বললো, “অতিরিক্ত মদ্যপানের কারণে হার্ট অ্যাটাকে মারা গেছে...তার কথা বাদ দিন; ইরাম কেমন আছে?”

সিদ্দিকী সাহেবের শিড়দাড়া দিয়ে শীতল একটি প্রবাহ বয়ে গেলো। “ভালো আছে। আগের মতো আর পাগলামি করে নি। মনে হয় না ওখান থেকে ফাঁকি দিয়ে পালাতে পারবে।”

“ওটা এশিয়ার মধ্যে সেরা রিহায়া। আশা করি সে সুস্থ হয়ে ফিরবে।”

মাথা নেড়ে সাই দিলেন সিদ্দিকী সাহেব। “ডাক্তার বলেছে কমপক্ষে ছ'মাস লাগবে। ড্রাগটা তো খুবই আনইউজুয়াল, তাই সময় নেবে।”

“চিন্তা করবেন না। সব ঠিক হয়ে যাবে।”

উদাস ভঙ্গিতে মাথা নেড়ে সাই দিলেন সি ই এ সিদ্দিকী। “বাকি খবর কি?”

“সব ঠিক আছে। চিন্তার কিছু নেই।” অমূল্য বাবু একটু থেমে আবার বললো, “জায়েদ রেহমানের শেষ বইটা বের হয়েছে।”

কথাটা শুনে স্থির চোখে চেয়ে রইলেন তিনি। “তাই নাকি?”

“বেশ ভালো বিক্রি হচ্ছে। এদিকে জায়েদ রেহমানের বই যে প্রকাশনী থেকে দু'বছর ধরে বের হয়ে আসছে তারা দাবি করছে তাদের কাছে নাকি জায়েদ রেহমানের আসল বইটি ছিলো।”

ভুরু কুচকে তাকালেন সিদ্দিকী। “তারপর?”

“ঐ প্রকাশক এ নিয়ে আদালতে গেছে।”

সিদ্দিকী সাহেবকে উদ্ভিগ্ন হয়ে উঠতে দেখে অমূল্য বাবু সঙ্গে সঙ্গে বললো, “চিন্তার কোনো কারণ নেই, ওরা ওদের পাণ্ডুলিপিটা খুঁজে পাচ্ছে না।”

এবার আর কিছু জিজ্ঞেস করলেন না সিদ্দিকী সাহেব।

“ওটা চুরি হয়ে গেছে।” কথাটা বলেই অমূল্য বাবু আশ্বস্ত করার ভঙ্গিতে দু'চোখ বন্ধ করে মাথাটা একটু নাড়লেন।


“জায়েদ রেহমানের হত্যাকাণ্ডের তদন্ত কতোদূর এগোলো?” প্রশ্ন পাল্টে জানতে চাইলেন সিদ্দিকী সাহেব।

“যা হবার তাই হচ্ছে। মিসেস রেহমান আর তার প্রেমিক যে খুনটা করেছে সেটা এখন প্রতিষ্ঠিত।”

“তাহলে ইরামের ব্যাপারে কোনো রকম ইনকোয়্যারি হবার সম্ভাবনা নেই?”

“না, নেই।”

স্বস্তি বোধ করলেন সিদ্দিকী সাহেব।



কুদরত হোসেনের সাথে কথা বলে আসার পর থেকে জেফরির মনে সন্দেহটা আরো দৃঢ় হয়েছে। তার সহকারী জামান খোঁজ নিয়ে জেনেছে কথা নামের যে বইটি প্রকাশ হয়েছে সেটির রয়্যালটি বাবদ অনেক টাকা চলে গেছে লেখকের সাবেক স্ত্রীর ভ্যানিটিব্যাগে।

এখন দেখা যাচ্ছে লেখকের মৃত্যুতে আসলে দু'জন মানুষ লাভবান হয়েছে : আবেদ আলী আর জায়েদ রেহমানের প্রথম স্ত্রী গোলনূর আফরোজ তরফদার।

তাহলে কি কুদরত সাহেবের কথাই ঠিক? আবেদ আলী আর গোলনূর আফরোজ তরফদার কোনো পেশাদার খুনিকে দিয়ে কাজটা করায় নি তো?

কিস্তি এটা কি ক'রে সম্ভব? জায়েদ রেহমান নিজের বাড়িতে খুন হয়েছেন। ঐ সময় সেখানে ছিলো তার স্ত্রী আর তার প্রেমিক। ব্যাপারটা তো পানির মতোই পরিষ্কার।

তারপরেও নিজের সহকারী জামানকে দিয়ে কিছু তথ্য জোগার ক'রে নিয়েছে সে। এই তথ্যগুলো খুবই ইঙ্গিতপূর্ণ বলে মনে হচ্ছে তার কাছে।

জায়েদ রেহমান খুন হবার এক সপ্তাহ আগে থেকে এখন পর্যন্ত আবেদ আলী যাদের সাথে ফোন করেছে কিংবা তাকে যারা ফোন করেছে সেটার একটা তালিকা জোগার করে নিয়ে এসেছে জামান। হোমিসাইডের জন্য কাজটা তেমন কঠিন কিছু না। সরকারী বেসরকারী সব ফোন কোম্পানিই আইন মোতাবেক হোমিসাইডকে যেকোনো ফোন নাম্বারের কললিস্ট দিতে বাধ্য। আর এই কম্পিউটারের যুগে সেটা হাতের মুঠোয় পাওয়া কয়েক মিনিটের ব্যাপার।

লেখক খুন হবার সাত দিন আগে আবেদ আলী মোট ৯৮টি কল করেছে আর রিসিভ করেছে ১২৫টি। সংখ্যাটা একজন ব্যবসায়ীর জন্য খুব বেশি কিনা বুঝতে পারছে না বেগ। তবে একটা জিনিস দেখে সে অবাকই হলো আমেরিকার একটি নাম্বার থেকে আবেদ আলীকে এই সাত দিনে ৫১২টি এসএমএস করা হয়েছে যার জবাবে আবেদ আলী নিজে করেছে ৪৮৮টি!

আমেরিকার ঐ নাম্বারটি ট্র্যাক-ডাউন ক'রে জানা গেছে সেটা সাগুফতা হোসেন মিলি নামের এক মহিলার। জেফরি বুঝতে পারলো প্রবাসী কোনো বাংলাদেশীই হবে। বিপত্তীক আবেদ আলী হয়তো ঐ মহিলার সাথে একটা সম্পর্ক গড়ে তোলার চেষ্টা করছে।

এই সাত দিনে দেশের ভেতরে আবেদ আলী যে নাম্বারে সবচাইতে বেশি ফোন করেছে সেটা আর কেউ নয়-জায়েদ রেহমানের সাবেক স্ত্রী গোলনূর আফরোজ তরফদার ।

মোট ৯ বার ফোন করেছে তাকে । আর মহিলা আবেদ আলীকে ফোন করেছে ১২ বার ।

ব্যাপারটা বেশ রহস্যজনক ঠেকলো জেফরির কাছে ।

জায়েদ রেহমানের হত্যাকাণ্ডের পুরো চিত্রটা আরেকবার ভেবে নিলো জেফরি । অনেক অসঙ্গতি আছে এই হত্যাকাণ্ডে :

শয্যাসায়ী অবস্থায় জায়েদ রেহমান নিজের ঘরে খুন হবার ঠিক আগে আবেদ আলীকে একটা মেইল ক'রে গেলেন এমন একটি ল্যাপটপে যেটা ছিলো তার নাগালের বাইরে । পাশের ঘরে তখন তার তরুণী স্ত্রী আর প্রেমিক অভিসারে মত্ত । ঠিক সেই সময় অ্যাপার্টমেন্টের নীচে এক অজ্ঞাত তরুণকে পুলিশ সন্দেহজনকভাবে ঘোরাঘুরি করতে দেখলে তাকে ধরার চেষ্টা করে কিন্তু যুবক পালিয়ে যেতে সক্ষম হয় ।

পরবর্তীতে পুলিশ আবাবো যখন জায়েদ রেহমানের অ্যাপার্টমেন্টে খোঁজ নিতে যায় তার ঠিক আগে দিয়ে ফজরের আজানের পর পরই অ্যাপার্টমেন্টের আরেক বাসিন্দা হানিফ সাহেবের পেছন পেছন আরেক অজ্ঞাত যুবক অ্যাপার্টমেন্ট থেকে বেরিয়ে গিয়ে আর ফিরে আসে নি । সেই যুবকের কোনো পরিচয় বের করা যায় নি এখন পর্যন্ত । অবাক করার বিষয় হলো ঐ দিন ভিটা নুভায় কোনো অ্যালোটির ফ্ল্যাটেই গেস্ট ছিলো না ।

তাহলে সেই যুবক কে?

জেফরি এখন অনেকটা নিশ্চিত লেখক জায়েদ রেহমানের হত্যাকাণ্ডের পেছনে যে বা যারা জড়িত তারা অনেক বেশি সতর্ক আর দক্ষ ।

পেশাদার কেউ?

সম্ভাবনাটি উড়িয়ে দেয়া যায় না ।

মিসেস রেহমান আর তার প্রেমিক যদি খুন না করে থাকে তাহলে কাজটা আর যে-ই করুক সে এটা করিয়েছে একজন পেশাদার লোককে দিয়ে । তবে এ মুহূর্তে আরো ভালো ক'রে তদন্ত না করে এসব কথা কারো সাথে শেয়ার করা যাবে না । কারণ ঐ ভদ্রমহিলা আর তার প্রেমিক যেভাবে ফেঁসে গেছে তাতে করে এই ব্যাপারটা প্রমাণ করা খুব কঠিন হয়ে উঠবে ।

ঘটনা যাই হোক না কেন জেফরি জানে এই কেসে অনেক প্রশ্ন আছে যেগুলোর উত্তর মিলছে না । শুরুতে অভাবনীয় সাফল্য পেয়ে যাওয়ার কারণেও এই কেসটার প্রতি পূর্ণ মনোযোগ দিতে পারে নি সে । একটা হত্যাকাণ্ডের তদন্ত যেভাবে যে পদ্ধতি প্রয়োগ করে করতে হয় সেভাবেই তদন্ত করতে হবে । সে

এটাও জানে কাজটা খুব একটা সহজ হবে না। তার নিজের ডিপার্টমেন্টই তাকে এখন সহযোগীতা করবে না।

হোমিসাইডে নিজের অফিসে বসে বসে ভাবছে সে। তার সামনে বসে আছে সহকারী জামান।

“আপনি কি এই ব্যাপারটা নিয়ে তদন্ত করতে চাইছেন?” জিজ্ঞেস করলো জামান।

“হ্যাঁ।”

“তাহলে এখন আমরা কি করবো?” জানতে চাইলো সে।

“আমি ভিটা নুভায় গিয়ে আরেকটু দেখে আসতে চাইছি।”

জামান বুঝতে পারলো না ভিটা নুভায় গিয়ে কী খুঁজে পাবে সে।

জামানকে সঙ্গে নিয়ে ভিটা নুভার সামনের রাস্তায় এসে দাঁড়ালো জেফরি বেগ। ভালো ক’রে অ্যাপার্টমেন্ট ভবনটি দেখে নিলো সে। আর সব লাক্সারি অ্যাপার্টমেন্ট ভবনের চেয়ে আলাদা কিছু না।

ছয় তলার এই ভবনের নীচ তলার পুরোটাই পার্কিং এরিয়া। প্রতি তলার লিফট আর সিঁড়ির ল্যান্ডিংয়ের দু’পাশে দুটো ক’রে মোট চারটি ফ্ল্যাট আছে। তার মানে পাঁচটি তলায় সর্বমোট বিশটি ফ্ল্যাট রয়েছে। জেফরির সহকারী জামান যতোটুকু খোঁজ নিয়েছে তাতে দেখা যাচ্ছে মাত্র ষোলো জন অ্যালোটি রয়েছে এখানে। যে চারজন অ্যালোটির দুটো করে ফ্ল্যাট আছে তার মধ্যে স্বয়ং জায়েদ রেহমানও আছেন।

রাস্তার ওপার থেকে পুরো ভবনটি দেখে নিলো জেফরি বেগ। ঢাকা শহরের অন্য অনেক উঁচু ভবনের মতোই ভিটা নুভার ছয়তলার ছাদে একটি মোবাইলফোন কোম্পানির টাওয়ার রয়েছে। এর আগে ব্যাপারটা তার চোখে পড়ে নি। অবশ্য এটা চোখে পড়ার মতো কোনো ব্যাপারও নয়।

রাস্তাটা পার হয়ে ভিটা নুভার দিকে এগিয়ে গেলো সে, তার পেছন পেছন সহকারী জামান।

নাইটগার্ড আসলামের জায়গায় এখন ডিউটি করছে মহব্বত নামের এক ছেলে। দিনের বেলায় সে-ই ডিউটি করে। ছেলেটা তাকে দেখেই সালাম দিয়ে এগিয়ে এলো কাছে।

নিজের পরিচয় দিয়ে এটা ওটা জানতে চেয়ে আসল কথায় চলে এলো বেগ। “ঐদিন দিনের বেলায় তুমিই তো ডিউটিতে ছিলে?”

“জি, স্যার। সন্ধ্যা পর্যন্ত আমিই ডিউটি দেই—” কথাটা বলেই মহব্বত নামের দাড়াইয়ান ছেলেটি গেটের দিকে তাকালো। এইমাত্র এক লোক গেট দিয়ে

তুকে পড়েছে। “স্যার, একটু দাঁড়ান, আমি আসতামি...” মহব্বত সেই লোকের কাছে এগিয়ে গেলো।

আগত লোকটার দিকে একবার তাকিয়ে জামানের দিকে ফিরলো জেফরি। “জামান, এই ভিটা নুভার ফ্লোরপ্যানটা জোগার করতে হবে।”

“ঠিক আছে, স্যার।”

“এই অ্যাপার্টমেন্টের বিল্ডারের কাছে গিয়ে চাইবে, বলবে ভেতর এবং বাইরের...” খেমে গেলো জেফরি। ঘাড় ঘুড়িয়ে মহব্বত আর ভিজিটরের দিকে তাকালো সে। একটা কথা তার মনোযোগ আকর্ষণ করেছে।

“ঐ দিন না একজন আইলো...আবার কি হইলো? টাওয়ারে কি প্রবলেম হইছে নাকি?” মহব্বত ভিজিটরের আইডিকার্ড চেক করে দেখে জানতে চাইলো।

“ঐ দিন একজন এসেছে মানে!?” লোকটা বিস্মিত হলো। “গত মাস থেকে এই জোনটা তো আমিই দেখাশোনা করছি...আমি ছাড়া আবার কে আসবে?”

“আরে আমি নিজে ছিলাম, আপনাকে এক লোক আইছিলো-”

“কী যে বলেন না,” মেইনটেনান্স ক্রু বললো। “আপনি-”

“মহব্বত, কি হয়েছে?” তাদের কাছে এগিয়ে এসে জেফরি জানতে চাইলো।

জেফরিকে দেখামাত্র মহব্বত আইডি কার্ডটা ফিরিয়ে দিয়ে ভিজিটরকে তাড়াতাড়ি ভেতরে চলে যেতে বলে জেফরির দিকে ফিরে বললো সে, “না, স্যার, কিছু না। টাওয়ারের লোক।”

“ওকে তুমি কী যেনো বলছিলে...কয়েক দিন আগে ওদের আরেকজন লোক এসেছিলো...”

“ও,” দাঁত বের করে হেসে বললো মহব্বত। “কয়েক দিন আগে ওগো আরেকজন আইছিলো তো, আবার এখন আরেকজন আইছে, তাই জিজ্ঞাস করছিলাম টাওয়ারে কোনো প্রবলেম হইছে কিনা।”

“ঐ দিন মানে কোন্ দিন?” বেগ জানতে চাইলো।

“জায়েদ স্যার যে রাইতে খুন হইলেন, ঐদিন সন্ধ্যার একটু আগে...”

“আচ্ছা। তাহলে ও যে তোমাকে বললো কেউ আসে নি?”

“হ, তাই তো কইলো।”

“ঐ দিন টাওয়ারের লোকটা এই লোক ছিলো না?”

“না। অন্য আরেকজন আইছিলো।”

“ঐ লোকটা কখন এখান থেকে চলে গেছিলো?”

“আমি কইবার পারুম না। আমি তো তার একটু বাদেই ডিউটি শ্যাম কইরা চইলা যাই। এটাই কইবার পারবো আসলাম তাই।”

জেফরি বেগ জামানের দিকে তাকালো। মনে হলো তার সহকারী জামানও কৌতূহলী হয়ে উঠেছে তথ্যটা জেনে।

“আসলাম এখন কোথায়?” জানতে চাইলো জামান।

“ঘরেই আছে,” পার্কিংএরিয়ার শেষ প্রান্তে একটা ছোট্ট ঘর দেখিয়ে বললো মহব্বত। “সারা রাত ডিউটি কইরা ঘুমাইতাছে।”

“ঠিক আছে। ওকে একটু ডেকে আনো। ওর সাথে কথা বলবো।”

পাঁচ মিনিট পর আসলাম এসে উপস্থিত হলো। তার চোখে সদ্য ঘুম থেকে জেগে ওঠার স্পষ্ট লক্ষণ।

“টাওয়ারের লোকটি কখন এই ভবন থেকে বের হয়ে গিয়েছিলো?” বেগ প্রশ্ন করলো আসলামকে।

“টাওয়ারের লোক! আমি তো কিছু জানি না!” আসলাম বিস্মিত।

জেফরি তাকালো মহব্বতের দিকে। “ও জানে না?”

“আমি তো তারে কই নাই। ডিউটি শ্যাষ কইরা ওরে বুঝাইয়া দিয়া চইলা গেছি,” জবাবে বললো মহব্বত। তারপর আসলামের দিকে তাকিয়ে বললো সে, “আসলাম ভাই, আমার ডিউটি শ্যাষ হইবার একটু আগে টাওয়ারের এক লোক আসছিলো...তারে কি আপনি বের হইয়া যাইতে দেহেন নাই?”

“না। এরকম কাউরে তো দেহি নাই।”

জেফরির গোয়েন্দা মন বলছে কিছু একটা আছে। “আসলাম, তুমি এরকম কাউকে বের হয়ে যেতে দ্যাখো নি, ঠিক ক’রে বলো?”

“না, স্যার। আমি তো জানিই না টাওয়ারের লোক ঢুকছে।” আসলাম ঘাবড়ে গিয়ে বললো।

এবার মহব্বতের দিকে ফিরলো জেফরি। “আচ্ছা, টাওয়ারের যে লোকটি সন্ধ্যার একটু আগে এখানে ঢুকেছিলো তাকে কি তুমি চেনো?”

“একেক সময় একেক লোক আসে, চিনমু কেমনে?”

জামানের দিকে তাকালো জেফরি। টাওয়ারের মেইনটেনান্স ক্রু লিফট দিয়ে উপরে চলে গেছে।

“জামান, ঐ লোকটাকে ডেকে আনো...”

মেইনটেনান্স ক্রুকে ছয়তলার ছাদ থেকে ডেকে এনে জেফরি আর জামান ভালো ক’রে জিজ্ঞাসাবাদ ক’রে নিশ্চিত হয়েছে বিগত পনেরো দিনে এই প্রথম সেলফোন কোম্পানি থেকে টাওয়ারের মেইনটেনান্স ক্রু ভিটা নুভায় এসেছে। জায়েদ রেহমান যে রাতে খুন হয়েছে সেদিন সন্ধ্যার একটু আগে তাদের কোনো লোকই এখানে আসে নি।

একটা কু পাওয়া গেলো। জায়েদ রেহমান খুন হবার পর ভোরের দিকে ফজরের আজানের পর পর যে অজ্ঞাত যুবক ভিটা নুভা থেকে বের হয়ে গিয়েছিলো তার সম্ভাব্য একটা ব্যাখ্যা পাওয়া যাচ্ছে এখন।

মেইনটেনান্স ক্রু'কে জেরা করা শেষ ক'রে জেফরি আর জামান সোজা চলে এলো ভিটা নুভার ছয় তলার সিঁড়িঘরের উপর স্থাপিত মোবাইলফোন টাওয়ারের কাছে।

ছয়তলা ছাদ থেকে একটা স্টিলের মই বেয়ে ওটার উপরে উঠতে হয়। ছোট্ট একটা চিলেকোঠার মতো ঘর আর তার ছাদেই স্থাপিত করা হয়েছে লোহার ফ্রেমের তৈরি সেলফোন টাওয়ারটি। এখানে কোনো লোক খুব সহজেই লুকিয়ে থাকতে পারবে। এখন প্রশ্ন, সম্ভাব্য খুনি এখন থেকে জায়েদ রেহমানের ঘরে ঢুকলো কী করে?

ছাদের চারপাশটা ঘুরে দেখলো জেফরি। চার ফিট উঁচু দেয়াল দিয়ে পুরো ছাদটি ঘেরা। সেই দেয়ালের উপর রেলিংয়ের মতো মোটা লোহার পাইপ আছে। আজকাল অনেক অ্যাপার্টমেন্টেই এরকম ডিজাইনের রেলিং থাকে।

দক্ষিণ দিকের বাউন্ডারি দেয়ালের কাছে এসে নীচের দিকে তাকালো সে। জেফরি এখন যেখানে দাঁড়িয়ে আছে ঠিক তার নীচেই জায়েদ রেহমানের ঘরটা। সেই ঘরের দক্ষিণমুখী বেলকনিটা দেখতে পাচ্ছে উপর থেকে। তার পাশেই, অল্প দূরে মিসেস রেহমানের ঘরের বেলকনি। একেবারে পাশাপাশি। দুটোর মাঝখানে দূরত্ব বড়জোর তিন ফিট হবে, কিন্তু জেফরির মনোযোগ চলে গেলো অন্য দিকে।

ছাদের যে অংশে সে দাঁড়িয়ে আছে সেখান থেকে লেখকের বেলকনিতে খুব সহজেই নামা যাবে। একটা দড়ি রেলিংয়ে বেধে নিলেই কাজটা করা সম্ভব।

পুরো দৃশ্যটা ভাবলো সে। টাওয়ারের মেইনটেনান্স ক্রু সেজে দাড়াইয়ান বদলির ঠিক আগে দিয়ে অজ্ঞাত এক যুবক ঢুকে পড়ে ভিটা নুভায়। তারপর টাওয়ারের উপর গিয়ে লুকিয়ে থাকে সে। রাত গভীর হলে ছাদের রেলিংয়ে দড়ি লাগিয়ে জায়েদ রেহমানের বেলকনিতে নেমে পড়ে সেই যুবক। লেখককে খুন করে আবার সেই দড়ি বেয়েই উঠে পড়ে ছাদে। ভোর হবার আগপর্যন্ত অপেক্ষা করে। তারপর ফজরের নামাজ পড়তে যাচ্ছে এরকম একটা ভান করে অ্যালোটি হানিফ সাহেবের পেছন পেছন বেরিয়ে পড়ে ভিটা নুভা থেকে।

অসাধারণ! মনে মনে ভাবলো জেফরি বেগ।



জায়েদ রেহমানের পাঁচশ' পৃষ্ঠার বইটি বিতর্কের ঝড় তুলেছে। এমন সব কথা লেখক স্বীকার ক'রে গেছেন যা সব ধরণের পাঠককেই আগ্রহী ক'রে তুলেছে ব্যাপকভাবে।

শুধু যে নারীঘটিত কেলেংকারীর ঘটনাগুলোই তিনি অকপটে বলে গেছেন তা নয়, নিজের জীবনে এমন কোনো বিষয় নেই যে পাঠককে জানান নি তিনি। এমন কি বিশ্বসাহিত্যের কোন্ লেখকের কোন্ লেখা নকল করেছেন সেসবের বিস্তারিত ফিরিস্তিও দিয়ে গেছেন অবলীলায়।

আর এসব কিছু পড়ে শুধুমাত্র নির্মল প্রকাশনীর সত্বাধিকারী কুদরত সাহেবই নয় বরং অনেক পাঠকের মনেও প্রশ্ন জাগছে, এই বই কি সত্যিই জায়েদ রেহমান লিখেছেন?

নিজের সৃষ্ট বিখ্যাত চরিত্র নীলকণ্ঠ সম্পর্কে তিনি বলেছেন, এটা নাকি তিনি আশির দশকে জনপ্রিয় আমেরিকান টিভি সিরিজ হাইওয়ে টু হ্যাভেন থেকে নিয়েছেন। যেখানে মূল চরিত্রটি বেশ রহস্যময় আর অলৌকিক ক্ষমতার অধিকারী, কিছুই করে না, পথে পথে ঘুরে বেড়ায় একটা হ্যাভারসেক নিয়ে। সব সময় একটি পোশাকই পরে থাকে সে : রঙচটা জিম্প্যান্ট আর লেদার জ্যাকেট।

এই পথ চলতে গিয়ে বিচিত্র সব মানুষের সাথে তার পরিচয় হয়। সেইসব মানুষের সাথে গড়ে তোলে সখ্যতা, হয়ে ওঠে তাদেরই একজন, তারপর সেইসব মানুষের জীবনে বিশাল কোনো সমস্যার সমাধান অলৌকিক উপায়ে সমাধান করে সবার অগোচরে উধাও হয়ে যায়। শুরু করে আবার নতুন আরেকটি অভিযাত্রা।

ঠিক যেনো জায়েদ রেহমানের রহস্যময় চরিত্র নীলকণ্ঠের মতো!

এই চরিত্রটি এ দেশে ভীষণ জনপ্রিয়। এতোটাই জনপ্রিয় যে তরুণদের মধ্যে বিশাল একটি দল নিজেদেরকে রহস্যমানব নীলকণ্ঠ বলে দাবি করে কিংবা সেরকম ভাবতে ভালোবাসে।

সবচাইতে বিস্ময়কর তথ্য হলো লেখক জায়েদ রেহমান তার লেখায় সব সময় দেশপ্রেম আর ন্যায়নীতির কথা বললেও কথা নামের আত্মজীবনীতে নিদ্বিধায় স্বীকার করেছেন প্রতি বছর আয়কর হিসেবে তিনি বিরাট রকমের ফাঁকি দিতেন সরকারকে।

বছরে যে লোকের আয় কোটি টাকার উপরে তিনি কিনা আয়কর দিতেন মাত্র কয়েক হাজার টাকা। একটা বই থেকে যদি দশ লক্ষ টাকা পেতেন তাহলে সরকারী হিসেবে সেটাকে মাত্র দশ-পনেরো হাজার টাকা দেখাতেন।

কথা নামক বইয়ের সবচাইতে আকর্ষণীয় দিক অবশ্যই লেখকের নারীঘটিত কাহিনীগুলো। এতো খোলামেলা বর্ণনা রয়েছে যে অনেকের ভুরু কপালে গিয়ে ঠেকছে।

জায়েদ রেহমানের নিজের স্বীকারোক্তিতে যতো নারীর (তার মধ্যে বেশ কয়েকজনকে কিশোরী বলাই সম্ভব) কথা এসেছে তার খুব কম অংশই জনসাধারণ জানতো। তালিকাটি এতো বড় যে এক জায়গায় লেখক নিজেই স্বীকার করেছেন অনেকের নামই নাকি তিনি ভুলে গেছেন!

অল্প বয়সী মেয়েদের ব্যাপারে বরাবরই তার আগ্রহ ছিলো। অনেক মেয়েকে তিনি তার নাটক আর ছবিতে অভিনয় করার আশ্বাস দেখিয়ে নিজের বাগান বাড়িতে নিয়ে গিয়ে ভোগ করেছেন।

পুরো বইটি পড়ে অনেকেই মন্তব্য করেছে এটা জায়েদ রেহমানের আত্মজীবনী নয়, নয় এটা হলো তার আত্মবিধ্বংসী কাজ।

তবে নিজের সুনাম বিনাশ করার পাশাপাশি আরেকজনের ভাবমূর্তিও প্রায় ধ্বংস করে ফেলেছেন তিনি—তার দ্বিতীয় স্ত্রী বর্ষার।

ছোটো মেয়ের বাঞ্চবী বর্ষার সাথে তার সম্পর্কের খেসারত দিতে গিয়ে লেখককে তার পরিবার আর সন্তানদের পর্যন্ত ত্যাগ করতে হয়েছে অথচ আত্মজীবনীতে সেই মেয়ে সম্পর্কে এমন সব কথা বলেছেন তিনি যা কিনা তার নিন্দ্রুকেরা বললহেই বেশি মানাতো।

হু হু করে বইটি বিক্রি হচ্ছে। কুদরত সাহেব আদালত থেকে কোনো ডিক্রি পাওয়ার আগেই নিঃশেষ হয়ে গেছে এক লক্ষ কপি। ফুলেফেঁপে উঠেছে অবয়ব প্রকাশনীর ব্যবসা। জেফরির সহকারী জামান জানতে পেরেছে লেখকের প্রথম স্ত্রী, যার নামে বইটির সত্ত্ব দিয়ে গেছেন জায়েদ সাহেব, তিনি ইতিমধ্যেই ষাটলক্ষ টাকা পেয়েছেন রয়্যালটি বাবদ।

টাকার এই অঙ্কের কথা শুনে জেফরির মনে সন্দেহটা আরো বেড়ে গেলো। তার আশংকা পেশাদার কাউকে দিয়ে এ কাজ করিয়ে থাকবে লাভবান হওয়া এইসব লোকজন। কিন্তু ভাবনাটা যতো সহজ প্রমাণ করাটা ততো সহজ হবে না।

আরেকটা বিষয় রয়েছে বইটিতে লেখক জায়েদ রেহমান তার কিছু শত্রুর কথা ব্যক্ত করেছেন।

পমি নামের এক উঠতি অভিনেত্রী, যাকে লেখক তার একটি ছবিতে

নিয়েছিলেন, কিন্তু মেয়েটি ছবির মাঝামাঝি পর্যায়ে এসে অজ্ঞাত এক কারণে ছবিটা ছেড়ে দেয়। লেখক স্বীকার করেছেন সেই অভিনেত্রীকে তিনি বাজে প্রস্তাব দেয়াতে মেয়েটি ক্ষেপে গিয়ে লেখকের সাথে দুর্ব্যবহার করে। বইতে নিজের আচরণের জন্য জায়েদ রেহমান অবশ্য ক্ষমা চেয়েছে সেই অভিনেত্রীর কাছে।

এরকম আশংকা তিনি আরো দু'জনের কাছ থেকে করেছেন—তার দ্বিতীয় স্ত্রী বর্ষা আর তার গোপন প্রেমিক।

বর্ষার একজন প্রেমিকের কথাও তিনি ইঙ্গিত করেছেন তবে স্পষ্ট করে নাম বলেন নি। জীবনের শেষ দিনগুলো এই আশংকাই তিনি করতেন যে, তার খুব কাছের লোকজন তাকে মেরে ফেলার জন্য ষড়যন্ত্র করছে।

অবিশ্বাস্য ব্যাপার!

পুরো দেশ এই বইয়ের আলোচনায় মুখর। অনেকের মনেই প্রশ্ন, জায়েদ রেহমানের কি মস্তিষ্ক বিকৃতি ঘটেছিলো?

আবার অনেকে মনে করছে শেষ দিনগুলোতে এসে লেখক নিজের কৃতকর্মের জন্য অনুতপ্ত ছিলেন। এ কথাটা অবশ্য জায়েদ রেহমান নিজেও তার বইয়ে বার বার বলেছেন।



অধ্যায় ৪১

জায়েদ রেহমানের হত্যাকাণ্ডের এক সপ্তাহ পর তার দ্বিতীয় স্ত্রী বর্ষা জামিনে মুক্তি পেয়ে গেলো। দু'বছরের এক শিশুসন্তান থাকার কারণে আদালত ভদ্রমহিলাকে জামিন দেন। এজন্যে অবশ্য নির্মল প্রকাশিনীর কুদরত সাহেবকে দেশের নাম করা এবং সর্বোচ্চ পারিশ্রমিক নেয়া এক ব্যারিস্টারের শরণাপন্ন হতে হয়েছে।

তবে মিসেস রেহমানের প্রেমিক আলম শফিককে আদালত জামিন দেয় নি।

খবরটা শুনে জেফরি বেগ একটুও অবাক হলো না। তার ভাবনায় এখন মিসেস রেহমান আর আলম শফিক নেই। লেখক জায়েদ রেহমানের হত্যাকাণ্ডটি নিয়ে সে একেবারে প্রথম থেকে তদন্ত শুরু করতে চাইছে।

ইতিমধ্যেই তার কাছে যে সব তথ্য রয়েছে তাতে করে পুরো মামলাটি নতুন করে ভাবতে বাধ্য করছে তাকে।

তার সহকারী জামান ভিটা নুভায় যে সেলফোন কোম্পানির টাওয়ার আছে তাদের সাথে যোগাযোগ করে জানতে পেরেছে ঐ দিন তাদের কোনো মেইনটেনান্স ক্রু ভিটা নুভায় যায় নি। মোট তিনজন ক্রু ঐ এলাকার টাওয়ারগুলো দেখাশোনা করে, তাদের কেউই লেখক খুন হবার অন্তত এক সপ্তাহ আগে ভিটা নুভায় যায় নি।

তার মানে দাঁড়ালো এক অজ্ঞাত যুবক সুকৌশলে অত্যন্ত ধূর্ততার সাথে মেইনটেনান্স ক্রু সেজে ভিটা নুভায় ঢুকে পড়েছিলো। সম্ভবত সেই যুবকই ভোরবেলায় ফজরের আজানের পর পর হানিফ সাহেবের পেছন পেছন অ্যাপার্টমেন্ট ভবন থেকে বের হয়ে যায়।

অজ্ঞাত সেই যুবক যে পেশাদার একজন সে ব্যাপারে জেফরির মনে কোনো সংশয় নেই। ভিটা নুভায় কখন মোবাইল ফোন কোম্পানির মেইনটেনান্স ক্রু আসে, কখন দাড়াওয়ানদের বদলি হয়, সবই জানতো সে। আর এটা জানার জন্যে দীর্ঘদিন তাকে ভিটা নুভার সব কিছু পর্যবেক্ষণ করতে হয়েছে।

কিন্তু কিভাবে?

এই প্রশ্নের জবাব জানতে আবারো চলে এলো ভিটা নুভায়। তবে এবার আর তার সঙ্গে জামান নেই।

ভিটা নুভার গেটের সামনে আসতেই দাড়াইয়ান মহক্বত তাকে দেখে সালাম দিলো। ছেলেটা ভয়ে ভয়ে আছে আবার বুঝি জিজ্ঞাসাবাদ করা হবে তাকে। কিন্তু জেফরি তাকে কিছু না বলে ভিটা নুভার চারপাশটা ভালো ক'রে দেখতে শুরু করলো।

দুপুর বেলা। রাস্তাটা প্রায় ফাঁকা। ভিটা নুভা ধানমণ্ডির একটি নিরিবিলি রাস্তার কর্নার পুটে অবস্থিত। এর দু'পাশ দিয়ে অর্থাৎ দক্ষিণ এবং পশ্চিম দিক দিয়ে রাস্তা চলে গেছে। পেছনে, উত্তর দিকে ধানমণ্ডি লেক। শুধুমাত্র পূর্ব দিকে আরেকটা অ্যাপার্টমেন্ট ভবন রয়েছে। সেই অ্যাপার্টমেন্ট ভবন থেকে জায়েদ সাহেবের ফ্ল্যাট এবং ভিটা নুভার প্রধান প্রবেশপথটি দেখা যায় না সুতরাং সেখান থেকে পর্যবেক্ষণ করা সম্ভব নয়।

তাহলে?

ভিটা নুভার প্রধান প্রবেশ পথের সামনে দাঁড়িয়ে রাস্তার ওপারে তাকাতেই বিশাল একটি খেলার মাঠ চোখে পড়লো তার। কোনো বাড়িঘর নেই। তবে ওখানেই একটা সম্ভাবনা দেখতে পেলো ইনভেস্টিগেটর জেফরি বেগ।

রাস্তা পার হয়ে চলে এলো ভিটা নুভার ঠিক বিপরীত দিকে ফুটপাতে।

ইস্পেস্টর এলাহী নেওয়াজ এখান থেকেই আরেক অজ্ঞাত যুবককে সন্দেহজনকভাবে জায়েদ রেহমানের ফ্ল্যাটের দিকে তাকিয়ে থাকতে দেখেছিলো। জেফরির মনোযোগ গেলো ফুটপাতের পাশেই ছোট্ট একটি চায়ের টংয়ের দিকে।

টংয়ের দু'পাশে দুটো কাঠের বেঞ্চ বসানো কাস্টমারদের জন্য। দুটো বেঞ্চই ফাঁকা। কোনো খন্দের নেই। দোকানি অলস ভঙ্গিতে বসে বসে রেডিও শুনছে। বেগকে আসতে দেখে সম্ভাব্য ক্রেতা ভেবে একটু নড়েচড়ে বসলো সে।

একটা বেঞ্চ গিয়ে বসলো সে। “এক কাপ চা দিন, চিনি কম,” দোকানিকে বললো।

চা বানাতে ব্যস্ত হয়ে পড়লো লোকটা।

একটু সময় পার হলে বললো সে, “কতো দিন ধরে আছেন এখানে?”

“এক বছর তো অইবোই,” চা বানাতে বানাতে জবাব দিলো লোকটা।

“সকাল ক'টা থেকে দোকান খুলেন?”

“আটটার দিকে,” কাপে চিনি মিশিয়ে চামচ দিয়ে নাড়তে নাড়তে বললো দোকানি। “আর বন্ধ করি...এই ধরেন, রাইত দশটা-এগারোটার দিকে।”

জেফরির দিকে চায়ের কাপটা বাড়িয়ে দিলে সেটা হাতে নিয়ে সে বললো, “এই চা বিক্রি ক'রে আপনার চলে?”

লোকটা মলিন হাসি দিলো। “চলে আর কি...গরীব মানুষ...কোনোরকম খায়া-পইড়া বাঁচি।”

“আপনার নাম কি?”

“তালেবর মিয়া।” দোকানি এতোসব প্রশ্ন শুনে অবাক হচ্ছে না। এখানে অনেক ক্রেতাই চা খেতে খেতে এরকম টুকটাক আলাপ করে তার সাথে। খুব একটা ভীড় না থাকলে তারও কথা বলতে ভালো লাগে।

চায়ে চুমুক দিয়ে জেফরি এমন একটা ভাব করলো যেনো খুব ভালো স্বাদ পেয়েছে। “আপনার চা তো খুব ভালো...”

দোকানির চোখ খুশিতে চক চক ক’রে উঠলো। “চ্যাষ্টা করি ভালো কইরা বানাইতে।”

“এই নিরিবিলা এলাকায় কাস্টমার কি খুব একটা আসে?”

“দিনের বেলায় বেশি কাস্টমার আসে না, তয় সন্ধ্যার পর অনেক আসে।” মুচকি একটা হাসি দিয়ে আবার বলতে লাগলো সে। “ডাইলখোর পোলাপান...”

তার কথা শুনে হেসে ফেললো জেফরি। “আচ্ছা।”

“এতো চিনি খাইবার পারে এরা...চিনি খাইলে নাকি নেশা ধরে।”

“শুধু ডাইলখোররাই আসে?”

“না, অনেকেই আসে...তয় ডাইলখোরের সংখ্যাই বেশি।”

“আচ্ছা, আপনার এখানে নিয়মিত আসতো? কিন্তু এক সপ্তাহ ধরে আর আসে না এরকম কোনো কাস্টমার আছে কি?”

এবার লোকটা জেফরির দিকে চেয়ে রইলো। সে বুঝতে পারছে এ লোক খামোখাই তার সাথে আড্ডা জমানোর চেষ্টা করছে না। “আপনি কে? এইসব জানতে চাইতাম ক্যান?” সন্দেহের সুরে বললো দোকানি।

জেফরি মুচকি হেসে বললো, “কেন জানতে চাইছি তার কারণ আছে। যা জানতে চাইছি বলুন।”

লোকটা জেফরির দিকে ভালো ক’রে তাকিয়ে দেখে নিলো। “আপনি কি পুলিশের লোক?” ভয়ে ভয়ে জানতে চাইলো সে।

মুচকি হেসে জেফরি মাথা নেড়ে সায় দিলো। “আপনার চাটা খুব ভালো। আমি এখানে প্রায়ই আসবো, আপনার চাও খাবো। আপনি আমাকে সাহায্য করলে আপনার লাভ হবে।”

তালেবর মিয়া চুপচাপ শুনে গেলো, কিছু বললো না।

“আপনার এখানে কয়েক দিন আগে রোজ রোজ আসতো, এখানে বসে বসে চা খেতো, এখন আর আসে না, সেরকম একজনের কথা জানতে চাইছি আমি।”

“সে কি করছে?” আশ্বে ক’রে জানতে চাইলো দোকানি।

বেগ মুচকি হেসে বললো, “এরকম একজন তো আসতো, তাই না?”

“তা আসতো...তয় ঐ বাড়িতে লেখক খুন অইবার পর থেইকা আর আসে না,” ভিটা নুভার দিকে ইঙ্গিত ক’রে বললো সে।

“আচ্ছা,” বললো বেগ। “কতো দিন আগে থেকে আসতো?”

“উমমম...এই ধরেন এক মাস ধইরা...”

“লোকটা দেখতে কেমন?”

“অনেক সুন্দর...আপনার মতোই...”

জেফরি একটু চমকে উঠলো। এ নিয়ে দু’জন এ কথা বললো তাকে। “বয়স কি রকম হবে?”

“আপনার বয়সীই অইবো...ছোটোও অইবার পারে।”

“লোকটা কখন আসতো এখানে?”

“ঠিক নাই। সকাল, বিকাল, রাইত সব সময়ই আসতো।”

“কি করতো?”

“চা খাইতো আর পেপার পড়তো। খুব বেশি কথা কইতো না।”

“ঐ বাড়িটার দিকে তাকিয়ে থাকতো?” ভিটা নুভা দেখিয়ে বললো জেফরি।

“হ।”

“লোকটা কোথায় থাকতো, জানেন?”

“না। মনে হয় নতুন ভাড়া আইছিলো...কিন্তু কুন বাড়িতে থাকতো কইবার পারুম না।”

“লোকটাকে যদি আবার দেখেন চিনতে পারবেন?”

“মনে হয় পারুম।”

“তাকে যদি কখনও আবার দেখেন আমাকে জানাবেন।” কথাটা বলেই জেফরি তার একটা ভিজিটিং কার্ড বের করলো। “লেখাপড়া জানেন?”

দাঁত বের ক’রে হেসে বললো দোকানি, “হ, জানি। তিন কেলাশ পর্যন্ত পড়ছিলাম।”

“ভালো। ঐ লোকটাকে যখনই দেখতে পাবেন সঙ্গে সঙ্গে আমাকে জানাবেন। আপনাকে অনেক বখশিস দেবো।”

লোকটার দিকে কার্ডটা বাড়িয়ে দিলে সেটা হাতে নিয়ে ভালো ক’রে দেখে সে বললো, “স্যার, ঐ লেখকের খুনের ব্যাপার, না?”

জেফরি একটু ভেবে বললো, “হুমমম। কিন্তু কারোর সাথে এ নিয়ে আলাপ করবেন না। ঠিক আছে, তালেবর মিয়া?”

“ঠিক আছে, স্যার। ঐ লোকটারে দেখলেই আমি আপনারে ফোন কইরা খবর দিমু। আমার নিজের মোবাইল আছে।”

জেফরি একটু অবাধ হবার ভান করলো। “তাই নাকি। তাহলে তো ভালোই হলো। আপনার মোবাইল নাম্বারটা আমাকে দিন।”

দোকানি তাকে তার মোবাইল নাম্বারটা বললে জেফরি সেটা নিজের সেলফোনে রেকর্ড ক'রে রাখতে যাবে অমনি ফোনটা বিপ্ করে উঠলো ।

ইনকমিং মেসেজের বিপ্ । মেসেজটা ওপেন করলো সে ।

এবার ইংরেজি বর্ণে বাংলা এসএমএস :

কেমন আছো?

একটা দীর্ঘশ্বাস বেড়িয়ে এলো তার ভেতর থেকে । বুঝতে পারছে তারচেয়ে রেবার কষ্টটাও কম নয় । কিন্তু কিছুই করার নেই । তাদের নিয়তি নির্ধারিত হয়ে গেছে । আর সেই নিয়তি মেনে নিতে তাদের দু'জনেরই খুব কষ্ট হচ্ছে ।

রেবাকে হারানোটা খুব সহজ কিছু নয় । এই হারানোর ব্যাপারটা ভেতরে ভেতরে তাকে বিপর্যস্ত ক'রে তুলছে ।

রেবা এখন কি করছে? খুব জানতে ইচ্ছে করছে জেফরির । নববিবাহিত একটি মেয়ে তার প্রেমিকের জন্য দিনরাত মনোকষ্টে ভুগছে আবার নতুন সংসারে গিয়ে তাকে মানিয়েও চলতে হচ্ছে—জেফরির চেয়ে রেবার কষ্টটা যে আরো বেশি, এটা সে বোঝে ।

“স্যার?”

তালেবর মিয়র কথায় সম্মিত ফিরে পেলো বেগ ।

“কি?”

“নাম্বারটা নিলেন না যে?”

বুঝতে পারলো না বেগ । “কিসের নাম্বার?”

“আমার মোবাইল ফোনের!” অবাক হয়ে বললো তালেবর মিয়া ।

“ও,” বুঝতে পারলো সে । “হ্যা, বলো...”

তালেবর মিয়া তার নাম্বারটা বলে গেলো আবার ।



মিসেস রেহমান জামিন নিয়ে বের হয়ে এলেও ভিটা নুভার নিজের অ্যাপার্টমেন্টে ওঠে নি। ওটা এখনও পুলিশ সিজ ক'রে রেখেছে। দু'বছরের শিশু সন্তানকে নিয়ে সোজা মায়ের বাড়িতে উঠেছে বর্ষা।

সাত দিনের দুর্বিষহ স্মৃতি আর সারা দেশের মিডিয়ায় তার সম্পর্কে যে সব মুখরোচক কথাবার্তা প্রচার হচ্ছে তারচেয়েও বড় হয়ে দেখা দিয়েছে অন্য আরেকটি বিষয় : জায়েদ রেহমানের আত্মজীবনী কথা।

সে কোনোভাবেই বিশ্বাস করতে পারছে না এ বই জায়েদ রেহমান লিখেছে। নির্মল প্রকাশনীর কুদরত সাহেব অবয়ব প্রকাশনী থেকে বের হওয়া বইটির এক কপি পাঠিয়ে দিয়েছে তার কাছে। অনেকটুকু পড়ে ফেলার পর মিসেস রেহমান নিশ্চিত বইটি জায়েদ রেহমানের কথা নয়, এটি অন্য কারোর কথা!

এক বছর আগে ওপেনহার্ট সার্জারির পর থেকেই জায়েদ রেহমান একটা আশংকায় ভুগতেন, তিনি বুঝি যেকোনো সময় মারা যাবেন। তারপরই সিদ্ধান্ত নেন আত্মজীবনী লিখবেন। আস্তে আস্তে অন্যান্য কাজের পাশাপাশি তিনি এটা লিখতে শুরু করেন আজ থেকে প্রায় সাত আটমাস আগে-আরেকটা মারাত্মক স্ট্রোকের পর যখন পক্ষাঘাতগ্রস্ত হয়ে পড়লেন।

মিসেস রেহমান মাঝেমাঝে ল্যাপটপ থেকে সেই লেখাগুলো পড়ে দেখেছে কিন্তু কথা নামের যে বইটি এখন তার সামনে আছে সেটার সাথে অনেক জায়গারই কোনো মিল নেই। এটাই তাকে বিস্মিত করছে। বইটি যদি বানোয়াট হতো তাহলে কিছু বিষয়ে মিল আর কিছু বিষয়ে অমিল থাকতো না। প্রথম দিকে লেখক নিজের শৈশব আর লেখালেখির জগতে কিভাবে এলেন এসব বিষয় ঠিকই আছে কিন্তু নিজের জীবনে ঘটে যাওয়া বিতর্কিত ঘটনাগুলো আর অকপটে স্বীকার করার ব্যাপারটি একদমই বানোয়াট ব'লে মনে হচ্ছে তার কাছে। জায়েদ রেহমানকে সে ভালো করেই চেনে। নিজের সম্পর্কে এমন কথা কখনই খিতে পারবে না। সব সময় নিজেকে যে লোক নিস্পাপ, রহস্যময় আর সাধুপুরুষদের মতো করে উপস্থাপন করতে অভ্যস্ত সে এমন কাজ করতে পারে না।

জায়েদ রেহমানকে তো আর তারচেয়ে বেশি কেউ চেনে না!

পরক্ষণেই আরেকজনের কথা মনে পড়ে গেলো তার।

না। তারচেয়ে বেশি চেনে এরকম আরেকজন আছে।

গ্যাট।

দীর্ঘ সাতাশ বছরের সম্পর্ক সেই মহিলার সাথে। সেদিক থেকে বর্ষার সাথে লেখকের সম্পর্কের বয়স টেনেটুনে পাঁচ বছর। বর্ষার ধারণা জায়েদ রেহমানের প্রথম স্ত্রী হত্যাকাণ্ডের সাথে জড়িত থাকতে পারে। মহিলা অনেক দিন থেকেই প্রতিশোধের নেশায় উন্মত্ত হয়ে ছিলো।

জায়েদ রেহমানের সাথে গ্যাটের ডিভোর্সের পর থেকেই মহিলা সব সময় বর্ষার বিরুদ্ধে যা-তা বলে বেড়াতো। কয়েকবার প্রকাশ্যে হুমকিও দিয়েছিলো সে।

তাদের দু'জনের দ্বন্দ্ব শুরু হয় আজ থেকে চার বছর আগে, যখন জায়েদ রেহমান গ্যাটকে ছেড়ে এই ভিটা নুভায় এসে থাকতে শুরু করেন বর্ষার সাথে। তখনও তাদের বিয়ে কিংবা গ্যাটের সাথে জায়েদ রেহমানের ডিভোর্স হয় নি।

এক দিনের ঘটনা বর্ষা কখনও ভুলবে না। সেই লাঞ্চার কথা কখনও ভোলা সম্ভবও নয়।

সন্ধ্যার দিকে প্রচুর মদ পান করে জায়েদ রেহমান লিখতে বসলে বর্ষা ঘরের কী যেনো টুকটাক কাজ করছিলো। এ সময় কলিংবেলটা বেজে উঠলে কাজের মেয়েটা গিয়ে দরজা খুলে দিতেই গ্যাট চিৎকার করে গালাগালি করতে করতে ঢুকে পড়ে তাদের ফ্ল্যাটে। হেঁচো শুনে ড্রইংরুমের দিকে পা বাড়াতেই প্রচণ্ডক্ষিপ্ত আর উদভ্রান্তের মতো গ্যাটের মুখোমুখি হয় বর্ষা।

“খান্কি! বাপের বয়সী একজনের সাথে ফস্টিনস্টি করতে লজ্জা করে না!” বলেই বর্ষার উপর ঝাঁপিয়ে পড়ে গ্যাট।

চড়াথাপড় আর কিলঘুঘি চালাতে থাকে সমানে। চুল ধরে মাটিতে শুইয়ে ফেলে বর্ষাকে। মহিলার সাথে কোনোভাবেই পেরে ওঠে নি সে। কাজের মেয়েটা এই অবস্থা দেখে দৌড়ে গিয়ে জায়েদ রেহমানকে খবর দিলে তিনিও ছুটে আসেন ড্রইংরুমে কিন্তু মদ্যপ থাকার কারণে গ্যাটের হাত থেকে বর্ষাকে রক্ষা করতে ব্যর্থ হন লেখক। নিজের লুঙ্গির গিট খুলে গেলে অনেকটা অর্ধনগ্ন লেখক অসহায় হয়ে পড়েন, সেই সুযোগে গ্যাট তাকেও বেশ কয়েকটা চড়-লাথি-ঘুঘি মেরে বসে।

বর্ষাকে বেদম মারপিট করে মাটিতে ফেলে দিয়ে গ্যাট এরপর যা করলো সেটাকে পাগলামি বলাই সঙ্গত।

লুঙ্গি নিয়ে বেসামাল জায়েদ রেহমানকে কষে কয়েকটা চড় মেরে তার লুঙ্গিটা টেনে পুরোপুরি খুলে ফেলে সে। জায়েদ সাহেব কিছুই করতে পারেন নি। কাজের মেয়েটা অবস্থা বেগতিক দেখে পাশের ফ্ল্যাটে সাহায্যের জন্যে ছুটে যায়, এইফাঁকে জায়েদ রেহমানকে পুরোপুরি লুঙ্গিবিহীন করে পাগলের মতো অট্টহাসিতে ফেঁটে পড়ে গ্যাট।

পাশের ফ্ল্যাট থেকে এক ভদ্রমহিলা ছুটে এসে দেখতে পায় জায়েদ রেহমান ড্রইংরুমে দাঁড়িয়ে আছে। তার পরনে একটা সেভো গেঞ্জি থাকলেও নিম্নাঙ্গে কিছুই নেই। লেখকের সামনেই দাঁড়িয়ে আছে গ্যাট, তার হাতে জায়েদ রেহমানের লুঙ্গি।

“শূয়োরের বাচ্চা! এটাই তোমার আসল চেহারা। কেউ না জানুক, আমি জানি তুই কতো বড় খাটাশ!” পাশের ফ্ল্যাট থেকে ছুটে আসা মহিলার দিকে তাকিয়ে উন্মাদের বলতে থাকে গ্যাট, “দেখুন...দেখুন! এই হলো দেশের সবচাইতে জনপ্রিয় লেখকের আসল চেহারা! শূয়োরের বাচ্চা নিজের মেয়ের বাব্বীকে নিয়ে এই ফ্ল্যাটে ফুঁটি করছে।” তারপর কাছেই কার্পেটের উপর পড়ে থাকা বর্ষার দিকে তাকিয়ে বলে, “আর এই খানকিটা! ওকে আমি নিজের মেয়ের মতো দেখতাম! শুধুমাত্র খ্যাতি আর সহায়-সম্পত্তির জন্য বাপের বয়সী একজনের সাথে লিভটুগেদার করছে!”

প্রচণ্ড ঘণায় বর্ষার উপর একদলা থুতু ছুড়ে মেরে চিৎকার ক’রে বলতে থাকে সে, “খানকি হবার এতোই যখন শখ, বাজারে গিয়ে দাঁড়িয়ে থাক না, মাগি!”

পাশের ফ্ল্যাটের মহিলা ভয়ে ভয়ে তাকে প্রশমিত করার জন্য বলে, “আপা আপনি শান্ত হোন...প্ৰিজ-”

“আমি শান্ত হবো!” চিৎকার ক’রে বলে গোলনূর আফরোজ তরফদার। “এই বয়সে এসে আমাকে এভাবে ছুড়ে ফেলে দেবার পরও আমি শান্ত হবো! এরকম একটা বাচ্চা মেয়ের কাছে আমাকে ছোটো করার পরও!? আপনি জানেন এটা একজন মেয়ের জন্য কতো বড় অপমান!?”

“গো-গো-গোলনূর,” জায়েদ রেহমান কাঁপতে কাঁপতে বলে তার প্রথম স্ত্রীকে, “প্ৰিজ...প্ৰিজ...”

জায়েদ রেহমানের দিকে চট ক’রে ফিরে আরো জোরে চিৎকার ক’রে বলে গ্যাট, “শূয়োরের বাচ্চা! তোমার জন্যে আমি কিনা করেছি! যখন নুন আনতে পাত্তা ফুড়াতো...যখন তোমার পকেটে ফুটা পয়সাও থাকতো না...এই আমি...এই আমি তখন তোমার পাশে ছিলাম। আর এখন...টাকা কামাতে শুরু করতেই আমাকে ছুড়ে ফেলে দিয়ে খানকি নিয়ে ফুঁটি করতে শুরু ক’রে দিলি!?”

“প্ৰিজ...প্ৰিজ...” টলতে টলতে নগ্ন জায়েদ রেহমান তার প্রথম স্ত্রীকে বলেন।

তারপরই ঘটে সেই ঘটনাটি।

গ্যাট নিজের বুক থেকে আচল সরিয়ে এক ঝটকায় ব্লাউজটা টেনে খুলে ফেলে। নিজের স্তন দুটোর দিকে ইঙ্গিত ক’রে পাগলের মতো বলতে থাকে, “এখন আর এগুলো ভালো লাগে না, না? তোমার চাই কচি কচি দুধ! এখন আর আমাকে পোষায় না, শূয়োরের বাচ্চা!?”

পাশের ফ্ল্যাটের মহিলা স্তম্ভিত হয়ে দৃশ্যটা দেখতে থাকে।

“ছোটো লোকের বাচ্চা! আর কতো ভগামি করবি?!” বলেই জায়েদ রেহমানের দিকে আরেকটু এগিয়ে যায় সে। “তুই কতো বড় বদমাশ সেটা আমি জানি...অল্পবয়সী মেয়ে দেখলে মাথা ঠিক থাকে না! তোর সারাজীবনের খায়েশ আমি মিটিয়ে দিচ্ছি...!” বলেই এক হাতে লেখকের অণুকোষটা খপ্ ক’রে ধরে ফেলে সে।

“আ-আ...!” এক গগনবিদারী চিৎকার দিয়ে অজ্ঞান হয়ে পড়ে লেখক জায়েদ রেহমান।

পাশের ফ্ল্যাট থেকে দু’জন শক্তসামর্থ তরুণ ছুটে না এলে সেদিন যে কী ঘটতো কে জানে।

বর্ষার জ্ঞান যখন ফিরে এলো দেখতে পেলো হাসপাতালের বেডে শুয়ে আছে সে। মোট পাঁচটা সেলাই দিতে হয়েছিলো তার মুখে। কপাল আর চিবুকের দু’জায়গায় কেটে গিয়ে খুব রক্তপাত হয়।

বর্ষার তুলনায় লেখক জায়েদ রেহমানের অবস্থা আরো সঙ্গিন হলেও তিনি নিজের বাড়িতেই চিকিৎসা নেন। পুরো ব্যাপারটা ধামাচাপা দেবার জন্যে এ নিয়ে আর পুলিশের কাছে কোনো রিপোর্ট করেন নি। একেবারে চেপে যাওয়া হয় ঘটনাটি।

তারপরও এক সাংবাদিক কিভাবে যেনো জেনে যায়। এ নিয়ে সে একটি রিপোর্টও তৈরি করে ফেলে তবে তার সেই রিপোর্ট কখনই পত্রিকায় প্রকাশিত হয় নি। এজন্যে অবশ্য জায়েদ রেহমানকে ছোট্ট একটা চালাকি করতে হয়েছিলো।

প্রতিবছর ঈদ সংখ্যায় এ দেশের প্রায় সবগুলো জাতীয় দৈনিকই বিশালাকারের ঈদসংখ্যা প্রকাশ ক’রে থাকে। একজন জনপ্রিয় লেখক হিসেবে জায়েদ রেহমানের উপন্যাস ছাপানো নিয়ে পত্রিকাগুলোর মধ্যে এক ধরণের প্রতিযোগিতা শুরু হয়ে যায় তখন। তবে হাতেগোনা অল্প কয়েকটি পত্রিকাই এই সুযোগটি পেয়ে থাকে।

জায়েদ রেহমান ঐ পত্রিকার সম্পাদককে নিজে ফোন ক’রে আসন্ন ঈদ সংখ্যায় তার পত্রিকার জন্যে একটা ঈদসংখ্যা দেবার প্রস্তাব দিয়ে রিপোর্টটা ছাপানো বন্ধ রাখতে সক্ষম হয়েছিলেন।

মোবাইলফোনের রিং হবার শব্দে অন্যমনস্কতা কাটিয়ে উঠলো বর্ষা।

নাশ্বারটা অজ্ঞাত।

“হ্যালো?”

“মিসেস রেহমান বলছেন?” ওপাশ থেকে একটা কণ্ঠ জানতে চাইলো।
বর্ষার কাছে কণ্ঠটা খুব চেনা চেনা লাগছে।

“জি, বলছি।”

“আমি ইনভেস্টিগেটর জেফরি বেগ।”

বর্ষা চুপ মেরে গেলো। বুঝতে পারছে না কী বলবে। এই লোক তাকে কেন ফোন করেছে?

“হ্যালো...মিসেস রেহমান—”

“জি, বলুন,” দ্বিধা কাটিয়ে জবাব দিলো বর্ষা।

“কেমন আছেন?” বেশ আন্তরিকতার সাথেই বললো জেফরি।

বর্ষা আবারো অবাক। এই ইনভেস্টিগেটর ভদ্রলোককে ঠিক বুঝে উঠতে পারে নি সে। এমনিতে খুব ভালো ব্যবহার করে তারপরেও সে দ্বিতীয়বার এই লোকের মুখোমুখি হতে চায় না।

“আছি আর কি...” কাটাকাটাভাবে বললো বর্ষা।

“আপনার সাথে একটু দেখা করতে চাই।”

“আমার সাথে!” অবাক হলো সে। “কেন?”

“সেটা দেখা হলেই বলবো।”

একটু ভেবে বললো বর্ষা, “কবে দেখা করবেন?”

“আজই।”

“আজই!...কখন?”

“আপনার যদি কোনো সমস্যা না থাকে তাহলে আধঘণ্টার মধ্যেই?”

দ্বিধায় পড়ে গেলো বর্ষা। ভেবে পাচ্ছে না কী বলবে।

“হ্যালো?” ওপাশে থেকে আবারো তাড়া দিলো বেগ।


“ঠিক আছে, আসুন। আমি অবশ্য আমার মায়ের বাড়িতে আছি।”

“আমি জানি। ধন্যবাদ। আধঘণ্টার মধ্যে চলে আসছি।”

ফোনটা রেখেই বর্ষা ভাবনায় পড়ে গেলো। এই ইনভেস্টিগেটর তার সাথে আবার দেখা করতে চাচ্ছে কেন?

একটা সিদ্ধান্ত নিয়ে ফেললো সে। এভাবে লোকটার সাথে দেখা করা ঠিক হবে না। কী বলতে কি বলে ফেলবে ঠিক নেই।

একটা নাম্বারে ডায়াল করলো বর্ষা।



অধ্যায় ৪৩

সহকারী ইনভেস্টিগেটর জামান আহমেদ নিজের ডেস্কে বসে অলস সময় পার করছিলো। সময় কাটানোর উদ্দেশ্যে জায়েদ রেহমানের কেসের কিছু মূল্যবান কাগজপত্র নিয়ে বসলো সে। কিছু দিন পরই এসব কাগজপত্র হয় পুলিশকে নয়তো মিসেস রেহমানের জিম্মায় ফিরিয়ে দিতে হবে।

জায়েদ রেহমান হত্যাকাণ্ডটি প্রথম দিকে তার কাছে এতোটাই সহজ সরল বলে মনে হচ্ছিলো যে এসব জিনিস নিয়ে তাকে মাথা ঘামাতে হয় নি। যেখানে আসামী হাতেনাতে ঘটনাস্থল থেকে গ্রেফতার হয়ে গেছে সেই কেসের আর থাকে কী। শুধুমাত্র কিছু রুটিনমাসিক কাজ করলেই হতো, কিন্তু তার বস্ জেফরি বেগ এখন নতুন করে তদন্ত শুরু করেছে। জামানের কাছেও এখন মনে হচ্ছে এই কেসটা আসলে খুবই ষোলাটে। অনেক বিষয় এখনও অস্পষ্ট তাদের কাছে।

জায়েদ রেহমানের ঘর থেকে কিছু কাগজপত্র সিজ করা হয়েছে যার সবগুলোই আছে তার অধীনে। জামান সেগুলো নিয়ে বসলো।

তেমন কিছু না বিদ্যুৎ, ওয়াসা, গ্যাস আর লন্ড্রির বিল, ডাক্তারের প্রেসক্রিপশন, ওষুধ কেনার রশিদ, এরকম কিছু সাধারণ জিনিস।

জায়েদ রেহমান কোনো ডায়েরি লিখতেন না। তার হাতের লেখার কোনো নমুনা পাওয়া যায় নি ফ্ল্যাটে। এসব মামুলি জিনিস থেকে কু বের করা দুরাশার সামিল। তারপরও কথা থাকে, মামুলি জিনিস থেকেও অনেক সময় বিরাট কিছু পাওয়া যায়। তুচ্ছ ভেবে উড়িয়ে দেয়াটা ঠিক না। তবে জামান জানে এসব জিনিস থেকে কিছু পাওয়া অসম্ভব।

কাগজগুলো নাড়তে নাড়তে একটা জায়গায় এসে থেমে গেলো সে। গ্যাস আর লন্ড্রির বিলের ফাঁকে ছোট্ট একটা কাগজ আঁটকে আছে। সিজার লিস্ট তৈরি করার সময় এটা তার চোখে পড়ে নি। জিনিসটা হাতে নিয়ে দেখলো জামান আইপিএস বিক্রয় প্রতিষ্ঠানের সার্ভিস রিসিপ্ট। তারিখটা দেখে বুঝতে পারলো লেখক খুন হবার মাত্র তিন দিন আগের।

সঙ্গে সঙ্গে জামানের মনে পড়ে গেলো জায়েদ রেহমানের ঘরে একটি আইপিএস দেখেছিলো। তার নিজের ঘরেও এরকম একটি আইপিএস রয়েছে,

সে জানে আইপিএস-এর ব্যাটারিতে প্রতি দু'তিন মাস অন্তর অন্তর ডিস্টল্ড ওয়াটার দিতে হয়। আইপিএস বিক্রয়কারী প্রতিষ্ঠানই গ্রাহককে এই সেবা দিয়ে থাকে।

মোবাইল ফোন কোম্পানির টাওয়ারের মেইটেনাপ্স ক্রু সেজে ভিটা নুভায় এক লোক ঢুকেছিলো...কথাটা মনে পড়তেই জামান কৌতূহলী হয়ে উঠলো সঙ্গে সঙ্গে।

মিসেস রেহমান জেফরি বেগকে শীতল অভ্যর্থনা জানালো।

তাকে একটা অপরিচয় ড্রইংরুমে নিয়ে গেলে জেফরি দেখতে পেলো ওখানে আগে থেকেই বসে আছে নির্মল প্রকাশনীর সত্বাধিকারী কুদরত সাহেব।

এই ভদ্রলোককে সে মোটেও আশা করে নি। বুঝতে পারলো মিসেস রেহমান হয়তো একা একা তাকে মোকাবেলা করতে চায় নি তাই ভদ্রলোককে ডেকে এনেছে।

কুশল বিনিময়ের পর জেফরি আসল কথায় চলে এলো। “মিসেস রেহমান, আমি আপনার সাথে একান্তে কিছু কথা বলতে চাচ্ছিলাম।”

মহিলা কুদরত সাহেবের দিকে তাকালো। “উনি আমার ঘনিষ্ঠ আত্মীয়। আপনি উনার সামনেই বলতে পারেন, কোনো সমস্যা নেই।”

কুদরত সাহেব দু'হাত বুকের কাছে ভাঁজ ক'রে রেখেছে। তার ভাবসাব দেখে মনে হচ্ছে মিসেস রেহমানের রক্ষাকর্তার ভূমিকায় নেমেছে সে।

আর কিছু বললো না জেফরি। বুঝতে পারছে এই ভদ্রলোককে এখন থেকে খুব সহজে সরানো যাবে না। তবে সে চাইলে কিছুক্ষণের মধ্যেই ভদ্রলোককে এখন থেকে ছুটি ক'রে দিতে পারে।

“মি: কুদরত, আপনাকে পেয়ে ভালোই হলো,” বলতে শুরু করলো জেফরি। “আপনার কাছ থেকেও কিছু বিষয় জেনে নেয়া যাবে।”

কুদরত সাহেব কিছু বলার আগেই মিসেস রেহমান মুখ খুললো। “আমার কাছে কেন এসেছেন সেটা একটু বলবেন কি?”

“এই কেসটার ব্যাপারে কিছু তথ্য পেয়েছি...সেসব নিয়ে আপনার সাথে একটু কথা বলতে চাই।”

“উনি আসলে এই কেস নিয়ে উকিলের উপস্থিতি ছাড়া কারো সাথে আর কিছু বলবেন না,” মিসেস রেহমানের হয়ে জবাব দিলো কুদরত সাহেব।

মিসেস রেহমানের দিকে তাকালো জেফরি। “এটা অফিশিয়ালি কোনো জিজ্ঞাসাবাদ না।”

“তাহলে...?” অবাক হয়ে মিসেস রেহমান বললো।

“আমি ব্যক্তিগতভাবে আপনার কাছ থেকে কিছু বিষয় জানতে চাইছি। পুরোটাই আনফিশিয়ালি। এতে আমার অনেক সাহায্য হবে।”

“আপনার সাহায্যে আসলে আমার তাতে কি! আমি কেন আপনাকে সাহায্য করতে যাবো?” বেশ ঝাঁঝালো কণ্ঠে বললো মিসেস রেহমান।

“কারণ আমাকে সাহায্য করলে আপনার লাভ হবে... ক্ষতি হবে না।”

“আপনি কি সব সময় আসামীদের কাছ থেকে সাহায্য নিয়ে তদন্ত করেন?” মুচকি হাসলো জেফরি বেগ। “না। সব সময় করি না।”

“তাহলে কখন করেন?”

“যখন আমার মনে হয় ভুল কাউকে আসামী করা হয়েছে তখন...!”

কথাটা শুনে মহিলা ভুরু কুচকে চেয়ে রইলো তার দিকে। “মানে?”

কুদরত সাহেব কিছু বলতে যাবে অমনি মিসেস রেহমান তাকে হাত তুলে বিরত রাখলো। “আপনার মনে হচ্ছে আমাকে ভুল ক’রে আসামী করা হয়েছে?”

“হ্যাঁ।” দৃঢ়ভাবে বললো বেগ।

“তো আপনার এ রকম মনে হবার কারণটা কি জানতে পারি?”

“অবশ্যই পারেন। তবে সে কথা আমি আপনাকে একান্তে বলতে চাই। এটা আপনার ভালোর জন্যেই।”

জেফরির এই কথাতে বেশ কাজ হলো। মিসেস রেহমান কুদরত সাহেবকে বাড়ির ভেতর ডেকে নিয়ে যাবার দশ মিনিট বাদে বিমর্ষ হয়ে চলে গেলো অদ্রলোক।

“এবার বলুন,” উদগ্রীব হয়ে জানতে চাইলো মিসেস রেহমান।

“বলছি, তার আগে আপনি বলুন, কথা নামের যে বইটি বের হয়েছে সেটা কি আপনি পড়েছেন?”

“হ্যাঁ, পড়েছি।”

“পড়ে কি মনে হলো?”

একটু চুপ থেকে মহিলা বললো, “ওটা জায়েদ লেখে নি। অন্য কেউ লিখেছে।”

“আপনার কেন এমন মনে হচ্ছে?”

“কারণ কথা নামে ও যে আত্মজীবনীটা লিখতে শুরু করেছিলো সেটার প্রায় সবটাই আমি পড়েছি। এই বইয়ের সাথে তার অনেক অমিল আছে।”

“তার মানে কিছু মিলও আছে?”

একটু ভেবে জবাব দিলো মহিলা। “তা আছে, তবে যেসব বিতর্কিত বিষয় এবং জায়েদের অকপট স্বীকারোক্তি হিসেবে লেখা আছে বইটাতে সেগুলোর পুরোটাই বানোয়াট। এরকম কিছু জায়েদ লেখে নি।”

“ঠিক আছে। আপনি নিশ্চয় জানেন জায়েদ রেহমান খুন হবার আগে অবয়ব

প্রকাশনীর আবেদ আলীর কাছে একটা ই-মেইল করেছিলেন, সেই সাথে কথা নামের বইটার পাণ্ডুলিপি?”

“হ্যাঁ।”

“এবার বলুন, খুন হবার রাতে শেষ কখন আপনি জায়েদ সাহেবের ঘরে ঢুকেছিলেন?”

মহিলা মনে করার চেষ্টা করলো। “রাত দশটার দিকে হবে।”

“তখন কি আপনি তাকে ল্যাপটপে কাজ করতে দেখেছিলেন?”

“হ্যাঁ।”

“তার সাথে কোনো কথাবার্তা হয়েছিলো?”

“তেমন কিছু না। আমি বললাম কি করছে, সে জানালো নতুন একটা বইয়ের কাজ করছে। তারপর ওষুধ খেয়েছে কিনা, এখন কেমন লাগছে এইসব কথা বলে গুডনাইট জানিয়ে চলে আসি নিজের ঘরে।”

“আমি যতোদূর জানি এরপর হাউজনার্স উনাকে ওষুধ খাইয়ে ল্যাপটপটা বেডের পাশে কফি টেবিলে রেখে তাকে শুইয়ে দিয়ে আসে।”

“আমিও তাই জানি। ওর ঘর থেকে ফিরে এসে হাউজনার্স আমাকে সেটা বলেছে।”

“তার মানে উনি এগারোটার পরই ঘুমিয়ে পড়েছিলেন?”

“তাই তো হবার কথা।”

“কিন্তু আপনি কি জানেন উনি মেইলটা করেছেন রাত ২টার পরে?”

“২টার পরে? এটা কিভাবে সম্ভব?”

“আমারও একই প্রশ্ন, এটা কিভাবে সম্ভব হলো!”

“আপনি কি সন্দেহ করছেন?”

“অবশ্যই কাজটা অন্য কেউ করেছে,” বেশ জোর দিয়ে বললো জেফরি।

“অন্য কেউ মানে?”

“আপনি বাদে কেউ।”

“আমি বাদে কেন?”

“কারণ কেউ নিজের পায়ে কুড়াল মারবে না। নিজের সর্বনাশ ডেকে আনবে না।”

মহিলা কিছুক্ষণ চুপ ক’রে থেকে বললো, “তাহলে আপনি মনে করছেন কাজটা শফিক করেছে?”

“না।”

জেফরির জবাবটা শুনে মহিলা বেশ অবাক হলো। “তাকে কেন সন্দেহের বাইরে রাখলেন?”

“খুব সহজ। কারণ সে ঐরকম একটা বই আবেদ আলীকে মেইল করবে

না। ওখানে আপনার বিরুদ্ধে অনেক কিছু লেখা রয়েছে। এমন কি আপনি অন্য কারো সাথে সম্পর্কে জড়িয়ে পড়েছেন বলেও ইঙ্গিত আছে।”

মহিলা চুপ ক’রে থাকলো।

“এরকম কিছু মি: শফিক কেন করতে যাবে?”

মিসেস রেহমান ফ্যালফ্যাল ক’রে চেয়ে রইলো তার দিকে। এই ইনভেস্টিগেটরকে এখন আর শত্রুভাবাপন্ন ব’লে মনে হচ্ছে না তার কাছে।

“তাহলে কাজটা করলো কে?” মিসেস রেহমান প্রশ্ন করলো।

“এমন একজন যেকিনা জায়েদ রেহমান কিংবা আপনার শত্রু। আপনাদের চরম ঘৃণা করে...”

ভদ্রমহিলা আস্তে ক’রে মাথা নেড়ে সায় দিলো।

“...আপনাদের উপর চরম প্রতিশোধ নিতে চায়!”

“গ্যাট!” মহিলা চাপা কণ্ঠে বললো।

“আপনি নিশ্চিত?”

দৃঢ়তার সাথে মাথা নেড়ে সায় দিলো মিসেস রেহমান। “এই পৃথিবীতে একজনই আছে যে আমাদেরকে চরম ঘৃণা করে...আমাদের সর্বনাশ করতে মরিয়া...আমাদের...” আর বলতে পারলো না সে।

“আর কেউ নেই? আপনি পুরোপুরি নিশ্চিত?”

মাথা দোলালো মহিলা। “এটা গ্যাটের কাজ। সে-ই করিয়েছে।”

জেফরি কিছু বলতে যাবে অমনি তার সেলফোনটা বেজে উঠলো। পকেট থেকে বের করে ডিসপুতে দেখতে পেলো তার সহকারী জামান ফোন করেছে।

“হ্যা, জামান, বলো...?”

ওপাশ থেকে জামান তাকে কী বললো সেটা মিসেস রেহমান শুনতে না পারলেও দেখতে পেলো ইনভেস্টিগেটর জেফরি বেগের অভিব্যক্তিতে বিরাট একটি পরিবর্তন এসেছে। ফোনটা বন্ধ ক’রে একদৃষ্টিতে তার দিকে তাকিয়ে রইলো সে।

“মিসেস রেহমান,” গম্ভীর হয়ে বললো সে। “আপনার জন্যে একটা সুসংবাদ আছে।”



সহকারী ইনভেস্টিগেটর জামান যে খবরটা নিয়ে এসেছে সেটা রীতিমতো অভাবনীয়। এই মূল্যবান তথ্যটি জেফরি বেগকে গোলকধাঁধাতুল্য তদন্ত থেকে বের হবার পথ দেখাচ্ছে।

জায়েদ রেহমানের ঘরে যে আইপিএস'টি আছে সেই কোম্পানির কর্তৃপক্ষ জানিয়েছে আইপিএস-এর ব্যাটারিতে ডিস্টিলড ওয়াটার যারা ভরে দিয়ে আসে তারা লেখকের খুন হবার এক মাস আগেই শেষবার সার্ভিস দিয়ে এসেছে। জামানের কাছে যে রিসিপ্টটা আছে সেটা নকল। তাদের কোম্পানির রিসিপ্ট কি রকম হয় সেটার একটা নমুনাও তারা দেখিয়েছে তাকে।

হোমিসাইডের নিজের অফিসে বসে আছে জেফরি আর জামান।

“স্যার, জায়েদ সাহেব খুন হবার তিন দিন আগে যে লোক আইপিএস সার্ভিসম্যান পরিচয় দিয়ে ভিটা নুভায় গিয়েছিলো সে খুবই পেশাদার একজন হবে।”

মাথা নেড়ে সায় দিলো জেফরি। “ওধু পেশাদার না, বলতে পারো খুবই দক্ষ একজন। ভাড়াটে খুনিরা যেরকম হয় এই লোক সেরকম কেউ না।”

“লেখককে খুন করার আগেই তাহলে এই লোক তার ঘরে ঢুকে সব দেখে এসেছিলো!”

“হ্যাঁ। আইপিএসটা তো তার ঘরেই।” জেফরি এবার টুকরো টুকরো সব তথ্য জোড়া দিতে লাগলো। “লোকটা কয়েক সপ্তাহ ধরে ভিটা নুভার বাইরে একটা চায়ের টেবুে বসে বসে রেকি ক'রে গেছে। তারপর নিখুঁত একটা পরিকল্পনা করে সে। এতোটাই নিখুঁত যে সেটা ধরা প্রায় অসম্ভব।”

“কিন্তু স্যার, এরকম একজন পেশাদার লোককে ভাড়া করলো কে?”

খুবই গুরুত্বপূর্ণ প্রশ্ন। ইতিমধ্যে জেফরিও এটা ভেবেছে। তার কাছে মনে হয়েছিলো ক্যানডিডেটের সংখ্যা দু'জন আবেদ আলী আর গোলনূর আফরোজ তরফদার। তবে মিসেস রেহমানের সাথে কথা বলার পর তার কাছে মনে হচ্ছে প্রকাশক আবেদ আলীর জড়িত থাকার সম্ভাবনা কিছুটা কম। তার কাছে এ মুহূর্তে প্রধানতম সন্দেহভাজন হলো গ্যাট!

“জায়েদ সাহেবের প্রথম স্ত্রী গোলনূর আফরোজ তরফদার কোথায় থাকে

জানো?” জানতে চাইলো জেফরি বেগ ।

“জানি না তবে সেটা খুব সহজেই জানা যাবে ।”

“কিভাবে?”

“আমাদের ডিপার্টমেন্টের কম্পিউটার অ্যানালিস্ট মুরতাজা ঐ মহিলার কেমন জানি আত্মীয় হয় ।”

“তাই নাকি!”

“জি, স্যার । আমি কি এক্ষুণি তার কাছ থেকে ঠিকানাটা নিয়ে আসবো?”

“হ্যা । মোবাইল ফোনের নাম্বারটাও নিয়ে নিও ।”

গোলনূর আফরোজ তরফদার যাকে সবাই গ্যাট নামে চেনে কখনই নিজের আলোয় আলোকিত হতে পারে নি, কারণ মাত্র সতেরো বছর বয়স থেকেই জনপ্রিয় লেখক জায়েদ রেহমানের প্রবল আলোয় স্ত্রিয়মান হয়ে পড়ে সে । এ নিয়ে অবশ্য তার মনে কোনো খেদও ছিলো না । নিজের স্বামীর উন্নতি, সমৃদ্ধি তাকে বরং আনন্দই দিতো ।

স্বামীর জন্যে মনপ্রাণ ঢেলে সংসার গুছিয়ে রাখতো সে । কোনো বিষয়েই জায়েদ রেহমানকে জড়াতো না লেখালেখির বিপ্লব হবে বলে । সমস্ত সাংসরিক ঝঞ্জাট থেকে তাকে বাঁচিয়ে রাখতো । বলতে গেলে নিজের দুই ছেলে-মেয়েকে একাই মানুষ করেছে । বিয়ের পর কতো কষ্ট করেছে সেটা হয়তো আজ অনেকেই ভুলে গেছে, কিন্তু গ্যাট জানে অমানুষিক কষ্ট করেছে এ জীবনে ।

ছোটোখাটো একটা চাকরি করতো জায়েদ রেহমান । টানাটানির সংসার । লেখালেখিতে পুরোপুরি মনোযোগ দেবার জন্যে যখন সেই চাকরিটাও ছেড়ে দিলো তখন অভাবঅনটনে জর্জরিত তারা । লেখালেখি ক’রে প্রতিষ্ঠা পাবার আগে দীর্ঘ দশ বছর অনেক ত্যাগ করতে হয়েছে গ্যাটকে ।

কিন্তু একটা সময় তাদের আর্থিক অনটন দূর হয়ে গেলো, গাড়ি-বাড়ি সবই হলো তাদের । খ্যাতি আর সচ্ছলতা উপভোগ করতে শুরু করলো পরিবারটি । দেশের সবচাইতে জনপ্রিয় লেখকের স্ত্রী হিসেবে নিজেকে পরিচয় দিতে গর্বিত বোধ করতে শুরু করলো গ্যাট, কিন্তু সেই সুখের সময়টা খুব বেশি দিন দীর্ঘ হলো না ।

প্রবল জনপ্রিয় হবার পর জায়েদ রেহমানের ঘাড়ে সিনেমা তৈরির ভূত চেপে বসে । হুটহাট ক’রে দুটো সিনেমাও তৈরি ক’রে ফেলেন তিনি । সেগুলো ব্যবসায়িকভাবে সফল হলে টিভি নাটক আর সিনেমা বানাতে শুরু করেন নিয়মিত, আর এটাই তাকে বদলে দিলো আমূল ।

চারদিক থেকে কানাঘুসা শোনা যেতে লাগলো তার সম্পর্কে । অল্পবয়সী

মেয়েদের জড়িয়ে দুয়েকটা রটানাও ছাপা হলো পত্রপত্রিকায়, তারপরেও গ্যাট সেগুলোকে আমলে নেয় নি, মনে করেছে শোবিজ জগতে এরকম মিথ্যে রটনা হওয়া অস্বাভাবিক নয়। তবে প্রথম ধাক্কাটা খেলো পমি নামের এক উঠতি অভিনেত্রির সাথে জায়েদ রেহমানের একটি ঘটনায়।

জায়েদ রেহমান তার তৃতীয় চলচ্চিত্রের কাজ শুরু করেছেন তখন। পমি ছিলো মূল চরিত্রে। সেন্ট মার্টিনে আউটডোর শুটিংয়ের মাঝপথে পমি ঢাকায় চলে আসে। ছবির বাকি কাজ করতে অস্বীকার করে সে। চারপাশ থেকে গুঞ্জন শোনা যেতে থাকে লেখক জায়েদ রেহমান পমির সাথে এমন বাজে আচরণ করেছেন যার জন্যে মেয়েটা বেঁকে বসেছে।

এ নিয়ে গ্যাটের সাথে জায়েদ রেহমানের তুমুল বাকবিতণ্ডা হলেও শেষ পর্যন্ত ব্যাপারটা আর বেশি দূর গড়ায় নি। তবে অনেক দিন পর গ্যাট আসল ঘটনা জানতে পারে, ততো দিনে অবশ্য জায়েদের সাথে তার সেপারেশন শুরু হয়ে গেছে।

কলিংবেলের শব্দে বর্তমানে ফিরে এলো গ্যাট। এক ঘণ্টা আগে হোমিসাইডের ইনভেস্টিগেটর জেফরি বেগ তাকে ফোন করে জানিয়েছিলো তার সাথে একটা বিষয়ে কথা বলতে চায়। ইনভেস্টিগেটরকে ফিরিয়ে দেয় নি সে, কারণ তাতে ক'রে লোকটা সন্দেহ ক'রে বসতে পারতো। খুব সম্ভবত সেই লোকই এখন এসেছে।

হোমিসাইডের জামান আহমেদ নিজের ডেস্কে বসে আছে। কিছুক্ষণ আগে তার বস্ জেফরি বেগ চলে গেছে গোলনূর আফরোজ তরফদারের সঙ্গে দেখা করতে। মহিলা অস্বস্তি বোধ করতে পারে তাই জামানকে সঙ্গে নেয় নি। জেফরি বেগ মহিলার সাথে একান্তে কিছু কথা বলতে চায়।

জায়েদ রেহমানের হত্যাকাণ্ডের ঘটনাটি যে এভাবে জটিল হয়ে উঠবে সেটা ঘূর্ণাক্ষরেও ভাবতে পারে নি সে। তার বস্ যখন নতুন ক'রে এই কেসটার তদন্ত করতে শুরু করে তখন তার কাছে এটাকে পাগলামি বলেই মনে হয়েছিলো।

ডেস্কে থাকা ল্যান্ডফোনটা বেজে উঠলে আনমনেই সেটা হাতে তুলে নিলো জামান।

“সিটি হোমিসাইড থেকে বলছি।”

ওপাশ থেকে কোনো সাড়াশব্দ নেই।

“হ্যালো...কে বলছেন?” জামান তাড়া দিলো।

“আমি ইনভেস্টিগেটর জেফরি বেগকে একটু চাচ্ছিলাম।” ফিসফিস ক'রে একটা কণ্ঠ বললো।

“সরি, উনি এখন অফিসে নেই, বাইরে আছেন...” বললো জামান। “আপনি কে বলছেন?”

“আমি উনাকে একটা তথ্য দিতে চাই। লেখক জায়েদ রেহমানের হত্যাকাণ্ডের ব্যাপারে...”

জামান স্তম্ভিত হয়ে গেলো কিছুক্ষণের জন্যে। লোকটার পরিচয় নিয়ে আর মাথা ঘামালো না সে। “আমি সহকারী ইনভেস্টিগেটর জামান বলছি...আপনি আমার কাছে বলতে পারেন।”

নীরবতা নেমে এলো ওপাশ থেকে।

“আমি জায়েদ রেহমানের হত্যাকাণ্ডের তদন্তে স্যারকে সহায়তা করছি,” বললো জামান।

“আমি যে তথ্যটা আপনাকে দেবো সেটা খুবই গুরুত্বপূর্ণ। কিন্তু তার আগে আপনাকে কথা দিতে হবে আমার পরিচয় জানার চেষ্টা করবেন না।”

“ঠিক আছে। আপনার পরিচয় নিয়ে আমি মাথা ঘামাবো না। বলুন, কি বলতে চাচ্ছেন?”

একটু থেমে বলতে শুরু করলো ওপাশের লোকটি। “জায়েদ সাহেব যে রাতে খুন হন সে রাতে তার অ্যাপার্টমেন্টের বাইরে এক ছেলেকে সন্দেহজনকভাবে দাঁড়িয়ে থাকতে দেখেছিলো ইন্সপেক্টর এলাহী নেওয়াজ...”

“হুমম...বলুন?”

“...আমি সেই ছেলের পরিচয় জানি!”

নিজের চেয়ারে সোজা হয়ে বসলো জামান। “হ্যা, বলুন...?”

“ইন্সপেক্টর কিন্তু সেই ছেলেটাকে গ্রেফতার করেছিলো।”

“গ্রেফতার করেছিলো!?”

“হ্যা।”

“তারপর?” উদগ্রীব হয়ে উঠলো জামান।

“মোটামুঠে টাকা খেয়ে তাকে ছেড়ে দেয়া হয়।”

“ছেলেটা কে?”

“বিশিষ্ট শিল্পপতি চৌধুরি ইমরান আহমেদ সিদ্দিকীর একমাত্র সন্তান ইরাম!”

“কি!”

ওপাশের লাইনটা কেটে গেলেও অনেকক্ষণ রিসিভারটা ধরে রাখলো জামান।

এরকম উড়ো ফোনকলকে তারা খুব একটা গুরুত্ব না দিলেও অনেক সময় এভাবেই মূল্যবান তথ্য পাওয়া যায়। জামানের কেন জানি মনে হচ্ছে এইমাত্র পাওয়া তথ্যটি সত্যি।

“আপনি এসব কি বলছেন!” জেফরি বেগ যখন গোলনূর আফরোজ তরফদারকে জানালো জায়েদ রেহমানের হত্যাকাণ্ডটির তদন্ত এখন নতুন দিকে মোড় নিচ্ছে তখন ভদ্রমহিলা অবিশ্বাসে এ কথা বললো।

তারা বসে আছে ড্রইংরুমে। এই বাড়িটা ভদ্রমহিলা পৈতৃকসূত্রে পেয়েছে। জায়েদ রেহমানের সাথে ডিভোর্সের পর থেকে এখানেই এক মেয়ে আর ছেলেকে নিয়ে বসবাস করতে শুরু করে তবে গত বছর একমাত্র মেয়েটি বিয়ে করে দেশের বাইরে চলে গেছে। ছেলে দার্মিংয়ের একটি মিশনারি স্কুলে পড়ে। গ্যাট এখন একেবারেই একা।

“আবেদ আলীকে আপনি গত সপ্তাহে অনেকবার ফোন করেছিলেন, তাই না?... কারণটা জানতে পারি কি?”

মহিলা ভুরু কুচকে রইলো। “আপনারা জানলেন কি করে?”

“আমাদের জন্যে এটা জানা তেমন কঠিন কাজ নয়।”

“আবেদ আলীর সাথে আমার দীর্ঘদিনের সম্পর্ক, তাকে আমি ফোন করতেই পারি।” কাটাকাটাভাবে বললো মহিলা।

“তা পারেন...”

“আপনি কি আমাকে সন্দেহ করছেন?” সরাসরি বললো গ্যাট।

“তা করছি না, তবে কিছু বিষয় পরিস্কার হবার জন্যে আমাকে অনেক কিছু জানতে হবে। সেজন্যেই এসব জানতে চাচ্ছি।” শীতলকণ্ঠে বললো বেগ।

একটু চুপ করে থেকে মহিলা বললো, “পাওনা টাকার জন্যে ফোন দিয়েছিলাম।”

“পাওনা টাকা! কিসের?”

“রয়্যালটির।” ছোট্ট করে বললো মহিলা।

“রয়্যালটি মানে?” বেগ বুঝতে না পেরে বললো।

“জায়েদের অনেক বইয়ের কপিরাইট সত্ত্ব আমার নামে। ওগুলোর প্রায় সবই আবেদ ভাইয়ের ওখান থেকে বের হয়েছে। প্রতি তিনমাস পর পর বইগুলোর রয়্যালটির টাকা আমি তুলে থাকি।”

“আপনি কিন্তু উনাকে অনেকবার ফোন করেছেন?”

“অনেকবার ফোন করে তাকে পাই নি... শুনেছি আজকাল আবেদ ভাই নাকি ইন্টারনেট ব্রাউজ করতেই বেশি ব্যস্ত থাকেন। বেশিরভাগ সময় উনার মোবাইল থাকে সাইলেস মুডে। এজন্যে অনেকবার ফোন করতে হয়েছিলো।”

“আচ্ছা।” একটু থেমে জেফরি আবার বললো, “জায়েদ সাহেবের সাথে সম্পর্ক খুবই খারাপ ছিলো এরকম কারোর কথা কি আপনি জানেন?”

“ওর শত্রুর কথা বলছেন?” মহিলা ভুরু উঁচিয়ে জানতে চাইলো।

“হ্যা ।”

“জায়েদের শত্রু...?” বিড়বিড় ক’রে বললো সে । “আপনার সামনেই বসে আছে । আমি!”

জেফরি বেগ ভিমড়ি খেলেও সেটা প্রকাশ করলো না ।

“আমি হলাম ওর এক নাম্বার শত্রু!”

“আর দু’নাম্বার শত্রু?” চট ক’রে জিজ্ঞেস করলো জেফরি ।

মহিলা জেফরির দিকে কিছুক্ষণ চেয়ে রইলো । “উমমম... পমি!”

“পমি?”

“অভিনেত্রি পমি । চেনেন?”

“চিনি ।” এই অভিনেত্রীকে জেফরি তেমন একটা না চিনলেও জায়েদ রেহমানের আত্মজীবনী কথা’য় তার উল্লেখ রয়েছে বলে নামটা শুনেই চিনতে পারলো ।

“তাকে ছাড়া তো আর কাউকে দেখছি না ।”

“পমি কেন?” জানতে চাইলো জেফরি ।

“জায়েদ ওকে ধর্মণ করেছিলো!” নির্বিকারভাবে বললো মহিলা ।



ধানমণ্ডি থানার ইন্সপেক্টর এলাহী নেওয়াজকে ডেকে আনা হয়েছে হোমিসাইড ডিপার্টমেন্টে। পুলিশ ভদ্রলোক মনে করছে জায়েদ রেহমানের হত্যাকাণ্ডের ব্যাপারে হোমিসাইড হয়তো তাকে কিছু গুরুত্বপূর্ণ তথ্য দেবে। পুলিশের অধীনে থাকা হত্যাকাণ্ডের কেসগুলোতে সাহায্য করাই হোমিসাইড ডিপার্টমেন্টের কাজ।

জায়েদ রেহমানের হত্যাকাণ্ডে এলাহীর অবদান অনস্বীকার্য। হোমিসাইডের সবচেয়ে মেধাবী ইনভেস্টিগেটর জেফরি বেগও সেটা জানে। এমনও হতে পারে জেফরি বেগ হয়তো তাকে আনুষ্ঠানিক ধন্যবাদ দেবার জন্যে এখানে ডেকে এনেছে। কারণ তার সহকারী জামান দু'ঘণ্টা আগে তাকে ফোন করে বলেছে হোমিসাইডের ইনভেস্টিগেটর জেফরি বেগ তাকে চায়ের দাওয়াত দিয়েছে।

এফবিআই'র ট্রেনিং নেয়া লোক, তাই বোধহয় আমেরিকান স্টাইলে ধন্যবাদ দিতে চাচ্ছে, মনে মনে ভাবলো ইন্সপেক্টর।

এলাহী নেওয়াজ একা বসে আছে জেফরি বেগের অফিসে। প্রায় দশ মিনিট হয়ে গেছে এখনও কারোর দেখা নেই। হোমিসাইডের একজন বলেছে ইনভেস্টিগেটর বাইরে আছে, কিছুক্ষণের মধ্যেই এসে পড়বে। সহকারী জামান অবশ্য ছিলো তবে কী একটা কাজে সেও কিছুক্ষণ আগে বাইরে চলে গেছে।

জেফরি বেগের অফিসটা একেবারেই সাদামাটা তবে ডান দিকের দেয়ালে একটা ফ্রেমে এফবিআই'র ট্রেনিংয়ের যে সার্টিফিকেটটা আছে সেটার উপস্থিতি পুরো ঘরটায় এক ধরনের আভিজাত্য এনে দিয়েছে। চেয়ার থেকে উঠে সেই ফ্রেমটার সামনে দাঁড়ালো এলাহী নেওয়াজ।

আচ্ছা, তাহলে এফবিআই'র সার্টিফিকেট এমন হয়!

ইংরেজিতে ভীষণ কাঁচা এলাহী নেওয়াজ সার্টিফিকেটের লেখাগুলো পড়ার চেষ্টা করলো। না। ইংরেজি বোঝাটা তার কাজ না। তার ভাঙারে খুব কম ইংরেজি শব্দই আছে। নিশ্চয় জেফরি বেগের অনেক প্রশংসা করা হয়েছে এখানে। এলাহী শুনেছে, এফবিআই'তে নাকি জেফরি অনেক ভালোভাবে ট্রেনিং শেষ করেছে। এই লোকের সবই ভালো শুধু নামটা তার কাছে কেমন জানি খটকা লাগে। ডেকের এক কোণে ছোট্ট একটি ছবির ফ্রেম। এক খুস্তান ফাদার,

কোলে সাত-আট বছরের এক বাচ্চাছিলে । তাহলে খুঁস্টান! মনে মনে ভাবলো ইম্পেপ্টর ।

“সরি ।” পেছন থেকে একটা আন্তরিকমাখা কণ্ঠ বললে এলাহী নেওয়াজ চমকে উঠেলে । ইনভেস্টিগেটর জেফরি বেগ দাঁড়িয়ে আছে তার পেছনে ।

“স্যার, স্লামালাইকুম,” ইম্পেপ্টর বললো ।

“দেরির জন্যে দুঃখিত । কতোক্ষণ আগে এসেছেন?” এলাহী নেওয়াজের সাথে করমর্দন করে নিজের ডেস্কে বসলো সে ।

“এই তো...দশ-পনেরো মিনিট হবে ।”

“বসুন ।”

এলাহী নেওয়াজ চেয়ারে বসলো ।

“চা-টা কিছু দিয়েছে?”

“না । তার কোনো দরকার নেই, স্যার ।”

তার কথাটা আমলে না নিয়ে ইন্টারকমে দু’কাপ চায়ের জন্যে বলে দিলো বেগ ।

“তো কেমন চলছে, ইম্পেপ্টর?”

“জি, স্যার, চলছে আর কি । কাজের অনেক চাপ ।”

“ধানমণ্ডি থানায় তো খুব বেশি ক্রাইম হয় না । অন্য থানার চেয়ে এখানকার অবস্থা বেশ ভালো ।”

“তা ঠিক । তবে ভিআইপি’দের সংখ্যা বেশি, কুলিয়ে উঠতে পারি না ।”

“জায়েদ সাহেবের কেসের খবর কি?”

এই প্রশ্ন করাতে এলাহী নেওয়াজ একটু উৎসাহ বোধ করলো । তার ধারণা এই কেসের জন্য কিছু দিনের মধ্যে সে একটা প্রমোশন পেতে যাচ্ছে । “স্যার, আশা করছি এক মাসের মধ্যে ফাইনাল ইনভেস্টিগেশন রিপোর্ট দিতে পারবো ।”

“গুড ।” একটু চুপ করে থেকে আবার বললো জেফরি, “আপনাদের ওসি তো আলী হোসেন সাহেব, তাই না?”

“জি, স্যার ।”

এমন সময় দরজায় নক্ হলে জেফরি ভেতরে আসার জন্যে বলতেই পিয়ন চা নিয়ে ঘরে ঢুকলো ।

“প্লিজ, চা নিন,” পিয়ন ছেলেটা চলে যাবার পর এলাহী নেওয়াজকে বললো জেফরি । “এই কেসটায় আপনি বেশ ভালো কাজ করেছেন, ইম্পেপ্টর ।”

“থ্যাঙ্ক ইউ, স্যার,” বিগলিত হয়ে বললো এলাহী ।

“আপনার মতো দক্ষ পুলিশ অফিসার খুব কমই আমি দেখেছি ।” চায়ে একটা লম্বা চুমুক দিলো জেফরি । “কিন্তু আমার মাথায় ঢুকছে না এতো বড় বোকামি আপনি কেন করলেন?”

জেফরির মুখ থেকে শেষ কথাটা শুনে চমকে উঠলো এলাহী। কানে ভুল শুনছে না তো। প্রশংসা করতে করতে ইনভেস্টিগেটর এ কী বলছে!

“জি স্যার...বুঝলাম না?”

“চৌধুরি ইরাম আহমেদ সিদ্দিকীকে গ্রেফতার করার ঘটনাটি চেপে গেলেন কেন?”

বিষম খেলো যেনো। নিজের অভিব্যক্তি লুকাতে পারলো না ইসপেক্টর। চায়ের কাপটা নামিয়ে রাখলো আশ্তে করে। কী বলবে বুঝতে পারছে না। তবে সে জানে ইনভেস্টিগেটর জেফরি বেগের কাছে এখন আর কোনো কিছু লুকাতে পারবে না। এই লোক সব জেনেই তাকে ডেকে পাঠিয়েছে।

তাহলে এজন্যই ডেকে আনা হয়েছে আমাকে!

“জায়েদ সাহেবের কেসে আপনার ভূমিকায় আমি ভীষণ খুশি হয়েছিলাম। আপনাকে আমি খুব পছন্দও করি...কিন্তু এতোবড় একটা ভুল আপনি করলেন কি ক’রে মাথায় ঢুকছে না।”

“স্যার, আমার কোনো দোষ নেই...হোমমিনিস্টারের রিকোয়েস্ট ছিলো ওটা। উনি তো সি ই এ সিদ্দিকীর ঘনিষ্ঠ লোক। আমি ছেলেটাকে গ্রেফতার করে থানায় নিয়ে যাবার পর ওসি সাহেব ফোন করে ছেড়ে দিতে বললেন...”

“হোমমিনিস্টার বলেছে?” জেফরির সন্দেহ হলো।

“জি, স্যার। আপনি ওসি সাহেবকে জিজ্ঞেস করে দেখতে পারেন।”

“কিন্তু আপনার কি একবারও মনে হলো না জায়েদ সাহেবের খুনের ঘটনায় ঐ ছেলেটা খুবই গুরুত্বপূর্ণ?”

“স্যার...আমার মনে হয়েছিলো কিন্তু...ওসি সাহেব বললেন তাই...” মাথা নীচু করে অনুশোচনায় আক্রান্ত হলো এলাহী। সে বুঝতে পারছে প্রমোশনের বদলে এখন ডিমোশন জুটতে পারে তার কপালে।

“ছেলেটা কি গুরুত্বপূর্ণ কোনো তথ্য দিয়েছিলো আপনার কাছে?”

“না, স্যার। পুরোপুরি নেশাগ্রস্ত ছিলো। কেন যে ঐ অ্যাপার্টমেন্টের সামনে দাঁড়িয়ে ছিলো বুঝতে পারছি না। প্রথমে আমি ভেবেছিলাম ডাকাত দলের সদস্য কিন্তু পরে জানতে পারি তার বাবা হলেন বিশিষ্ট ব্যবসায়ী।”

“আপনি বলছেন ওসি সাহেব হোমমিনিস্টারের কাছ থেকে অর্ডার পেয়ে ছেলেটাকে ছেড়ে দেয়ার জন্যে আপনাকে বলেছে?”

“জি, স্যার!” জোর দিয়ে বললো ইসপেক্টর।

“তাহলে ওরা আপনাকে অতোগুলো টাকা দিলো কেন?” কথাটা বলে স্থির চোখে চেয়ে রইলো জেফরি।

ঘাবড়ে গেলো এলাহী নেওয়াজ। এই লোক এতো কিছু জানলো কি ক’রে! টাকা নেয়ার কথাটা অস্বীকার করে আরো বড় কোনো সমস্যায় পড়তে চাইলো না

ইন্সপেক্টর। “স্যার, বিশ্বাস করেন আমি টাকা চাই নি। সিদ্দিকী সাহেব থানায় এলে আমি সঙ্গে সঙ্গে তার ছেলেকে তার হাতে তুলে দেই। কোনো টাকা দাবি করি নি। হোমমিনিস্টারের লোকের কাছে টাকা চাইবো এতো বড় আহাম্মক আমি নই—”

“তাহলে?”

“সিদ্দিকী সাহেবের উকিল পরে আমাকে এ টাকাটা দিয়ে গেছে। আমি নিতে চাই নি, বলতে পারেন জোর করেই দিয়ে গেছে।”

জেফরি জানে কথাটা সত্যি। একটু চুপ থেকে বললো সে, “তারপরও আমি বলবো আপনি একটা আহাম্মক।”

ইন্সপেক্টর আতঙ্কভরা চোখে তাকালো তার দিকে।

“কারণ আপনি ভেবেছেন কথাটা কেউ কোনোদিন জানতে পারবে না। ভুলে গেছেন আপনার অনেক সহকর্মী আছে, হয়তো এ ব্যাপারটা তারা ভালো চোখে দেখে নি।”

এলাহী বুঝতে পারছে এই ঘটনাটা কে ফাঁস করেছে। সাব-ইন্সপেক্টর সমীর দাস ছাড়া আর কেউ এ কাজ করার সাহস দেখাবে না। তাকে কিছু টাকা দিয়ে দিলে আজ আর এরকম বিপদে পড়তো না সে। একটু লোভ সংবরণ করলে কেউ ঘুগাঙ্করেও ব্যাপারটা জানতে পারতো না।

“মি: এলাহী, চৌধুরি ইরাম আহমেদ সিদ্দিকী এখন কোথায় আছে জানেন?” গম্ভীর কণ্ঠে জানতে চাইলো ইনভেস্টিগেটর জেফরি বেগ।

“জানি, স্যার...” আশ্বে ক’রে বললো সে।

“গুড,” বললো জেফরি। “যা হবার হয়েছে, এখন আমি চাইবো আপনি আমাকে পুরোপুরি সহযোগীতা করবেন।”

আশার আলো দেখতে পেলো ইন্সপেক্টর। “জি, স্যার। অবশ্যই করবো।”

“ইরাম সিদ্দিকী এখন কোথায় আছে, বলুন?”



অধ্যায় ৪৬

অভিনেত্রী পমিকে জায়েদ রেহমান ধর্ষণ করেছেন!

কথাটা বিশ্বাস করতে কষ্ট হচ্ছে জেফরি বেগের। তবে জায়েদ সাহেবের সাবেক স্ত্রী গ্যাট যেভাবে বললো তাতে অবিশ্বাস করারও উপায় নেই। এটাও তো ঠিক কথা নামের আত্মজীবনীতেও লেখক এরকম একটা ঘটনার ইঙ্গিত দিয়েছেন।

“আপনি কি অভিনেত্রী পমিকে জিজ্ঞাসাবাদ করবেন?” জেফরির কাছ থেকে সব শুনে প্রশ্ন করলো জামান।

“আপাতত সেরকম কোনো ইচ্ছে আমার নেই।” একটু চুপ থেকে আবার বলতে লাগলো জেফরি, “এভাবে একের পর একজনকে সন্দেহ ক’রে তদন্তকাজ তো এগোচ্ছে না, বরং আরো বেশি জটিল হয়ে উঠছে।”

“তাহলে...?”

“আমাদের এখন মনোযোগ দিতে হবে ঐ যুবকের উপর। সে কে সেটা খুঁজে বের করলে জানা যেতো কার হয়ে কাজটা করেছে। আমি এখন আসল কালপ্রটিকে না খুঁজে বরং নিজ হাতে যে হত্যাকাণ্ডটি ঘটিয়েছে তার ব্যাপারে বেশি আগ্রহী।”

“কিন্তু তাকে খুঁজে বের করাটা কি খুব সহজ হবে, স্যার?”

“মোটাই না।” নিজের ডেস্ক থেকে উঠে দাঁড়ালো সে। তার ছোট্ট পরিসরের অফিসের ভেতর পায়চারী করতে লাগলো। “আমাদের খুনি শুধু খুনই করে নি...খুনটা সে করেছে এমন এক সময় যখন লেখকের স্ত্রী পাশের ঘরে তার প্রেমিকের সাথে গোপন অভিসারে লিপ্ত। এই দিনটি, মুহূর্তটি খুব বিচক্ষণতার সাথেই বেছে নিয়েছে সে। তারপর লেখকের কম্পিউটার থেকে বানোয়াট একটি পাণ্ডুলিপি মেইল করে পুরো ব্যাপারটি গোলকধাঁধার মতো ক’রে ফেলেছে। আর এসবই করা হয়েছে লেখকের ভাবমূর্তি নষ্ট করার উদ্দেশ্যে।”

“শুধুমাত্র পেশাদার করো পক্ষেই এ কাজ করা সম্ভব।” জামান মন্তব্য করলো। “আপনার কাছ থেকে সব শুনে আমার মনে হচ্ছে অভিনেত্রী পমিও এ কাজ করতে পারে।”

“কেন এরকম মনে হচ্ছে?” জেফরি একটু বাজিয়ে দেখতে চাইলো তার সহকারীকে।

“কারণ লেখক জায়েদ রেহমান কেবল খুনই হন নি সেই সাথে তার ভাবমূর্তিও ভীষণভাবে ক্ষতিগ্রস্ত হয়েছে। তার মানসম্মান ধুলোয় মিশিয়ে দেয়া হয়েছে। পমি যদি লেখকের হাতে ধর্ষিত হয়ে থাকে তাহলে সে এরকমভাবেই প্রতিশোধ নিতে চাইবে।”

“অবশ্য আমার কাছে মনে হচ্ছে কাজটা করতে পারে সম্ভাব্য তিনজন গ্যাট, আবেদ আলী এবং পমি। তবে আবেদ আলী আর গ্যাটের ব্যাপারে আমার সন্দেহ একটু বেশি। পমির ব্যাপারটা আমার কাছে খুব দুর্বল মনে হচ্ছে। ভুলে যেও না আবেদ আলী আর গ্যাট এ ঘটনায় বেশ লাভবান হয়েছে।”

“আপনি কি আলম শফিক আর মিসেস রেহমানকে সন্দেহের তালিকা থেকে বাদ রাখছেন?”

“এতো কিছু জানার পর মনে হচ্ছে না কাজটা তারা করেছে।”

“তাহলে সি ই এ সিদ্ধিকী সাহেবের ছেলের কানেকশানটা কোথায়?”

“ভালো প্রশ্ন করেছো। এদের তিনজনের যেকোনো একজনের সাথে যদি তার কানেকশান বের করা যায় তাহলে অনেক সহজ হয়ে যাবে কেসটা।”

জামান এবার বুঝতে পারছে তার বস কিভাবে এগোতে চাচ্ছে। “তাহলে আপনি কি এখন তাকে খুঁজে বের করতে চাইছেন?”

“হ্যা, তা-ই চাইছি, তবে ছেলেটাকে সিদ্ধিকী সাহেব বোম্বের এক রিহাবো পাঠিয়ে দিয়েছে। যতোদূর জানতে পেরেছি ছয় মাসের আগে সে দেশে ফিরবে না।”

“আপনি কি তাহলে ছয়মাস অপেক্ষা করবেন?” জানতে চাইলো জামান।

“না।”

“তাহলে?”

“দেখি কি করা যায়।” মুখে এ কথা বললেও হঠাৎ করেই একটা সিদ্ধান্ত নিয়ে ফেললো সে।

সি ই এ সিদ্ধিকী নিজের বিশাল ব্যবসায়িক সাম্রাজ্যের হেডঅফিসে ব্যস্ত সময় কাটাচ্ছেন। কয়েক দিনের জন্যে দেশের বাইরে গেলে এমনই হয়—একগাদা কাজ জমে থাকে। এই ব্যস্ততার মাঝেও নিজের একমাত্র সন্তান ইরামের সাথে ফোনে কথা বলতে ভুলে যান নি। লাঞ্চের পর একটু সময় বিশ্রাম নেন তিনি, সেই সময়টাতে ছেলের সাথে কিছুক্ষণ কথা বলেছেন। তার সাথে কথা বলার পর থেকেই তিনি বেশ রিলাক্স মুডে আছেন।

টুটমেন্টটা বোধহয় ভালোই চলছে, কারণ তার ছেলে আজ বেশ গুছিয়ে কথা

বলেছে। তার কাছে মনে হচ্ছে ওখানে কয়েকটা মাস থাকলে ইরাম পুরোপুরি সুস্থ হয়ে উঠবে।

এমন সময় ইন্টারকমটা বেজে উঠলে তিনি সেটা তুলে নিলেন। তার পারসোনাল সেক্রেটারি তাকে জানালো সিটি হোমিসাইড থেকে ইনভেস্টিগেটর জেফরি বেগ নামের এক লোক তার সাথে দেখা করতে চাইছে।

মাইগড!

কি বলবেন বুঝতে না পেরে সিদ্দিকী সাহেব সেক্রেটারিকে বলে দিলেন ইনভেস্টিগেটরকে দশ মিনিট অপেক্ষা করতে। তিনি জরুরি একটা কাজ করছেন।

ইন্টারকমটা রেখেই সঙ্গে সঙ্গে অমূল্য বাবুকে ফোন ক’রে জানালেন ব্যাপারটা।

“আপনি তার সাথে দেখা করেন। সমস্যা নেই। বরং না দেখা করলেই লোকটা উল্টাপাল্টা ভাবে শুরু করবে।”

“আপনার কি মনে হয় সে ইরামের ব্যাপারটা জেনে গেছে?” উদ্ভিগ্ন হয়ে জানতে চাইলেন তিনি।

একটু চুপ ক’রে থেকে বাবু বললো, “...খুব সম্ভবত ইরামের গ্রেফতারের ব্যাপারটা জেনে গেছে। এর বেশি জানার কথা নয়। আপনি একদম স্বাভাবিকভাবে কথা বলবেন।”

“আপনি থাকলে অনেক সুবিধা হতো...”

“তা ঠিক। আপনি কথা বলতে শুরু করুন...আমি দেখি কতো জলদি আসতে পারি।”

“তহলে তাকে আমি ভেতরে আসতে বলে দেই?”

“অবশ্যই।”

“আপনি কিন্তু দেরি করবেন না।”

“একদম চিন্তা করবেন না...আমি আসছি।”

ফোনটা নামিয়ে রেখে সিদ্দিকী সাহেব কিছক্ষণ চুপ মেরে রইলেন। নিজেকে ধাতস্থ করে নিচ্ছেন তিনি। পাঁচ মিনিট পর ইন্টারকমটা তুলে সেক্রেটারিকে বলে দিলেন ইনভেস্টিগেটরকে ভেতরে পাঠিয়ে দেবার জন্য।

দরজা খুলে ভেতরে প্রবেশ করলো দেবদূতের মতো দেখতে এক যুবক। সিদ্দিকী সাহেবের দিকে হাত বাড়িয়ে বেশ মার্জিতভাবে বললো সে, “আমি সিটি হোমিসাইডের ইনভেস্টিগেটর জেফরি বেগ।”

কোনো কথা না বলে হাত মেলালেন সিদ্দিকী সাহেব, তারপর চেয়ারে বসার ইশারা করলেন ভিজিটরকে।

“থ্যাঙ্কস,” সিদ্দিকী সাহেবের বিশাল ডেস্কের বিপরীতে একটা চেয়ারে বসে বললো বেগ।

“তো কি মনে করে আমার এখানে আসা?” ভাববাচ্যে জানতে চাইলেন সি ই এ সিদ্দিকী।

“আমি লেখক জায়েদ রেহমানের হত্যাকাণ্ডের তদন্ত করছি। সেই বিষয়ে একটু কথা বলতে এসেছি।”

একটু অবাক হলেন সিদ্দিকী সাহেব। “আচ্ছা। বলুন কি জান্যে এসেছেন...আমার হাতে অবশ্য খুব বেশি সময় নেই।”

“আমি বেশি সময় নেবো না। ব্যাপারটা আপনার ছেলে ইরামকে নিয়ে...”

“বলে যান,” আশ্তে ক’রে বললেন তিনি।

“আমি জানতে পেরেছি জায়েদ রেহমান যে রাতে খুন হলেন সে রাতে ইরাম পুলিশের হাতে গ্রেফতার হয়েছিলো।” একটু থেমে সিদ্দিকী সাহেবের অভিব্যক্তি লক্ষ্য করলো জেফরি। ভদ্রলোক নির্বিকার। “আপনি নিজে থানায় গিয়ে তাকে ছাড়িয়ে আনেন...”

ভদ্রলোক কিছুই বললেন না।

“আমি কি ঠিক বলেছি?” প্রশ্ন রাখলো জেফরি।

“আপনি আসলে কি জানতে চাইছেন, ইনভেস্টিগেটর?” ভরাট কণ্ঠে বললেন তিনি।

“আমার ধারণা আপনার ছেলে জায়েদ রেহমানের হত্যাকাণ্ডের ব্যাপারে গুরুত্বপূর্ণ কিছু জানে।”

নিজের চেয়ারে সোজা হয়ে বসেলেন। “আপনি মনে করছেন ঐ লেখকের হত্যাকাণ্ডে আমার ছেলে জড়িত?”

এভাবে সরাসরি বলাতে জেফরি একটু ভিমড়ি খেলো। “না। আমি তা বলছি না। সম্ভবত হত্যাকাণ্ডের ব্যাপারে সে গুরুত্বপূর্ণ কিছু জানে।”

“লেখক খুন হবার রাতে সে তার অ্যাপার্টমেন্টের সামনে দাঁড়িয়ে ছিলো...এই তো?”

“জি।”

“আপনি আমার ছেলে সম্পর্কে কতোটুকু জানেন?”

“খুব বেশি কিছু জানি না। শুধু জানি আপনার ছেলে বোধহয় মাদকাসক্ত—”

“বোধহয় না, সে বেশ ভালোভাবেই মাদকাসক্ত।”

নিজের ছেলে সম্পর্কে এভাবে স্পষ্ট কথা বলাতে জেফরি আবারো অবাক হলো। শত কোটি টাকার মালিকেরা কি এভাবেই কথা বলে! মনে মনে বললো জেফরি।

“আর কি জানেন?” জেফরিকে চূপ ক’রে থাকতে দেখে তিনি জানতে চাইলেন ।

“আমি আসলে তার সম্পর্কে তেমন কিছুই জানি না ।”

“আপনি জানতে চাচ্ছেন সেই রাতে আমার ছেলে কেন জায়েদ রেহমানের বাড়ির সামনে গিয়েছিলো, তাই না?”

মাথা নেড়ে সায় দিলো জেফরি ।

“আমার ছেলে লেখক জায়েদ রেহমানের অন্ধভক্ত । লেখক জায়েদ রেহমান রেহমানও সেটা জানতেন । এমনকি তিনি ইরামকে একটি বইও উৎসর্গ করেছিলেন । বলতে পারেন লেখক জায়েদ রেহমানের সবচাইতে বড় ভক্তের নাম হলো চৌধুরি ইরাম আহমেদ সিদ্দিকী ।”

জেফরি এটা জানতো না । কথাটা শুনে খুব অবাকই হলো সে । “তা বুঝলাম কিন্তু—”

সিদ্দিকী সাহেবের অফিসের দরজা খুলে এক লোক ঢুকে পড়লো বিনা অনুমতিতে ।

মেদহীন শরীরের এক পঞ্চাশোর্ধ লোক । কিছু না বলে সোজা জেফরির পাশের চেয়ারে এসে বসে পড়লো সে । সিদ্দিকী সাহেবের দিকে সপ্রশ্ন দৃষ্টিতে তাকালে তিনি বললেন, “ইনি হলেন অমূল্য বাবু । আমার...খুবই কাছের একজন । আপনি উনার সামনে বলতে পারেন, কোনো সমস্যা নেই ।”

সিদ্দিকী সাহেবের আশ্বাস পেয়ে জেফরি আবার বলতে লাগলো, “অতো রাতে আপনার ছেলে তার বাড়ির সামনে কেন গেলো...আর আপনিই বা তাকে থানা থেকে ছাড়িয়ে এনে সেদিনই বোম্বের এক রিহ্যাবে পাঠিয়ে দিলেন কেন?”

মুচকি হেসে অমূল্য বাবুর দিকে তাকালেন সিদ্দিকী সাহেব ।

“কারণ পরদিন তাকে বোম্বের রিহ্যাবে পাঠিয়ে দেয়া হবে সেজন্যে...” পাশ থেকে অমূল্য বাবু নামের লোকটি বললে জেফরি তার দিকে তাকালো । “...বাড়ি থেকে পালিয়ে লেখক জায়েদ রেহমানের সাথে হয়তো দেখা করার উদ্দেশ্যে সেখানে গেছিলো ।”

মাথা নেড়ে কথাটার সাথে সায় দিলেন সিদ্দিকী সাহেব ।

জেফরি কিছু বললো না । স্থির চোখে চেয়ে রইলো অমূল্য বাবু নামের লোকটির দিকে ।

“কি ভাবছেন, ইনভেস্টিগেটর সাহেব?” জানতে চাইলেন সিদ্দিকী সাহেব ।

“বুঝতে পেরেছি, কিন্তু আপনি কেন ধানমণ্ডি থানার ইন্সপেক্টর এলাহী নেওয়াজকে অতোগুলো টাকা দিতে গেলেন?”

কিছুক্ষণ চূপ মেরে অমূল্য বাবুর দিকে তাকিয়ে তিনি বললেন, “খুব

সহজ... পুলিশ যাতে আমার ছেলেকে হ্যারাজমেন্ট না করে। খামোখা তাকে নিয়ে টানাটানি না করে।”

“কিন্তু আপনি তো স্বরাষ্ট্রমন্ত্রীর ঘনিষ্ঠ লোক, আপনি কেন সামান্য একজন পুলিশ ইন্সপেক্টরকে অতোগুলো টাকা দেবেন?”

সিদ্দিকী সাহেব আর অমূল্য বাবু নিজেদের মধ্যে দৃষ্টি বিনিময় করে নিলেন।

“পুলিশের মুখ বন্ধ করার জন্যে টাকা ছাড়া আর কিছু আছে!” অমূল্য বাবু বললো। “স্বরাষ্ট্রমন্ত্রীর ঘনিষ্ঠ লোক বললেই এরা মুখ বন্ধ রাখবে ভেবেছেন?”

“এখন নিশ্চয় বুঝতে পারছেন ওদের মুখ বন্ধ রাখা কতোটা কঠিন।” সিদ্দিকী সাহেব বললেন।

মাথা নেড়ে সায় দিলো জেফরি বেগ। চৌধুরি ইরাম আহমেদ সিদ্দিকী আরেকটা কানাগলি! গোলকধাঁধার আরেকটা কানাগলিতে গিয়ে ঢুকে পড়েছে সে।

“ইনভেস্টিগেটর?” জেফরির অন্যান্যমনস্কতা ভাঙার জন্যে বললেন সিদ্দিকী সাহেব। “আমার একটা জরুরি অ্যাপয়েন্টমেন্ট আছে। আপনার যদি আর কিছু না জানার থাকে তাহলে...”

“ওহ্ সরি,” কথাটা বলেই চট করে উঠে পড়লো জেফরি। “আপনার অনেক সময় নষ্ট করলাম। হোপ ইউ ডোন্ট মাইন্ড।”

“নট অ্যাট অল,” বললেন তিনি। “আশা করি আপনি এখন পুরো বিষয়টা বুঝতে পেরেছেন।”

“অবশ্যই। তাহলে আমি আর আপনার মূল্যবান সময় নষ্ট করবো না। আসি।” কথাটা বলে সিদ্দিকী সাহেবের সাথে হাত মিলিয়ে দ্রুত বের হয়ে গেলো জেফরি বেগ।



হোমিসাইডের মহাপরিচালক ফারুক আহমেদ তার প্রিয়পাত্র জেফরি বেগের উপর না রেগে পারলো না ।

সিদ্দিকী সাহেব যে স্বরাষ্ট্রমন্ত্রীর ঘনিষ্ঠ লোক সেটা জেনেও কোন্ আক্কেলে তার অফিসে গেলো সে!

যদি স্বরাষ্ট্রমন্ত্রী সিদ্দিকী সাহেবের ছেলেকে থানা থেকে ছেড়ে দিতে বলেও থাকেন সেটা নিয়ে এতো বেশি ভাবার কী আছে? বড়লোকের নেশাখোর ছেলে তার প্রিয় লেখকের বাড়ির সামনে গিয়ে দাঁড়িয়ে থাকলো আর জেফরি সন্দেহ করতে শুরু ক’রে দিলো এই ছেলে হত্যাকাণ্ডের সাথে জড়িত!

এতোটা স্টুপিডিটি জেফরির কাছে থেকে সে আশা করে নি । অন্তত সিদ্দিকী সাহেবের অফিসে যাবার আগে তাকে জানানো উচিত ছিলো ।

“তুমি যদি আমাকে ওখানে যাবার আগে জানাতে তাহলে আমি তোমাকে যেতে বারণ করতাম,” তার সামনে বসে থাকা জেফরি বেগের উদ্দেশ্যে বললো ফারুক আহমেদ । সিদ্দিকী সাহেবের ওখান থেকে জেফরি চলে আসার পর পরই বেচারী মহাপরিচালক চাপের মধ্যে পড়ে গেছে । “ভদ্রলোক স্বরাষ্ট্রমন্ত্রীর কাছে নালিশ করেছেন ।”

জেফরিও বুঝতে পারছে এভাবে হুট করে সি ই এ সিদ্দিকী সাহেবের অফিসে যাওয়াটা ঠিক হয় নি । এই কেসে ইরামকে খুব বেশি গুরুত্ব দিয়েছিলো সে । এখন দেখা যাচ্ছে নিতান্তই কাকতালীয় একটি ব্যাপার । সবচাইতে বড় কথা ইরাম হলো লেখক জায়েদ রেহমানের একজন অন্ধভক্ত । ভালো করে খোঁজখবর না নিয়েই তার ব্যাপারে কিছু জানতে চাওয়াটা একদম ভুল হয়ে গেছে ।

“আমি মন্ত্রী সাহেবকে বুঝিয়ে বলার চেষ্টা করছি । আপাতত উনাকে ঠাণ্ডা করা গেছে কিন্তু এ ব্যাপারটা নিয়ে আর কিছু করলে পরিস্থিতি খুব খারাপ হবে ।”

“আমি কিন্তু বলি নি উনার ছেলেকে সন্দেহ করছি । বলেছি তার ছেলে হয়তো এই খুনের ব্যাপারে গুরুত্বপূর্ণ কিছু জানে ।”

“সেটা ঠিক আছে...কিন্তু উনি পুলিশকে ঘুষ দিয়েছেন এ কথা বলতে গেলে কেন?”

কিছু বললো না জেফরি বেগ।

“যাইহোক, এই কেসের চিন্তা বাদ দাও। যা করার করেছো, এখন বাকিটা পুলিশ সামলাক।”

“কিন্তু—”

হাত তুলে কথার মাঝখানে তাকে বাধা দিয়ে বললো ফারুক আহমেদ। “ট্রাই টু আন্ডারস্ট্যান্ড। আমি তোমাকে খুব স্নেহ করি বলে তোমার কথা মতো এই কেসটা আবার তদন্ত করতে দিয়েছি। কিন্তু তুমি ভুলে গেছো তোমাকে বলেছিলাম এটা হবে আনঅফিশিয়ালি...কোনো কিছু করার আগে আমাকে জানাতেও বলেছিলাম।”

চুপ করে থাকলো জেফরি। হঠাৎ বিপ ক’রে উঠলো তার মোবাইল ফোনটা। অরেকটা এসএমএস! মোবাইলটা বের ক’রে দেখলো না। উঠে দাঁড়ালো সে। “স্যার, আমি তাহলে আসি...”

“ঠিক আছে, যাও। এই ফালতু কেসটা নিয়ে খামোখা মাথা ঘামানোর দরকার নেই।”

মহাপরিচালকের রুম থেকে বের হয়ে পকেট থেকে মোবাইলটা বের করে দেখলো জেফরি বেগ।

আই কান্ট ফরগেট ইউ

রেবার উপর তার কোনো রাগ নেই বরং এখন মেয়েটার জন্যে তার খুব কষ্ট হচ্ছে। তার খুব ইচ্ছে করছে রেবাকে একটা মেসেজ করতে কিন্তু কী এক সংকোচে করতে পারছে না। আমিও তোমাকে ভুলতে পারছি না। এক মুহূর্তের জন্যেও না।

“হাই।”

একটা মিষ্টি কণ্ঠ বলে উঠলে মোবাইলের ডিসপ্লে থেকে চোখ তুলে তাকালো জেফরি। এডলিন।

সঙ্গে সঙ্গে ফোনটা পকেটে রেখে দিলো সে। “কেমন আছেন?”

“ভালো। ক্যান্টিনে যিচ্ছিলেন?” এডলিন জানতে চাইলো। আশেপাশে কেউ না থাকলে এই মেয়ে তাকে স্যার সম্বোধন করে না। এখনও তাই করছে।

“না।”

মেয়েটা দাঁড়িয়ে আছে, জেফরি কিছু বলছে না। মেয়েটাও কোনো কথা খুঁজে পাচ্ছে না। অস্বস্তিকর একটি অবস্থা। অবশেষে এডলিন বললো, “আমি ক্যান্টিনে যাচ্ছি।”

জেফরি বুঝতে পারছে না কি বলবে। এডলিন তার চোখের দিকে তাকালো

কিছু একটা শোনার আশায়। কিন্তু জেফরি কোনো কথা না বললে বিব্রত হয়ে চলে গেলো এডলিন।

নিজের অফিসের দিকে পা বাড়ালো জেফরি বেগ। অফিসের দরজার কাছে আসতেই মোবাইল ফোনটা বেজে উঠলো। এবার আর কোনো মেসেজ নয়, ইনকামিং কলের রিং। অন্যমনস্কভাবেই ফোনটা বের ক'রে কলটা রিসিভ করলো সে।

“স্যার, ঐ লোকের তো দ্যাকছি...” বেশ উত্তেজিত হয়ে একটা কণ্ঠ বললো তাকে।

“কোন লোক?” বুঝতে না পেরে বললো সে।

“ঐ যে আমার দোকানে আসতো...চা খাইতো?”

“আপনি কে বলছেন!?” এখনও চিনতে পারছে না জেফরি।

“আমি, স্যার...তালেবর মিয়া...ঐ যে আমার চা খাইয়া কইলেন খুব ভালো চা হইছে?”


...চা? চট করে মনে পড়ে গেলো তার। “ও, হ্যা, মনে পড়েছে।”

“স্যার, আপনি বলছিলেন না ঐ লোকটারে দেখলে আপনারে খবর দিতে?”

“হ্যা!” জেফরি নড়ে চড়ে উঠলো।

“তারে আমি দ্যাকছি, স্যার।”

“কি!?”



অধ্যায় ৪৮

ভিটা নুভার সামনের রাস্তা। বিশ্ববিদ্যালয় পড়ুয়া দু'টো ছেলে-মেয়ে পাশাপাশি কথা বলতে বলতে হেটে যাচ্ছে।

আচমকা তাদের সামনে একটা প্রাইভেট কার ব্রেক কষলে ছেলে-মেয়ে দুটো ভড়কে গেলেও স্থির হয়ে দাঁড়িয়ে রইলো।

গাড়ি থেকে নেমে এলো পঞ্চাশোর্ধ্ব এক জাঁদরেল লোক।

হন হন করে এগিয়ে এসে থপ্ করে মেয়েটির হাত ধরে ফেললে ছেলেটা হাত তুলে তাকে বাধা দিতেই বয়স্ক লোকটি ঠাস্ করে ছেলেটার গালে চড় বসিয়ে দিলো...

কাট!

একটা কণ্ঠ শোনা যেতেই কেঁপে উঠলো পুরো দৃশ্যটা... তারপর বিশৃঙ্খলা।

আলম শফিককে দেখা গেলো হাতে একটা ক্লিপবোর্ড নিয়ে ছেলেমেয়ে দু'জন আর বয়স্ক লোকের কাছে এগিয়ে যেতে।

এখানেই দৃশ্যটা শেষ।

“চড় মারার ঠিক আগ মুহূর্তের দৃশ্যটায় যাও,” পাশে বসে থাকা জামানকে বললো জেফরি বেগ।

তারা বসে আছে জেফরির অফিসে। প্রায় দশ মিনিট ধরে একটা ডিভিডি কম্পিউটারে ঢুকিয়ে ছোট্ট একটি দৃশ্য বার বার দেখছে।

একটু আগে মিসেস রেহমানের সাথে দেখা করে এই ডিভিডিটা নিয়ে এসেছে জামান।

ভিটা নুভার বিপরীত দিকে রাস্তার পাশে ফুটপাতে চায়ের দোকানি তালেবর মিয়া কিছুক্ষণ আগে ফোন করে যখন জানালো সে সম্ভাব্য খুনিকে দেখেছে কথাটা শুনে জেফরির মনে হয়েছিলো খুনি বুঝি তার চায়ের দোকানেই এসেছিলো। কিন্তু এটা তো অসম্ভব! পেশাদার একজন খুনি এরকম বোকামি করবে না।

তবে তার এই ভাবনার স্থায়ীত্ব ছিলো খুবই অল্প সময়ের জন্যে। এরপর তালেবর মিয়া যা বললো সেটা আরো বিস্ময়কর।

গতকাল রাতে এক টিভি চ্যানেলে ‘সিদ্ধান্ত’ নামের একটি টেলিফিল্ম

প্রচারিত হয়েছে। সেখানে একটি দৃশ্য চিত্রায়িত হয়েছিলো ভিটা নুভার সামনে। সেই দৃশ্যে কয়েক সেকেন্ডের জন্য তালেবর মিয়ার চায়ের দোকান দেখা গেছে...আর সেই সাথে দেখা গেছে ওখানে বসে থাকা সম্ভাব্য সেই খুনিকে!

এক মনে চা খেতে খেতে পত্রিকা পড়ছে।

মাত্র কয়েক সেকেন্ডের একটি দৃশ্য।

তালেবর মিয়ার কথার সূত্র ধরে জেফরি নিজে ঐ টিভি চ্যানেলে যোগাযোগ ক'রে জানতে পেরেছে কাকতালীয়ভাবেই টেলিফিল্মটির নির্মাতা প্রতিষ্ঠান বি.জে এন্টারটেইনমেন্ট, যার সত্ত্বাধিকারী প্রয়াত লেখক জায়েদ রেহমান এবং মিসেস রেহমান।

ঐ চ্যানেলে জেফরির কলেজ জীবনের এক বন্ধু বেশ উঁচুপদে চাকরি করে, জেফরি যখন তাকে সব খুলে বললো তখন সেই বন্ধুই তাকে জানালো টেলিফিল্মটিতে ঐ দৃশ্য মাত্র কয়েক সেকেন্ডের জন্য আছে, আর সেখানে লোকটার শুধুমাত্র এক পাশই দেখা গেছে, ভালো হয় নির্মাতা প্রতিষ্ঠানের সাথে যোগাযোগ করে তাদের কাছ থেকে টেলিফিল্মের ফুটেজ সংগ্রহ করলে। রাশ ফুটেজে নিশ্চয় আরো ভালোভাবে দেখা যাবে লোকটাকে।

বন্ধুর কথা মতোই মিসেস রেহমানকে ফোন করে সেই টেলিফিল্মের ফুটেজ চায় জেফরি, তবে ভদ্রমহিলাকে পুরো ব্যাপারটি খুলে বলে নি সে।

মহিলা একটু অবাক হলেও তার অনুরোধ রক্ষা করেছে।

জামান ফুটেজের একটি জায়গা স্থির ক'রে রাখলে জেফরি একটু কাছে এগিয়ে ভালো ক'রে দেখলো। “হ্যা, ঠিক এই অ্যাসেল থেকেই পুরো চেহারাটা দেখা যাচ্ছে।”

বিশ্ববিদ্যালয় পড়ুয়া দুটো ছেলেমেয়ে পাশাপাশি হাটছে। তাদের পেছনে ফুটপাতে একটা চায়ের দোকান ফ্রেমে ঢুকে পড়েছে। এটা তালেবর মিয়ার দোকান। সেখানে একজনই ক্রেতা পত্রিকা হাতে আপন মনে চা খাচ্ছে। ঠিক এই দৃশ্যটায় এসে যুবক মুখ তুলে ক্যামেরার দিকে তাকিয়েছিলো।

দেবদূতের মতো চেহারার এক যুবক।

সম্ভাব্য খুনি!

এই সেই যুবক যে কিনা ভিটা নুভার সামনে দিনের পর দিন তালেবর মিয়ার চায়ের দোকানে বসে পুরো অ্যাপার্টমেন্টটি পর্যবেক্ষণ ক'রে গেছে। এই যুবকই মোবাইলফোনের টাওয়ারের মেইনটেনান্স ক্রু সেজে ঢুকেছিলো, পরে ভোর বেলা জায়েদ রেহমানের খুন হবার পর ফজরের নামাজ পড়তে যাওয়ার ভান করে ভিটা নুভা থেকে বের হয়ে গিয়েছিলো।

জেফরি নিশ্চিত এই সেই পেশাদার খুনি...লেখক জায়েদ রেহমানকে যে খুন করেছে।

বার বার চেহারাটা দেখে গেলো সে। তার সহকারী জামান বাকরুদ্দ হয়ে আছে। এভাবে এতো দ্রুত সম্ভাব্য খুনিকে নিজের চোখে দেখতে পাওয়াটা বিস্ময়করই বটে।

“ঠিক এই ফ্রেম থেকেই স্টিলছবি নেবে,” জামানকে বলে গেলো জেফরি বেগ। “জুম করে আরো কাছে আনা যাবে না?”

“যাবে,” পর্দার দিকে চেয়েই বললো জামান।

“ডিপার্টমেন্টের কাউকে কিছু বোলো না।”

পর্দা থেকে চোখ সরিয়ে জামান তার দিকে তাকালো।

“আপাতত ব্যাপারটা তোমার আর আমার মধ্যেই রাখবে।”

“ফারুক স্যারকে জানাবেন না?”

“এখন না।”

“ছবিটার কয়টি প্রিন্ট করবো, স্যার?”

একটু ভেবে বললো জেফরি, “দুটো।”

“এরপর কি করবেন?”

“আমাদের আবারো ভিটা নুভায় যেতে হবে।”

এক ঘন্টা পর ভিডিও ফুটেজ থেকে দুটো ছবি প্রিন্ট করে জামানকে সঙ্গে নিয়ে ভিটা নুভায় চলে এসেছে ইনভেস্টিগেটর জেফরি বেগ। নাইটগার্ড আসলাম আর দাডোয়ান মহব্বত দাঁড়িয়ে আছে তাদের সামনে।

জেফরি প্রথমে মহব্বতকে ছবিটা দেখালো। “দ্যাখো তো, এই লোকটাকে চিনতে পারো কিনা?”

ছবিটা হতে নিয়ে ভালো করে দেখে নিলো মহব্বত। “হ, স্যার। এইটা তো টাওয়ারের ঐ লোকটাই মনে হইতাকে!”

“গুড।” এরপর আসলামকে দেখালে ছবিটার দিকে অনেকক্ষণ তাকিয়ে থাকলো সে। “হানিফ সাহেবের পেছন পেছন যে লোকটাকে তুমি বের হয়ে যেতে দেখেছো...এই লোকটা কি সেই লোক?”

মাথা নেড়ে সায় দিলো সে। “হ।”

দাডোয়ান দু’জনকে বিদায় করে দিয়ে জেফরি আর জামান ভিটা নুভা থেকে বের হয়ে তালেবর মিয়ার চায়ের দোকানে চলে এলো।

চা খেতে খেতে কথা বলতে শুরু করলো জেফরি।

“শুটিং যেদিন হয় সেদিনের কথা কি তোমার মনে আছে, তালেবর?”

“হ, স্যার। বেশি দিন আগের ঘটনা তো না। এই বাড়ির সামনে শুটিং হইতছিলো। রাস্তাটা এক্কেবারে নিরিবিলি আছিলো ঐ দিন। আমি দোকান

থেইকা বইসা বইসা তামশা দেখতাছিলাম...এমন সময় ঐ লোকটা আইলো । সেও বইসা বইসা তামশা দেখতে থাকলো । তারপর আত্থা উইঠা চায়ের বিল দিয়া চইলা গেলো ।”

চায়ে চুমুক দিয়ে বললো জেফরি, “লোকটা কোন দিক থেকে তোমার এখানে আসতো...চলে যেতো কোন দিকে?”

“উমমম..আসতো ঐদিকে থেইকা,” রাস্তার পশ্চিম দিকে নির্দেশ করে বললো । “আবার ঐদিকেই চইলা যাইতো, স্যার ।”

মাথা নেড়ে সায় দিলো জেফরি । “কখনও কি দিনে দু’তিনবার আসতো?”

“তা আসতো...মাজেমইদ্যে ।”

“সব সময় কি একাই আসতো?”

“হ ।”

“সিগারেট খেতো?”

“হ, খাইতো ।”

“পরনের জামাকাপড় কি খুব ফিটফাট থাকতো?”

“সব সময়ই ফিটফাট থাকতো, স্যার ।”

“কোন পত্রিকা পড়তো?”

“ইণ্ডেফাক ।”

“গুড ।” জেফরি চা শেষ করে উঠে দাঁড়ালে তার সাথে সাথে জামানও উঠে দাঁড়ালো । চায়ের বিল দেবার সময় বললো, “তুমি অনেক বুদ্ধিমান একটা লোক । অনেক উপকার করেছে ।”

আনন্দে বিগলিত হয়ে উঠলো তালেবর ।

তালেবর মিয়াকে ধন্যবাদ দিয়ে চায়ের দামসহ কিছু বখশিস দিয়ে দিলো সে । লোকটা অবশ্য প্রথমে টাকা নিতে না চাইলেও জেফরি জোর করলে আর না করলো না ।

“আজ আসি । পরে দেখা হবে ।”

তালেবর নিয়ার গুঝান থেকে সোজা পশ্চিম দিক ধরে ফুটপাথ দিয়ে হেটে যাচ্ছে জেফরি বেগ আর জামান ।

“আমার ধারণা সে আশেপাশেই কোথাও থাকতো,” বললো জেফরি ।

“আমারও তাই মনে হচ্ছে, স্যার ।”

“আশেপাশে লন্ড্রি আর সিগারেটের দোকান দেখলে তাদের কাছে ছবিটা দেখিয়ে জিজ্ঞেস করতে হবে ।”

জামান সামনের দিকে তাকালো । “এই জায়গাটা আমি চিনি, স্যার । সামনেই একটা সিগারেটের দোকান আছে । আর বা দিকে মোড় নিলেই একটা লন্ড্রির দোকান ।”

সিগারেটের দোকানিকে ছবিটা দেখালে চিনতে পারলো না।

“সিগারেট বোধহয় তালেবরের কাছ থেকেই কিনতো,” জেফরি বললো।

আরো সামনে এগিয়ে বায়ে মোড় নিতেই হাতের ডানে একটা লন্ড্রির দোকান দেখা গেলো। একটা ছবি নিয়ে জামানই এগিয়ে গেলো কথা বলার জন্য, জেফরি আর দোকানের ভেতর ঢুকলো না।

বয়স্ক এক লোক বসে আছে দোকানে। জামান তার সাথে কিছুক্ষণ কথা বলার পর ছবিটা দেখালে লোকটা মাথা নেড়ে সায় দিলো। দোকানের বাইরে থেকে জেফরি দৃশ্যটা দেখে এগিয়ে গেলো সেদিকে।


“স্যার, ইনি বলছেন এই লোককে চেনেন,” জেফরিকে দোকানের ভেতর ঢুকতে দেখে জামান বললো। “তবে কোন্ বাড়িতে থাকেন জানেন না। খুব সম্ভবত আশেপাশেই থাকেন।”

আশেপাশের অনেকগুলো বাড়ির দাড়াওয়ানকে ছবিটা দেখালো তারা, কেউ চিনতে পারলো না।

এভাবে খুঁজে যে পাওয়া যাবে না সেটা জেফরিও জানে। ডিপার্টমেন্টের সাহায্য ছাড়া এরকম একজন লোককে ট্র্যাকডাউন করা প্রায় অসম্ভব একটি কাজ। কিন্তু এ মুহূর্তে ডিপার্টমেন্টকে এ ব্যাপারে কিছু জানাতে চাচ্ছে না সে।

চট করেই একটা নাম তার মাথায় এসে পড়লো।

সিদ্ধান্ত নিলো হোমিসাইডের মহাপরিচালক ফারুক আহমেদকে সব খুলে বলার আগে আরেকজনের সাথে এ নিয়ে কথা বলবে।



ফ্ল্যান্স সাংবাদিক দিলান মামুদ সারাটা দিন ডক্টর জেডের সাথে ছিলো। লিওনার্দো দা ভিঞ্চি সংক্রান্ত এক সমস্যা নিয়ে ডক্টর খুব ব্যস্ত আছেন। এই রহস্যময় পণ্ডিতব্যক্তির সাথে যখনই থাকে মোবাইল ফোন বন্ধ করে রাখে সে। আজও তাই করেছে।

অবশেষে অনেক রাতে বাড়ি ফিরে এলে বন্ধ থাকা মোবাইলফোনটা চালু করতেই দেখতে পেলো একটা মেসেজ জমে আছে ইনবক্সে।

জেফরি বেগ!

মেসেজটা ওপেন করলো সে।

ইংরেজিতে লিখেছে। বাংলা করলে অর্থ দাঁড়ায় :

কল করে পাই নি। মেইল চেক করে দেখুন। জরুরি।

দিলানের ইচ্ছে হলো কলব্যাক করার কিন্তু মেইলে কি আছে সেটা জানতে কৌতূহলী হয়ে উঠলো সে।

মেইলটা খুব সংক্ষিপ্ত। সাথে একটা ইমেজ অ্যাটাচ করা আছে।

এই ছবির লোকটিকে যদি চিনে থাকেন আমাদের জানান। খুব জরুরি।

সঙ্গে সঙ্গে অ্যাটাচ করা ছবিটা ওপেন করে দেখলো সে। তার চোখের কোনো পলক পড়লো না। *মাইগড!*

কম্পিউটারের ঘড়ির দিকে তাকালো। ১২:০৫

এতো রাতে কি ফোন করা ঠিক হবে? ভাবলো দিলান মামুদ। তবে এটাও তো ঠিক ইনভেস্টিগেটর জেফরি বেগ তার মতোই অবিবাহিত। অবশেষে ফোনটা তুলে নিয়ে ডায়াল করলো সে।

জেফরি বেগের চোখে ঘুম নেই। এক সপ্তাহ ধরেই তার ঘুম ভালো হচ্ছে না। চোখের নীচটা কালচে হতে শুরু করেছে। রেবার বিয়ে হবার খবরটা শোনার পর

থেকেই ঘুমে ব্যাঘাত হচ্ছে। একা থাকে, নিজের ঘরে এসে বিছানায় শুতে গেলেই নানান কথা মনে পড়ে। পুরনো সেসব স্মৃতি আরো দীর্ঘ করে তোলে নিঃসঙ্গ রাতটাকে।

তবে আজকে রেবার জন্য নয়, জায়েদ রেহমানের হত্যাকাণ্ডটি নিয়ে ভেবে যাচ্ছে সে। বিরাট অগ্রগতি হয়েছে আজ। সম্ভাব্য খুনির ছবি এখন তার হাতে। জেফরি নিশ্চিত এই খুনি পেশাদার কেউ।

একজন পেশাদার খুনি দীর্ঘদিন ধরে লেখকের অ্যাপার্টমেন্ট পর্যবেক্ষণ করে গেছে... তারপর প্রথমে আইপিএস সার্ভিসম্যান সেজে জায়েদ রেহমানের ঘরে ঢুকে দেখে এসেছে... অবশেষে ভিটা নুভার ছয় তলার উপর মোবাইলফোন কোম্পানির টাওয়ারের মেইনটেনান্স ত্রু সেজে দাড়ায়েন বদলি হবার ঠিক আগে সেখানে ঢুকে পড়েছে। খুব সম্ভবত টাওয়ারের উপরেই লুকিয়ে ছিলো সে... তারপর রাত গভীর হলে সেখান থেকে নেমে জায়েদ রেহমানের ঘরে ঢুকে পড়েছে। কিন্তু কিভাবে?

এটা এখনও জেফরি জানে না। তবে খুনি খুন করার পর আবার নিজের জায়গায় ফিরে যায়। অপেক্ষা করতে থাকে মোক্ষম সময়ের জন্যে... আর সেই মোক্ষম সময়টি হলো ভোরবেলা... ফজরের আজানের পর পর!

তাকে চমকে দিয়ে মোবাইল ফোনটা বাজতে শুরু করলো এ সময়। ফোনটা তুলে নিলো সে।

দিলান মামুদ!

আজ সারা দিনে অনেকবার চেষ্টা করেও তার সাথে যোগাযোগ করতে পারে নি। তার মোবাইলফোন বন্ধ ছিলো। শেষে খুনির ছবিটা তাকে মেইল করে দিয়েছে।

“হ্যালো?” জেফরি বললো।

“ছবিটা কোথেকে পেলেন?” সময় নষ্ট না করে সরাসরি জানতে চাইলো দিলান মামুদ। তার কণ্ঠে উদ্বেগ।

“লম্বা কাহিনী... আপনি তাকে চেনেন!?”

“হ্যাঁ।”

বিছানা থেকে উঠে বসলো জেফরি। “কে সে!?”

“আগে আমাকে বলেন আপনি তাকে খুঁজছেন কেন?”

“জায়েদ রেহমানের কেসে—”

“জায়েদ রেহমানের খুন...?” তার কথার মাঝখানে বাধা দিয়ে বললো দিলান।

“হ্যাঁ।”

“মিসেস রেহমান আর তার ঐ প্রেমিক না খুনটা করেছে!?”

“এর মাঝখানে অনেক ঘটনা ঘটে গেছে...পরে আপনাকে সব বলবো। এখন বলুন এই লোকটা কে?”

“ভয়ঙ্কর এক খুনি। একেবারে প্রফেশনাল। খুবই বিপজ্জনক লোক...”

“আমিও তাই ধারণা করেছিলাম। লোকটার নাম কি? কোথায় থাকে?”

“বাস্টার্ড!” আস্তে ক’রে বললো দিলান মামুদ।

“কী!?”

“ওর নাম। এটা যে আসল নাম না সেটা জানি, কিন্তু অল্প যে কয়েক জন মানুষ তাকে চেনে এ নামেই চেনে।”

“থাকে কোথায়?” আবারো জানতে চাইলো জেফরি।

“সেটা আমি জানি না...তবে তার ব্যাপারে খুব সাবধানে এগোবেন। খুবই বিপজ্জনক লোক।”

“পেশাদার খুনি, বিপজ্জনক তো হবেই,” বললো জেফরি।

“আমি আপনাকে নিয়ে আশংকা করছি। সে আপনার পেছনে লাগতে পারে।”

“আমার পেছনে!?”

“হ্যা। সে যদি জানতে পারে আপনি তাকে খুঁজছেন তাহলে আপনার জন্য সেটা ভালো হবে না।”

“এটা সে কি ক’রে জানবে?”

“সে জানবে। যেভাবেই হোক জেনে যাবে এটা।” একটু থেমে আবার বললো, “আপনি খুব সাবধানে থাকবেন।”

দিলান মামুদের সাথে ফোনে কথা বলার পর জেফরি একটু চিন্তিত হয়ে পড়লো। এভাবে আনঅফিশিয়ালি তদন্ত করাটা খুব বেশি ঝুঁকিপূর্ণ হয়ে যায়।



হোমিসাইড মহাপরিচালক ফারুক আহমেদ চুপ মেরে আছে। মনোযোগ দিয়ে জেফরির কথা শুনে গেলেও কোনো মন্তব্য করে নি এখন পর্যন্ত।

“স্যার, আমাদের হাতে এখন অনেকগুলো প্রমাণ আছে। এমন কি খুনির ছবি পর্যন্ত! এই লোকটিই জায়েদ রেহমানকে খুন করেছে, এ ব্যাপারে আমি নিশ্চিত।”

ফারুক সাহেবের সামনে টেবিলের উপর পেশাদার সেই খুনির ছবি রাখা আছে।

“তাহলে মিসেস রেহমান আর আলম শফিক? তারা কি কোনোভাবেই এর সাথে জড়িত নয়?” বললো মহাপরিচালক।

“না।” বেশ দৃঢ়তার সাথে বললো জেফরি।

“ধরে নিলাম পেশাদার খুনিই কাজটা করেছে কিন্তু তাকে ভাড়া করেছে কে? মিসেস রেহমান আর তার প্রেমিক কি তাকে ভাড়া করতে পারে না?”

মাথা দোলালো বেগ। “স্যার, এই খুনি,” টেবিলের উপর ছবিটায় টোকা মেরে বললো সে, “দীর্ঘদিন ধরে ভিটা নুভার সামনে বসে পর্যবেক্ষণ করেছে। মিসেস রেহমান আর আলম শফিক তাকে ভাড়া করলে তাকে এভাবে রেকি করতে হতো না, কারণ সব তথ্য সে তাদের কাছ থেকেই পেতো।”

মাথা নেড়ে সায় দিলো ফারুক সাহেব। “তাহলে তাকে ভাড়া করেছে কে?”

খুবই সঙ্গত প্রশ্ন, মনে মনে ভাবলো জেফরি। “সেটা খুঁজে বের করতে হলে তদন্তটি আবার নতুন করে শুরু করতে হবে।” একটু থেমে ব্যাখ্যা করার চেষ্টা করলো সে। “এই খুনিকে যদি ধরা যায় কিংবা আমাদের কাছে থাকা সন্দেহভাজনদের কারোর সাথে যদি এর কোনো রকম কানেকশন বের করা যায় তাহলে খুব সহজেই সেই প্রশ্নের জবাব জানা যাবে।”

চুপ মেরে রইলো ফারুক সাহেব তবে তার চোখমুখ দেখে জেফরি ইতিবাচক কিছু আশা করছে। “এভাবে আনঅফিশিয়ালি তদন্ত চালিয়ে গেলে খুনিকে ধরা যাবে না। এরকম একটা ছবি হাতে থাকার পরও যদি আমরা ব্যাপকভাবে ম্যানহান্ট শুরু করতে না পারি তাহলে কিছুই করতে পারবো না।”

“তাহলে তুমি চাচ্ছে এটি খুনিকে খুঁজে বের করতে?” ধীরকণ্ঠে বললো ফারুক আহমেদ।

“জি স্যার। এই খুনিকে খুঁজে বের করতে পারলেই আমরা অনেক কিছু জানতে পারবো।”

“কিভাবে কাজটা করতে চাও?”

“স্যার, সমস্ত থানায় এর ছবি দিয়ে এর সম্পর্কে খোঁজ নেবার জন্যে একটি টিম গঠন করে ব্যাপক অভিযান চালাতে হবে। আমার ধারণা খুব সহজেই তাকে ধরা সম্ভব হবে।”

চুপ করে রইলো ফারুক সাহেব। অনেকক্ষণ পর বললো, “ঠিক আছে। স্বরাষ্ট্রমন্ত্রণালয়কে এটা জানাতে হবে। জায়েদ রেহমানের হত্যা মামলাটি তারা বিশেষ গুরুত্বপূর্ণ মামলার মধ্যে অন্তর্ভুক্ত করেছে। এরইমধ্যে ফাইনাল ইনভেস্টিগেশন রিপোর্ট তৈরি হবার পথে। তাদেরকে না জানিয়ে তো এই কেসটা পুণঃতদন্ত করতে পারবো না।”

কথাটা শুনে জেফরি খুশি হলো। তার বস্কে তাহলে বোঝানো গেছে।

“ধন্যবাদ, স্যার।”

এমন সময় তার ফোনটা বিপ্ ক’রে উঠলে জেফরি বুঝতে পারলো রেবা আরেকটা মেসেজ পাঠিয়েছে।

ফারুক সাহেবের কাছ থেকে বিদায় নিয়ে চলে এলো নিজের অফিসে। ওপেন করলো মেসেজটা।

তোমার সাথে দেখা করতে চাই

অসম্ভব! রেবার মাথা কি খারাপ হয়ে গেছে? মোবাইলটা পকেটে রেখে দিলো সে। এরকম একেকটা এসএমএস তাকে অস্থির করে তোলে ভেতরে ভেতরে। মাথা থেকে রেবার চিন্তাটা কিছুক্ষনের জন্য ঝেঁড়ে ফেলতে জায়েদ রেহমানের কেসটা নিয়ে ভাবতে শুরু করে দিলো সে। নিজের ডেস্কে বসে সহকারী জামানকে ফোন করে তার রুমে চলে আসতে বললো। একা একা থাকলেই রেবার চিন্তা মাথায় এসে পড়ে, সামনে একজন থাকলে চিন্তাটা সহজে আসবে না।

দশ মিনিট পর জামান আর জেফরি ডুবে গেলো জায়েদ সাহেবের কেসটা নিয়ে। জামানকে জেফরি জানালো ফারুক সাহেব তদন্ত পুণরায় করার ব্যাপারে রাজি হয়েছে। এখন পূর্ণোদ্যমে কাজ শুরু করতে হবে। খুনিকে ধরার অভিযান চলতে থাকবে পাশাপাশি কে হত্যাকাণ্ডের মূল হোতা সেটা খুঁজে বের করার জন্য তাদেরকে কাজ ক’রে যেতে হবে।

“আমরা কি সন্দেহভাজন হিসেবে গ্যাট আর আবেদ আলীকে নিয়েই কাজ করবো?” জানতে চাইলো জামান।

“গ্যাট, আবেদ, আলী আর অভিনেত্রী পমি । আমরা এখন এই তিনজনের উপর কাজ করবো । আমার ধারণা এদের মধ্যেই কেউ খুনের মূল হোতা । এ পর্যন্ত আমরা গ্যাট আর আবেদ আলীর ব্যাপারে কিছু জানতে পারলেও পমির ব্যাপারে কিছু জানি না ।”

“আমি কি তার ব্যাপারে খোঁজখবর নেবো, স্যার?”

“না । আমি নিজে তার সাথে একবার দেখা করতে চাই ।”



আধো-আলো-অন্ধকার একটি ঘর। মৃদু ভলিউমে চলছে টিভি। ঘরের একমাত্র লোকটি লাগেজ গোছগাছ করছে। নেবার মতো খুব বেশি কিছু নেই। প্রয়োজনীয় কাপড়চোপড় আর কিছু আনুষঙ্গিক জিনিসপত্র। লোকটা এর আগে কখনই এতোটা ঝামেলায় পড়ে নি। হুট ক'রে তাকে জায়গা বদল করতে হচ্ছে। দরকার পড়লে দেশও ছাড়তে হতে পারে। এই প্রথম তার ছবি কোনো গোয়েন্দার হাতে চলে গেছে। ব্যাপারটা তার জন্যে ভয়ানক খারাপ খবর। জেফরি বেগ নামের গোয়েন্দা লোকটি কিভাবে তার ছবি জোগার করতে পারলো এখনও সেটা ভেবে পাচ্ছে না।

এটা কি ক'রে সম্ভব হলো?

এই জীবনে কখনই এতোটা অস্থির হয় নি সে। তার কাছে খবর আছে সেই গোয়েন্দা আরেকজনকে সাথে নিয়ে তার ছবি দেখিয়ে লোকজনকে জিজ্ঞেস করেছে তাকে কেউ চেনে কিনা। আরো জানতে পেরেছে, জায়েদ রেহমানের হত্যাকাণ্ডের পুণঃতদন্ত হবে।

এই জেফরি বেগ লোকটা তার জন্যে চ্যালেঞ্জ হয়ে উঠছে। মনে মনে তার প্রশংসা না করে পারলো না। পুরো পরিকল্পনা নতুন ক'রে সাজিয়ে নিতে হবে এখন। তবে সবার আগে এই জায়গাটা ছেড়ে চলে যেতে হবে।

অভিনেত্রী পমি প্রথমে কোনোভাবেই রাজি ছিলো না দেখা করার জন্য। জেফরি তাকে অনেক বুঝিয়েসুঝিয়ে রাজি করিয়েছে। হোমিসাইডের সাথে সহযোগীতা না করলে জায়েদ রেহমানের খুনের ব্যাপারে তাকেও সন্দেহ করা হতে পারে এরকম একটি প্রচলন আভাস দিলে এই তরুণী নিজের সিদ্ধান্ত থেকে সরে আসে।

এবারও সঙ্গে করে জামানকে নিয়ে আসে নি। গ্যাটের কথা যদি সত্যি হয় তাহলে তার সাথে জায়েদ রেহমান যা করেছে সেটা দু'জন পুরুষের সামনে বলতে অস্বস্তি বোধ করবে পমি। এখান থেকে পমিকে বিদায় দিয়ে সে চলে যাবে ভিটা নুভায়, জামানকে বলে দিয়েছে সে যেনো ওখানে চলে যায়।

নিজের বাড়িতে দেখা না করে একটা রেস্তোরাঁয় বসেছে পমি। এই অভিজাত রেস্তোরাঁয় যে সে খুব নিয়মিত আসে সেটা বুঝতে পারলো জেফরি বেগ। তার মতো একজন উঠতি অভিনেত্রী এ শহরের যেখানে খুশি সেখানে যেতে পারে না। ব্যাপারটা জেফরিও বোঝে। নিজের বাড়িতে জেফরিকে আসতে না বলার একটাই কারণ, তার মধ্যবয়সী ধনাঢ্য স্বামী। ভদ্রলোককে গত বছর বিয়ে করেছে সে। বয়সে তারচেয়ে বিশ বছরের বড়। জেফরির সাথে তার কথাবার্তা স্বামীর কাছে যেনো প্রকাশ না পায় সেজন্যই পমি এই জায়গাটা বেছে নিয়েছে।

“বলুন, আমার কাছ থেকে কি জানতে চান?” পমির কণ্ঠে অধৈর্য।

“জায়েদ রেহমানকে কতো দিন ধরে চেনেন?” বললো জেফরি।

“উমমম...তিন-চার বছর হবে।”

“আপনি তো উনার সাথে কাজ করেছেন, তাই না?”

“হ্যাঁ। এটা সবাই জানে, মি: বেগ। আপনি নিশ্চয় এসব কথা জানার জন্য আসেন নি। আসল কথায় আসুন। আমাকে আবার বাড়ি ফিরে যেতে হবে।”

ঠিক আছে, মনে মনে বললো জেফরি। “আপনি তো জায়েদ রেহমারে একটি ছবিতে কাজ করেছিলেন...কিন্তু সেটা শেষ করেন নি কেন?”

দেখতে দারুণ সুন্দরী পমি চেয়ে রইলো ইনভেস্টিগেটরের দিকে। “কাজ করতে সমস্যা হচ্ছিলো। ছবি সাইন করার সময় উনি আমার চরিত্রটি যেরকম বলেছিলেন পরে দেখি সেটা অনেক বদলে গেছে। এজন্যই কাজটা আর করা হয় নি।”

জেফরির ঠোঁটে মুচকি হাসি। “উনার এতোগুলো টিভি নাটকে কাজ করেছেন অথচ এরকম সামান্য একটি কারণে মাঝপথে এসে ছবিটা ছেড়ে দিলেন?”

“আমি মনে করেছি কাজটা করা ঠিক হবে না তাই ছেড়ে দিয়েছি। এতে সমস্যার কি আছে!?”

“তাহলে তার সাথে আপনি আর সম্পর্ক রাখলেন না কেন?”

“রাখি নি কারণ...কারণ, উনি আমার সাথে বাজে ব্যবহার করেছিলেন।”

মাথা নেড়ে সায় দিলো জেফরি। “আচ্ছা আমাকে বলুন তো, মানুষ হিসেবে জায়েদ রেহমান কেমন ছিলেন?”

অবাক হলো পমি। “এটা জানা কি আপনার তদন্তের জন্যে খুবই দরকার?”

“হ্যাঁ।”

একটু ভেবে বললো পমি, “ইবলিশ! আস্ত একটা ইবলিশ তবে সাধুপুরুষের মুখোশ পরে থাকতো সব সময়। আসল জায়েদ রেহমানকে খুব কম মানুষই চেনে।”

“সেই অল্প মানুষের মধ্যে আপনিও আছেন,” চট ক’রে বললো জেফরি।
পমি কিছু বললো না, একদৃষ্টিতে চেয়ে রইলো শুধু।

“মিসেস জায়েদ, মানে গোলনূর আফরোজ তরফদারের সাথে আপনার
সম্পর্ক কেমন ছিলো?”

এই প্রশ্নটি শুনে আবারো অবাক হলো পমি। “খুবই ভালো। উনাকে আমি
বড়বানের মতো দেখতাম। আমাকে তুই ক’রে সম্বোধন করতেন। তবে এখন
আর যোগাযোগ নেই।”

কথাটা কিভাবে বলবে ভেবে পেলো না সে। একটু ইতস্তত ক’রে বললো,
“জায়েদ রেহমান যে ধর্ষণ করেছিলেন সে ব্যাপারে জানতে চাইছি।”

একটু চমকে উঠলো পমি। পরক্ষণেই মুখটা তিক্ততায় ভরে উঠলো। “আপা
তাহলে আপনাকে বলে দিয়েছে...”

“হ্যাঁ। না বলার তো কোনো কারণ নেই।”

“জানার আর কি আছে। এসব জঘন্য ঘটনার কথা বলতে ইচ্ছে করে না।
একজন বিকৃত মানসিকতার লোক ছিলো সে। আই হেইট হিম।”

জেফরি বুঝতে পারছে জায়েদ রেহমানকে এতোটা ঘৃণা করার সঙ্গত কারণ
রয়েছে মেয়েটির। তার নিজেরও এসব বিষয় নিয়ে কথা বলতে ইচ্ছে করছে না।
কোনো মেয়েকে তার ধর্ষণের কথা জিজ্ঞেস করা মানে তাকে পুণরায় ধর্ষণ করার
সামিল।

“আচ্ছা, পমি...আপনি জায়েদ রেহমানের বিরুদ্ধে মামলা করলেন না
কেন?” প্রশ্ন করলো জেফরি।

“আমি মামলা করবো!?” চোখেমুখে সুতীব্র বিস্ময়। “আমি কেন তার
বিরুদ্ধে মামলা করতে যাবো!?”

“কারণ উনি আপনাকে ধর্ষণ করেছেন...”

“হোয়াট!?” সীমাহীন বিস্ময়ে ফেঁটে পড়লো পমি। “আপনি এসব কী
বলছেন!?”

জেফরি আসার অনেক আগেই জামান চলে এসেছে ভিটা নুভায় তবে সেখানে না
চুকে এর আশেপাশে ঘুরে বেড়াচ্ছে সে। ইচ্ছে করেই একটু আগেভাগে এসেছে
খুনির ছবিটা নিয়ে লোকজনকে জিজ্ঞেস করবে বলে। ঢাকা শহরের এই অংশটা
সহকারী ইনভেস্টিগেটর জামানের খুব চেনা। ছাত্র জীবনে এখানেই তারা পাঁচ
বন্ধু একটা বাড়ি ভাড়া নিয়ে থাকতো। তার ধারণা লন্ড্রির দোকানদারের কথা
যদি সত্যি হয় তাহলে এখানকার কেউ না কেউ খুনির ছবি দেখে তাকে শনাক্ত
করতে পারবেই।

ভিটা নুভা থেকে একটু দূরে আরো কিছু বাড়ির দাড়াইয়ান, মুদি দোকানিকে খুনির ছবিটা দেখিয়ে জানতে চাইলো লোকটাকে তারা কখনও দেখেছে কিনা। কেউ দেখে নি।

হাটতে হাটতে একটা ফাঁকা রাস্তা যএসে পড়লো সে। হাতঘড়িতে সময় দেখে বুঝতে পারলো ভিটা নুভায় ফিরে যেতে হবে। অনেক দূল এসে পড়েছে, হাটতে আর ভালো লাগছে না। ফুটপাতে দাঁড়িয়ে আছে একটা রিক্সার জন্য।

“স্যার?”

একটা ফ্যাসফ্যাসে কর্তৃ গুনে ঘুরে তাকাতেই দেখতে পেলো তার পেছনে এক ভিক্ষুক।

“এই গরীবুরে দুইডা পয়সা দেন...স্যার।”

লোকটার এক পা নেই। বসে আছে জামানের পেছনে ফুটপাত ঘেষা একটি বড় গাছের নীচে পুরনো নষ্ট হয়ে যাওয়া ফোমের টুকরোর উপর। দেখে বোঝা যাচ্ছে এখানেই লোকটা প্রতিদিন বসে।

পকেট থেকে দু’টাকার একটি কয়েন বের ক’রে ভিক্ষুকটার হাতে তুলে দিলো সে। খুশিতে হলুদ রঙের দাঁত বের করে হাসলো লোকটা।

জামান আবার রাস্তার দিকে তাকালো। না। কোনো রিক্সা দেখা যাচ্ছে না।

“স্যার কি রিস্কা খুঁজতাহেন?” পেছন থেকে ভিক্ষুক বললো।

“হুমম...”

“এই সময় এইখানে রিস্কা পাইবেন না...সামনে বায়ে গিয়া একটু আগে বাড়লে পাইবেন।”

আরেকটু হেটে সামনে যাবো? এমন সময় চট করেই তার মাথায় একটা ভাবনা চলে এলো। এই ভিক্ষুকটি কি প্রতিদিন এখানেই বসে?

“তুমি কি রোজ রোজ এখানে বসেই ভিক্ষা করো?” জানতে চাইলো জামান।

“হ, স্যার।”

“কতো দিন ধরে এখানে ভিক্ষা করছো?”

“দুই মাস তো অইবোই...”

একটু ভেবে পকেট থেকে খুনির একটি ছবি বের করে হাতে নিয়ে নিলো সে। “তাহলে তো তুমি এখানকার অনেককেই চেনো।”

ময়লা দাঁত বের ক’রে হাসলো আবার। “সবাইরে না, স্যার...যারা রেগুলার ভিক্ষা দেয় খালি তাগোরে চিনি।”

জামান মুচকি হাসলো। লোকটার কাছে গিয়ে হাটু মুড়ে বসে পড়লো সে। “এই ছবিটা একটু দ্যাখো তো,” খুনির ছবিটা ভিক্ষুকের দিকে বাড়িয়ে দিয়ে বললো সে।

ভুরু কুচকে ছবির দিকে তাকালো ভিক্ষুক ।

“আমার এক পুরনো বন্ধু...সুনেছি এখানেই থাকে কিন্তু তার ঠিকানাটা হারিয়ে ফেলেছি, তাই বাসাটা খুঁজে পাচ্ছি না ।”

লোকটার ময়লা দাঁত দেখা গেলো আবার । “হেরে তো আমি চিনি...”

জামানের গায়ের পশম দাঁড়িয়ে গেলো । “তাই নাকি!”

“হ । দ্যাখা অইলেই আমারে পাঁচ ট্যাকা দেয় ।”

“কোথায় থাকে সে?”

রাস্তার পুব দিকে দেখিয়ে বললো ভিক্ষুক, “ঐ যে লাল বাড়িটা আছে না...ঐ বাড়িতে ।”

কিছুক্ষণ আগে এই বাড়িটা অতিক্রম ক’রে এসেছে জামান । গেটে কোনো দাড়াওয়ান দেখতে পায় নি তখন ।

“আজকে তাকে দেখেছো?” জামান উদগ্রীব হয়ে জিজ্ঞেস করলো ।

“আধা ঘণ্টা আগেই তো বাড়ির ভিতর ঢুকতে দ্যাখলাম...এহনও মনে হয় বাড়িতেই আছে ।”



অধ্যায় ৫২

অভিনেত্রী পমির কাছ থেকে যা জানতে পেরেছে সেটা একেবারেই লোমহর্ষক একটি ব্যাপার। ভয়ঙ্কর এই তথ্যটা তার চোখের সামনে সমস্ত রহস্য উন্মোচন করে দিয়েছে।

রেস্তোরাঁ থেকে বের হয়ে পমিকে বিদায় দিয়ে ফুটপাথ ধরে হাটছে আর ভাবছে ইনভেস্টিগেটর জেফরি বেগ। জায়েদ রেহমানের হত্যাকাণ্ডের গোলকর্ধা থেকে বের হবার পথটা খুঁজে পেয়েছে সে। পুরো এপিসোডটা এখন তার কাছে পরিষ্কার।

এমন সময় তার মোবাইল ফোনটার রিং বেজে উঠলো।

তার সহকারী জামান।

“হ্যা, জামান...ফোন ক’রে ভালো করেছে। একটা দারুণ খবর আছে—!”

“স্যার! আমি এখন খুনির বাড়ির সামনে। সে বাড়ির ভেতরেই আছে! আপনি এক্ষুণি চলে আসুন!” এক নিঃশ্বাসে কথাগুলো বললো জামান।

“কি!?” জেফরি টের পেলো তার শরীরের সমস্ত পশম দাঁড়িয়ে গেছে।

“ধানমণ্ডিতে...ভিটা নুভার কাছেই...এক্ষুণি চলে আসুন, স্যার!”

ভিটা নুভা থেকে এক ব্লক দূরে ধানমণ্ডির এক নিরিবিলি রাস্তার পাশে লাল রঙের ডুপেক্স বাড়িটি অবস্থিত। প্রথম দিকে এখানে যেসব বাড়িঘর তৈরি করা হয়েছিলো এই বাড়িটা সেরকমই একটি বাড়ি। দশ কাঠার বাড়িটার সামনে বিশাল একটি লন, তারপরই পুরনো দোতলা ভবনটি অবস্থিত।

দশ-পনেরো বছর আগেও এই এলাকায় এরকম বাড়ি ছিলো শত শত। তবে ডেভেলপারদের আধিপত্যে এখন অবস্থা একেবারে পাল্টে গেছে। বিরল হয়ে উঠেছে সামনে বিশাল লনবিশিষ্ট এরকম দোতলার বাড়িগুলো।

লালমাটিয়ার একটি রেস্তোরাঁয় বসেছিলো পমির সাথে কথা বলার জন্য, সেখান থেকে হাটতে হাটতে ধানমণ্ডির দিকেই যাচ্ছিলো, ফলে এখানে আসতে বড়জোর দশ মিনিট লেগেছে তার। অবশ্য রিক্সা করে আসার সময় ফোনে পুরো ব্যাপারটা শুনে নিয়েছে জামানের কাছ থেকে।

তার সহকারী জামান লাল বাড়িটার মেইন গেটের সামনে প্রবল উত্তেজনা

নিয়ে দাঁড়িয়ে আছে। জেফরিকে আসতে দেখেই তার কাছে ছুটে গেলো।

“স্যার...এই বাড়িটাতেই আছে!” লাল রঙের বাড়িটা দেখিয়ে বললো জামান।

বাড়িটার দিকে তাকালো জেফরি। মেইনগেটটা বেশ পুরনো, মলিন, রঙ উঠে গেছে। “কোনো দাড়াইয়ান নেই?”

“না, স্যার। আশেপাশে জিজ্ঞেস ক’রে জানতে পেরেছি এই বাড়িতে অনেক দিন থেকে কেউ থাকে না। ডেভেলপারকে নাকি দিয়ে দেয়া হয়েছে। কয়েক দিন পরই ভেঙে ফেলা হবে।”

একটু ভেবে জেফরি বললো, “চলো।”

জামান একটু অবাক হলো। “আমরা দু’জনেই যাবো?”

“হ্যাঁ। চিন্তার কিছু নেই, আমার সাথে গান আছে।”

“আমার সাথেও আছে, স্যার,” বললো জামান।

“গুড। তাহলে সময় নষ্ট না করে চলো...ও যদি টের পেয়ে যায় অনেক ঝামেলা হয়ে যাবে। একবার ফস্কে গেলে ওকে আর ধরা সম্ভব হবে না।”

জামানও বুঝতে পারছে সেটা। আর কোনো কথা না বলে তারা লাল বাড়িটার দিকে এগিয়ে গেলো নিঃশব্দে।

মেইনগেটটা ভেতর থেকে বন্ধ। কোনো কলিংবেল নেই। জেফরি ইশারা করলে জামান গেটটার উপর উঠে টপকে গিয়ে খুলে ফেললো সেটা। বাড়ির ভেতর ঢুকেই নিজেদের অস্ত্র হাতে তুলে নিলো দু’জনে।

বিশাল লনটা ফাঁকা। আগাছা জন্মে আছে। উপর তলা থেকে ভেসে আসছে টিভি চলার মৃদু শব্দ। জেফরি পা টিপে টিপে লনটা পেরিয়ে দোতলা বাড়ির সদর দরজার কাছে চলে এলো, তার পেছনে জামান।

জেফরি বেগ কাঠের দরজাটা আস্তে ক’রে ধাক্কা দিতেই খুলে গেলো সেটা। ভেতর থেকে আঁটকানো ছিলো না। একটু অবাকই হলো সে। ভেতরে ঢুকে পড়লো তারা দু’জন। ভেতরে সব জানালা বন্ধ, দিনের বেলা হলেও আলো খুব কম। বিশাল ড্রইংরুমটা দেখে মনে হয় না কেউ ব্যবহার করে। পরিত্যক্ত।

টিভির শব্দটা আসছে উপর তলা থেকে, জামানকে ব্যাকআপ দেবার ইশারা করে জেফরি বেগ ড্রইংরুমের শেষমাথায় থাকা সিঁড়িটা দিয়ে উপরে উঠে গেলো নিঃশব্দে।

দোতলার ল্যান্ডিংয়ে উঠে টিভির শব্দটা কোথেকে আসছে বোঝার চেষ্টা করলো বেগ। বাম দিকের দুটো ঘর, সেগুলোর দরজায় বড় একটা তালা দেখা যাচ্ছে। তবে ডান দিকের একটা ঘরের খোলা দরজা দিয়ে মৃদু আলো দেখতে পেলো সে।

দরজা খোলা!

টিভির আওয়াজ সেই ঘর থেকেই আসছে। জেফরি বেগ টের পেলো তার হৃদস্পন্দন বেড়ে গেছে। দিলান মামুদ তাকে বলে দিয়েছে লোকটা ভয়ঙ্কর...খুবই বিপজ্জনক। জেফরিও জানে পেশাদার এক খুনিকে মোকাবেলা করতে যাচ্ছে তারা।

পিস্তলটার লক্ খুলে দু'হাতে ধরে আস্ত আস্তে পা টিপে এগোতে লাগলো জেফরি। জামান সিঁড়ির ল্যান্ডিংয়ে দাঁড়িয়ে থাকলো ব্যাকআপ হিসেবে।

দরজার কাছে এসে দেয়ালের সাথে পিঠ দিয়ে দাঁড়ালো সে। খুব দ্রুত করতে হবে কাজটা। ঘরের ভেতর থেকে টিভির শব্দটা এখন আরো স্পষ্ট শোনা যাচ্ছে। এক ঝটকায় ঢুকে পড়লো দরজা দিয়ে। হাতের পিস্তলটা সামনের দিকে তাক করা।

ফাঁকা।

ঘরে কেউ নেই। অসম্ভব!

শুধু একটা টিভি চলছে। অ্যানিমেল প্লানেট।

কয়েক মুহূর্তের জন্যে জেফরির কাছে মনে হলো সে একটা ফাঁদে পড়ে গেছে। কথটা ভাবতেই তার গায়ের পশম দাঁড়িয়ে গেলো।

“স্যার?”

জামানের কণ্ঠটা শোনা গেলো সিঁড়ির ল্যান্ডিং থেকে। ঘর থেকে বেরিয়ে এসে জামানের দিকে তাকিয়ে দু'পাশে মাথা নাড়তেই হঠাৎ করে একটা গন্ধ নাকে টের পেলো জেফরি, ব্যাপারটা ধরতে দু'তিন সেকেন্ডের বেশি লাগলো না। হাত তুলে জামানকে ল্যান্ডিংয়ে থাকার ইশারা করে করিডোরের শেষ মাথায় রান্নাঘরের দিকে এগিয়ে গেলো সে।

রান্নাঘরটাও ফাঁকা। এখানে গন্ধটা আরো প্রকট। বন্ধ জানালার সামনে গ্যাসের চুলা, সেদিকে তাকাতেই জেফরির হৃদস্পন্দনটা থেমে গেলো।

“জামান!” চিৎকার দিয়ে রান্নাঘর থেকে ল্যান্ডিংয়ের দিকে দৌড়ে গেলো সে। “জলদি! নীচে নামো!”

জেফরির এমন আচরণে ভ্যাবাচ্যাকা খেয়ে গেলোও বিপদের গন্ধ আঁচ করতে পেরে সিঁড়ি দিয়ে দ্রুত নামতে লাগলো জামান।

জেফরি সিঁড়ির ল্যান্ডিং থেকে চার ধাপ নীচে পা রাখতেই ঘটনাটা ঘটলো।

লাগেজ গুছিয়ে ঠাণ্ডা পানি দিয়ে গোসল সেরে নেয়। তারপর নিজের প্রিয় কালো রঙের প্যান্ট আর রেজার পরে লাগেজটা হাতে নিয়ে ঘর থেকে বের হবার সময়ই সিঁড়ির ল্যান্ডিংয়ের জানালা দিয়ে দেখতে পায় বাড়ির মেইনগেটের সামনে দু'জন লোক দাঁড়িয়ে আছে।

জেফরি বেগ!

এতো দ্রুত তার বাড়ির সন্ধান পেয়ে যাবে ভাবতেই পারে নি। আবারো অবাধ হয় সে। এরকম পরিস্থিতিতেও তার মাথাটা দারুণভাবে কাজ করলো। ঠাণ্ডা পানি দিয়ে গোসল করলে তার মধ্যে স্থিরতা চলে আসে। মাথা ঠাণ্ডা রেখে নিজের ঘরে ফিরে যায় দ্রুত। টিভিটা ছেড়ে দিয়ে ঘরের দরজা খোলা রেখেই পাশের রান্নাঘরে ঢুকে পড়ে। পকেট থেকে সিগারেটের প্যাকেট আর দেয়াশলাই বের করে প্রচণ্ড দ্রুততায় একটি ভয়ঙ্কর ডিভাইস তৈরি করে ফেলে অল্প সময়ের মধ্যেই।

একটা সিগারেট ধরিয়ে দু'একটা টান দিয়ে দেয়াশলাই থেকে সবগুলো কাঠি বের করে মেলে রাখে গ্যাসের চুলার পাশে, তারপর সিগারেটটা এমনভাবে দেয়াশলাইয়ের কাঠিগুলোর উপর রেখে দেয় যাতে কিছুক্ষণের মধ্যেই সেটা জ্বলতে জ্বলতে কাঠিগুলোর বারুদ স্পর্শ করে। এরপর গ্যাসের চুলাটা ছেড়ে দিয়ে রান্নাঘর থেকে বের হয়ে ঢুকে পড়ে পাশের একটা বাথরুমে।

এই বাড়ির রান্নাঘর আর বাথরুমটা সিঁড়ির ল্যান্ডিং থেকে দেখা যায় না। পুরনো ডুপ্লেক্স বাড়ি। একটু বেশি রক্ষণশীল। সে জানে অন্য কারো পক্ষে এই বাড়িতে ঢুকে কমন বাথরুম আর রান্নাঘরটি খুঁজে বের করতে কিছুটা সময় লেগে যাবে। তার দরকার মাত্র চার-পাঁচ মিনিট।

রান্নাঘরের জানালার মাত্র তিন ফিট নীচেই গাড়ি রাখার একটা গ্যারাজ রয়েছে। এই বাড়ির চারপাশ ঘিরে থাকা বাউন্ডারি দেয়ালটা চলে গেছে সেই গ্যারাজটা ঘেষে। দেয়ালটার ওপাশে আছে সরু একটা গলি। তার হিসেবটা খুব সহজ। এ মুহূর্তে এরচেয়ে সহজে এ বাড়ি থেকে বের হওয়া প্রায় অসম্ভব।

বাথরুমের ভেতর অপেক্ষা করছে সে। আর মাত্র কয়েক মিনিট বাকি।

কিছুটা সময় অতিক্রান্ত হবার পরই সে শুনতে পেলো কেউ একজন চিৎকার করে বলছে, “জামান! জলদি নীচে নামো!”

তারপরই সেটা ঘটলো।

কানে তাল লাগার মতো বিকট একটি বিস্ফোরণে কেঁপে উঠলো পুরো বাড়িটা। বাথরুমের নিরাপদ চারদেয়ালের মধ্যেও বিস্ফোরণের আঁচ টের পেলো সে, সেইসাথে দু'জন মানুষের আর্ত চিৎকার। সিঁড়ি থেকে এসেছে সেটা। একটু দম নিয়ে বাথরুম থেকে বের হতেই দেখতে পেলো ধূয়ায় চারপাশ অন্ধকার হয়ে আছে। রান্নাঘরে উঁকি মারলো, ঘরটা দেখে মনে হচ্ছে বোমা বিস্ফোরিত হয়েছে সেখানে।

দেয়াশলাইয়ের কাঠির বারুদে সিগারেটের আগুন লাগতেই চার-পাঁচ মিনিট ধরে চুলা থেকে নির্গত গ্যাসে বিস্ফোরণ ঘটেছে। বোমার মতো শক্তিশালী সেই বিস্ফোরণে উড়ে গেছে ঘরের দরজা জানালা।

দম বন্ধ করে রান্নাঘরে ঢুকে ভাঙা জানালা দিয়ে লাফিয়ে নেমে পড়লো গ্যারাজের টিনের ছাদের উপর। শব্দটা খুব জোরে হলো বলে একটু চিন্তায় পড়ে গেলো সে। দ্রুত সেখান থেকে লাফ দিয়ে নীচের গলিতে নেমে এমনভাবে হাটতে শুরু করলো যেনো কোনো কিছু হয় নি।

অনেক দূর যাবার পর মুচকি হেসে পেছনে ফিরে বাড়িটা এক নজর দেখেই আবার হাটতে লাগলো সে।

বিস্ফোরণের শব্দে সিঁড়ি থেকে হ্রমুর করে জেফরি আর জামান ছিটকে পড়ে যায় নীচের ল্যান্ডিংয়ে। পিস্তলটা আরেকটু হলে হাত থেকে ছিটকে পড়ে যেতো। তাদের কানে তালা লাগার জোগার হয়েছে। ধাতস্থ হতে আধ মিনিটের মতো লেগে গেলো। মেঝে থেকে উঠে বসলো জেফরি। একেবারে অক্ষত আছে। বিস্ফোরণের শব্দওয়েভে বেসামাল হয়ে পড়েছে শুধু। তবে তার সহকারী জামান বোধহয় ডান পায়ে ব্যথা পেয়েছে। সে ডান পায়ের গোড়ালী ধরে কৌঁকাচ্ছে।

ঠিক তখনই ধপাস করে কোনো কিছু পড়ার শব্দ শুনতে পেলো জেফরি বেগ। কিছু একটা আঁচ করতে পেরে উঠে দাঁড়ালো সে। জামানের দিকে তাকিয়ে বললো, “তুমি এখানেই থাকো, আমি উপরে যাচ্ছি...”

এক হাতে পিস্তল নিয়ে দ্রুত সিঁড়ি ভেঙে রান্নাঘরের দরজার সামনে আসতেই দেখতে পেলো সেটার দরজা জানালা বিস্ফোরণে উড়ে গেছে। ধোয়ায় আচ্ছন্ন ঘরটায় ঢুকে ভাঙা জানালা দিয়ে নীচে তাকাতেই বুঝে ফেললো কি হয়েছে।

সেও ঠিক খুনির মতো লাফিয়ে নামলো গ্যারাজের টিনের ছাদে। সেখান থেকে দ্রুত লাফ দিয়ে গলিতে নামতেই দৌড়াতে শুরু করলো। সে জানে খুনি তার থেকে কয়েক মিনিট এগিয়ে আছে।

গলিটা একশ’ গজের মতো এগিয়ে গিয়েই ডান দিকে বাঁক নিয়ে মিশে গেছে মেইন রোডের সাথে। জেফরি দৌড়ে চলে এলো সেখানে। মেইন রোডে অসংখ্য যানবাহন আর মানুষজনের মধ্যে খুঁজে বেড়ালো তার দু’চোখ। পিস্তলটা কারোর নজরে পড়ার আগেই কোমরে গুঁজে রাখলো। একবার ডানে আরেকবার বামে তাকালো সে। বুঝতে পারছে না কোন্ দিকে গেছে খুনি।

কয়েক মুহূর্ত পরেই সেটা তার চোখে পড়লো।

ডান দিকের রাস্তার ফুটপাতে, তার থেকে বেশ দূরে কালো রেন্জার আর প্যান্ট পরা এক লোক। হাতে মাঝারি আকৃতির একটি লাগেজ। মানুষের ভীড়ে এতো দূর থেকে তাকে লক্ষ্য করতে পারতো না যদি না সে পেছন ফিরে তাকাতো।

জেফরি দ্রুত এগিয়ে গেলো। তার হাটার গতি অনেকটা দৌড়ের মতোই।
খুনিও বুঝে গেছে জেফরি তার পিছু নিয়েছে তবে আশ্চর্যের ব্যাপার হলো হাটার
গতি একদম স্বাভাবিক রেখেছে। ধীরস্থির। কোনো তাড়াহুড়া নেই তার মধ্যে।

আশ্চর্য!

দূরত্ব কমিয়ে আনার জন্য জেফরি বেগ দ্রুত এগিয়ে যাচ্ছে। এখন তার
থেকে মাত্র একশ' গজ দূরে আছে। কোমর থেকে পিস্তলটা বের ক'রে হাতে
নেবে কিনা বুঝতে পারলো না। এতো মানুষের ভীড়ে এভাবে পিস্তল হাতে...না।
সিদ্ধান্ত নিতে পারলো না সে। সম্ভবত খুনিও সেটা বুঝে গেছে!

আচমকা ডান দিকের একটা গলিতে ঢুকে পড়লো সে। একেবারে চোখের
পলকে। জেফরিও দৌড়ে ছুটে গেলো। গলিতে ঢুকতেই দেখে সুনসান। কোনো
জনমানবের চিহ্ন নেই।

অসম্ভব!

ম্যাজিকের মতো উধাও হয়ে গেছে সে। এভাবে তার চোখের সামনে থেকে
হাওয়া হয়ে যাবে একদমই বুঝতে পারে নি জেফরি। কী করবে বুঝে উঠতে
পারলো না। অসহায়ের মতো দাঁড়িয়ে রইলো।

তার মোবাইল ফোনটায় ইনকামিং মেসেজের বিপ্ হলে পকেট থেকে সেটা
বের করে দেখলো। ইংরেজিতে লিখেছে, বাংলা করলে অর্থ দাঁড়ায় :

আমাকে অনুসরণ করবে না। ফিরে যাও।

জেফরি ভেবেছিলো রেবার মেসেজ...কিন্তু খুনির কাছ থেকে এরকম একটি
মেসেজ পেয়ে তার বুকটা ধক ক'রে উঠলো। তার মোবাইল নাম্বার পর্যন্ত আছে
লোকটার কাছে! আশোপাশেই কোথাও আছে ভয়ঙ্কর সেই খুনি!

চারদিক চকিত দেখে নিলো সে। গলিটার দু'পাশে সারি সারি বাড়ি আর
অ্যাপার্টমেন্ট। কোনো জনমানুষের চিহ্ন নেই। সতর্ক হয়ে উঠলো। একেবারে
বিশুদ্ধ গোলকধাঁধা!

চট করে তার মাথায় একটা বুদ্ধি এলো। ইনকামিং মেসেজটা যে নাম্বার
থেকে এসেছে সেই নাম্বারে রিটার্ন কল করলো সে।

যা ভেবেছিলো তাই...

দূর থেকে একটা মোবাইল ফোনের রিং হবার শব্দ শুনতে পেলো
ইনভেস্টিগেটর জেফরি বেগ। তার গায়ের পশম দাঁড়িয়ে গেলো। কোমর থেকে
পিস্তলটা বের ক'রে যেখান থেকে শব্দটা আসছে সেদিকে ছুটে গেলো
সতর্কভাবে।

একটু সামনে ডান দিকের দুটো বাড়ির মাঝখানে সরু আরেকটা গলি চলে


গেছে, সেই গলি থেকে আসছে শব্দটা। গলিতে ঢুকতেই রিংটা থেমে গেলো কয়েক মুহূর্তের জন্য জেফরি ভড়কে গেলো কিন্তু পরক্ষণেই বুঝতে পারলো রিং হতে হতে স্বাভাবিকভাবেই সেটা থেমে গেছে। আবারো ডায়াল করলো সেই নাম্বারে।

এবার তার খুব কাছ থেকে রিং হবার শব্দ শুনতে পেলো সে। আস্তে আস্তে গলির আরো ভেতরে ঢুকে পড়লো জেফরি। গলির শেষ মাথায় ডান দিকের বাউন্ডারি দেয়ালের উপর একটা মোবাইল ফোন রাখা আছে, সেটা থেকে আওয়াজটা আসছে।

বুঝতে পারলো সে, দেয়ালের উপর থেকে মোবাইল ফোনটা নিয়ে দৌড়ে গলিটা পেরিয়ে আরেকটা বড় রাস্তায় এসে পড়লো। প্রথমে ডানে, তারপর বায়ে তাকালো। খুনির কোনো চিহ্ন দেখা যাচ্ছে না।

মোবাইল ফোনটা ব্যবহার করে তাকে ধোঁকা দেয়া হয়েছে। এতে ক'রে বাড়তি কিছুটা সময় পেয়ে উধাও হয়ে গেছে খুনি।

নিজের বোকামির জন্য মনে মনে নিজেকেই ভৎসনা করলো জেফরি বেগ।



খুনিকে ধরতে ব্যর্থ হলেও জেফরি বেগ জানে কে লেখক জায়েদ রেহমানকে হত্যা করিয়েছে, তারচেয়েও গুরুত্বপূর্ণ কেন করিয়েছে সেটাও জেনে গেছে সে। পুরো ঘটনাটিই বেশ জটিল। একটা নিখুঁত পরিকল্পনা। দক্ষ এক খুনি। গোলকধাঁধাতুল্য এই হত্যারহস্য অবশেষে উন্মোচিত হয়েছে তার কাছে।

সহকারী জামান পায়ে একটু চোট পেলেও সেটা মারাত্মক কিছু না-তার ডান পায়ের গোড়ালী মচকে গেছে।

নিজের সহকারী জামানকে এখন পর্যন্ত কিছুই বলে নি। হোমিসাইডে ফিরে এসে, বেশ কিছু তথ্যও জোগার ক’রে ফেলেছে সে। ধানমন্ডির ঐ লাল রঙের বাড়িটা যে রিয়েল এস্টেট প্রতিষ্ঠানের তার পরিচয় এবং মালিকের নামও জেনেছে জেফরি। সবগুলো তথ্য একটা বিষয়কেই দৃঢ় ক’রে তুলেছে জায়েদ রেহমানের আসল খুনি। তবে যে মোবাইল ফোন দিয়ে খুনি তাকে ধোকা দিয়েছে সেটা আনরেজিস্টার্ড একটি সিমের। তার ধারণা খুনির কাছে একাধিক মোবাইল থাকে সব সময়।

সিদ্ধান্ত নিলো পুরো ব্যাপারটা হোমিসাইডের মহাপরিচালককে অবগত করতে হবে।

সব শুনে ফারুক সাহেব চুপ মেরে গেলো। তার নীরবতা দীর্ঘস্থায়ী হলো কয়েক মিনিট। তার সামনে বসে আছে তার প্রিয়পাত্র জেফরি বেগ। অবশেষে মুখ খুললো হোমিসাইড প্রধান।

“অবিশ্বাস্য!” কথটা বলেই আবার চুপ মেরে গেলো। “পুরো কেসটা তো একেবারে ওলটপালট হয়ে যাবে। কাউকেই বিশ্বাস করানো যাবে না।”

“কিন্তু আমাদের হাতে প্রমাণ আছে, স্যার। আমরা এটা প্রমাণ করতে পারবো,” বললো জেফরি।

“প্রমাণ?” ফারুক আহমেদ অবাক হয়ে বললো। “কোথায় প্রমাণ? এগুলো কি আদালতে টিকবে? খুনি যদি ধরা পড়তো... পুলিশের কাছে স্বীকারোক্তি দিতো তাহলে ব্যাপারটা ভেবে দেখা যেতো।”

“কিন্তু স্যার, অভিনেত্রী পমি যে কাহিনীটা আমাকে বলেছে, সেটাকে কি বলবেন?”

“একজন অভিনেত্রী কী বললো না বললো সেটা আদালতে গ্রহণযোগ্য হবে না... অবশ্য ঐ অভিনেত্রী যদি শেষ পর্যন্ত আদালতে গিয়ে এসব কথা বলে তো!”

জেফরিও জানে কথাটা সত্যি। পমি তার সাথেই দেখা করেছে গোপনে, যাতে করে তার স্বামী জানতে না পারে। সে আদালতে গিয়ে এসব কথা বলবে সেটা ভাবা অবাঞ্ছিত।

“শোনো, জেফ... আমি বুঝতে পারছি তোমার অবস্থাটা। তোমার কথা যদি সত্যি হয়ে থাকে তাহলে তুমি যাদেরকে দায়ি করছো তাদেরকে কোনো দিনই আদালতে প্রমাণ করা যাবে না যে তারা দোষি।”

“কিন্তু আরেকটু তদন্ত করলে আমি নিশ্চিত সেটা প্রমাণ করা যাবে। আমার হাতে অনেকগুলো প্রমাণ আছে, সেগুলো নিয়ে কাজ করলে—”

“তোমার হাতে আসলে শক্ত কোনো প্রমাণই নেই, জেফ। যেগুলো আছে সেগুলো এক ফুৎকারে হাওয়া হয়ে যাবে। ঐ দাডোয়ান আর নাইটগার্ড? চায়ের দোকানি? একজন ঘুসখোর পুলিশ ইন্সপেক্টর? আর ঐ পমি না ফমি নামের এক অভিনেত্রী?” মাথা দোলালো ফারুক সাহেব। “এদের কথায় কিংবা সাক্ষীতে কিছুই প্রমাণ করা যাবে না।”

“তাহলে আমি যা জানতে পেরেছি তার কি কোনোই মূল্য নেই?” হতাশ হয়ে বললো জেফরি।

“তুমি একটা কাহিনী জানতে পেরেছো। অবিশ্বাস্য একটি কাহিনী। জায়েদ রেহমানের হত্যার তদন্তে যেসব অসঙ্গতি তোমার কাছে ধরা পড়েছিলো এই কাহিনীটা সেসব দূর করতে সাহায্য করছে। তোমার কাছে এখন পুরো বিষয়টা পরিষ্কার... কিন্তু এটা তো তুমি প্রমাণ করতে পারবে না।”

“খুনি যে বাড়িতে ছিলো সেটার ব্যাপারে কি বলবেন?”

মাথা দোলালো হোমিসাইড প্রধান। “ডেভেলপাররা বলবে বাড়িটা পরিত্যাগ ছিলো... খুনি হয়তো সেই সুযোগই নিয়েছে।”

“স্যার, আপনি যদি আমাকে সুযোগ দেন তো আমি প্রমাণ করতে পারবো...”

“কি রকম সুযোগ?”

“সি ই এ সিদ্ধিকী সাহেবকে জিজ্ঞাসাবাদ করতে দিন আমাকে—”

“অসম্ভব!” আৎকে উঠলো হোমিসাইড প্রধান। “শুধুমাত্র সন্দেহের উপর ভিত্তি করে এরকম একজন ধনাত্মক শিল্পপতি-ব্যবসায়ীকে খুনের মামলায় জিজ্ঞাসাবাদ!?! মাইগড! তুমি বুঝতে পারছো না?”

“তাহলে তো আমরা এ হত্যাকাণ্ডের তদন্ত করতে পারবো না, স্যার।”

“তুমি ভুলে গেছো এই হত্যাকাণ্ডের তদন্ত প্রায় শেষ পর্যায়ে আছে। আমার ধারণা আগামী মাসের মধ্যেই ফাইনাল ইনভেস্টিগেটিভ রিপোর্ট দেয়া হবে।”

“স্যার, আমরা তো জানি ওরা খুন করে নি!” জেফরি বললো।

“ঠিক আছে, সেটা ওদের উকিলের উপরেই ছেড়ে দাও। এ ব্যাপারে আমরা এখন কিছু করতে পারবো না,” বললো ফারুক আহমেদ। “কিছু করার নেই।”

“আমি যদি ঐ খুনিকে ধরতে পারি কিংবা সিদ্ধিকী সাহেবের বিরুদ্ধে শক্ত কোনো প্রমাণ পাই তাহলে কি তাকে জিজ্ঞাসাবাদ করার অনুমতি দেবেন?”

“যদি কিছু পাও তখন দেখা যাবে।” একটু থেমে আবার বললো সে, “তবে ঐ খুনি শুধু ধরা পড়লেই হবে না, তাকে পুলিশ রিমাণ্ডে স্বীকারোক্তিও দিতে হবে। আমি এরকম কিছু ঘটবে না।”

হতাশ হয়ে ফারুক সাহেবের দিকে চেয়ে রইলো জেফরি।

“রিয়েলিটি...মাইবয়,” একটু থেমে আবার বললো, “বাড়ি যাও। বিশ্রাম নাও, জেফ।”

অন্যমনস্ক হয়ে উঠে চলে গেলো সে। যাবার আগে হোমিসাইড প্রধানকে কিছুই বললো না।

একটা দীর্ঘশ্বাস বেরিয়ে এলো ফারুক সাহেবের ভেতর থেকে।



সন্ধ্যার একটু আগে, সিদ্দিকী সাহেব নিজের অফিস থেকে বের হবার প্রস্তুতি নিচ্ছেন মাত্র অমনি ইন্টারকমে তার প্রাইভেট সেক্রেটারি জানালো ইনভেস্টিগেটর জেফরি বেগ তার সঙ্গে দেখা করতে চাইছে।

আশ্চর্য! এই লোকটা তার সাথে বার বার দেখা করতে চাইছে কেন?

অমূল্য বাবুও কাছে নেই। একটু চুপ ক'রে থেকে সেক্রেটারিকে বলে দিলেন ইনভেস্টিগেটরকে তার অফিসে পাঠিয়ে দিতে, তারপর নিজের ডেস্কের নীচে একটা গোপন সুইচ টিপে দিলেন তিনি।

“আসুন,” দরজা খুলে অফিসে ঢুকতেই জেফরির উদ্দেশ্যে বললেন সি ই এ সিদ্দিকী। “বসুন, প্লিজ।”

একটা চেয়ারে বসলো বেগ। “ধন্যবাদ।”

“আবার কি মনে করে, ইনভেস্টিগেটর?” সিদ্দিকী সাহেব জানতে চাইলেন।

“আপনার সাথে দেখা করার কোনো পরিকল্পনা আমার ছিলো না কিন্তু পরিস্থিতি বাধ্য করেছে।”

ভুরু তুলে চেয়ে রইলেন তিনি। “যা বলার তাড়াতাড়ি বলুন, আমি জাস্ট বের হচ্ছিলাম।”

মাথা নেড়ে সায় দিলো জেফরি বেগ। পকেট থেকে খুনির ছবিটা বের করে ডেস্কের উপর রাখলো। সি ই এ সিদ্দিকী সাহেব ছবিটার দিকে তাকালেন কিন্তু তার অভিব্যক্তি দেখে বোঝার উপায় নেই লোকটাকে তিনি চিনতে পেরেছেন কিনা। নির্বিকার।

“চিনতে পেরেছেন?”

মাথা নাড়লেন তিনি। মুখে কিছু বললেন না।

“এই লোক লেখকক জায়েদ রেহমানকে খুন করেছে,” সিদ্দিকী সাহেবের দিকে স্থির চোখে তাকিয়ে বললো জেফরি।

এখনও কোনো অভিব্যক্তি নেই। “তাই নাকি,” নির্লগ্নভাবে বললেন তিনি। “আমার কাছে কেন এসেছেন সেটা বলুন।”

“বলছি,” একটু থেমে বলতে লাগলো সে। “এই লোকটা পেশাদার খুনি। নিজের কাজে বেশ প্রতিভাবান। আমাদের কাছে প্রমাণ আছে এই লোকই লেখক জায়েদ রেহমানকে খুন করেছে...তবে কাজটা সে করেছে আরেকজনের হয়ে।”

“ইনভেস্টিগেটর...আপনার যা বলার সংক্ষেপে বলুন। কে কাকে খুন করেছে সেটা আমাকে গুনিয়ে লাভ নেই। আসল কথায় আসুন।” বেশ দৃঢ়ভাবে বললেন তিনি।

“মি: সিদ্দিকী, এই পেশাদার ভাড়াটে খুনিকে দিয়ে লেখক জায়েদ রেহমানকে আপনিই খুন করিয়েছেন!”

সিদ্দিকী সাহেব নিষ্পলক চোখে জেফরির দিকে চেয়ে রইলেন। “আমি!?”

মাথা নেড়ে সায় দিলো জেফরি। “হ্যাঁ।”

“আমি তাকে খুন করতে যাবো কেন?”

“পমি আমাকে সব বলেছে।” কথাটা শুনে এই প্রথম সিদ্দিকী সাহেব একটু চমকে উঠলেন। “এখন আমি সব জানি।”

সিদ্দিকী সাহেব চুপ মেরে রইলেন।

“আপনার ছেলে ইরাম অল্পবয়স থেকেই লেখক জায়েদ রেহমানের অঙ্ক ভক্ত। তার সাথে লেখকের বেশ ভালো সম্পর্ক ছিলো। জায়েদ সাহেব ইরামকে তার একটা বইও উৎসর্গ করেছিলেন। লেখকের খুব ঘনিষ্ঠ ছিলো ইরাম।” একটু থেমে সিদ্দিকী সাহেবের দিকে ভালো করে তাকালো জেফরি। “কয়েক বছর আগে...লেখক জায়েদ রেহমান তার একটি ছবির গুটিং ইউনিট নিয়ে সেন্ট মার্টিনে যান। সঙ্গে ছিলো ইরাম।”

“আমার কাছে বলেছিলো বন্ধুদের সাথে সেন্ট মার্টিনে যাচ্ছে...” অন্যমনস্ক হয়ে বললেন সিদ্দিকী সাহেব।

“এক রাতে...ছবির নায়িকা পমি স্ক্রিপ্টের ব্যাপারে একটু আলোচনা করার জন্য জায়েদ সাহেবের রুমে ঢুকতেই ভয়ঙ্কর একটি দৃশ্য দেখতে পায়।”

সিদ্দিকী সাহেব দু’চোখ বন্ধ করে ফেললেন।

লেখক জায়েদ রেহমান যে ইরামকে নেশাগ্রস্ত করে বলাৎকার করছিলেন সেটা আর মুখে বললো না জেফরি।

“পমি এটা মেনে নিতে পারে নি। ঐ দিন রাতেই এ নিয়ে জায়েদ সাহেবের সাথে তার তুমুল বাকবিতণ্ডা হয়। পর দিন সকালেই ইউনিট ছেড়ে চলে আসে সে। আর সেই ছবিতে কাজ করে নি।”

চোখ খুললেন সিদ্দিকী সাহেব। লাল টকটকে দু’চোখ।

“জায়েদ রেহমানের মতো জনপ্রিয় লেখকের বিরুদ্ধে এসব বলে কোনো লাভ হবে না বরং তার নিজেই ক্ষতি হবে এটা বুঝতে পেরে পমি সেদিনের ঘটনাটি আর কাউকে বলে নি। বিনিময়ে জায়েদ রেহমানও তার বিরুদ্ধে মাঝপথে ছবির কাজ ছেড়ে দেয়ার জন্য কোনো মামলা বা ক্ষতিপূরণের দাবি করেন নি। বিশাল অঙ্কের টাকা লোকসান মেনে নেন তিনি।” একটু থামলো জেফরি।

সিদ্দিকী সাহেবের দৃষ্টি শূন্যে। যেনো অন্য কোথাও হারিয়ে গেছেন।

“জায়েদ রেহমানের সাথে তার প্রথম স্ত্রীর ডিভোর্সের পর কথা প্রসঙ্গে পমি মহিলাকে জানায় লেখক একজন ধর্ষণকারী। জঘন্য সেই ঘটনাটি পুরোপুরি খুলে বলে নি সে ফলে গোলনূর আফরোজ তরফদার ধরে নেয় জায়েদ সাহেব পমিকেই ধর্ষণ করেছেন। মহিলাকে দোষ দেয়া যায় না...ধর্ষণ বলতে আমরা সাধারণত পুরুষ কর্তৃক নারীকে ধর্ষণ করাই বুঝি।”

সিদ্দিকী সাহেব এবার জেফরির দিকে তাকালেন।

“আপনি অবশ্য এই ব্যাপারটার কিছুই জানতেন না। কিন্তু ঘটনাচক্রে পমি আপনাকে পুরো ঘটনাটি বলে দেয়...”

“হ্যা...ঐ দিনের কথা আমার স্পষ্ট মনে আছে,” সিদ্দিকী সাহেব বললেন।

“আপনার বন্ধু মির্জা আদিলকে বিয়ে করার পর পরই পমি নিয়মিত ঢাকা ক্লাবে আসতে শুরু করে,” বলতে লাগলো জেফরি। “এক দিন লেখক জায়েদ রেহমানও অন্য একজন মেম্বারের গেস্ট হয়ে ক্লাবে এলেন। আপনার সাথে তার পরিচয় করিয়ে দেয়া হলো...আপনারা তিনজনে বসে একটু ড্রিংক করলেন। লেখক অবশ্য জানতো না আপনিই ইরামের বাবা। এমন সময় পমি এসে হাজির হয় সেখানে...কিছুটা মাতাল ছিলো সে।”

আলতো করে মাথা নাড়লেন সিদ্দিকী সাহেব তবে তার দৃষ্টি এখনও শূন্যে।

“ক্লাবে জায়েদ রেহমানকে দেখেই পমি বিগড়ে যায়। জায়েদ রেহমানকে গালিগালাজ করতে শুরু করে সে। মাতাল ছিলো বলে কোনো হুশ ছিলো না। আপনি তাকে ধমক দিলে সে রেগেমেগে বলে দেয় ইরামের সাথে জায়েদ সাহেব কি জঘন্য কাজটা করেছিলো সেন্ট মার্টিনের গুটিং ইউনিটে।”

মাথা নীচু করে রাখলেন সিদ্দিকী সাহেব।

“জীবনে এতোটা বিস্মিত হন নি আপনি...এতোটা ক্ষুব্ধও হন নি কখনও। জায়েদ সাহেবের সাথে আপনার তুমুল ঝগড়া বেধে যায়। হাতাহাতির পর্যায়ে চলে গেলে অন্যেরা এসে আপনাদেরকে থামায়। সেদিনই আপনি সবার সামনে বলেছিলেন জায়েদ রেহমানকে এর মাশুল দিতে হবে।”

মুখে তিক্ত হাসি দেখা গেলো সিদ্দিকী সাহেবের। “হ্যা, তা বলেছিলাম।”

“ক্লাব থেকে ফিরেই জায়েদ সাহেব স্ট্রোক করে বসেন। কয়েক দিন পর তার ওপেনহার্ট সার্জারি করা হয়...এর কয়েক মাস পর আরেকটা স্ট্রোকে উনি প্যারালাইজড হয়ে যান।” জেফরি বেগ একটু থেমে আবার বলতে লাগলো, “তারপর যখন জানতে পারলেন লেখক জায়েদ রেহমান আত্মজীবনী লেখার কাজে হাত দিয়েছেন তখন আর দেরি করলেন না। আত্মজীবনীর কাজ শেষ হবার আগেই পেশাদার এক খুনিকে দিয়ে খুনটা করালেন...খুবই নিখুতভাবে। ফেঁসে গেলো মিসেস রেহমান আর তার প্রেমিক।”

“সবই তো জানেন দেখছি...” বললেন সিদ্দিকী সাহেব ।

জেফরি বেগ আরো বলতে লাগলো । “অমূল্য বাবুর এক দূরসম্পর্কের আত্মীয় নির্মল প্রকাশনীতে কম্পিউটার অপারেটর হিসেবে কাজ করে । তার কাছ থেকেই জায়েদ সাহেবের আত্মজীবনী লেখার কথাটা জানতে পারে অমূল্য বাবু...সে আপনাকে সব জানালে পরিকল্পনা চূড়ান্ত করা হয় ।”

“কিন্তু আপনি কোনো কিছুই প্রমাণ করতে পারবেন না,” দৃঢ়তার সাথে বললেন সিদ্দিকী সাহেব ।

জেফরি কিছু বললো না । “অবয়ব প্রকাশনী থেকে জায়েদ রেহমানের যে আত্মজীবনীটা প্রকাশিত হয়েছে খুব সম্ভবত সেটা আপনার ঐ অমূল্য বাবুর লেখা...আমি খোঁজ নিয়ে জানতে পেরেছি ভদ্রলোক এক সময় লেখালেখি করতেন । বলা যায় ব্যর্থ লেখক ।”

সিদ্দিকী সাহেবের ঠোঁটে মুচকি হাসি । “এখন তো আর সেটা বলার উপায় নেই । বইটা দারুণ বিক্রি হচ্ছে!”

কিছুক্ষণ চুপ ক’রে থেকে জেফরি বললো, “তবে আপনার ছেলে ইরাম কেন ঐদিন রাতে ভিটা নুভার সামনে গিয়েছিলো সেটা এখনও জানি না...”

“আপনার খুব জানতে ইচ্ছে করছে?” গম্ভীর কণ্ঠে বললেন সিদ্দিকী সাহেব ।

অবাক হলো ইনভেস্টিগেটর জেফরি বেগ ।

“ঠিক কি কারণে ইরাম ঐ দিন ওখানে গিয়েছিলো জানি না । তবে প্রায়ই সে নেশাগ্রস্ত অবস্থায় বাড়ি থেকে পালিয়ে যায় । আমার ধারণা সম্ভবত সেও লেখককে খুন করতে চায়!”

অবাক হলো জেফরি । “কী বলেন!”

মাথা নেড়ে সায় দিলেন তিনি । “আমার ছেলে এলএসডি’র মতো মারাত্মক এক ড্রাগে আসক্ত । ঐ ঘটনার পর থেকে সে কিছুটা অস্বাভাবিকও হয়ে পড়ে । আপনি অনেক কিছু জানলেও এটা জানেন না লেখক জায়েদ রেহমানের এক বইতেই এলএসডি সম্পর্কে ভুল ধারণা পায় ইরাম । আমি অবশ্য কিছু দিন আগে জানতে পেরেছি কথাটা ।

“এই ড্রাগ নিলে নাকি মায়ের জরায়ুতে থাকার স্মৃতি মনে পড়ে যায়...লেখকের এমন কথায় বিশ্বাস করে ওটাতে আসক্ত হয়ে পড়েছিলো সে । জন্মের পর পরই ওর মা মারা গেছে সুতরাং মায়ের ব্যাপারে তার সব সময়ই একটা ফ্যাসিনেশন কাজ করে । কোথেকে এসব ড্রাগ জোগার করে বুঝি না । খুব সম্ভবত তার একটি সার্কেল আছে । অনেক চেষ্টা করেছি কিন্তু অ্যাডিকশন থেকে ফেরাতে পারি নি । ইদানীং সে ড্রাগ নেবার পরই জায়েদ রেহমানকে খুন করার জন্য মরিয়া হয়ে ওঠে । সব সময়ই চোখে চোখে রাখি কিন্তু আমার ছেলেটা

সবাইকে ফাঁকি দিয়ে বার বার পালিয়ে যায়। কাকতালীয়ভাবে ঐদিনও সে একই কাজ করেছিলো।” সিদ্দিকী সাহেব থামলেন।

“আপনি জায়েদ রেহমানের উপর প্রতিশোধ নেবার জন্যে তাকে খুন করেছেন...বানোয়াট একটি আত্মজীবনী তার নামে ছেড়ে দিয়ে তার মানসম্মান ধুলোয় মিটিয়ে দিয়েছেন!?”

“হ্যাঁ,” বললেন সিদ্দিকী সাহেব। “এছাড়া আমার কিছু করার ছিলো না। আমি তো আদালতে গিয়ে বলতে পারবো না আমার ছেলের সাথে কি করেছে ঐ বিকৃত মানসিকতার লোকটি। তাই আমি আমার মতো করেই প্রতিশোধ নিয়েছি। আমার ছেলেকে বলাৎকার করার প্রতিশোধ...আমার ছেলেকে নেশায় আসক্ত করানোর প্রতিশোধ...!”

“একজন পক্ষাঘাতগ্রস্ত লোককে হত্যা ক’রে প্রতিশোধ নিলেন!”

“হ্যাঁ, নিলাম...কারণ ঐ জঘন্য লোকটি ভণ্ড আর মিথ্যায় পরিপূর্ণ একটি আত্মজীবনী লিখছিলো। নিজেকে একজন সাধুপুরুষ হিসেবে অমর করতে চেয়েছিলো...চেয়েছিলো নিজের সমস্ত নোংরা সত্যগুলোকে আড়াল করতে। আমি তা হতে দিই নি!” একটু থেমে আবার বলতে লাগলেন, “আপনার সাথে যদি কেউ অন্যায় করে তাহলে আপনি তার প্রতিশোধ নেবেন...এটাই স্বাভাবিক।”

“তাহলে আইন-আদালত কি করবে?” প্রশ্ন রাখলো জেফরি।

“তাদের যা করার তারা করবে। আমার যা করার আমি করেছি। আমি আদালতে যেতে পারবো না বলে তো তাকে ছেড়ে দিতে পারি না।” একটু থেমে আবার বলতে লাগলেন তিনি। “আপনি ব্যাপারটা যেভাবে দেখছেন আমি সেভাবে দেখছি না, এই হলো পার্থক্য।”

“আপনি তাহলে কিভাবে দেখছেন!?” অবাক হয়ে জানতে চাইলো জেফরি।

“অন্যায়ের বিরুদ্ধে প্রতিশোধ নেয়াটাকে আমি স্বাভাবিক ব্যাপার ব’লেই মনে করি। প্রতিশোধ এই মহাবিশ্বেরই অংশ! আপনি নিউটনের থার্ড ল সম্পর্কে নিশ্চয় জানেন-প্রত্যেক ক্রিয়ারই একটি বিপরীত এবং সমান প্রতিক্রিয়া আছে-দ্যাটস ইট! আপনি যা করবেন তার পাল্টা প্রতিক্রিয়া থাকতে হবে। প্রতিশোধ ছাড়া পৃথিবীটা একবার চিন্তা ক’রে দেখুন, মি: বেগ...ওয়ান ফাইন মিনির্ আপনি ঘুম থেকে উঠে দেখতে পেলেন কোনো রকম প্রতিশোধ নেই। অন্যায় বেড়ে যাবে হু হু করে! কেউ অন্যায় অত্যাচার করতে ভয় পাবে না। আমরা প্রতিশোধের ভয়ে অনেক অন্যায় কাজ থেকে বিরত থাকি। আই ফর আই! চোখের বদলে চোখ-এটাই জগতের নিয়ম। সেই প্রাচীনকাল থেকেই এটা চলে এসেছে।” উত্তেজিত হয়ে উঠেছিলেন তিনি, নিজেকে একটু ধাতস্থ করে আবার বলতে লাগলেন, “মি: জেফরি বেগ, আপনি নিশ্চয় জানেন, অন্যায়ের

প্রতিশোধের জন্যে গৃকদের একজন দেবতা রয়েছে...নেমেসিস! আমার ছেলের সাথে যে অন্যায় করা হয়েছে তার প্রতিশোধ আমি নিয়েছি।”

“কিন্তু আপনার এই প্রতিশোধের কারণে নির্দোষ দু’জন মানুষ ফেঁসে যাচ্ছে সেটা কি আপনি জানেন না?”

“জানি। এও জানি তাদেরকে নিয়ে আপনার খুব চিন্তা হচ্ছে।”

“আমি তো মনে করি যে কোনো বিবেকবান মানুষেরই তাই হওয়া উচিত।” কথাটা বেশ ঝাঁঝের সাথে বললো জেফরি বেগ।

“কিছু দিনের মধ্যেই সব ঠিক হয়ে যাবে।”

অবাক হলো ইনভেস্টিগেটর। “ঠিক হয়ে যাবে! কিভাবে? আপনি নিজের দোষ স্বীকার ক’রে নেবেন!?”

দু’পাশে মাথা দোলালো সিদ্দিকী সাহেব। “ছেলেমানুষী কথাবার্তা বলবেন না। একটু অপেক্ষা ক’রে দেখুন, সব ঠিক হয়ে যাবে।”

“আপনি নিজেকে খুব ক্ষমতাবান ভাবেন, তাই না? ভাবেন টাকা দিয়ে সব করা সম্ভব?”

“টাকা দিয়ে অনেক কিছুই করা সম্ভব, মি: বেগ।”

“আচ্ছা! তাহলে আমাকে বলুন এই দু’জন নির্দোষ মানুষ কিভাবে রক্ষা পাবে?”

“মনে করুন কয়েক দিন পর এক খুনি-ডাকাত পুলিশের কাছে ধরা পড়ে স্বীকারোক্তি দিলো, সে কৌশলে জায়েদ রেহমানের ফ্ল্যাটে ঢুকে ডাকাতি করতে গিয়ে তাকে খুন করেছে!”

জেফরি চেয়ে রইলো, কিছু বললো না।

“ভাবছেন অসম্ভব?” মাথা দোলালেন তিনি। “টাকা দিয়ে সব না হলেও এ কাজটা করা যাবে।”

জেফরি ভদ্রলোকের দিকে চেয়ে রইলো।

“আমার কতো টাকা আছে সেটা আমি নিজেও জানি না, মি: বেগ। সম্ভবত এক দু’হাজার কোটি। এতো টাকা থাকার পরও এক তুচ্ছ লেখক আমার অল্প বয়সী ছেলের সাথে জঘন্য একটা কাজ করলো আর আমি কিনা বসে বসে আদর্শের বাণী আওড়াবো!” দু’পাশে দৃঢ়ভাবে মাথা নাড়লেন তিনি। “না। এভাবে পৃথিবীটা চলে না। কোনোদিন চলবেও না। তুমি আমার নিষ্পাপ ছেলেকে বলাৎকার করেছেো আমি তোমার সারা জীবনের অর্জিত মানসম্মানকে বলাৎকার করেছি।”

“আপনার কাজ আপনি করেছেন, এবার আমার কাজ আমাকে করতে দিন।” উঠে দাঁড়ালো জেফরি বেগ। “আপনার প্রতি, আপনার ছেলের প্রতি

আমার যথেষ্ট সমবেদনা আছে, তারপরও হত্যাকাণ্ডকে কোনোভাবেই মেনে নেয়া যায় না। এর অবশ্যই বিচার হওয়া উচিত, আর আমি সেই চেষ্টাই করবো।”

“গুডলাক, মি: বেগ।” কথাটা নির্বিকারভাবে বললেন সি ই এ সিদ্ধিকী।

“এরপর এখানে যখন আসবো আপনি বুঝতে পারবেন টাকা আর ক্ষমতা দিয়ে সব কিছু হয় না।” কথাটা বলেই দরজার দিকে পা বাড়ালো সে।

“আর আপনি এখান থেকে ফিরে গিয়ে বুঝতে পারবেন, ইটস অ্যা ওয়াইল্ড ওয়ার্ল্ড, মি: বেগ... অ্যান্ড ফানি টু!”

মুচকি হেসে জেফরি বেগ দরজা খুলে বের হতেই শুনতে পেলো পেছন থেকে সিদ্ধিকী সাহেব বলছেন, “এপ্রিল ফুল!”

কথাটার কোনো মানে বুঝলো না ইনভেস্টিগেটর জেফরি বেগ।

নিজের অফিসে এসে লেদার জ্যাকেটের ভেতরের পকেট থেকে মোবাইল ফোনটা বের করে আনলো সে।

সি ই এ সিদ্ধিকীর সাথে তাঁর সমস্ত কথাবার্তা রেকর্ড করেছে জেফরি বেগ। এছাড়া তার আর কোনো উপায়ও ছিলো না। এমন কোনো শক্তিশালী কু তার হাতে নেই যা দিয়ে ক্ষমতাধর সিদ্ধিকী সাহেবকে অভিযুক্ত করা যাবে। সিম অফ না করে রাখলে রেকর্ডিংয়ের মাঝপথে কেউ কল করে বসতে পারে সেজন্যে ভদ্রলোকের অফিসে ঢোকান আগেই সিম অফ করে রেকর্ডিং মুছে দিয়ে রেখেছিলো।

দীর্ঘ সংলাপে জেফরি ইচ্ছে করেই পুরো হত্যাকাণ্ডের ঘটনাটি বিস্তারিত বলে গেছে। তার ফাঁদে পা দিয়ে ভদ্রলোকও এমন অনেক কথা বলে ফেলেছেন যা তার জন্যে কাল হয়ে দাঁড়াবে।

মি: সিদ্ধিকী, আপনি অনেক টাকার মালিক হতে পারেন, হতে পারেন অনেক ক্ষমতাধর ব্যক্তি কিন্তু অতোটা স্মার্ট হয়ে উঠতে পারেন নি! মনে মনে বললো বেগ।

রেকর্ডিং অপশনে গিয়ে কিছুক্ষণ আগে রেকর্ড হওয়া অডিও ফাইলটা পু করে ফোনসেটটা কানের কাছে তুলে ধরলো ইনভেস্টিগেটর।

ঘর্ঘর্... ঘর্ঘর্... ঘর্ঘর্...

অবাক হয়ে মোবাইলটা চোখের সামনে এনে দেখলো ফাইলটার ডিউরেশন মাত্র ৮ সেকেন্ড!

ঘর্ঘর্... ঘর্ঘর্... ঘর্ঘর্...

এটা কি করে সম্ভব!?

সিদ্ধিকী সাহেবের শেষ কথাটার মানে বুঝতে পারলো জেফরি বেগ।

জ্যামার! ইলেক্ট্রনিক ডিভাইস বিকল ক'রে দেবার জন্যে বিভিন্ন ধরনের জ্যামার রয়েছে। কিছু জ্যামার আছে শুধুমাত্র শব্দধারণকে বাধা দিয়ে থাকে। নিরাপত্তা সংস্থাগুলোর পাশাপাশি বড় বড় অনেক ব্যবসায়ীও এ ধরনের জিনিস ব্যবহার ক'রে থাকে ব্ল্যাকমেইল হবার হাত থেকে রক্ষা পাবার জন্যে। সি ই এ সিদ্দিকী সাহেবের অফিসরুমে যে এরকম একটি ডিভাইস আছে সে ব্যাপারে জেফরি বেগ একদম নিশ্চিত।

শুধুমাত্র সিদ্দিকী সাহেবের শেষ কথাটাই রেকর্ড হয়েছে।

এপ্রিল ফুল!?



অধ্যায় ৫৫

রেবার ইয়েলো ক্যাবটা এসে থামলো দোতলা একটি বাড়ির সামনে। রাত দশটা। প্রচণ্ড ঠাণ্ডা পড়েছে। একটা শাল গায়ে জড়িয়ে আস্তে ক'রে গাড়ি থেকে নেমে দোতলা বাড়িটার দিকে পা বাড়ালো সে।

সিঁড়ি দিয়ে উঠে দোতলার যে ফ্ল্যাটের দরজার সামনে এসে দাঁড়ালো সেই ফ্ল্যাটের একটি ডুপ্লিকেট চাবি আছে তার কাছে। অনেক দিন পর আজকে আবার এখানে এসেছে রেবা।

প্রায় এক ঘণ্টা ধরে জেফরির মোবাইলে ফোন করে গেলেও তাকে পায় নি। তার ফোন বন্ধ। অজানা আশংকায় রেবার বুক কেঁপে উঠলেও নিজেকে এই ব'লে সান্ত্বনা দিয়েছে জেফ হয়তো জরুরি কোনো কাজে ব্যস্ত আছে। সাধারণত ইন্টেরোগেশনের সময় সে মোবাইল ফোন বন্ধ রাখে, রেবা সেটা জানে।

অনেক বার ফোন করেও যখন পেলো না তখন আর এখানে না এসে উপায় রইলো না তার।

ভেতরে ঢুকে সুইচ টিপে বাতি জ্বালিয়ে দিলো রেবা।

জেফরির এই দুই রুমের ফ্ল্যাটে অনেক দিন পর এলো। এই কয়েক মাসেই জায়গাটা একটু অপরিচিত ব'লে মনে হচ্ছে তার কাছে। এলোমেলো হয়ে আছে ফ্ল্যাটটা। জেফরি যে মানসিকভাবে বিপর্যস্ত এটা যেনো তারই বর্হিপ্রকাশ। এমনিতে সে খুব গোছানো একজন মানুষ।

এমন সময় দরজার নবে চাবি ঘোরানোর শব্দ শুনে রেবা ছুটে গেলো সেদিকে। জেফরি তাহলে এসে পড়েছে।

দরজাটা খুলতেই দেখতে পেলো এক আগস্ত্রক দাঁড়িয়ে আছে তার সামনে। রেবার চেয়ে তার বিস্ময় কোনো অংশেই কম নয়।

ইনভেস্টিগেটর জেফরি বেগ খুবই নিয়ম-শৃঙ্খলার মধ্যে বেড়ে ওঠা একজন মানুষ। ফাদার জেফরি হোবার্টের কাছ থেকে মা-বাবার স্নেহ পেলেও কঠিন শাসনের মধ্যে থাকতে হয়েছে তাকে। সিগারেট কিংবা মদের প্রতি কখনই তার আকর্ষণ ছিলো না, তবে বন্ধুবান্ধবদের পান্নায় পড়ে বছরে দু'একবার পানাহার

করে। ভার্জিনিয়ায় ট্রেনিং নেবার সময়ও খুব একটা ছুঁয়ে দেখে নি মদ নামক জিনিসটা। তবে আজকে তার মানসিক অবস্থা খুব খারাপ। আজকের মতো এতো ব্যর্থ একটি দিন তার জীবনে আর কখনও আসে নি।

বেশ কয়েক দিন ধরে তার মনমেজাজ ভালো নেই। ভেতরে ভেতরে একটা অস্থিরতা চলছে। যে মেয়ের সাথে দীর্ঘ পাঁচ বছরের সম্পর্ক তার কাবিন হয়ে গেছে কয়েক দিন আগে। এরপর জায়েদ রেহমানের হত্যাকাণ্ডের ঘটনাটি তাকে একেবারে শেষ ক'রে দিয়েছে। পুরোপুরি ব্যর্থ সে।

খুনিকে হাতের নাগালে পেয়েও ধরতে পারে নি। ধূর্ত খুনি তাকে বোকা বানিয়ে সটকে পড়েছে। এরপর তাকে আরেকবার বোকা বানিয়ে এপ্রিল ফুল উপহার দিয়েছেন সি ই এ সিদ্দিকী।

আর সব দিনের মতো হোমিসাইড থেকে সোজা নিজের ফ্ল্যাটে ফিরে গেলো না, একটা বারে গিয়ে আকর্ষণ পান করলো সে। অনেক রাত পর্যন্ত থাকার ইচ্ছে ছিলো কিন্তু সেটা আর সম্ভব হয় নি। বারে বসে পান করতে করতেই তার মনে পড়ে যায় মোবাইল ফোনটা বন্ধ ক'রে রেখেছে। সিদ্দিকী সাহেবের কথা রেকর্ড করার জন্যে সিম অফ ক'রে রেখেছিলো। সঙ্গে সঙ্গে মোবাইল ফোনটা বের করে সিম অন করতেই তিন চারটি এসএমএস এসে জড়ো হলো। সবগুলোই রেবার। প্রথমটা সন্ধ্যার দিকে। শেষ মেসেজটা প্রায় এক ঘণ্টা আগের।

তোমাকে কল ক'রে পাচ্ছি না। দেখা করতে চাই। জরুরি

রেবা আমার সাথে দেখা করতে চাইছে! খুবই বিস্মিত হলো জেফরি বেগ।

আমি তোমার কাছে আসছি

আমার কাছে!

তোমার ফ্ল্যাটে যাচ্ছি। জলদি আসো। পিজ

কি!

সঙ্গে সঙ্গে রেবার মোবাইলে কল করলো কিন্তু তার মোবাইল বন্ধ। উদ্ভিগ্ন হয়ে উঠলো জেফরি বেগ। বার থেকে বের হয়ে একটা ট্যাক্সি ক্যাব নিয়ে রওনা হলো নিজের ফ্ল্যাটের উদ্দেশ্যে। তার মাথায় কিছুই ঢুকছে না। রেবা কেন তার ফ্ল্যাটে আসবে! তার ফোনই বা কেন বন্ধ! মদের নেশায় মাথাটা ঠিকমতো কাজ করছে না। অস্থির হয়ে উঠলো সে। বার বার ক্যাবের ড্রাইভারকে জোরে

চালানোর জন্যে ভাগাদা দিলো পেছনের সিট থেকে ।

বাড়ির সামনে আসতেই দ্রুত ভাড়া মিটিয়ে নিজের ফ্ল্যাটের দিকে টলতে টলতে পা বাড়ালো সে । সিঁড়ি দিয়ে ওঠার সময় একবার হোচটও খেলো । ফ্ল্যাটের দরজায় দরজায় নক করলেও কোনো সাড়া শব্দ পেলো না । রেবা হয়তো ঘুমিয়ে পড়েছে । অগত্যা পকেট থেকে चाबि বের করে দরজা খুলে ভেতরে ঢুকে পড়লো ।

বেডরুমে বাতি জ্বলছে । সেদিকে পা বাড়ালো জেফরি । দরজার কাছে আসতেই এমন একটা দৃশ্য দেখতে পেলো যা কখনই চিন্তা করে নি ।

মাই গড!

বেডরুমে বিছানার প্রান্তে রেবা বসে আছে । চোখেমুখে তীব্র আতঙ্ক । তার ঠিক পেছনেই দাঁড়িয়ে আছে দেবদূতের মতো চেহারার সেই খুনি—জায়েদ রেহমানের হত্যাকারী ।

কিন্তু জেফরি নড়তে পারলো না । তার পা দুটো আড়ষ্ট হয়ে গেছে, কারণ খুনির হাতে যে পিস্তলটি রয়েছে সেটা রেবার মাথার পেছনে তাক করা ।

এই জীবনে নিজেকে এতোটা অসহায় আর কখনই লাগে নি । বেডরুমের দরজার সামনে দাঁড়িয়ে রইলো বেশ কিছুটা সময় । তার মুখ দিয়ে কোনো কথা বেরোলো না ।

“জেফ!” অস্ফুটস্বরে বললো রেবা । ভয়ে কাঁপছে সে ।

তার পেছনে থাকা খুনির চেহারা একদম নির্বিকার । “পিস্তলটা বিছানার উপর রাখো,” আশু ক’রে বললো সে ।

জেফরি বেগ তার জ্যাকেটের ভেতরে হাত দিয়ে শোল্ডার হোলস্টার থেকে নাইন মিলিমিটারের পিস্তলটা বের ক’রে বিছানার উপর রেখে দিলো ।

খুনি এবার অন্য হাত দিয়ে কয়েক পা পেছনে চলে যাবার ইশারা করলো জেফরিকে ।

“মি: জেফরি বেগ, বসুন,” বিছানার অন্যপ্রান্তের দিকে ইশারা ক’রে বললো খুনি ।

তার কথা মতো জেফরি বসলো । রেবাকে আশ্বস্ত ক’রে বললো সে, “ভয় পেয়ো না ।”

“এই লোক কে...জেফ?” কাঁপা কাঁপা গলায় বললো রেবা ।

“তোমাকে পরে সব বলবো । এখন কোনো কথা বোলো না ।”

খুনি তাদের কথাবার্তায় কোনো বাধা না দিয়ে মুচকি হাসলো কেবল । পিস্তলটা এখনও রেবার দিকেই তাক করা ।

“আমাদেরকে মেরে ফেলবে...?”

“না। রেবা,” বললো জেফরি।

“বাস্...এবার চুপ! আর কোনো কথা নয়,” রেবার উদ্দেশ্যে বললো খুনি।

“তুমি কি চাও?” প্রশ্ন করলো জেফরি।

খুনির ঠোঁটে বাঁকা হাসি। “আমি কারো কাছ থেকে কিছু চাই না...দরকার পড়লে আমি নিজেই নিয়ে নিই।”

একটা দীর্ঘশ্বাস বেরিয়ে এলো জেফরির বুক থেকে। “তুমি আমাকে খুন করতে চাও তো...ঠিক আছে। কিন্তু ওকে ছেড়ে দাও।” জেফরির কথা শুনে রেবার চোখ দুটো বিস্ফারিত হবার জোগার হলো। “ওকে কিছু কারো না।”

জেফরির সাথে কথা বলার পর পরই সিদ্দিকী সাহেব নিজের বাড়িতে ফিরে এসেছেন, আজ আর ক্লাবে যান নি।

ড্রইংরুমে বসে আছে অমূল্য বাবু। কিছুক্ষণ আগে এসেছে সে। সিদ্দিকী সাহেবের কাছ থেকে সব শুনে বাবু বললো, “এই ব্যাপারটা নিয়ে আপনাকে আর না ভাবলেও চলবে। ঐ ইনভেস্টিগেটর ভদ্রলোক কিছুই করতে পারবে না। সব ক্রিয়ার ক’রে ফেলা হয়েছে। তবে আমার আশংকা বাস্টার্ড হয়তো তাকে ছেড়ে দেবে না। কিছু আলামত রয়ে গেছে তার কাছে।”

“মানে!?” সিদ্দিকী সাহেব অবাক হয়ে জানতে চাইলেন। “ঐ ইনভেস্টিগেটরকে বাস্টার্ড...মাই গড! আমি আর কোনো খুনখারাবি চাই না। যথেষ্ট হয়েছে।”

“আমরা তো আর তাকে তাকে খুন করতে বলি নি, বাস্টার্ড তার প্রয়োজনে যা করার করবে, আমাদের কিছু করার নেই।”

দু’পাশে মাথা দোলালেন সিদ্দিকী সাহেব। “আমি চাই না ঐ জেফরি বেগ ক্লোকটার কোনো ক্ষতি হোক। বাস্টার্ডকে যেভাবে পারেন থামান।”

অমূল্য বাবুর কপালে ভাঁজ পড়ে গেলো, তবে মুখে কিছু বললো না।

“কী?” সিদ্দিকী সাহেব উদগ্রীব হয়ে জানতে চাইলেন।

“ভাবছি দেরি হয়ে গেলো কিনা...”

“মাই গড...কী বলেন! ওকে এক্ষুণি বলে দিন। জলদি!”

খুনি সম্পর্কে আমাদের মনে যে ধরণের ছবি গঁথে আছে এই বাস্টার্ড নামের খুনির সাথে তার কোনো মিলই নেই। নিষ্পাপ চেহারার এক যুবক। দেখলে মনে হবে বয়স বাড়লেও চেহারাটা রয়ে গেছে ফুটফুটে শিশুর মতোই আর এটাই

ইনভেস্টিগেটর জেফরি বেগের ভয়ের কারণ হয়ে দাঁড়িয়েছে। এই মুহূর্তে জেফরি বেগের অবস্থা খুবই নাজুক। মদের প্রভাবে মাথাটাও ঠিকমতো কাজ করছে না। সে একা থাকলে যেটুকু সুবিধা পেতো এখন রেবার উপস্থিতিতে পুরোপুরি অসহায় হয়ে পড়েছে।

এমন সময় ফোনে রিং হতে লাগলে জেফরি আর খুনি দু'জনেই চমক উঠলো। না। জেফরির নয়, খুনির ফোনটা বাজছে।

খুনি অবাক হয়ে জেফরির পিস্তলটা বিছানা থেকে তুলে নিয়ে নিজের কোমরে গুঁজে পকেট থেকে মোবাইল ফোনটা বের করলো। কলটা রিসিভ করলেও কিছু বললো না সে। কানে চেপে রেখে কিছুক্ষণ শুনে গেলো ওপাশের কথা।

“আপনাদের সাথে আমার ডিল শেষ হয়ে গেছে...” খুনি জেফরির দিকে তাকালো। “আমার সামনেই আছে...আমি খুন করার জন্য টাকা নেই জীবন বাঁচানোর জন্য না...”

জেফরি বুঝতে পারছে ফোনটা সম্ভবত সিদ্ধিকী সাহেব করেছেন।

“...আপনি বুঝতে পারছেন না...আমার নিজের প্রটেকশনের জন্য করতে হচ্ছে এটা...তাই!...হ্যা...তাই!”

জেফরি টের পাচ্ছে তার হৃদস্পন্দন বেড়ে যাচ্ছে। মদের প্রভাবে যেটুকু বিমুনি ভাব চলে এসেছিলো সেটাও উধাও হয়ে গেছে এখন। কিছু একটা করতেই হবে। *এক্ষুণি!*

ফোনে কথা বলতে গিয়ে খুনির হাতে থাকা পিস্তলটি রেবার মাথার পেছন থেকে একটু সরে গেলো। সেটা এখন ছাদের দিকে তাক করা। স্বতঃফূর্ত প্রতিক্রিয়া। ব্যাপারটা খুনির অগোচরেই হয়েছে। *এক্ষুণি!* মনে মনে নিজেকে তাড়া দিলো জেফরি বেগ।

ঠিক তখনই ঘটলো ব্যাপারটা।

আচমকা চারপাশ ঘন অন্ধকারে ডুবে গেলো।

অমূল্য বাবু ফোনটা কানে ধরে রেখেছে, কিছু বলছে না। তার চোখমুখ দেখে সিদ্ধিকী সাহেব চিন্তিত হয়ে পড়লেন।

“কি হয়েছে!?”

কানে ফোন ধরে রেখেই বাবু বললো, “গুলির শব্দ!”

“কি!”

“ধস্তাধস্তির শব্দও হচ্ছে।”

সিদ্দিকী সাহেব অস্থির হয়ে ঘরে পায়চারী করতে লাগলেন ।

অমূল্য বাবু ফোনটা এখনও কানে ধরে শুনে যাচ্ছে । কিছুক্ষণ পর আংকে উঠলো সে ।

“কি হয়েছে?” পায়চারী থামিয়ে জানতে চাইলেন সি ই এ সিদ্দিকী ।

“আরেকটা গুলি!”

জেফরি খুনির দিকে ঝাঁপিয়ে পড়ে তার হাত থেকে পিস্তলটা নিতে উদ্যত হবার আগেই এটা ঘটলো । মুহূর্তেই বুঝে গেলো সে, তবে ফোনে কথা বলতে থাকার কারণে বুঝতে দেরি ক’রে ফেললো খুনি ।

লোডশেডিং!

ভ্যাবাচ্যাকা ঋওয়া খুনি কিছু বুঝে ওঠার আগেই জেফরি বেগ তার উপর ঝাঁপিয়ে পড়ে । তার লক্ষ্য ছিলো একটাই—খুনির পিস্তল ধরে থাকা হাতটি ।

মোবাইল ফোনটা চালু থাকার কারণে অন্ধকারেও খুনির মুখের দিকটা ডিসপ্লের আলোতে স্পষ্ট দেখা যাচ্ছিলো ফলে জেফরির নিশানা একেবারে অব্যর্থ হয় ।

আর্ত চিৎকার দিয়ে ওঠে রেবা । তাকে উদ্দেশ্যে ক’রে জেফরি কেবল একটা কথাই বলতে পেরেছিলো, “রেবা! ঘর থেকে বেরিয়ে যাও!”

খুনির পিস্তল ধরা হাতটির কজি বাম হাতে শক্ত ক’রে ধরে ডান হাতে সজোরে ঘুষি চালায় মাথার বাম দিকে । তারা দু’জনেই বিছানা থেকে হরমুর ক’রে মোঝোতে পড়ে গেলে পিস্তল থেকে একটা গুলি বের হয়ে যায় সঙ্গে সঙ্গে ।

জেফরি বুঝতে পারে রেবা এখনও বিছানার উপর । প্রাণপণে চিৎকার দিয়ে যায় সে ।

“রেবা! ঘর থেকে বেরিয়ে যাও! বেরিয়ে যাও...!”

জেফরির ফ্ল্যাটে অনেকবার এসেছে রেবা, সবকিছুই তার চেনা । ফলে গাঢ় অন্ধকারেও সেখান থেকে বের হতে কোনো অসুবিধা হয় নি । সিঁড়ি দিয়ে যখন নীচে নামছে ঠিক তখনই দ্বিতীয় গুলির শব্দটা শুনতে পায় । থমকে যায় রেবা । বুকটা মোচড় দিয়ে ওঠে তার । বুঝতে পারে না কী করবে । দু’চোখ ঠেলে পানি বের হতে শুরু করে । দৌড়ে বাড়ি থেকে বের হয়ে মেইন রোডে এসে পড়ে । জীবনে এরকম পরিস্থিতিতে পড়ে নি । প্রচণ্ড নার্ভাস হয়ে ছিলো কিন্তু গুলির শব্দটা তাকে বিপর্যস্ত ক’রে ফেলে ।

এমনিতেই জায়গাটা নিরিবিলা, লোডশেডিং চলছে বলে একেবারে ভুতুরে লাগছে, তার উপর পরপর দুটো গুলির শব্দে আশেপাশের লোকজন ভয় পেয়ে বন্ধ করে দিতে শুরু করেছে নিজেদের ঘরের দরজা । অনেকে হয়তো ভাবছে

ডাকাত পড়েছে।

রাস্তাটা পার হয়ে জেফরির ফ্ল্যাটের দিকে তাকালো। বাইরে থেকে ঘুটঘুটে অন্ধকার ছাড়া আর কিছু চোখে পড়ছে না।

ওদিকে অন্ধকারে দু'জন মানুষ নিজেদের সমস্ত শক্তি দিয়ে লড়ে যাচ্ছে একে অন্যকে ঘায়েল করার জন্য।

এখনও পর্যন্ত খুনির হাত থেকে পিস্তলটা ছাড়াতে পারে নি জেফরি বেগ। এক হাতে খুনির পিস্তল ধরা হাতের কজি শক্ত করে ধরে অন্য হাতে ঘুমি মেরেছিলো প্রচণ্ড জোরে তারপরও হাত থেকে পিস্তলটা ছাড়াতে পারে নি। পর পর দুটো গুলি বের হয়ে গেছে অস্ত্র থেকে। দুটোই আঘাত হেনেছে ছাদে।

তারা দু'জন এখন মেঝেতে ধস্তাধস্তি করছে। জেফরি প্রথমে খুনির উপরে থাকলেও দুটো গুলির শব্দে একটু চমকতেই সেই সুবিধাটুকু নিয়ে নিয়েছে খুনি। খপ্ ক'রে জেফরির গলা চেপে ধরলো, এতোটাই জোরে যে জেফরির মনে হলো তার গলাটা বুঝি ছিড়েই ফেলবে।

দম বন্ধ হয়ে আসছে তার। যেভাবেই হোক হাতটা ছাড়াতে হবে নইলে কিছুক্ষণের মধ্যেই নিঃশেষ হয়ে যাবে তার সমস্ত শক্তি। কিন্তু খুনির যে হাতে পিস্তলটা আছে সেটা কোনোভাবেই ছাড়া যাবে না, ছাড়লেই গুলি ক'রে বসবে। আবার যে হাতটা দিয়ে তার গলা ধরে রেখেছে সেটাও একহাতে ছাড়ানো সম্ভব হচ্ছে না।

জেফরি দ্রুত ভাবতে লাগলো। এফবিআই'তে যে কমব্যাট ট্রেনিং নিয়েছিলো তার সবগুলো কৌশলই ভেবে দেখলো সে।

হাটু দিয়ে খুনির তলপেটে একটা আঘাত করলেও কোনো কাজ হলো না, উল্টো খুনি তার গলাটা আরো জোরে চেপে ধরলো।

জেফরি বেগ টের পাচ্ছে তার সমস্ত শক্তি দ্রুত ফুরিয়ে যাচ্ছে। আশ্তে আশ্তে দুর্বল হয়ে আসছে তার হাত-পা।

ঠিক তখনই একটা ব্যাপার মনে পড়ে গেলো তার।

আমার পিস্তলটা!

ডান হাতে খুনির কোমরে গুঁজে থাকা পিস্তলটা এক ঝটকায় হাতে নিয়েই গুলি চালিয়ে বসলো জেফরি বেগ।

একটু আগে তার কাছ থেকে সেটা নিয়ে নিজের কোমরে গুঁজে রেখেছিলো খুনি।

একটা চাপা আতর্নাদ। জাস্তব গোষ্ঠানী!

টের পেলো গুলির আঘাতে খুনি তার কাছ থেকে কিছুটা দূরে ছিটকে পড়েছে

সেই সাথে তার গলাটাও মুক্ত হয়ে গেছে। সঙ্গে সঙ্গে একটু সরে গিয়ে বুক ভরে নিঃশ্বাস নিয়ে নিলো।

খুনির গোঙানী থেমে গেছে এখন। অন্ধকারে কিছুই দেখা যাচ্ছে না। জেফরি বেগ আন্দাজ করার চেষ্টা করলো ঘরের ঠিক কোথায়, কোন্ পর্জিশনে আছে। অন্ধকারে ধস্তাধস্তি করতে গিয়ে খেই হারিয়ে ফেলেছে সে।

বাম হাতে বিছানার প্রান্ত ধরে উঠে বসলো। এখনও হাফাচ্ছে। খুট ক'রে একটা শব্দ হতেই সেদিকে লক্ষ্য ক'রে আরেকটা গুলি চালালো সে।

বিস্ফোরণের আওনে ক্ষণিকের জন্যে ঘরের সেই অংশটুকু দেখতে পেলো খুবই অল্প সময়ের জন্যে কিন্তু স্পষ্ট দেখতে পেয়েছে মেঝের সেই জায়গাটি খালি। ওখানে কেউ নেই!

মাই গড! ওখানেই তো খুনি ছিলো! তাহলে গেলো কোথায়?

গায়ের সমস্ত পশম দাঁড়িয়ে গেলো তার। আর সময় নষ্ট না ক'রে অন্ধকারে ছুটে গেলো দরজার দিকে। একটু আগে রেবা বের হয়ে গেছে ফলে দরজাটা খোলাই ছিলো।

কতো দ্রুত সিঁড়ি দিয়ে নীচে নেমে এলো ধারণাও করতে পারলো না জেফরি। নিজের ফ্ল্যাট ছেড়ে প্রাণপণে দৌড়ে চলে এলো মেইন রোডে। খুনিকে কোনো সুযোগ দেয়ার প্রশ্নই ওঠে না। সে জানে তার কাছেও একটি পিস্তল আছে।

“রেবা! রেবা!” চিৎকার ক'রে ডাকতে লাগলো সে। অন্ধকার রাস্তায় কাউকে দেখা যাচ্ছে না তবে সে জানে রেবা অনেক আগেই তার ঘর থেকে বের হয়ে গেছে। “রেবা!”

রাস্তার ডান দিকের ফুটপাথে একটি অবয়ব দেখতে পেলো সে।

“রেবা!”

হঠাৎ চারপাশ আলোকিত হয়ে উঠলো। লোডশেডিংয়ের সমাপ্তি হয়েছে।

তার সামনে দাঁড়িয়ে আছে রেবা, ভয়ে কাঁপছে। তার দু'চোখ বেয়ে পানি গড়িয়ে পড়ছে। জেফরিকে দেখামাত্রই দৌড়ে ছুটে এলো। কাঁপিয়ে পড়লো তার বুকো। কিছুই বলতে পারলো না শুধু জড়িয়ে ধরে কেঁদে চললো কিছুক্ষণ।

এই জীবনে এতোটা প্রশস্তি পায় নি জেফরি বেগ। তার কাছে মনে হলো এক মুহূর্তে সে হারানো সব কিছু ফিরে পেয়েছে।



একটি খুনের ব্যবচ্ছেদ

ভিটা নুভার দাড়াইয়ান মহব্বত সেন্দ্রি বক্সে বসে আছে। ঘড়ির দিকে তাকালো সে। ৬টা বাজতে ১০ মিনিট বাকি। তার ডিউটি শেষ হবে ঠিক ছ'টায়। গেট দিয়ে এক লোককে ঢুকতে দেখে সেন্দ্রি বক্স থেকে বেরিয়ে এলো।

“কই যাইবেন?”

লোকটার হাতে খাকি ব্যাগ। একটা কার্ড বের ক'রে দেখালো সে। “টাওয়ারে যাবো।”

মহব্বত আইডিকার্ডটা দেখে কোনো কিছু না বলে ফেরত দিয়ে দিলে লোকটা পাকির্হ এরিয়ার লিফটের দিকে পা বাড়ালো।

ভিটা নুভার নাইটগার্ড আসলাম ডিউটিতে এলো দশ মিনিট পর। রাত থেকে ভোর পর্যন্ত সে-ই ডিউটি করবে। ছুটি পেয়ে নিজের ঘরে ফিরে গেলো মহব্বত।

রাত দুটো বাজে।

পূর্ণিমার আলোয় চারপাশটা অদ্ভুত সুন্দর দেখাচ্ছে। ভিটা নুভার ছয়তলার ছাদের সেলফোনের টাওয়ারের উপর থেকে কালো ফুলহাতা হাইনেক গেঞ্জি, কালো প্যান্ট আর মাথায় ক্যাপ পরা এক লোক নেমে এলো নিঃশব্দে। তার হাতে একটি খাকি ব্যাগ।

ছাদের দক্ষিণ দিকে এসে নীচের দিকে তাকালো সে, রাস্তাটা একেবারে ফাঁকা। ব্যাগ থেকে বারো-তেরো ফুটের একটি দড়ি বের করে ছাদের রেলিংয়ের সাথে বেধে নিলো লোকটি। তার ঠিক নীচেই একটা বেলকনি। অন্যসব ফ্ল্যাটের মতো শেড কিংবা গ্রিল দিয়ে সুরক্ষিত করা নেই। মুচকি হাসলো সে। এই ভবনের স্থপতিকে মনে মনে ধন্যবাদ দিলো। নিরাপত্তাকে ছাপিয়ে গেছে সৌন্দর্য!

দড়ি বেয়ে আস্তে ক'রে নেমে গেলো সেই বেলকনিতে।

বেলকনির স্লাইডিং ডোরটা একটু ফাঁক করাই আছে। সিনথেটিক গ্লাভ পরা হাত দিয়ে সেটা আরেকটু সরিয়ে ঢুকে পড়লো ঘরের ভেতর।

অন্ধকার ঘরে মেডিক্যাল বেডে একজন শুয়ে আছে। বেলকনির স্লাইডিং

ডোর দিয়ে আসা জ্যোৎস্নার মৃদু আলো ঢুকে পড়েছে ঘরে, চারপাশটা দেখে নিয়ে পা টিপে টিপে বেডের কাছে গিয়ে থামলো সে ।

এই ঘরে এর আগেও এসেছিলো, কয়েক দিন আগে, অন্য এক পরিচয়ে ।

বেডের পাশে কফি টেবিলের উপর রাখা ল্যাপটপটির দিকে তাকালো । চালু অবস্থায়ই আছে । টাচপ্যাডে আঙুল ছোঁয়াতেই পর্দায় ভেসে উঠলো ইয়াহ মেইলের হোমপেজ । আরেকবার মুচকি হাসলো সে । তার কাজটা সহজ হয়ে গেলো । তার মানে তাকে আর জোর ক’রে অসুস্থ লোকটার কাছ থেকে মেইল একাউন্টের পাসওয়ার্ড নিতে হবে না ।

বেডে শুয়ে থাকা লোকটির দিকে তাকালো । তার দু’চোখ খোলা ।

“কে?” ফ্যাসফ্যাসে কণ্ঠে অসুস্থ লোকটি বললো ।

কালো পোশাকের লোকটি একটুও চমকালো না । তার নার্ভ বেশ শক্ত । অপেক্ষা করলো সে । তার হাতে অনেক সময় আছে, তাড়াহুড়ার কোনো দরকার নেই । অসুস্থ লোকটি আর কিছু বলছে না । আরেকটু সময় নিলো সে, তারপর বেডের কাছে গিয়ে একহাতে অসুস্থ লোকটার মুখ চেপে ধরে তার বুকের বাম পাশে সজোরে ঘুমি চালালো ।

পর পর তিনটি ।

শেষে কঁনুই দিয়ে প্রচণ্ড জোরে ঘৃণার সাথে আরেকটা আঘাত করলো সে । এরকম অর্থব লোককে খুন করার মতো কাপুরুষ নয় সে । তাকে যখন এই খুনের লোভনীয় প্রস্তাব দেয়া হয়েছিলো সঙ্গে সঙ্গে প্রত্যাখ্যান করেছিলো কিন্তু সব ঘটনা শুনে অবশেষে রাজি হয় । তার নিয়োগকর্তারা অবশ্য এসবের কিছুই জানে না । যারা শিশুদের উপর যৌননিপীড়ন চালায় তাদেরকে মনেপ্রাণে ঘৃণা করে সে । অনেক আগে, শৈশবে তার সাথেও এরকমটি করার চেষ্টা করেছিলো আরেকজন বিকৃত লোক । তার পরিণাম এই লোকটার চেয়েও খারাপ হয়েছিলো ।

অসুস্থ লোকটার মুখ থেকে হাত সরিয়ে দেখলো, সে নিশ্চিত কিছুক্ষণের মধ্যেই মৃত্যু হবে । কিন্তু তাকে বিস্মিত ক’রে লোকটা আচমকা চোখ খুলে যন্ত্রণাকাতর কণ্ঠে বললো “...আমাকে ক্ষমা করে দিও!”

চমকে উঠলো খুনি । তবে তাকে কিছু করতে হলো না, লেখক মৃত্যুর কোলে ঢলে পড়ছে । লেখকের মাথার নীচ থেকে বালিশটা নিয়ে মুখের উপর রেখে দিলো সে ।

পকেট থেকে একটা পেনড্রাইভ বের করে ল্যাপটপের কাছে গেলো সে । পুরো কাজটা করতে মাত্র দশ মিনিট সময় লাগলো ।

বেলকনিতে এসে নীচের রাস্তার দিকে তাকাতেই তার চোখ আঁটকে গেলো একটা দৃশ্য দেখে, বসে পড়লো সঙ্গে সঙ্গে ।

রাস্তার ফুটপাথ থেকে এক ছেলে দাঁড়িয়ে দাঁড়িয়ে বেলকনিটা দেখছে!

একটু ভড়কে গেলো খুনি। কিছুক্ষণ বসে থেকে বেলকনির রোঁধাং দিয়ে উঁকি মেরে দেখলো ছেলেটা এখনও বেলকনির দিকেই তাকিয়ে আছে।

নীচু হয়ে বসে আরেকটু অপেক্ষা করলো সে। কিছুক্ষণ পর রাস্তা থেকে হৈহল্লার শব্দ শুনে আবারো উঁকি মেরে দেখতেই গায়ে কাটা দিয়ে উঠলো।

পুলিশ!

ছেলেটি প্রাণপনে দৌড়াচ্ছে, তার পেছনে একটি পুলিশ জিপ।

জিপটি দৃষ্টিসীমার বাইরে চলে গেলে খুনি আর দেরি করলো না, দড়ি বেয়ে বেলকনি থেকে আবার উঠে পড়লো ছাদে।

দড়িটা খুলে ব্যাগে ভরে নিয়ে টাওয়ারের উপর গিয়ে অপেক্ষা করতে লাগলো সে। এরপর ভিটা নুভার নীচে পুলিশের আগমন আর টের পায় নি। ফজরের আজানের জন্যে অপেক্ষা করতে লাগলো খুনি।


আজান হতেই টাওয়ার থেকে নেমে এলো, খাকি ব্যাগ থেকে একটা পাজামা আর পাঞ্জাবি বের করে পোশাক পাল্টে বাকি পোশাক আর দড়ির গোছাটা ব্যাগে ভরে নিলো সে। ছাদের উত্তর দিকে গিয়ে আশ্তে ক'রে নীচে ফেলে দিলো ব্যাগটা। এই ভবনের উত্তর অংশে একটা লেক চলে গেছে। ব্যাগটা গিয়ে পড়লো লেকের পাশে থাকা সারি সারি গাছের নীচে।

তারপর ছাদ থেকে সিঁড়ি দিয়ে সোজা চার তলায় এসে অপেক্ষা করলো হানিফ সাহেবের জন্যে। দীর্ঘ দিন পর্যবেক্ষণ করে সে জানে এই ভদ্রলোক এখনই ফজরের নামাজ পড়তে বের হবে। তিনতলার একটি ফ্ল্যাটে দরজা খোলার শব্দ হতেই সে সজাগ হয়ে উঠলো। বুঝতে পারলো হানিফ সাহেব বের হচ্ছে। ভদ্রলোক লিফটে ঢোকান পর পরই দ্রুত সিঁড়ি ভেঙে নীচে নেমে গেলো সে।

হানিফ সাহেব যখন লিফট থেকে বের হয়ে পার্কিং এরিয়া দিয়ে মেইনগেটের দিকে এগোতে লাগলো খুনি তার পিছু নিলো। সদ্য ঘুম থেকে ওঠা হানিফ সাহেব অবশ্য টের পেলো না তার পেছনে আরেকজন আছে। টের পেলোও কোনো সমস্যা হতো না। ভদ্রলোক মনে করতো অন্য কোনো ফ্ল্যাটের গেস্ট হয়তো।

নাইটগার্ড ছেলেটি হানিফ সাহেবকে দেখেই সালাম দিয়ে মেইনগেটটা খুলে দিলো। খুনি নাইটগার্ডের দিকে তাকালো না, যেনো হানিফ সাহেবের সাথে সাথে সেও নামাজ পড়তে যাচ্ছে এরকম একটি ভান করে বের হয়ে গেলো ভিটা নুভা থেকে।

অ্যাপার্টমেন্ট থেকে বেরিয়ে লেকের যে জায়গায় ব্যাগটি ফেলে দিয়েছিলো সেটা তুলে নিতেই শুনতে পেলো পুলিশের গাড়ি এসে মেইন গেটের সামনে থেমেছে। আর দেরি না করে লেকের ওয়াকওয়ে ধরে চলে গেলো খুনি।



উপসংহার

বাস্টার্ড নামের খুনির ব্যাপারটা বেশ রহস্যজনক। এটা নিশ্চিত গুলিবিদ্ধ হওয়ার পরও জেফরির আগেই ঘর থেকে বের হয়ে যেতে সক্ষম হয়েছে সে, কারণ এরপর পুলিশ এসে ঘরে কাউকে খুঁজে পায় নি। সবচেয়ে বড় কথা কোনো রক্তপাতের চিহ্ন পর্যন্ত নেই। পুলিশের ধারণা খুনিকে গুলি করতে ব্যর্থ হয়েছে জেফরি, কিন্তু সেটা অসম্ভব। খুনির তলপেটে পিস্তল ঠেকিয়ে গুলি করেছে সে।

তবে জেফরি এ ঘটনায় একটা ব্যাখ্যা দাঁড় করিয়েছে খুনি সম্ভবত বুলেটপ্রফ্‌ ভেস্ট পরে ছিলো। গুলির আঘাতে একটু আহত হয়, তারপর গড়িয়ে বিছানার নীচে চলে যাবার সময় দ্বিতীয় গুলিটা করে জেফরি। আর ঘর থেকে সে বেরিয়ে যাবার ঠিক আগেই খুনি সেখান থেকে সটকে পড়ে।

জেফরিকে গুলি করার মোক্ষম সুযোগ পেয়েও তাকে গুলি করলো না কেন? সম্ভবত ফোনে সিদ্ধিকী সাহেবের শেষ নির্দেশ মেনে খুনি এ কাজ করে নি। পুরো ঘটনায় জেফরির একটাই প্রাপ্তি-রেবা!

রেবা তার কাছে ফিরে এসেছে। বাবা-মা'র মুখের দিকে তাকিয়ে সব মেনে নিয়ে প্রবাসী এক পাত্রকে বিয়ে করার জন্যে রাজি হয়েছিলো সে। কাবিন করে ছেলে চলে যাবে কানাডায় তারপর কয়েক মাস পর ফিরে এসে বিয়ের অনুষ্ঠান করে রেবাকে সঙ্গে করে নিয়ে যাবে। কিন্তু কাবিনের দিন যতোই ঘনিয়ে আসতে লাগে রেবার মধ্যে দ্বিধাদ্বন্দ্ব ততোই বাড়তে থাকে। শেষ পর্যন্ত কাবিনের আগের দিন রাতে নিজেকে আর ঠিক রাখতে পারে নি।

একটা ভয় জেঁকে বসে তার মধ্যে-জেফরিকে হারানোর ভয়। এক অচেনা মানুষের সাথে সারাজীবন কাটানোর ভয়। সাহস করে মুখোমুখি হয় বাবার। স্পষ্ট বলে দেয় তার পক্ষে এ বিয়ে করা সম্ভব নয়। পরিবারের কেউই তাকে বোঝাতে পারে নি। নিজের সিদ্ধান্তে অটল থাকে সে। ভেঙে দেয়া হয় বিয়ে।

এ ঘটনার পর থেকে নিজের পরিবারে অপাংক্তেয় হয়ে পড়ে সে। গুমোট পরিবেশে একটা সপ্তাহ কাটিয়ে দেয়। নিজের বাবা-মা, ভাই-বোন সবাই তার সঙ্গে শীতল আচরণ করতে শুরু করে। দম বন্ধ হয়ে আসে তার। সিদ্ধান্ত নেয় জেফরির কাছে ফিরে যাবে। বাড়ি থেকে বের হয়ে সোজা চলে আসে তার ফ্ল্যাটে।

জেফরি বেগ এখন জায়েদ রেহমান হত্যাকাণ্ডের পুরো ঘটনাটা জানতে পেরেছে কিন্তু তার করার কিছুই নেই। এই ঘটনাটি সে কোনোভাবেই আইনে প্রমাণ করতে পারবে না। তবে তার মনে ক্ষীণ আশা সিদ্ধিকী সাহেব হয়তো মিসেস রেহমান আর আলম শফিককে নির্দোষ প্রমাণ করার ব্যবস্থা নেবেন।

কিন্তু সাংবাদিক পাভেল আহমেদের খুন এবং সেই ইন্টারভিউটি একেবারেই আড়ালে চলে গেছে। কেউ জানে না লেখক জায়েদ রেহমানের হত্যাকাণ্ডের সাথে পাভেল আহমেদের হত্যার যোগসূত্র রয়েছে। অন্য অনেকের মতো এ ব্যাপারে জেফরির কোনো ধরাণাই নেই।

পাভেল লেখক জায়েদ রেহমানের যে ইন্টারভিউটি নিয়েছিলো সেটাকে ছোট্ট একটি ঘটনা ছিলো সদ্য স্ট্রোকে আক্রান্ত লেখক মানসিকভাবে একটু ভারসাম্যহীন ছিলো বলে ইন্টারভিউয়ের এক পর্যায়ে অসংলগ্নভাবে বলে ফেলেন, তিনি আশংকা করছেন বিশিষ্ট ব্যবসায়ী এবং শিল্পপতি সি ই এ সিদ্ধিকী তার ক্ষতি করতে পারেন।

সাংবাদিক পাভেল আহমেদ অনেক কষ্টে এই ইন্টারভিউটা নিতে পেরেছিলো। মিসেস রেহমান একজন মিডিয়া সেলিব্রিটি হওয়াতে পাভেলের সাথে তার পরিচয় ছিলো, ঐ ভদ্রমহিলাই তাকে ইন্টারভিউ নেবার সুযোগ ক'রে দেয়। তবে বিশাল অঙ্কের বিজ্ঞাপন হারানো এবং মানহানি মামলার ভয়ে সি ই এ সিদ্ধিকীর মতো বিজনেস টাইকুনের বিরুদ্ধে বলা এরকম অসংলগ্ন কথা প্রচারের ঝুঁকি নিতে চায় নি কেউ।

বিগত এক সপ্তাহ ধরে রেবা জেফরির সাথেই আছে। খুব শীঘ্রই বিয়ে করার জন্য তাগাদা দিচ্ছে রেবা তবে জেফরি তাকে বলেছে এভাবে এক ছাদের নীচে থাকতে তার ভালোই লাগছে। রেবা অবশ্য স্পষ্ট করে বলে দিয়েছে তাকে যতো দ্রুত সম্ভব মিসেস বেগ করার ব্যবস্থা নিতে হবে। রেবার বাবা অবশ্য জেফরির সাথে যোগাযোগ করে তার সাথে দেখা করার জন্য বলেছিলো, তবে এখন পর্যন্ত জেফরির সে রকম কোনো ইচ্ছে নেই।

দু'দিন ধরে শৈত্যপ্রবাহ চলছে। গতকাল জগিং করা হয় নি, রেবার সাথে সারাটা সকাল বিছানায় গল্পগুজব ক'রে কাটিয়ে দিয়েছে। তবে আজকে আর সেটা করে নি, প্রবল শৈত্যের মধ্যেও চলে এসেছে। রেবা অবশ্য বলেছিলো এই ঠাণ্ডার মধ্যে জগিং না করলেও চলবে কিন্তু জেফরি তার কথা শোনে নি। এক দিন জগিং না করলেই তার শরীর ম্যাজ ম্যাজ করে।

প্রায় বিশ মিনিটের মতো জগিং করার পর একটু ঘেমে উঠলো জেফরি বেগ। ধানমণ্ডি লেকের পাশ দিয়ে ছোট্ট একটা ওয়াকওয়ে ধরে আস্তে আস্তে দৌড়াচ্ছে। সামনের তিন-চার গজ দূরের দৃশ্য পর্যন্ত দেখা যাচ্ছে না। প্রচণ্ড ঠাণ্ডা পড়েছে বলে জগারের সংখ্যা নেমে এসেছে শূন্যের কোঠায়।

হঠাৎ সে টের পেলো তার পেছনে আরেকজন জগার আছে। জগিংরত অবস্থায়ই ঘাড় ঘুরিয়ে পেছনে তাকিয়ে দেখলেও প্রচণ্ড কুয়াশার কারণে লোকটার চেহারা দেখতে পেলো না। তার থেকে দশ-পনেরো গজ দূরে হবে, মাথায় হুড দেয়া একটি ট্র্যাকসুট পড়ে আছে, শুধু এটুকুই বুঝতে পারলো।

কিছু দূর যাওয়ার পর টের পেলো পেছনের লোকটা তার খুব কাছে এসে পড়েছে। অজানা এক আশংকায় তার শরীরের সমস্ত পশম দাঁড়িয়ে গেলো। ঘাড় ঘুরিয়ে না দেখে দৌড়ানোর গতি আরেকটু বাড়িয়ে দিলো সে। পেছন থেকে নিঃশ্বাসের যে শব্দ শুনতে পাচ্ছে তাতে মনে হচ্ছে লোকটাও গতি বাড়িয়ে তার খুব কাছে চলে এসেছে।

ঘাড় ঘুরিয়ে দেখতে যাবে তার আগেই পেছন থেকে লোকটা তার গতি বাড়িয়ে জেফরিকে অতিক্রম ক'রে চলে গেলো সামনের ঘন কুয়াশার মধ্যে। হাফ ছেড়ে বাঁচলো সে। খামোখাই আশংকা করেছিলো।

মুচকি হেসে নতুন উদ্যমে দৌড়াতে শুরু করলো জেফরি। প্রায় পঞ্চাশ গজ এগোবার পরই ওয়াকওয়ে'তে একটা এনভেলপ পড়ে থাকতে দেখে থেমে গেলো সে। বুঝতে পারলো এনভেলপটি এইমাত্র এখানে ফেলে দিয়ে গেছে কেউ।

বাস্টার্ড!?

চারপাশে তাকিয়ে দেখলো কেউ নেই। জেফরির হৃদস্পন্দন বেড়ে গেলো সঙ্গে সঙ্গে। এনভেলপটি তুলে নিয়ে আবারো চারদিকে তাকালো। উপরে সুন্দর ক'রে লেখা আছে : জেফরি বেগ

এনভেলপ খুলে দেখতে পেলো ভেতরে ছোট্ট একটি চিরকুট আর দলা পাকানো একটি ধাতব বস্তু। স্লগ! ব্যবহৃত বুলেট। চিরকুটটা খুলে পড়লো

তোমার বুলেট তোমাকে ফিরিয়ে দিলাম! অযাচিত উপহার আমি গ্রহণ করি না।

আমাকে নিয়ে ভয় পাবার কিছু নেই। তুমি তোমার মতো জীবন যাপন করো, আমি আমার মতো।

তোমার সাথে দেখা করার কোনো ইচ্ছে আমার নেই।

তুমিও সেরকম কোনো ইচ্ছে পোষণ করো না।


তোমার বিয়ের অর্থীম শুভেচ্ছা রইলো।

বুলেটটা হাতে নিয়ে কিছুক্ষণ তাকিয়ে রইলো জেফরি বেগ তারপর ছুড়ে মারলো লেকের ঘোলা পানিতে ।

জায়েদ রেহমানের হত্যাকাণ্ডের পুরো ঘটনাটি সে কোনো দিনই প্রমাণ করতে পারবে না । কাউকে বললেও বিশ্বাস করবে না বিশিষ্ট ব্যবসায়ী-শিল্পপতি সি ই এ সিদ্দিকী তার ছেলের প্রতি অন্যায়ের প্রতিশোধ নিতে একজন জনপ্রিয় লেখককে খুন করিয়েছেন ।

অবশ্য সে যদি লেখক হতো এই ঘটনাটি নিয়ে একটা বই লিখতে পারতো ।

এই প্রথম জেফরি বেগ লেখকদের একটু ঈর্ষা করলো ।



নেমেসিস

পক্ষাঘাতগ্রস্ত অবস্থায় দেশের স্বচর্চাইতে জনপ্রিয় লেখক খুন হলেন নিজের অ্যাপার্টমেন্টে। সিটি হোমিসাইড ইনভেস্টিগেটর জেফরি বেগ বিস্ময়কর দ্রুততায় ধরে ফেললো সম্ভাব্য খুনিকে... তারপরই ঘটনা মোড় নিতে থাকে ভিন্দিকে। শেষপর্যন্ত জেফরি বেগ যা জানতে পারে সেটা একেবারেই অচিন্তনীয়।

নেমেসিস-একটি প্রতিশোধ-টানটান উত্তেজনার একটি থ্রিলার।

বইয়ের আলোয় আলোকিত হোন...

ISBN 984-8659-20-X



9 789847 020891 >



Aohor Arsalan HQ Release

**Please Buy The Hard Copy if You
Like this Book!!**